

十三經

商務印書館發行

周易

三三乾元亨利貞初九潛龍勿用九二見龍在田利見大人九三君子終日乾乾夕惕若厲无咎九四或躍在淵无咎九五飛龍在天利見大人上九亢龍有悔用九見羣龍无首吉彖曰大哉乾元萬物資始乃統天雲行雨施品物流形大明終始六位時成時乘六龍以御天乾道變化各正性命保合大和乃利貞首出庶物萬國咸寧象曰天行健君子以自強不息潛龍勿用陽在下也見龍在田德施普也終日乾乾反復道也或躍在淵進无咎也飛龍在天大人造也亢龍有悔盈不可久也用况天德不可爲首也文言曰元者善之長也亨者嘉之會也利者義之和也貞者事之幹也君子體仁足以長人嘉會足以合禮利物足以和義貞固足以幹事君子行此四德者故曰乾元亨利貞初九曰潛龍勿用何謂也子曰龍德而隱者也不易乎世不成乎名遯世无悶不見是而无悶樂則行之憂則違之確乎其不可拔潛龍也九二曰見龍在田利見大人何謂也子曰龍德而正中者也庸言之信庸行之謹閑邪存其誠善世而不伐德博而化易曰見龍在田利見大人君德也九三曰君子終日乾

乾夕惕若厲无咎何謂也子曰君子進德脩業忠信所以進德也脩辭立其誠所以居業也知至至之可與幾也知終終之可與存義也是故居上位而不驕在下位而不憂故乾乾因其時而惕離危无咎矣九四曰或躍在淵无咎何謂也子曰上下无常非爲邪也進退无恆非離羣也君子進德脩業欲及時也故无咎九五曰飛龍在天利見大人何謂也子曰同聲相應同氣相求水流溼火就燥雲從龍風從虎聖人作而萬物覩本乎天者親上本乎地者親下則各從其類也上九曰亢龍有悔何謂也子曰貴而无位高而无民賢人在下位而无輔是以動而有悔也潛龍勿用下也見龍在田時舍也終日乾乾行事也或躍在淵自試也飛龍在天上治也亢龍有悔窮之災也乾元用九天下治也潛龍勿用陽氣潛藏見龍在田天下文明終日乾乾與時偕行或躍在淵乾道乃革飛龍在天乃位乎天德亢龍有悔與時偕極乾元用九乃見天則乾元者始而亨者也利貞者性情也乾始能以美利利天下不言所利大矣哉大哉乾乎剛健中正純粹精也六爻發揮旁通情也時乘六龍以御天也雲行雨施天下平也君子以成德爲行日可見之行也潛之爲言也隱而未見行而未

成是以君子弗用也君子學以聚之問以辯之寬以居之仁以行之易曰見龍在田利見大人君德也九三重剛而不中上不在天下不在田故乾乾因其時而惕雖危无咎矣九四重剛而不中上不在天下不在田中不在人故或之或之者疑之也故无咎夫大人者與天地合其德與日月合其明與四時合其序與鬼神合其吉凶先天而天弗違後天而奉天時天且弗違而況於人乎況於鬼神乎亢之爲言也知進而不知退知存而不知亡知得而不知喪其唯聖人乎知進退存亡而不失其正者其唯聖人乎

三三坤元亨利牝馬之貞君子有攸往先迷後得主利西南得朋東北喪朋安貞吉彖曰至哉坤元萬物資生乃順承天坤厚載物德合无疆含弘先大品物咸亨牝馬地類行地无疆柔順利貞君子攸行先迷失道後順得常四南得朋乃與類行東北喪朋乃終有慶安貞之吉應地无疆象曰地勢坤君子以厚德載物初六履霜堅冰至象曰履霜堅冰陰始凝也馴致其道至堅冰也六二直方大不習无不利象曰六二之動直以方也不習无不利地道光也六三含章可貞或從王事无成有終象曰

含章可貞以時發也或從王事知光大也六四括囊无咎无譽象曰括囊无咎慎不害也六五黃裳元吉象曰黃裳元吉文在中也上六龍戰于野其血玄黃象曰龍戰于野其道窮也用六利永貞象曰用六永貞以大終也文言曰坤至柔而動也剛至靜而德方後得主而有常含萬物而化光坤道其順乎承天而時行積善之家必有余慶積不善之家必有余殃臣弑其君子弑其父非一朝一夕之故其所由來者漸矣由辯之不早辯也易曰履霜堅冰至蓋言順也直其正也方其義也君子敬以直內義以方外敬義立而德不孤直方大不習无不利則不疑其所行也陰雖有美含之以從王事弗敢成也地道也妻道也臣道也地道無成而代有終也天地變化草木蕃天地閉賢人隱易曰括囊无咎无譽蓋言謹也君子黃中通理正位居體美在其中而暢於四支發於事業美之至也陰疑於陽必戰爲其嫌於无陽也故稱龍焉猶未離其類也故稱血焉夫玄黃者天地之雜也天玄而地黃

三三屯元亨利貞勿用有攸往利建侯彖曰屯剛柔始交而難生動乎險中大亨貞雷雨之動滿盈天造草昧宜建侯而不寧象曰雲雷屯君子以經綸初九磐桓利居

貞利建侯象曰雖磐桓志行正也以貴下賤大得民也六二屯如遭如乘馬班如匪寇婚媾女子貞不字十年乃字象曰六二之難乘剛也十年乃字反常也六三卽鹿無虞惟入于林中君子幾不如舍往吝象曰卽鹿无虞以從禽也君子舍之往吝窮也六四乘馬班如求婚媾往吉无不利象曰求而往明也九五屯其膏小貞吉大貞凶象曰屯其膏施未光也上六乘馬班如泣血漣如象曰泣血漣如何可長也

三三蒙亨匪我求童蒙童蒙求我初筮告再三瀆瀆則不告利貞彖曰蒙山下有險險而止蒙蒙亨以亨行時中也匪我求童蒙童蒙求我志應也初筮舍以剛中也再三瀆瀆則不告瀆蒙也蒙以養正聖功也象曰山下出泉蒙君子以果行育德初六發蒙利用刑人用說桎梏以往吝象曰利用刑人以正法也九二包蒙吉納婦吉子克家象曰子克家剛柔節也六三勿用取女見金夫不有躬无攸利象曰勿用取女行不順也六四困蒙吝象曰困蒙之吝獨遠實也六五童蒙吉象曰童蒙之吉順以巽也上九擊蒙不利爲寇利禦寇象曰利用禦寇上下順也

三三需有孚光亨貞吉利涉大川彖曰需須也險在前也剛健而不陷其義不困窮

矣需有孚光亨貞吉位乎天位以正中也利涉大川往有功也象曰雲上於天需君子以飲食宴樂初九需于郊利用恆无咎象曰需于郊不犯難行也利用恆无咎未失常也九二需于沙小有言終吉象曰需于沙衍在中也雖小有言以終吉也九三需于泥致寇至象曰需于泥災在外也自我致寇敬慎不敗也六四需于血出自穴象曰需于血順以聽也九五需于酒食貞吉象曰酒食貞吉以中正也上六入于穴有不速之客三人來敬之終吉象曰不速之客來敬之終吉雖不當位未大失也

三三訟有孚窒惕中吉終凶利見大人不利涉大川彖曰訟上剛下險險而健訟訟有孚窒惕中吉剛來而得中也終凶訟不可成也利見大人尙中正也不利涉大川入于淵也象曰天與水違行訟君子以作事謀始初六不永所事小有言終吉象曰不永所事訟不可長也雖小有言其辯明也九二不克訟歸而逋其邑人三百戶无眚象曰不克訟歸逋竄也自下訟上患至掇也六三食舊德貞厲終吉或從王事无成象曰食舊德從上吉也九四不克訟復即命渝安貞吉象曰復即命渝安貞不失也九五訟元吉象曰訟元吉以中正也上九或錫之鞶帶終朝三褫之象曰以訟受

服亦不足敬也

三三師貞丈人吉无咎象曰師衆也貞正也能以衆正可以王矣剛中而應行險而順以此毒天下而民從之吉又何咎矣象曰地中有水師君子以容民畜衆初六師出以律否臧凶象曰師出以律失律凶也九二在師中吉无咎王三錫命象曰在師中吉承天寵也王三錫命懷萬邦也六三師或輿尸凶象曰師或輿尸大无功也六四師左次无咎象曰左次无咎未失常也六五田有禽利執言无咎長子帥師弟子輿尸貞凶象曰長子帥師以中行也弟子輿尸使不當也上六大君有命開國承家小人勿用象曰大君有命以正功也小人勿用必亂邦也

三三比吉原筮元永貞无咎不寧方來後夫凶象曰比吉也比輔也下順從也原筮元永貞无咎以剛中也

不寧方來上下應也後夫凶其道窮也象曰地上有水比先王以建萬國親諸侯初六有孚比之无咎有孚盈缶終來有它吉象曰比之初六有它吉也六二比之自內貞吉象曰比之自內不自失也六三比之匪人象曰比之匪人不亦傷乎六四外比之貞吉象曰外比於賢以從上也九五顯比王用三驅失前

禽邑人不誠吉象曰顯比之吉位正中也舍逆取順失前禽也邑人不誠上使中也上六比之无首凶象曰比之无首无所終也

三三小畜亨密雲不雨自我西郊彖曰小畜柔得位而上下應之曰小畜健而巽剛中而志行乃亨密雲不雨尙往也自我西郊施未行也象曰風行天上小畜君子以懿文德初九復自道何其咎吉象曰復自道其義吉也九二牽復吉象曰牽復在中亦不自失也九三輿說輻夫妻反目象曰夫妻反目不能正室也六四有孚血去惕出无咎象曰有孚惕出上合志也九五有孚攣如富以其鄰象曰有孚攣如不獨富也上九既雨既處尙德載婦貞厲月幾望君子征凶象曰既雨既處德積載也君子征凶有所疑也

三三履虎尾不咥人亨彖曰履柔履剛也說而應乎乾是以履虎尾不咥人亨剛中正履帝位而不疚光明也象曰上天下澤履君子以辯上下定民志初九素履往无咎象曰素履之往獨行願也九二履道坦坦幽人貞吉象曰幽人貞吉中不自亂也六三眇能視跛能履履虎尾咥人凶武人爲于大君象曰眇能視不足以有明也跛

能履不足以與行也。咥人之凶位不當也。武人爲于大君志剛也。九四履虎尾愬愬終吉。象曰愬愬終吉志行也。九五夬履貞厲。象曰夬履貞厲位正當也。上九視履考祥其旋元吉。象曰元吉在上大有慶也。

三三泰小往大來吉亨。象曰泰小往大來吉亨則是天地交而萬物通也。上下交而其志同也。內陽而外陰內健而外順。內君子而外小人。君子道長小人道消也。象曰天地交泰后以財成天地之道輔相天地之宜以左右民。初九拔茅茹以其彙征吉。象曰拔茅征吉志在外也。九二包荒用馮河不通遺朋亡得尚于中行。象曰包荒得尚于中行以光大也。九三无平不陂无往不復艱貞无咎勿恤其孚于食有福。象曰无往不復天地際也。六四翩翩不富以其鄰不戒以孚。象曰翩翩不富皆失實也不戒以孚中心願也。六五帝乙歸妹以祉元吉。象曰以祉元吉中以行願也。上六城復于隍勿用師自邑告命貞吝。象曰城復于隍其命亂也。

三三否之匪人不利君子貞大往小來。象曰否之匪人不利君子貞大往小來則是天地不交而萬物不通也。上下不交而天下无邦也。內陰而外陽內柔而外剛內小

人而外君子小人道長君子道消也象曰天地不交否君子以儉德辟難不可榮以祿初六拔茅茹以其彙貞吉亨象曰拔茅貞吉志在君也六二包承小人吉大人否亨象曰大人否亨不亂羣也六三包羞象曰包羞位不當也九四有命无咎疇離祉象曰有命无咎志行也九五休否大人吉其亡其亡繫于苞桑象曰大人之吉位正当也上九傾否先否後喜象曰否終則傾何可長也

三三同人于野亨利涉大川利君子貞象曰同人柔得位得中而應乎乾曰同人同人曰同人于野亨利涉大川乾行也文明以健中正而應君子正也唯君子爲能通天下之志象曰天與火同人君子以類族辨物初九同人于門无咎象曰出門同人又誰咎也六二同人于宗吝象曰同人于宗吝道也九三伏戎于莽升其高陵三歲不興象曰伏戎于莽敵剛也三歲不興安行也九四乘其墉弗克攻吉象曰乘其墉義弗克也其吉則困而反則也九五同人先號咷而後笑大師克相遇象曰同人之先以中直也大師相遇言相克也上九同人于郊无悔象曰同人于郊志未得也

三三大有元亨象曰大有柔得尊位大中而上下應之曰大有其德剛健而文明應

乎天而時行是以元亨象曰火在天上大有君子以遏惡揚善順天休命初九无交害匪咎艱則无咎象曰大有初九无交害也九二大卑以載有攸往无咎象曰大車以載積中不敗也九三公用亨于天子小人弗克象曰公用亨于天子小人害也九四匪其彭无咎象曰匪其彭无咎明辨晷也六五厥孚交如威如吉象曰厥孚交如信以發志也威如之吉易而无備也上九自天祐之吉无不利象曰大有上吉自天祐也

三三謙亨君子有終象曰謙亨天道下濟而光明地道卑而上行天道虧盈而益謙地道變盈而流謙鬼神害盈而福謙人道惡盈而好謙謙尊而光卑而不可踰君子之終也象曰地中有山謙君子以裒多益寡稱物平施初六謙謙君子用涉大川吉象曰謙謙君子卑以自牧也六二鳴謙貞吉象曰鳴謙貞吉中心得也九三勞謙君子有終吉象曰勞謙君子萬民服也六四无不利撝謙象曰无不利撝謙不遠則也六五不富以其鄰利用侵伐无不利象曰利用侵伐征不服也上六鳴謙利用行師征邑國象曰鳴謙志未得也可用行師征邑國也

三三豫利建侯行師彖曰豫剛應而志行順以動豫豫順以動故天地如之而況建侯行師乎天地以順動故日月不過而四時不忒聖人以順動則刑罰清而民服豫之時義大矣哉象曰雷出地奮豫先王以作樂崇德殷薦之上帝以配祖考初六鳴豫凶象曰初六鳴豫志窮凶也六二介于石不終日貞吉象曰不終日貞吉以中正也六三盱豫悔遲有悔象曰盱豫有悔位不當也九四由豫大有得勿疑朋盍簪象曰由豫大有得志大行也六五貞疾恆不死象曰六五貞疾乘剛也恆不死中未亡也上六冥豫成有渝无咎象曰冥豫在上何可長也

三三隨元亨利貞无咎彖曰隨剛來而下柔動而說隨大亨貞无咎而天下隨時隨時之義大矣哉象曰澤中有雷隨君子以嚮晦入宴息初九官有渝貞吉出門交有功象曰官有渝從正吉也出門交有功不失也六二係小子失丈夫象曰係小子弗兼與也六三係丈夫失小子隨有求得利居貞象曰係丈夫志舍下也九四隨有獲貞凶有孚在道以明何咎象曰隨有獲其義凶也有孚在道明功也九五孚于嘉吉象曰孚于嘉吉位正中也上六拘係之乃從維之王用亨于四山象曰拘係之上窮

也

三三蠱元亨利涉大川先甲三日後甲三日彖曰蠱剛上而柔下巽而止蠱蠱元亨而天下治也利涉大川往有事也先甲三日後甲三日終則有始天行也象曰山下有風蠱君子以振民育德初六幹父之蠱有子考无咎厲終吉象曰幹父之蠱意承考也九二幹母之蠱不可貞象曰幹母之蠱得中道也九三幹父之蠱小有悔无大咎象曰幹父之蠱終无咎也六四裕父之蠱往見吝象曰裕父之蠱往未得也六五幹父之蠱用譽象曰幹父用譽承以德也上九不事王侯高尙其事象曰不事王侯志可則也

三三臨元亨利貞至于八月有凶彖曰臨剛浸而長說而順剛中而應大亨以正天之道也至于八月有凶消不久也象曰澤上有地臨君子以教思无窮容保民无疆初九咸臨貞吉象曰咸臨貞吉志行正也九二咸臨吉无不利象曰咸臨吉无不利未順命也六三甘臨无攸利既憂之无咎象曰甘臨位不當也既憂之咎不長也六四至臨无咎象曰至臨无咎位當也六五知臨大君之宜吉象曰大君之宜行中之

謂也上六教臨吉无咎象曰教臨之吉志在內也

三三觀盟而不薦有孚顒若象曰大觀在上順而巽中正以觀天下觀盟而不薦有孚顒若下觀而化也觀天之神道而四時不忒聖人以神道設教而天下服矣象曰風行地上觀先王以省方觀民設教初六童觀小人无咎君子吝象曰初六童觀小人道也六二闕觀利女貞象曰闕觀女貞亦可醜也六三觀我生進退象曰觀我生進退未失道也六四觀國之光利用賓于王象曰觀國之光尙賓也九五觀我生君子无咎象曰觀我生觀民也上九觀其生君子无咎象曰觀其生志未平也

三三噬嗑亨利用獄象曰頤中有物曰噬嗑噬嗑而亨剛柔分動而明雷電合而章柔得中而上行雖不當位利用獄也象曰雷電噬嗑先王以明罰勅法初九履校滅趾无咎象曰履校滅趾不行也六二噬膚滅鼻无咎象曰噬膚滅鼻乘剛也六三噬腊肉遇毒小吝无咎象曰遇毒位不當也九四噬乾肺得金矢利艱貞吉象曰利艱貞吉未光也六五噬乾肉得黃金貞厲无咎象曰貞厲无咎得當也上九何校滅耳凶象曰何校滅耳聽不明也

三三賁亨小利有攸往彖曰賁亨柔來而文剛故亨分剛上而文柔故小利有攸往天文也文明以止人文也觀乎天文以察時變觀乎人文以化成天下象曰山下有火賁君子以明庶政无敢折獄初九賁其趾舍車而徒象曰舍車而徒義弗乘也六二賁其須象曰賁其須與上興也九三賁如濡如永貞吉象曰永貞之吉終莫之陵也六四賁如皤如白馬翰如匪寇婚媾象曰六四當位疑也匪寇婚媾終无尤也六五賁于丘園束帛戔戔吝終吉象曰六五之吉有喜也上九白賁无咎象曰白賁无咎上得志也

三三剝不利有攸往彖曰剝剝也柔變剛也不利有攸往小人長也順而止之觀象也君子尚消息盈虛天行也象曰山附於地剝上以厚下安宅初六剝牀以足蔑貞凶象曰剝牀以足以滅下也六二剝牀以辨蔑貞凶象曰剝牀以辨未有與也六三剝之无咎象曰剝之无咎失上下也六四剝牀以膚凶象曰剝牀以膚切近災也六五貫魚以宮人寵无不利象曰以宮人寵終无尤也上九碩果不食君子得輿小人剝廬象曰君子得輿民所載也小人剝廬終不可用也

三三復亨出入无疾朋來无咎反復其道七日來復利有攸往彖曰復亨剛反動商以順行是以出入无疾朋來无咎反復其道七日來復天行也利有攸往剛長也復其見天地之心乎象曰雷在地中復先王以至日閉關商旅不行后不省方初九不遠復无祇悔元吉象曰不遠之復以脩身也六二休復吉象曰休復之吉以下仁也六三頻復厲无咎象曰頻復之厲義无咎也六四中行獨復象曰中行獨復以從道也六五敦復无悔象曰敦復无悔中以自考也上六迷復凶有災告用行師終有大敗以其國君凶至于十年不克征象曰迷復之凶反君道也

三三无妄元亨利貞其匪正有眚不利有攸往彖曰无妄剛自外來而爲主於內動而健剛中而應大亨以正天之命也其匪正有眚不利有攸往无妄之往何之矣天之不祐行矣哉象曰天下雷行物與无妄先王以茂對時育萬物初九无妄往吉象曰无妄之往得志也六二不耕穫不菑畲則利有攸往象曰不耕穫未富也六三无妄之災或繫之牛行人之得邑人之災象曰行人得牛邑人災也九四可貞无咎象曰可貞无咎固有之也九五无妄之疾勿藥有喜象曰无妄之藥不可試也上九无

妄行有咎无攸利象曰无妄之行窮之災也

三三三 大畜利貞不家食吉利涉大川象曰大畜剛健篤實輝光日新其德剛上而尚賢能止健大正也不家食吉養賢也利涉大川應乎天也象曰天在山中大畜君子以多識前言往行以畜其德初九有厲利己象曰有厲利己不犯災也九二輿說輟象曰輿說輟中无尤也九三良馬逐利艱貞曰閑輿衛利有攸往象曰利有攸往上合志也六四童牛之牯元吉象曰六四元吉有喜也六五豮豕之牙吉象曰六五之吉有慶也上九何天之衢亨象曰何天之衢道大行也

三三三 頤貞吉觀頤自求口實象曰頤貞吉養正則吉也觀頤觀其所養也自求口實觀其自養也天地養萬物聖人養賢以及萬民頤之時大矣哉象曰山下有雷頤君子以慎言語節飲食初九舍爾靈龜觀我朵頤凶象曰觀我朵頤亦不足貴也六二頤顛拂經于丘頤征凶象曰六二征凶行失類也六三拂頤貞凶十年勿用无攸利象曰十年勿用道大悖也六四頤頤吉虎視眈眈其欲逐逐无咎象曰頤頤之吉上施光也六五拂經居貞吉不可涉大川象曰居貞之吉順以從上也上九由頤厲吉

利涉大川象曰由頤厲吉大有慶也

三三大過棟撓利有攸往亨彖曰大過大者過也棟撓本末弱也剛過而中巽而說行利有攸往乃亨大過之時大矣哉象曰澤滅木大過君子以獨立不懼遯世无悶初六藉用白茅无咎象曰藉用白茅柔在下也九二枯楊生稊老夫得其女妻无不利象曰老夫女妻過以相與也九三棟撓凶象曰棟撓之凶不可以有輔也九四棟隆吉有它吝象曰棟隆之吉不撓乎下也九五枯楊生華老婦得其士夫无咎无譽象曰枯楊生華何可久也老婦士夫亦可醜也上六過涉滅頂凶无咎象曰過涉之凶不可咎也

三三習坎有孚維心亨行有尙彖曰習坎重險也水流而不盈行險而不失其信維心亨乃以剛中也行有尙往有功也天險不可升也地險山川丘陵也王公設險以守其國險之時用大矣哉象曰水洊至習坎君子以常德行習教事初六習坎入于坎窞凶象曰習坎入坎失道凶也九二坎有險求小得象曰求小得未出中也六三來之坎坎險且枕入于坎窞勿用象曰來之坎坎終无功也六四樽酒簋贰用缶納

約自屬終无咎象曰樽酒簋二剛柔際也九五坎不盈祇既平无咎象曰坎不盈中未大也上六係用徽纆寘于叢棘三歲不得凶象曰上六失道凶三歲也

三三離利貞亨畜牝牛吉彖曰離麗也日月麗乎天百穀草木麗乎土重明以麗乎正乃化成天下柔麗乎中正故亨是以畜牝牛吉也象曰明兩作離大人以繼明照于四方初九履錯然敬之无咎象曰履錯之敬以辟咎也六二黃離元吉象曰黃離元吉得中道也九三日昃之離不鼓缶而歌則大耋之嗟凶象曰日昃之離何可久也九四突如其來如焚如死如棄如象曰突如其來如无所容也六五出涕沱若戚嗟若吉象曰六五之吉離王公也上九王用出征有嘉折首獲匪其醜无咎象曰王用出征以正邦也

三三咸亨利貞取女吉彖曰咸感也柔上而剛下二氣感應以相與止而說男下女是以亨利貞取女吉也天地感而萬物化生聖人感人心而天下和平觀其所感而天地萬物之情可見矣象曰山上有澤咸君子以虛受人初六咸其拇象曰咸其拇志在外也六二咸其腓凶居吉象曰雖凶居吉順不害也九三咸其股執其隨往吝

象曰咸其股亦不處也志在隨人所執下也九四貞吉悔亡憧憧往來朋從爾思象曰貞吉悔亡未感害也憧憧往未未光大也九五咸其脢无悔象曰咸其脢志末也上六咸其輔頰舌象曰咸其輔頰舌滕口說也

三三恆亨无咎利貞利有攸往彖曰恆久也剛上而柔下雷風相與巽而動剛柔皆應恆恆亨无咎利貞久於其道也天地之道恆久而不已也利有攸往終則有始也日月得天而能久照四時變化而能久成聖人久於其道而天下化成觀其所恆而天地萬物之情可見矣象曰雷風恆君子以立不易方初六浚恆貞凶无攸利象曰浚恆之凶始求深也九二悔亡象曰九二悔亡能久中也九三不恆其德或承之羞貞吝象曰不恆其德无所容也九四田无禽象曰久非其位安得禽也六五恆其德貞婦人吉夫子凶象曰婦人貞吉從一而終也夫子制義從婦凶也上六振恆凶象曰振恆在上大无功也

三三遯亨小利貞彖曰遯亨遯而亨也剛當位而應與時行也小利貞浸而長也遯之時義大矣哉象曰天下有山遯君子以遠小人而嚴初六遯尾厲勿用有攸

往象曰遯尾之厲不往何災也六二執之用黃牛之革莫之勝說象曰執用黃牛固志也九三係遯有疾厲畜臣妾吉象曰係遯之厲有疾憊也畜臣妾吉不可大事也九四好遯君子吉小人否象曰君子好遯小人否也九五嘉遯貞吉象曰嘉遯貞吉以正志也上九肥遯无不利象曰肥遯无不利无所疑也

三三三大壯利貞彖曰大壯大者壯也剛以動故壯大壯利貞大者正也正大而天地之情可見矣象曰雷在天上大壯君子以非禮弗履初九壯于趾征凶有孚象曰壯于趾其孚窮也九二貞吉象曰九二貞吉以中也九三小人用壯君子用罔貞厲羝羊觸藩羸其角象曰小人用壯君子罔也九四貞吉悔亡藩決不羸壯于大輿之輶象曰藩決不羸尚往也六五喪羊于易无悔象曰喪羊于易位不當也上六羝羊觸藩不能退不能遂无攸利艱則吉象曰不能退不能遂不詳也艱則吉咎不長也

三三三晉康侯用錫馬蕃庶晝日三接象曰晉進也明出地上順而麗乎大明柔進而上行是以康侯用錫馬蕃庶晝日三接也象曰明出地上晉君子以自昭明德初六晉如摧如貞吉罔孚裕无咎象曰晉如摧如獨行正也裕无咎未受命也六二晉如

愁如貞吉受茲介福于其王母象曰受茲介福以中正也六三衆允悔亡象曰衆允之志上行也九四晉如鼫鼠貞厲象曰鼫鼠貞厲位不當也六五悔亡失得勿恤往吉无不利象曰失得勿恤往有慶也上九晉其角維用伐邑厲吉无咎貞吝象曰維用伐邑道未光也

三三明夷利艱貞象曰明入地中明夷內文明而外柔順以蒙大難文王以之利艱貞晦其明也內難而能正其志箕子以之象曰明入地中明夷君子以莅衆用晦而明初九明夷于飛垂其翼君子于行三日不食有攸往主人有言象曰君子于行義不食也六二明夷夷于左股用拯馬壯吉象曰六二之吉順以則也九三明夷于南狩得其大首不可疾貞象曰南狩之志乃得大也六四入于左腹獲明夷之心于出門庭象曰入于左腹獲心意也六五箕子之明夷利貞象曰箕子之貞明不可息也上六不明晦初登于天後入于地象曰初登于天照四國也後入于地失則也

三三家人利女貞象曰家人女正位乎內男正位乎外男女正天地之大義也家人有嚴君焉父母之謂也父子兄弟夫婦夫婦而家道正正家而天下定矣

象曰風自火出家人君子以言有物而行有恆初九閑有家悔亡象曰閑有家志未變也六二无攸遂在中饋貞吉象曰六二之吉順以巽也九三家人嗃嗃悔厲吉婦子嘻嘻終吝象曰家人嗃嗃未失也婦子嘻嘻失家節也六四富家大吉象曰富家大吉順在位也九五王假有家勿恤吉象曰王假有家交相愛也上九有孚威如終吉象曰威如之吉反身之謂也

三三睽小事吉彖曰睽火動而上澤動而下二女同居其志不同行說而麗乎明柔進而上行得中而應乎剛是以小事吉天地睽而其事同也男女睽而其志通也萬物睽而其事類也睽之時用大矣哉象曰上火下澤睽君子以同而異初九悔亡喪馬勿逐自復見惡人无咎象曰見惡人以辟咎也九二遇主于巷无咎象曰遇主于巷未失道也六三見輿曳其牛掣其人天且劓无初有終象曰見輿曳位不當也无初有終遇剛也九四睽孤遇元夫交孚厲无咎象曰交孚无咎志行也六五悔亡厥宗噬膚往何咎象曰厥宗噬膚往有慶也上九睽孤見豕負塗載鬼一車先張之弧後說之弧匪寇婚媾往遇雨則吉象曰遇雨之吉羣疑亡也

三三蹇利西南不利來北利見大人貞吉彖曰蹇難也險在前也見險而能止知矣哉蹇利西南往得中也不利東北其道窮也利見大人往有功也當位貞吉以正邦也蹇之時用大矣哉象曰山上有水蹇君子以反身修德初六往蹇來譽象曰往蹇來譽宜待也六二王臣蹇蹇匪躬之故象曰王臣蹇蹇終无尤也九三往蹇來反象曰往蹇來反內喜之也六四往蹇來連象曰往蹇來連當位實也九五大蹇朋來象曰大蹇朋來以中節也上六往蹇來碩吉利見大人象曰往蹇來碩志在內也利見大人以從貴也

三三解利西南无所往其來復吉有攸往夙吉彖曰解險以動動而免乎險解解利西南往得衆也其來復吉乃得中也有攸往夙吉往有功也天地解而雷雨作雷雨作而百果草木皆甲坼解之時大矣哉象曰雷雨作解君子以赦過宥罪初六无咎象曰剛柔之際義无咎也九二田獲三狐得黃矢貞吉象曰九二貞吉得中道也六三負且乘致寇至貞吝象曰負且乘亦可醜也自我致戎又誰咎也九四解而拇朋至斯孚象曰解而拇未當位也六五君子維有解吉有孚子小人象曰君子有解小

人退也上六公用射隼于高墉之上獲之无不利象曰公用射隼以解悖也

三三損有孚元吉无咎可貞利有攸往曷之用二簋可用享彖曰損損下益上其道上行損而有孚元吉无咎可貞利有攸往曷之用二簋可用享二簋應有時損剛益柔有時損益盈虛與時偕行象曰山下有澤損君子以懲忿窒欲初九已事遄往无咎酌損之象曰已事遄往尙合志也九二利貞征凶弗損益之象曰九二利貞中以爲志也六三人行則損一人一人行則得其友象曰一人行三則疑也六四損其疾使遄有喜无咎象曰損其疾亦可喜也六五或益之十朋之龜弗克違元吉象曰六五元吉自上祐也上九弗損益之无咎貞吉利有攸往得臣无家象曰弗損益之大得志也

三三益利有攸往利涉大川象曰益損上益下民說无疆自上下下其道大光利有攸往中正有慶利涉大川木道乃行益動而巽日進无疆天施地生其益无方凡益之道與時偕行象曰風雷益君子以見善則遷有過則改初九利用爲大作元吉无咎象曰元吉无咎下不厚事也六二或益之十朋之龜弗克違永貞吉王用享于帝

吉象曰或益之自外來也六三益之用凶事无咎有孚中行告公用圭象曰益用凶事固有之也六四中行告公從利用爲依遷國象曰告公從以益志也九五有孚惠心勿問元吉有孚惠我德象曰有孚惠心勿問之矣惠我德大得志也上九莫益之或擊之立心勿恆凶象曰莫益之偏辭也或擊之自外來也

三三夫揚于王庭孚號有厲告自邑不利卽戎利有攸往彖曰夫決也剛決柔也健而說決而和揚于王庭柔乘五剛也孚號有厲其危乃光也告自邑不利卽戎所尙乃窮也利有攸往剛長乃終也象曰澤上於天夫君子以施祿及下居德則忌初九壯于前趾往不勝爲咎象曰不勝而往咎也九二惕號莫夜有戎勿恤象曰有戎勿恤得中道也九三壯于頄有凶君子夫夫獨行遇雨若濡有愠无咎象曰君子夫夫終无咎也九四臀无膚其行次且牽羊悔亡聞言不信象曰其行次且位不當也聞言不信聽不明也九五覓陸夫夫中行无咎象曰中行无咎中未光也上六无號終有凶象曰无號之凶終不可長也

三三姤女壯勿用取女彖曰姤遇也柔遇剛也勿用取女不可與長也天地相遇品

物咸章也剛遇中正天下大行也姤之時義大矣哉象曰天下有風姤后以施命誥四方初六繫于金柅貞吉有攸往見凶羸豕孚蹢躅象曰繫于金柅柔道牽也九二包有魚无咎不利賓象曰包有魚義不及賓也九三臀无膚其行次且厲无大咎象曰其行次且行未牽也九四包无魚起凶象曰无魚之凶遠民也九五以杞包瓜含豶有隕自天象曰九五含章中正也有隕自天志不舍命也上九姤其角吝无咎象曰姤其角上窮吝也

萃亨王假有廟利見大人亨利貞用大牲吉利有攸往象曰萃聚也順以說剛中而應故聚也王假有廟致孝享也利見大人亨聚以正也用大牲吉利有攸往順天命也觀其所聚而天地萬物之情可見矣象曰澤上於地萃君子以除戎器戒不虞初六有孚不終乃亂乃萃若號一握爲笑勿恤往无咎象曰乃亂乃萃其志亂也六二引吉无咎孚乃利用禴象曰引吉无咎中未變也六三萃如嗟如无攸利往无咎小吝象曰往无咎上巽也九四大吉无咎象曰大吉无咎位不當也九五萃有位无咎匪孚元永貞悔亡象曰萃有位志未光也上六齋咨涕洟无咎象曰齋咨涕洟

未安上也

三三升元亨用見大人勿恤南征吉象曰柔以時升巽而順剛中而應是以大亨用見大人勿恤有慶也南征吉志行也象曰地中生木升君子以順德積小以高大初六允升大吉象曰允升大吉上合志也九二孚乃利用禴无咎象曰九二之孚有喜也九三升虛邑象曰升虛邑无所疑也六四王用亨于岐山吉无咎象曰王用亨于岐山順事也六五貞吉升階象曰貞吉升階大得志也上六冥升利于不息之貞象曰冥升在上消不富也

三三困亨貞大人吉无咎有言不信象曰困剛揜也險以說困而不失其所亨其唯君子乎貞大人吉以剛中也有言不信尚口乃窮也象曰澤无水困君子以致命遂志初六臀困于株木入于幽谷三歲不覿象曰入于幽谷幽不明也九二困于酒食朱紱方來利用享祀征凶无咎象曰困于酒食中有慶也六三困于石據于蒺藜入于其宮不見其妻凶象曰據于蒺藜乘剛也入于其宮不見其妻不祥也九四來徐徐困于金車吝有終象曰來徐徐志在下也雖不當位有與也九五劓刑困于赤紱

乃徐有說利用祭祀象曰剝則志未得也乃徐有說以中直也利用祭祀受福也上六困于葛藟于臲臲曰動悔有悔征吉象曰困于葛藟未當也動悔有悔吉行也

三三井改邑不改井无喪无得往來井井汔至亦未繙井羸其瓶凶象曰巽乎水而上水井井養而不窮也改邑不改井乃以剛中也汔至亦未繙井未有功也羸其瓶是以凶也象曰木上有水井君子以勞民勸相初六井泥不食舊井无禽象曰井泥不食下也舊井无禽時舍也九二井谷射鮒甕敝漏象曰井谷射鮒无與也九三井渫不食爲我心恻可用汲王明並受其福象曰井渫不食行恻也求王明受福也六四井甃无咎象曰井甃无咎脩井也九五井冽寒泉食象曰寒泉之食中正也上六井收勿幕有孚元吉象曰元吉在上大成也

三三革已日乃孚元亨利貞悔亡彖曰革水火相息二女同居其志不相得曰革已日乃孚革而信之文明以說大亨以正革而當其悔乃亡天地革而四時成湯武革命順乎天而應乎人革之時大矣哉象曰澤中有火革君子以治曆明時初九鞶用黃牛之革象曰鞶用黃牛不可以有爲也六二已日乃革之征吉无咎象曰已日革

之行有嘉也九三征凶貞厲革言三就有孚象曰革言三就又何之矣九四悔亡有孚改命吉象曰改命之吉信志也九五大人虎變未占有孚象曰大人虎變其文炳也上六君子豹變小人革面征凶居貞吉象曰君子豹變其文蔚也小人革面顯以從君也

三三鼎元吉亨象曰鼎象也以木巽火亨飪也聖人亨以享上帝而大亨以養聖賢巽而耳目聰明柔進而上行得中而應乎剛是以元亨象曰木上有火鼎君子以正位凝命初六鼎顛趾利出否得妾以其子无咎象曰鼎顛趾未悖也利出否以從貴也九二鼎有實我仇有疾不我能即吉象曰鼎有實慎所之也我仇有疾終无尤也九三鼎耳革其行塞雉膏不食方雨虧悔終吉象曰鼎耳革失其義也九四鼎折足覆公餗其形渥凶象曰覆公餗信如何也六五鼎黃耳金鉉利貞象曰鼎黃耳中以爲實也上九鼎玉鉉大吉无不利象曰玉鉉在上剛柔節也

三三震亨震來虩虩笑言啞啞震驚百里不喪匕鬯象曰震亨震來虩虩恐致福也笑言啞啞後有則也震驚百里驚遠而懼邇也出可以守宗廟社稷以爲祭主也象

曰洊雷震君子以恐懼脩省初九震來虩虩後笑言啞啞吉象曰震來虩虩恐致福也笑言啞啞後有則也六二震來厲億喪貝躋于九陵勿逐七日得象曰震來厲乘剛也六三震蘇蘇震行无咎象曰震蘇蘇位不當也九四震遂泥象曰震遂泥未光也六五震往來厲意无喪有事象曰震往來厲危行也其事在中大无喪也上六震索索視矍矍征凶震不于其躬子其鄰无咎婚媾有言象曰震索索中未得也雖凶无咎畏鄰戒也

三三艮其背不獲其身行其庭不見其人无咎彖曰艮止也時止則止時行則行動靜不失其時其道光明艮其止止其所也上下敵應不相與也是以不獲其身行其庭不見其人无咎也象曰兼山艮君子以思不出其位初六艮其趾无咎利永貞象曰艮其趾未失正也六二艮其腓不拯其隨其心不快象曰不拯其隨未退聽也九三艮其限列其夤厲薰心象曰艮其限危薰心也六四艮其身无咎象曰艮其身止諸躬也六五艮其輔言有序悔亡象曰艮其輔以中正也上九敦艮吉象曰敦艮之吉以厚終也

三三漸女歸吉利貞彖曰漸之進也女歸吉也進得位往有功也進以正可以正邦也其位剛得中也止而巽動不窮也象曰山上有木漸君子以居賢德善俗初六鴻漸于小子厲有言无咎象曰小子之厲義无咎也六二鴻漸于磐飲食衍衍吉象曰飲食衍衍不素飽也九三鴻漸于陸夫征不復婦孕不育凶利禦寇象曰夫征不復離羣醜也婦孕不育失其道也利用禦寇順相保也六四鴻漸于木或得其桷无咎象曰或得其桷順以巽也九五鴻漸于陵婦三歲不孕終莫之勝吉象曰終莫之勝吉得所願也上九鴻漸于陸其羽可用爲儀吉象曰其羽可用爲儀吉不可亂也

三三歸妹征凶无飲利彖曰歸妹天地之大義也天地不交而萬物不興歸妹人之終始也說以動所歸妹也征凶位不當也无飲利柔乘剛也象曰澤上有雷歸妹君子以永終知敝初九歸妹以娣跛能履征吉象曰歸妹以娣以恆也跛能履吉相承也九二眇能視利幽人之貞象曰利幽人之貞未變常也六三歸妹以須反歸以娣象曰歸妹以須未當也九四歸妹愆期遲歸有時象曰愆期之志有待而行也六五帝乙歸妹其君之袂不如其娣之袂良月幾望吉象曰帝乙歸妹不如其娣之袂良

也其位在中以貴行也上六女承筐无實士刲羊无血无攸利象曰上六无實承虛
筐也

三三豐亨王假之勿憂宜日中象曰豐大也明以動故豐王假之尙大也勿憂宜日
中宜照天下也日中則昃月盈則食天地盈虛與時消息而況於人乎況於鬼神乎
象曰雷電皆至豐君子以折獄致刑初九遇其配主雖旬无咎往有尙象曰雖旬无
咎過旬災也六二豐其蔀日中見斗往得疑疾有孚發若吉象曰有孚發若信以發
志也九三豐其沛日中見沫折其右肱无咎象曰豐其沛不可大事也折其右肱終
不可用也九四豐其蔀日中見斗遇其夷主吉象曰豐其蔀位不當也日中見斗幽
不明也遇其夷主吉行也六五來章有慶譽吉象曰六五之吉有慶也上六豐其屋
蔀其家闕其戶闕其无人三歲不覿凶象曰豐其屋天際翔也闕其戶闕其无人自
藏也

三三旅小亨旅貞吉象曰旅小亨柔得中乎外而順乎剛止而麗乎明是以小亨旅
貞吉也旅之時義大矣哉象曰山上有火旅君子以明慎用刑而不留獄初六旅瑣

瑣斯其所取災象曰旅瑣瑣志窮災也六二旅卽次懷其資得童僕貞象曰得童僕貞終无尤也九三旅焚其次喪其童僕貞厲象曰旅焚其次亦以傷矣以旅與下其義喪也九四旅于處得其資斧我心不快象曰旅于處未得位也得其資斧心未快也六五射雉一矢亡終以譽命象曰終以譽命上逮也上九鳥焚其巢旅人先笑後號咷喪牛于易凶象曰以旅在上其義焚也喪牛于易終莫之聞也

三三巽小亨利有攸往利見大人象曰重巽以申命剛巽乎中正而志行柔皆順乎剛是以小亨利有攸往利見大人象曰隨風巽君子以申命行事初六進退利武人之貞象曰進退志疑也利武人之貞志治也九二巽在牀下用史巫紛若吉无咎象曰紛若之吉得中也九三頻巽吝象曰頻巽之吝志窮也六四悔亡田獲三品象曰田獲三品有功也九五貞吉悔亡无不利无初有終先庚三日後庚三日吉象曰九五之吉位正中也上九巽在牀下喪其資斧貞凶象曰巽在牀下上窮也喪其資斧正乎凶也

三三兌亨利貞象曰兌說也剛中而柔外說以利貞是以順乎天而應乎人說以先

民民忘其勞說以犯難民忘其死說之大民勸矣哉象曰麗澤兌君子以朋友講習
初九和兌吉象曰和兌之吉行未疑也九二孚兌吉悔亡象曰孚兌之吉信志也六
三來兌凶象曰來兌之凶位不當也九四商兌未寧介疾有喜象曰九四之喜有慶
也九五孚于剝有厲象曰孚于剝位正當也上六引兌象曰上六引兌未先也

三三渙亨王假有廟利涉大川利貞象曰渙亨剛來而不窮柔得位乎外而上同王
假有廟王乃在中也利涉大川乘木有功也象曰風行水上渙先王以享于帝立廟
初六用拯馬壯吉象曰初六之吉順也九二渙奔其机悔亡象曰渙奔其机得願也
六三渙其躬无悔象曰渙其躬志在外也六四渙其羣元吉渙有丘匪夷所思象曰
渙其羣元吉光大也九五渙汗其大號渙王居无咎象曰王居无咎正位也上九渙
其血去逖出无咎象曰渙其血遠害也

三三節亨苦節不可貞象曰節亨剛柔分而剛得中苦節不可貞其道窮也說以行
險當位以節中正以通天地節而四時成節以制度不傷財不害民象曰澤上有水
節君子以制數度議德行初九不出戶庭无咎象曰不出戶庭知通塞也九二不出

門庭凶象曰不出門庭凶失時極也六三不節若則嗟若无咎象曰不節之嗟又誰咎也六四安節亨象曰安節之亨承上道也九五甘節吉往有尙象曰甘節之吉居位中也上六苦節貞凶悔亡象曰苦節貞凶其道窮也

三三中孚豚魚吉利涉大川利貞彖曰中孚柔在內而剛得中說而巽孚乃化邦也豚魚吉信及豚魚也利涉大川乘木舟虛也中孚以利貞乃應乎天也象曰澤上有風中孚君子以議獄緩死初九虞吉有它不燕象曰初九虞吉志未變也九二鶴鳴在陰其子和之我有好爵吾與爾靡之象曰其子和之中心願也六三得敵或鼓或罷或泣或歌象曰或鼓或罷位不當也六四月幾望馬匹亡无咎象曰馬匹亡絕類上也九五有孚攣如无咎象曰有孚攣如位正當也上九翰音登于天貞凶象曰翰音登于天何可長也

三三小過亨利貞可小事不可大事飛鳥遺之音不宜上宜下大吉彖曰小過小者過而亨也過以利貞與時行也柔得中是以小事吉也剛失位而不中是以不可大事也有飛鳥之象焉飛鳥遺之音不宜上宜下大吉上逆而下順也象曰山上有雷

小過君子以行過乎恭喪過乎哀用過乎儉初六飛鳥以凶象曰飛鳥以凶不可如何也六二過其祖遇其妣不及其君遇其臣无咎象曰不及其君臣不可過也九三弗過防之從或戕之凶象曰從或戕之凶如何也九四无咎弗過遇之往厲必戒勿用永貞象曰弗過遇之位不當也往厲必戒終不可長也六五密雲不雨自我西郊公弋取彼在穴象曰密雲不雨已上也上六弗過過之飛鳥離之凶是謂災眚象曰弗過過之已亢也

三三既濟亨小利貞初吉終亂象曰既濟亨小者亨也利貞剛柔正而位當也初吉柔得中也終止則亂其道窮也象曰水在火上既濟君子以思患而豫防之初九曳其輪濡其尾无咎象曰曳其輪義无咎也六二婦喪其茀勿逐七日得象曰七日得以中道也九三高宗伐鬼方三年克之小人勿用象曰三年克之德也六四繻有衣袽終日戒象曰終日戒有所疑也九五東鄰殺牛不如西鄰之禴祭實受其福象曰東鄰殺牛不如西鄰之時也實受其福吉大來也上六濡其首厲象曰濡其首厲何可久也

三三未濟亨小狐汔濟濡其尾无攸利彖曰未濟亨柔得中也小狐汔濟未出中也濡其尾无攸利不續終也雖不當位剛柔應也象曰火在水上未濟君子以慎辨物居方初六濡其尾吝象曰濡其尾亦不知極也九二曳其輪貞吉象曰九二貞吉中以行正也六三未濟征凶利涉大川象曰未濟征凶位不當也九四貞吉悔亡震用伐鬼方三年有賞于大國象曰貞吉悔亡志行也六五貞吉无悔君子之光有孚吉象曰君子之光其暉吉也上九有孚于飲酒无咎濡其首有孚失是象曰攸酒濡首亦不知節也

繫辭上

天尊地卑乾坤定矣卑高以陳貴賤位矣動靜有常剛柔斷矣方以類聚物以羣分吉凶生矣在天成象在地成形變化見矣是攸剛柔相摩八卦相盪鼓之以雷霆潤之以風雨日月運行一寒一暑乾道成男坤道成女乾知大始坤作成物乾以易知坤以簡能易則易知簡則易從易知則有親易從則有功有親則可久有功則可大可久則賢人之德可大則賢人之業易簡而天下之理得矣天下之理得而成位乎

其中矣

聖人設卦觀象繫辭焉而明吉凶剛柔相推而生變化是故吉凶者失得之象也悔吝者憂虞之象也變化者進退之象也剛柔者晝夜之象也六爻之動三極之道也是故君子所居而安者易之序也所樂而玩者爻之辭也是故君子居則觀其象而玩其辭動則觀其變而玩其占是以自天祐之吉无不利

象者言乎象者也爻者言乎變者也吉凶者言乎其失得也悔吝者言乎其小疵也无咎者善補過也是故列貴賤者存乎位齊小大者存乎卦辯吉凶者存乎辭憂悔吝者存乎介震无咎者存乎悔是故卦有小大辭有險易辭也者各指其所之易與天地準故能彌綸天地之道仰以觀於天文俯以察於地理是故知幽明之故原始反終故知死生之說

精氣爲物遊魂爲變是故知鬼神之情狀與天地相似故不違知周乎萬物而道濟天下故不過旁行而不流樂天知命故不憂安土敦乎仁故能愛範圍天地之化而不過曲成萬物而不遺通乎晝夜之道而知故神无方而易无體一陰一陽之謂道

繼之者善也成之者性也仁者見之謂之仁知者見之謂之知百姓日用而不知故君子之道鮮矣

顯諸仁藏諸用鼓萬物而不與聖人同憂盛德大業至矣哉富有之謂大業日新之謂盛德生生之謂易成象之謂乾效法之謂坤極數知來之謂占通變之謂事陰陽不測之謂神夫易廣大矣以言乎遠則不禦以言乎邇則靜而正以言乎天地之間則備矣夫乾其靜也專其動也直是以大生焉夫坤其靜也翕其動也闢是以廣生焉廣大配天地變通配四時陰陽之義配日月易簡之善配至德子曰易其至矣乎夫易聖人所以崇德而廣業也知崇禮卑崇效天卑法地天地設位而易行乎其中矣成性存存道義之門

聖人有以見天下之賾而擬諸其形容象其物宜是故謂之象聖人有以見天下之動而觀其會通以行其典禮繫辭焉以斷其吉凶是故謂之爻言天下之至賾而不可惡也言天下之至動而不可亂也擬之而後言議之而後動擬議以成其變化鳴鶴在陰其子和之我有好爵吾與爾靡之子曰君子居其室出其言善則千里之外

應之况其邇者乎居其室出其言不善則千里之外遠之况其邇者乎言出乎身加
乎民行發乎邇見乎遠言行君子之樞機樞機之發榮辱之主也言行君子之所以
動天地也可不慎乎同人先號咷而後笑子曰君子之道或出或處或默或語二人
同心其利斷金同心之言其臭如蘭

初六藉用白茅无咎子曰苟錯諸地而可矣藉之用茅何咎之有慎之至也夫茅之
爲物薄而用可重也慎斯術也以往其无所失矣勞謙君子有終吉子曰勞而不伐
有功而不德厚之至也語以其功下人者也德言盛禮言恭謙也者致恭以存其位
者也亢龍有悔子曰貴而无位高而无民賢人在下位而无輔是以動而有悔也不
出戶庭无咎子曰亂之所生也則言語以爲階君不密則失臣臣不密則失身幾事
不密則害成是以君子慎密而不出也子曰作易者其知盜乎易曰負且乘致寇至
負也者小人之事也乘也者君子之器也小人而乘君子之器盜思奪之矣上慢下
暴盜思伐之矣慢藏誨盜冶容誨淫易曰負且乘致寇至盜之招也

大衍之數五十其用四十有九分而爲二以象兩掛一以象三揲之以四以象四時

歸奇於扚以象閏五歲再閏故再扚而後掛天數五地數五五位相得而各有合天數二十有五地數三十凡天地之數五十有五此所以成變化而行鬼神也乾之策二百一十有六坤之策百四十有四凡三百有六十當期之日二篇之策萬有一千五百二十當萬物之數也是故四營而成易十有八變而成卦八卦而小成引而伸之觸類而長之天下之能事畢矣顯道神德行是故可與酬酢可與祐神矣

子曰知變化之道者其知神之所爲乎易有聖人之道四焉以言者尙其辭以動者尙其變以制器者尙其象以卜筮者尙其占是以君子將有爲也將有行也問焉而以其受命也如響无有遠近幽深遂知來物非天下之至精其孰能與於此參伍以變錯綜其數通其變遂成天下之文極其數遂定天下之象非天下之至變其孰能與於此易无思也无爲也寂然不動感而遂通天下之故非天下之至神其孰能與於此夫易聖人之所以極深而研幾也唯深也故能通天下之志唯幾也故能成天下之務唯神也故不疾而速不行而至子曰易有聖人之道四焉者此之謂也
天一地二天三地四天五地六天七地八天九地十子曰夫易何爲者也夫易開物

成務冒天下之道如斯而已者也是故聖人以通天下之志以定天下之業以斷天下之疑是故著之德圓而神卦之德方以知六爻之義易以貢聖人以此洗心退藏於密吉凶與民同患神以知來知以藏往其孰能與此哉古之聰明叡知神武而不殺者夫是以明於天之道而察於民之故是與神物以前民用聖人以此齊成以神明其德夫是故闔戶謂之坤闢戶謂之乾一闔一闢謂之變往來不窮謂之通見乃謂之象形乃謂之器制而用之謂之法利用出入民咸用之謂之神

是故易有太極是生兩儀兩儀生四象四象生八卦八卦定吉凶吉凶生大業是故法象莫大乎天地變通莫大乎四時縣象著明莫大乎日月崇高莫大乎富貴備物致用立成器以爲天下利莫大乎聖人探賾索隱鉤深致遠以定天下之吉凶成天下之亹亹者莫大乎蓍龜是故天生神物聖人則之天地變化聖人效之天垂象見吉凶聖人象之河出圖洛出書聖人則之易有四象所以示也繫辭焉所以告也定之以吉凶所以斷也易曰自天祐之吉无不利子曰祐者助也天之所助者順也人

之所助者信也履信思乎順又以尙賢也是以自天祐之吉无不利也

子曰書不盡言言不盡意然則聖人之意其不可見乎子曰聖人立象以盡意設卦以盡情僞繫辭以盡其言變而通之以盡利鼓之舞之以盡神乾坤其易之緼邪乾坤成列而易立乎其中矣乾坤毀則無以見易易不可見則乾坤或幾乎息矣是故形而上者謂之道形而下者謂之器化而裁之謂之變推而行之謂之通舉而錯之天下之民謂之事業是故夫象聖人有以見天下之賾而擬諸其形容象其物宜是故謂之象聖人有以見天下之動而觀其會通以行其典禮繫辭焉以斷其吉凶是故謂之爻極天下之賾者存乎卦鼓天下之動者存乎辭化而裁之存乎變推而行之存乎通神而明之存乎其人默而成之不言而信存乎德行

繫辭下

八卦成列象在其中矣因而重之爻在其中矣剛柔相推變在其中矣繫辭焉而命之動在其中矣吉凶悔吝者生乎動者也剛柔者立本者也變通者趣時者也吉凶者貞勝者也天地之道貞觀者也日月之道貞明者也天下之動貞夫一者也夫乾確然示人易矣夫坤隤然示人簡矣爻也者效此者也象也者像此者也爻象動乎

內吉凶見乎外功業見乎變聖人之情見乎辭天地之大德曰生聖人之大寶曰位何以守位曰仁何以聚人曰財理財正辭禁民爲非曰義

古者包犧氏之王天下也仰則觀象於天俯則觀法於地觀鳥獸之文與地之宜近取諸身遠取諸物於是始作八卦以通神明之德以類萬物之情作結繩而爲罔罟以佃以漁蓋取諸離包犧氏沒神農氏作斲木爲耜揉木爲耒耨之利以教天下蓋取諸益日中爲市致天下之民聚天下之貨交易而退各得其所蓋取諸噬嗑神農氏沒黃帝堯舜氏作通其變使民不倦神而化之使民宜之易窮則變變則通通則久是以自天祐之吉无不利黃帝堯舜垂衣裳而天下治蓋取諸乾坤剡木爲舟剡木爲楫舟楫之利以濟不通致遠以利天下蓋取諸渙服牛乘馬引重致遠以利天下蓋取諸隨重門擊柝以待暴客蓋取諸豫斷木爲杵掘地爲臼白杵之利萬民以濟蓋取諸小過弦木爲弧剡木爲矢弧矢之利以威天下蓋取諸睽上古穴居而野處後世聖人易之以宮室上棟下宇以待風雨蓋取諸大壯古之葬者厚衣之以薪葬之中野不封不樹喪期无數後世聖人易之以棺槨蓋取諸大過上古結繩而

治後世聖人易之以書契百官以治萬民以察蓋取諸夫

是故易者象也象也者像也彖者材也爻也者效天下之動者也是故吉凶生而悔吝著也陽卦多陰陰卦多陽其故何也陽卦奇陰卦耦其德行何也陽一君而二民君子之道也陰二君而一民小人之道也易曰憧憧往來朋從爾思子曰天下何思何慮天下同歸而殊塗一致而百慮天下何思何慮日往則月來月往則日來日月相推而明生焉寒往則暑來暑往則寒來寒暑相推而歲成焉往者屈也來者信也屈信相感而利生焉尺蠖之屈以求信也龍蛇之蟄以存身也精義入神以致用也利用安身以崇德也過此以往未之或知也窮神知化德之盛也

易曰困于石據于蒺藜入于其宮不見其妻凶子曰非所困而困焉名必辱非所據而據焉身必危既辱且危死期將至妻其可得見耶易曰公用射隼于高墉之上獲之无不利子曰隼者禽也弓矢者器也射之者人也君子藏器於身待時而動何不利之有動而不括是以出而有獲語成器而動者也子曰小人不恥不仁不畏不義不見利不勸不威不懲小懲而大誡此小人之福也易曰履校滅趾无咎此之謂也

善不積不足以成名惡不積不足以滅身小人以小善爲无益而弗爲也以小惡爲无傷而弗去也故惡積而不可掩罪大而不可解易曰何校滅耳凶子曰危者安其位者也亡者保其存者也亂者有其治者也是故君子安而不忘危存而不忘亡治而不忘亂是以身安而國家可保也易曰其亡其亡繫于苞桑子曰德薄而位尊知小而謀大力小而任重鮮不及矣易曰鼎折足覆公餗其形渥凶言不勝其任也子曰知幾其神乎君子上交不諂下交不瀆其知幾乎幾者動之微吉之先見者也君子見幾而作不俟終日易曰介于石不終日貞吉介如石焉寧用終日斷可識矣君子知微知彰知柔知剛萬夫之望子曰顏氏之子其殆庶幾乎有不善未嘗不知知之未嘗復行也易曰不遠復无祇悔元吉天地絪縕萬物化醇男女構精萬物化生易曰三人行則損一人一人行則得其友言致一也子曰君子安其身而後動易其心而後語定其交而後求君子脩此三者故全也危以動則民不與也懼以語則民不應也无交而求則民不與也莫之與則傷之者至矣易曰莫益之或擊之立心勿恆凶

子曰乾坤其易之門邪乾陽物也坤陰物也陰陽合德而剛柔有體以體天地之撰以通神明之德其稱名也雜而不越於稽其類其衰世之意邪夫易彰往而察末而微顯闡幽開而常名辨物正言斷辭則備矣其稱名也小其取類也大其旨遠其辭文其言曲而中其事肆而隱因貳以濟民行以明失得之報

易之興也其於中古乎作易者其有憂患乎是故履德之基也謙德之柄也復德之本也恆德之固也損德之脩也益德之裕也困德之辨也井德之地也巽德之制也履和而至謙尊而光復小而辨於物恆雜而不厭損光難而後易益長裕而不設困窮而通井居其所而遷巽稱而隱履以和行謙以制禮復以自知恆以一德損以遠害益以興利困以寡怨井以辯義巽以行權

易之爲書也不可遠爲道也屢遷變動不居周流六虛上下无常剛柔相易不可爲典要唯變所適其出入以度外內使知懼又明於憂患與故无有師保如臨父母初率其辭而揆其方既有典常苟非其人道不虛行易之爲害也原始要終以爲質也六爻相雜唯其時物也其初難知其上易知本末也初辭擬之卒成之終若夫雜物

撰德辨是與非則非其中爻不備臆亦要存亡吉凶則居可知矣知者觀其彖辭則思過半矣

二與四同功而異位其善不同二多譽四多懼近也柔之爲道不利遠者其要无咎其用柔中也三與五同功而異位三多凶五多功貴賤之等也其柔危其剛勝邪易之爲書也廣大悉備有天道焉有人道焉有地道焉兼三材而兩之故六六者非它也三材之道也道有變動故曰爻爻有等故曰物物相雜故曰文文不當故吉凶生焉易之興也其當殷之末世周之盛德邪當文王與紂之事邪是故其辭危危者使平易者使傾其道甚大百物不廢懼以終始其要无咎此之謂易之道也

夫乾天下之至健也德行恆易以知險夫坤天下之至順也德行恆簡以知阻能說諸心能研諸侯之慮定天下之吉凶成天下之亹亹者是故變化云爲吉事有祥象事知器占事知來天地設位聖人成能人謀鬼謀百姓與能八卦以象告爻象以情言剛柔雜居而吉凶可見矣變動以利言吉凶以情遷是故愛惡相攻而吉凶生遠近相取而悔吝生情僞相感而利害生凡易之情近而不相得則凶或害之悔且吝

將叛者其辭慙中心疑者其辭枝吉人之辭寡躁人之辭多誣善之人其辭游失其守者其辭屈

說卦

昔者聖人之作易也幽贊於神明而生蓍參天兩地而倚數觀變於陰陽而立卦發揮於剛柔而生爻和順於道德而理於義窮理盡性以至於命

昔者聖人之作易也將以順性命之理是以立天之道曰陰與陽立地之道曰柔與剛立人之道曰仁與義兼三才而兩之故易六畫而成卦分陰分陽迭用柔剛故易六位而成章

天地定位山澤通氣雷風相薄水火不相射八卦相錯數往者順知來者逆是故易逆數也

雷以動之風以散之雨以潤之日以恒之艮以止之兌以說之乾以君之坤以藏之帝出乎震齊乎巽相見乎離致役乎坤說言乎兌戰乎乾勞乎坎成言乎艮萬物出乎震震東方也齊乎巽巽東南也齊也者言萬物之絜齊也離也者明也萬物皆相

見南方之卦也。聖人南面而聽天下嚮明而治，蓋取諸此也。坤也者，地也。萬物皆致養焉。故曰：致役乎坤。兌正秋也，萬物之所說也。故曰：說言乎兌。戰乎乾，乾西北之卦也。言陰陽相薄也。坎者水也，正北方之卦也。勞卦也。萬物之所歸也。故曰：勞乎坎。艮東北之卦也。萬物之所成終而所成始也。故曰：成言乎艮。

神也者，妙萬物而爲言者也。動萬物者莫疾乎雷，撓萬物者莫疾乎風，燥萬物者莫熯乎火，說萬物者莫說乎澤，潤萬物者莫潤乎水。終萬物始萬物者莫盛乎艮。故水火相逮，雷風不相悖，山澤通氣，然後能變化。既成萬物也。

乾健也。坤順也。震動也。巽入也。坎陷也。離麗也。艮止也。兌說也。

乾爲馬，坤爲牛，震爲龍，巽爲雞，坎爲豕，離爲雉，艮爲狗，兌爲羊。

乾爲首，坤爲腹，震爲足，巽爲股，坎爲耳，離爲目，艮爲手，兌爲口。

乾天也，故稱乎父。坤地也，故稱乎母。震一索而得男，故謂之長男。巽一索而得女，故謂之長女。坎再索而得男，故謂之中男。離再索而得女，故謂之中女。艮三索而得男，故謂之少男。兌三索而得女，故謂之少女。

乾爲天爲圓爲君爲父爲玉爲金爲寒爲冰爲大赤爲良馬爲老馬爲瘠馬爲駁馬爲木果

坤爲地爲母爲布爲釜爲吝嗇爲均爲子母牛爲大輿爲文爲衆爲柄其於地也爲黑

震爲雷爲龍爲玄黃爲旉爲大塗爲長子爲決躁爲蒼筤竹爲萑葦其於馬也爲善鳴爲馵足爲作足爲的顛其於稼也爲反生其究爲健爲蕃鮮

巽爲木爲風爲長女爲繩直爲工爲白爲長爲高爲進退爲不果爲臭其於人也爲寡髮爲廣顙爲多白眼爲近利市三倍其究爲躁卦

坎爲水爲溝瀆爲隱伏爲矯輮爲弓輪其於人也爲加憂爲心病爲耳痛爲血卦爲赤其於馬也爲美脊爲亟心爲下首爲薄蹄爲曳其於輿也爲多眚爲通爲月爲盜其於木也爲堅多心

離爲火爲日爲電爲中女爲甲冑爲戈兵其於人也爲大腹爲乾卦爲鱉爲蟹爲龜爲蚌爲龜其於木也爲科上槁

良爲山爲徑路爲小石爲門闕爲果蓏爲閹寺爲指爲狗爲鼠爲黔喙之屬其於木也爲堅多節

兌爲澤爲少女爲巫爲口舌爲毀折爲附決其於地也爲剛鹵爲妾爲羊

序卦

有天地然後萬物生焉盈天地之間者唯萬物故受之以屯屯者盈也屯者物之始生也物生必蒙故受之以蒙蒙者蒙也物之穉也物穉不可不養也故受之以需需者飲食之道也飲食必有訟故受之以訟訟必有衆起故受之以師師者衆也衆必有所比故受之以比比者比也比必有所畜故受之以小畜物畜然後有禮故受之以履履而泰然後安故受之以泰泰者通也物不可以終通故受之以否物不可以終否故受之以同人與人同者物必歸焉故受之以大有有大者不可以盈故受之以謙有大而能謙必豫故受之以豫豫必有隨故受之以隨以喜隨人者必有事故受之以蠱蠱者事也有事而後可大故受之以臨臨者大也物大然後可觀故受之以觀可觀而後有所合故受之以噬嗑嗑者合也物不可以苟合而已故受之以賁

賁者飾也至飾然後亨則盡矣故受之以剝剝者剝也物不可以終盡剝窮上反下故受之以復復則不妄矣故受之以无妄有无妄然後可畜故受之以大畜物畜然後可養故受之以頤頤者養也不養則不可動故受之以大過物不可以終過故受之以坎坎者陷也陷必有所麗故受之以離離者麗也

有天地然後有萬物有萬物然後有男女有男女然後有夫婦有夫婦然後有父子有父子然後有君臣有君臣然後有上下有上下然後禮義有所錯夫婦之道不可以不久也故受之以恆恆者久也物不可以久居其所故受之以遯遯者退也物不可以終遯故受之以大壯物不可以終壯故受之以晉晉者進也進必有所傷故受之以明夷夷者傷也傷於外者必反於家故受之以家人家道窮必乖故受之以睽睽者乖也乖必有難故受之以蹇蹇者難也物不可以終難故受之以解解者緩也緩必有所失故受之以損損而己必益故受之以益益而己必決故受之有夬夬者決也決必有遇故受之以姤姤者遇也物相遇而後聚故受之以萃萃者聚也聚而上者謂之升故受之以升升而己必困故受之以困困乎上者必反下故受

之以井井道不可不革故受之以革革物者莫若鼎故受之以鼎主器者莫若長子故受之以震震者動也物不可以終動止之故受之以艮艮者止也物不可以終止故受之以漸漸者進也進必有所歸故受之以歸妹得其所歸者必大故受之以豐豐者大也窮大者必失其居故受之以旅旅而无所容故受之以巽巽者入也入而後說之故受之以兌兌者說也說而後散之故受之以渙渙者離也物不可以終離故受之以節節而信之故受之以中孚有其信者必行之故受之以小過有過物者必濟故受之以既濟物不可窮也故受之以未濟終焉

雜卦

乾剛坤柔比樂師憂臨觀之義或與或求屯見而不失其居蒙雜而著震起也艮止也損益盛衰之始也大畜時也无妄災也萃聚而升不來也謙輕而豫息也噬嗑食也賁无色也兌見而巽伏也隨无故也蠱則飭也剝爛也復反也晉晝也明夷誅也井通而困相遇也咸速也恆久也渙離也節止也解緩也蹇難也睽外也家人內也否泰反其類也大壯則止遯則退也大有衆也同人親也革去故也鼎取新也小過

過也中孚信也豐多故也親寡族也離上而坎下也小畜寡也履不處也需不進也
訟不親也大過顛也姤遇也柔遇剛也漸女歸待男行也頤養正也既濟定也歸妹
女之終也未濟男之窮也夬決也剛決柔也君子道長小人道憂也

周易終

尙書

虞書

堯典

昔在帝堯聰明文思光宅天下將遜于位讓于虞舜作堯典

曰若稽古帝堯曰放勳欽明文思安安允恭克讓光被四表格子上下克明俊德以親九族九族既睦平章百姓百姓昭明協和萬邦黎民於變時雍乃命羲和欽若昊天曆象日月星辰敬授人時分命羲仲宅嵎夷曰暘谷寅賓出日平秩東作日中星鳥以殷仲春厥民析鳥獸孳尾申命羲叔宅南交平秩南訛敬致日永星火以正仲夏厥民因鳥獸希革分命和仲宅西曰昧谷寅饒納日平秩西成宵中星虛以殷仲秋厥民夷鳥獸毛毳申命和叔宅朔方曰幽都平在朔易日短星昴以正仲冬厥民隩鳥獸氄毛帝曰咨汝羲暨和朞三百有六旬有六日以閏月定四時成歲允釐百工庶績咸熙帝曰疇咨若時登庸放齊曰胤子朱啓明帝曰吁嚚訟可乎帝曰疇咨若予采驩兕曰都共工方鳩僝功帝曰吁靜言庸違象恭滔天帝曰咨四岳湯湯洪

水方割蕩蕩懷山襄陵浩浩滔天下民其咨有能俾乂兪曰於鯀哉帝曰吁咈哉方命圯族岳曰异哉試可乃已帝曰往欽哉九載績用弗成帝曰咨四岳朕在位七十載汝能庸命異朕位岳曰否德忝帝位曰明明揚側陋師錫帝曰有鰥在下曰虞舜帝曰兪予聞如何岳曰瞽子父頑母嚚象傲克諧以孝烝烝乂不格姦帝曰我其試哉女于時觀厥刑于二女釐降二女于嬀汭嬪于虞帝曰欽哉

舜典

虞舜側微堯聞之聰明將使嗣位歷試諸難作舜典

曰若稽古帝舜曰重華協于帝濬哲文明溫恭允塞玄德升聞乃命以位慎徽五典五典克從納于百揆百揆時敘賓于四門四門穆穆納于大麓烈風雷雨弗迷帝曰格汝舜詢事考言乃言底可績三載汝陟帝位舜讓于德弗嗣正月上日受終于文祖在璿璣玉衡以齊七政肆類于上帝禋于六宗望于山川徧于羣神輯五瑞既月乃日覲四岳羣牧班瑞于羣后歲二月東巡守至于岱宗柴望秩于山川肆覲東后協時月正日同律度量衡修五禮五玉三帛二生一死贊如五器卒乃復五月南巡

守至于南岳如岱禮八月西巡守至于西岳如初十有一月朔巡守至于北岳如西
禮歸格于藝祖用特五載一巡守羣后四朝敷奏以言明試以功車服以庸肇十有
二州封十有二山溶川象以典刑流宥五刑鞭作官刑扑作教刑金作贖刑青災肆
赦怙終賊刑欽哉欽哉惟刑之恤哉流共工于幽州放驩兜于崇山竄三苗于三危
殛鯀于羽山四罪而天下咸服二十有八載帝乃俎落百姓如喪考妣三載四海遏
密八音月正元日舜格于文祖詢于四岳闢四門明四目達四聰咨十有二牧曰食
哉惟時遠柔能邇惇德允元而難任人蠻夷率服舜曰咨四岳有能奮庸熙帝之載
使宅百揆亮采惠疇僉曰伯禹作司空帝曰俞咨禹汝平水土惟時懋哉禹拜稽首
讓于稷契暨皋陶帝曰俞汝往哉帝曰棄黎民阻飢汝后稷播時百穀帝曰契百姓
不親五品不遜汝作司徒敬敷五教在寬帝曰皋陶蠻夷猾夏寇賊姦汝作士五
刑有服五服三就五流有宅五宅三居惟明克允帝曰疇若予工僉曰垂哉帝曰俞
咨垂汝共工垂拜稽首讓于爰斯暨伯與帝曰俞往哉汝諧帝曰疇若予上下草木
鳥獸僉曰益哉帝曰俞咨益汝作朕虞益拜稽首讓于朱虎熊羆帝曰俞往哉汝諧

帝曰咨四岳有能典朕三禮僉曰伯夷帝曰兪咨伯汝作秩宗夙夜惟寅直哉惟清伯拜稽首讓于夔龍帝曰兪往欽哉帝曰夔命汝典樂教胄于直而溫寬而栗剛而無虐簡而無傲詩言志歌永言聲依永律和聲八音克諧無相奪倫神人以和夔曰於予擊石拊石百獸率舞帝曰龍朕望說殄行震驚朕師命汝作納言夙夜出納朕命惟允帝曰咨汝二十有二人欽哉惟時亮天功三載考績三考黜陟幽明庶績咸熙分北三苗舜生三十徵庸三十在位五十載陟方乃死

帝釐下土方設居方別生分類作汨作九共九篇稟飫

大禹謨

皋陶矢厥謨禹成厥功帝舜申之作大禹皋陶謨益稷

曰若稽古大禹曰文命敷於四海祗承于帝曰后克艱厥后臣克艱厥臣政乃乂黎民敏德帝曰兪允若茲嘉言罔攸伏野無遺賢萬邦咸寧稽于衆舍己從人不虐無告不廢困窮惟帝時克益曰都帝德廢運乃聖乃神乃武乃文皇天眷命奄有四海爲天下君禹曰惠迪吉從逆凶惟影響益曰吁戒哉儆戒無虞罔失法度罔遊于逸

罔淫于樂任賢勿貳去邪勿疑疑謀勿成百志惟熙罔違道以于百姓之譽罔拂百姓以從己之欲無怠無荒四夷來王禹曰於帝念哉德惟善政政在養民水火金木土穀惟修正德利用厚生惟和九功惟敘九敘惟歌戒之用休董之用威勸之以九歌俾勿壞帝曰俞地平天成六府三事允治萬世永賴時乃功帝曰格汝禹朕宅帝位三十有三載耄期倦于勤汝惟不忘摠朕師禹曰朕德罔克民不依阜陶邁種德德乃降黎民懷之帝念哉念茲在茲釋茲在茲名言茲在茲允出茲在茲惟帝念功帝曰臯陶惟茲臣庶罔或于予正汝作士明于五刑以弼五教期于予治刑期于無刑民協于中時乃功懋哉臯陶曰帝德罔愆臨下以簡御衆以寬罰弗及嗣賞延于世宥過無大刑故無小罪疑惟輕功疑惟重與其殺不辜寧失不經好生之德洽于民心茲用不犯于有司帝曰俾予從欲以治四方風動惟乃之休帝曰來禹降水儆予成允成功惟汝賢克勤于邦克儉于家不自滿假惟汝賢汝惟不矜天下莫與汝爭能汝惟不伐天下莫與汝爭功予懋乃德嘉乃丕績天之歷數在汝躬汝終陟元后人心惟危道心惟微惟精惟一允執厥中無稽之言勿聽弗詢之謀勿庸可愛非

君可畏非民衆非元后何戴后非衆罔與守邦欽哉慎乃有位敬修其可願四海困窮天祿永終惟口出好興戎朕言不再禹曰枚卜功臣惟吉之從帝曰禹官占惟先蔽志昆命于元龜朕志先定詢謀僉同鬼神其依龜筮協從卜不習吉禹拜稽首固辭帝曰毋惟汝諧正月朔旦受命于神宗率百官若帝之初帝曰咨禹惟時有苗弗率汝徂征禹乃會羣后誓于師曰濟濟有衆咸聽朕命蠢茲有苗昏迷不恭侮慢自賢反道敗德君子在野小人在位民棄不保天降之咎肆予以爾衆士奉辭罰罪爾尙一乃心力其克有勳三旬苗民逆命益贊于禹曰惟德動天無遠弗届滿招損謙受益時乃天道帝初于歷山往于田日號泣于旻天于父母負罪引慝祇載見瞽瞍夔夔齋慄誓亦允若至誠感神矧茲有苗禹拜昌言曰兪班師振旅帝乃誕敷文德舞干羽于兩階七旬有苗格

皋陶謨

曰若稽古皋陶曰允迪厥德謨明弼諧禹曰兪如何皋陶曰都慎厥身修思永惇敘九族庶明勵翼邇可遠在茲禹拜昌言曰兪皋陶曰都在知人在安民禹曰吁戚若

時惟帝其難之知人則哲能官人安民則惠黎民懷之能哲而惠何憂乎驩兜何遷乎有苗何畏乎巧言令色孔壬皋陶曰都亦行有九德亦言其人有德乃言曰載采采禹曰何皋陶曰寬而栗柔而立慤而恭亂而敬擾而毅直而溫簡而廉剛而塞彊而義彰厥有常吉哉日宣三德夙夜浚明有家日嚴祇敬六德亮采有邦翕受敷施九德咸事俊乂在官百僚師師百工惟時撫于五辰庶績其凝無教逸欲有邦兢兢業業一日二日萬幾無曠庶官天工人其代之天敍有典勅我五典五惇哉天秩有禮自我五禮有庸哉同寅協恭和衷哉天命有德五服五章哉天討有罪五刑五用哉政事懋哉懋哉天聰明自我民聰明天明畏自我民明威達于上下敬哉有土阜陶曰朕言惠可底行禹曰兪乃言底可績皋陶曰予未有知思曰贊贊襄哉

益稷

帝曰來禹汝亦昌言禹拜曰都帝予何言予思日孜孜皋陶曰吁如何禹曰洪水滔天浩浩懷山襄陵下民昏墊予乘四載隨山刊木暨益奏庶鮮食予決九川距四海濬畎澮距川暨稷播奏庶艱食鮮食懋遷有無化居烝民乃粒萬邦作乂皋陶曰兪

師汝昌言禹曰都帝慎乃在位帝曰兪禹曰安汝止惟幾惟康其弼直惟動丕應後志以昭受上帝天其申命用休帝曰吁臣哉鄰哉鄰哉臣哉禹曰兪帝曰臣作朕股肱耳目予欲左右有民汝翼予欲宣力四方汝爲予欲觀古人之象日月星辰山龍華蟲作會宗彝藻火粉米黼黻絺繡以五采彰施于五色作服汝明予欲聞六律五聲八音在治忽以出納五言汝聽予違汝弼汝無面從退有後言欽四鄰庶頑讒說若不在時候以明之撻以記之書用讖哉欲並生哉工以納言時而颺之格則承之庸之否則威之禹曰兪哉帝光天之下至于海隅蒼生萬邦黎獻共惟帝臣惟帝時舉敷納以言明庶以功車服以庸誰敢不讓敢不敬應帝不時敷同日奏罔功無若丹朱傲惟慢遊是好傲處是作罔晝夜頌頌罔水行舟朋淫于家用殄厥世予創若時娶于塗山辛壬癸甲啓呱呱而泣予弗子惟荒度土功弼成五服至于五千州十有二師外薄四海咸建五長各迪有功苗頑弗卽工帝其念哉帝曰迪朕德時乃功惟敘皋陶方祗厥敘方施象刑惟明夔曰憂擊鳴球搏拊琴瑟以詠祖考來格虞賓在位羣后德讓下管鼗鼓合止祝敔笙鏞以間鳥獸跄跄簫韶九成鳳皇來儀夔曰

於予擊石拊石百獸率舞庶尹允諧帝庸作歌曰勅天之命惟時惟幾乃歌曰股肱
喜哉元首起哉百工熙哉阜陶拜手稽首颺言曰念哉率作興事慎乃憲欽哉屢省
乃成欽哉乃唐載歌曰元首明哉股肱良哉庶事康哉又歌曰元首叢脞哉股肱惰
哉萬事墮哉帝拜曰兪往欽哉

夏書

禹貢

禹別九州隨山濬川任土作貢

禹敷土隨山刊木奠高山大川冀州既載壺口治梁及岐既修太原至于岳陽覃懷
底績至于衡漳厥土惟白壤厥賦惟上上錯厥田惟中中恆衛既從大陸既作島夷
皮服夾右碣石入于河濟河惟兗州九河既道雷夏既澤灘沮會同桑土既蠶是降
丘宅土厥土黑墳厥草惟絲厥木惟條厥田惟中下厥賦貞作十有三載乃同厥貢
漆絲厥篋織文浮于濟漯達于河海岱惟青州嵎夷既略濰淄其道厥土白墳海濱
廣斥厥田惟上下厥賦中上厥貢鹽絺海物惟錯岱畎絲枲松怪石萊夷作牧厥

篚屨絲浮于汶達于濟海岱及淮惟徐州淮沂其乂蒙羽其藝大野既豬東原底平厥土赤埴墳草木漸包厥田惟上中厥賦中中厥貢惟土五色羽畎夏翟陽孤桐泗濱浮磬淮夷蠙珠暨魚厥篚玄纁縞浮于淮泗達于河淮海惟揚州彭蠡既豬陽鳥攸居三江既入震澤底定篠簜既敷厥草惟夭厥木惟喬厥土惟塗泥厥田惟下下厥賦下上錯厥貢惟金三品璠璣篠簜齒革羽毛惟木鳥夷卉服厥篚織貝厥包橘柚錫貢浚于江海達于淮泗荆及衡陽惟荊州江漢朝宗于海九江孔殷沱潛既道雲土夢作乂厥土惟塗泥厥田惟下中厥賦上下厥貢羽毛齒革惟金三品杗榦栝柏礪砥磬丹惟箇籛栝三邦底貢厥名包匭菁茅厥篚玄纁璣組九江納錫大龜浮于江沱潛漢逾于洛至于南河荆河惟豫州伊洛瀝澗既入于河滎波既豬導菏澤被孟豬厥土惟壤下土墳墟厥田惟中上厥賦錯上中厥貢漆枲絺紵厥篚織纈錫貢磬錯浮于洛達于河華陽黑水惟梁州岷嶓既藝沱潛既道蔡蒙旅平夷底績厥土青黎厥田惟下上厥賦下中三錯厥貢璆鐵銀鏤砮磬熊羆狐狸織皮西傾因桓是來浮于潛逾于沔入于渭亂于河黑水西河惟雍州弱水既西涇屬渭汭漆

沮既從澧水攸同荆岐既旅終南惇物至于鳥鼠原隰底績至于豬野三危既宅三苗丕紘厥土惟黃壤厥田惟上上厥賦中下厥貢惟球琳琅玕浮于積石至于龍門西河會于渭汭織皮岷崑析支渠搜西戎卽紘導岍及岐至于荆山逾于河壺口雷首至于太岳底柱析城至于王屋太行恆山至于碣石入于海西傾朱圉鳥鼠至于太華熊耳外方桐柏至于陪尾導嶓冢至于荆山內方至于大別岷山之陽至于衡山過九江至于敷淺原導弱水至于合黎餘波入于流沙導黑水至于三危入于南海導河積石至于龍門南至于華陰東至于底柱又東至于孟津東過洛汭至于大伾北過降水至于大陸又北播爲九河同爲逆河入于海嶧冢導濊東流爲漢又東爲滄浪之水過三澨至于大別南入于江東匯澤爲彭蠡東爲北江入于海岷山導江東別爲沱又東至于澧過九江至于東陵東迤北會于匯東爲中江入于海導沈水東流爲濟入于河溢爲滎東出于陶邱北又東至于潁又東北會于汝又北東入于海導淮自桐柏東會于泗沂東入于海導渭自鳥鼠同穴東會于澧又東會于涇又東過漆沮入于河導洛自熊耳東北會于澗灋又東會于伊又東北入于河九州

攸同四隩既宅九山刊旅九川滌源九澤既陂四海會同六府孔修庶土交正底慎財賦咸則三壤成賦中邦錫土姓祇台德先不距朕行五百里甸服百里賦納總二百里納銍三百里納秸服四百里粟五百里米五百里侯服百里采二百里男邦二百里諸侯五百里綏服三百里揆文教二百里奮武衛五百里要服三百里夷二百里蔡五百里荒服三百里蠻二百里流東漸于海西被于流沙朔南暨聲教訖于四海禹錫玄圭告厥成功

甘誓

啓與有扈戰于甘之野作甘誓

大戰于甘乃召六卿王曰嗟六事之人予誓告汝有扈氏威侮五行怠棄三正天用勳絕其命今予惟恭行天之罰左不攻于左汝不恭命右不攻于右汝不恭命御非其馬之正汝不恭命用命賞于祖弗用命戮于社予則孥戮汝

五子之歌

太康失邦昆弟五人須于洛汭作五子之歌

太康尸位以逸豫滅厥德黎民咸貳乃盤遊無度畋于有洛之表十旬弗反有窮后羿因民弗忍距于河厥弟五人御其母以從徯于洛之汭五子咸怨述大禹之戒以作歌其一曰皇祖有訓民可近不可下民惟邦本本固邦寧予視天下愚夫愚婦一能勝予一人三矢怨豈在明不見是圖予臨兆民懷乎若朽索之馭六馬爲人上者柰何不敬其二曰訓有之內作色荒外作禽荒甘酒嗜音峻宇彫牆有一于此未或不亡其三曰惟彼陶唐有此冀方今失厥道亂其紀綱乃底滅亡其四曰明明我祖萬邦之君有典有則貽厥子孫關石和鈞王府則有荒墜厥緒覆宗絕祀其五曰嗚呼曷歸予懷之悲萬姓仇予予將疇依鬱陶乎予心顏厚有忸怩弗慎厥德雖悔可追

胤征

羲和湏淫廢時亂日胤往征之作胤征

惟仲康肇位四海胤侯命掌六師羲和廢厥職酒荒于厥邑胤后承王命徂征告于衆曰嗟予有衆聖有謨訓明徵定保先王克謹天戒臣人克有常憲百官修輔厥后

惟明明每歲孟春道人以木鐸徇于路官師相規工執藝事以諫其或不恭邦有常刑惟時義和顛覆厥德沈亂于酒畔官離次傲擾天紀退棄厥司乃季秋月朔辰弗集于房譬奏鼓齋夫馳庶人走義和尸厥官罔聞知昏迷于天象以干先王之誅政典曰先時者殺無赦不及時者殺無赦今予以爾有衆奉將天罰爾衆士同力王室尙弼予欽承天子威命火炎崐岡玉石俱焚天吏逸德烈于猛火殲厥渠魁脅從罔治舊染汙俗咸與惟新嗚呼威克厥愛允濟愛克厥威允罔功其爾衆士懋戒哉

自契至于成湯八遷湯始居亳從先王居作帝告釐沃

湯征諸侯葛伯不祀湯始征之作湯征

伊尹去亳適夏既醜有夏復歸于亳入自北門乃遇汝鳩汝方作汝鳩汝方

商書

湯誓

伊尹相湯伐桀升自陟遂與桀戰于鳴條之野作湯誓

王曰格爾衆庶悉聽朕言非台小子敢行稱亂有夏多罪天命殛之今爾有衆汝曰

我后不恤我衆舍我穡事而割正夏予惟聞汝衆言夏氏有罪予畏上帝不敢不正
今汝其曰夏罪其如台夏王率遏衆力率割夏邑有衆率怠弗協曰時日曷喪予及
汝皆亡夏德若茲今朕必往爾尙輔予一人致天之罰予其大寶汝爾無不信朕不
食言爾不從誓言予則孥戮汝罔有攸赦

湯既勝夏欲遷其社不可作夏社疑至臣扈

夏師敗績湯遂從之遂伐三腹俘厥寶玉誼伯仲伯作典寶

仲虺之誥

湯歸自夏至于大坰仲虺作誥

成湯放桀于南巢惟有慙德曰予恐來世以台爲口實仲虺乃作誥曰嗚呼惟天生
民有欲無主乃亂惟天生聰明時又有夏昏德民墜塗炭天乃錫王勇智表正萬邦
纘禹舊服茲率厥典奉若天命夏王有罪矯誣上天以布命于下帝用不臧式商受
命用爽厥師簡賢附勢塞繁有徒肇我邦予有夏若苗之有莠若粟之有秕小大戰
戰罔不懼于非辜矧予之德言足聽聞惟王不邇聲色不殖貨利德懋懋官功懋懋

賞用人惟己改過不吝克寬克仁彰信兆民乃葛伯仇餉初征自葛東征西夷怨南征北狄怨曰奚獨後予攸徂之民室家相慶曰徯予后后来其蘇民之戴商厥惟舊哉佑賢輔德顯忠遂良兼弱攻昧取亂侮亡推亡固存邦乃其昌德日新萬邦惟懷志自滿九族乃離王懋昭大德建中于民以義制事以禮制心垂裕後昆予聞曰能自得師者王謂人莫己若者亡好問則裕自用則小嗚呼慎厥終惟其始殖有禮履昏暴欽崇天道永保天命

湯誥

湯既黜夏命復歸于亳作湯誥

王歸自克夏至于亳誕告萬方王曰嗟爾萬方有衆明聽予一人誥惟皇上帝降衷于下民若有恆性克綏厥猷惟后夏王滅德作威以敷虐于爾萬方百姓爾萬方百姓罹其凶害弗忍荼毒並告無辜于上下神祇天道福善禍淫降災于夏以彰厥罪肆台小子將天命明威不敢赦敢用玄牡敢昭告于上天神后請罪有夏聿求元聖與之戮力以與爾有衆請命上天孚佑下民罪人黜伏天命弗僭賈若草木兆民允

殖俾予一人輯寧爾邦茲朕未知獲戾于上下慄慄危懼若將隕于深淵凡我造邦無從匪彜無卽悖淫各守爾典以承天休爾有善朕弗敢蔽罪當朕躬弗敢自赦惟簡在上帝之心其爾萬方有罪在予一人予一人有罪無以爾萬方嗚呼尙克時忱乃亦有終咎單作明居

伊訓

成湯既沒太甲元年伊尹作伊訓肆命徂后

惟元祀十有二月乙丑伊尹祠于先王奉嗣王祗見厥祖侯甸羣后咸在百官總己以聽冢宰伊尹乃明言烈祖之成德以訓于王曰嗚呼古有夏先后方懋厥德罔有天災山川鬼神亦莫不寧暨鳥獸魚鼈咸若于其于孫弗率皇天降災假手于我有命造攻自嗚條朕哉自亳惟我商王布昭聖武代虐以寬兆民允懷今王嗣厥德罔不在初立愛惟親立敬惟長始于家邦終於四海嗚呼先王肇修人紀從諫弗拂先民時若居上克明爲下克忠與人不求備檢身若不及以至于有萬邦茲惟艱哉敷

求哲人俾輔于爾後嗣制官刑儆于有位曰敢有恆舞于宮酣歌于室時謂巫風敢有殉于貨色恆于遊畋時謂淫風敢有侮聖言逆忠直遠耆德比頑童時謂亂風惟茲三風十愆卿士有一于身家必喪邦君有一于身國必亡臣下不匡其刑墨具訓于蒙士嗚呼嗣王祇厥身念哉聖謨洋洋嘉言孔彰惟上帝不常作善降之百祥作不善降之百殃爾惟德罔小萬邦惟慶爾惟不德罔大墜厥宗

肆命

徂后

太甲上

太甲既立不明伊尹放諸桐三年復歸于亳思庸伊尹作太甲三篇

惟嗣王不惠于阿衡伊尹作書曰先王顧諟天之明命以承上下神祇社稷宗廟罔不祇肅天監厥德用集大命撫綏萬方惟尹躬克左右厥辟宅師肆嗣王丕承基緒惟尹躬先見于西邑夏自周有終相亦惟終其後嗣王罔克有終相亦罔終嗣王戒哉祇爾厥辟辟不辟忝厥祖王惟庸罔念聞伊尹乃言曰先王昧爽丕顯坐以待旦

旁求俊彥啓迪後人無越厥命以自覆愼乃儉德惟懷永圖若虞機張往省括于度則釋欽厥止率乃祖攸行惟朕以懌萬世有辭王未克變伊尹曰茲乃不義習與性成予弗狎于弗順營于桐宮密邇先王其訓無俾世迷王徂桐宮居憂克終允德

太甲中

惟三祀十有二月朔伊尹以冕服奉鬯王歸于亳作書曰民非后罔克胥匡以生后非民罔以辟四方皇天眷佑有商俾嗣王克終厥德實萬世無疆之休王拜手稽首曰予小子不明于德自底不類欲敗度縱敗禮以速戾于厥躬天作孽猶可違自作孽不可逭既往背師保之訓弗克于厥初尙賴匡救之德圖惟厥終伊尹拜手稽首曰修厥身允德協于下惟明后先王子惠困窮民服厥命罔有不悅並其有邦厥鄰乃曰後我后后來無罰王懋乃德視乃厥祖無時豫怠奉先思孝接下思恭視遠惟明聽德惟聰朕承王之休無斁

太甲下

伊尹申誥于王曰嗚呼惟天無親克敬惟親民罔常懷懷于有仁鬼神無常享享于

克誠天位艱哉德惟治否德亂與治同道罔不興與亂同事罔不亡終始慎厥與惟明明后先王惟時懋敬厥德克配上帝今王嗣有令緒尙監茲哉若升高必自下若陟遐必自邇無輕民事惟難無安厥位惟危慎終于始有言逆于汝心必求諸道有言遜于汝志必求諸非道嗚呼弗慮胡獲弗爲胡成一元良萬邦以貞君罔以辯言亂舊政臣罔以寵利居成功邦其永孚于休

咸有一德

伊尹作咸有一德

伊尹既復政厥辟將告歸乃陳戒于德曰嗚呼天難謀命靡常常厥德保厥位厥德匪常九有以亡夏王弗克庸德慢神虐民皇天弗保監于萬方啓迪有命眷求一德俾作神主惟尹躬暨湯咸有一德克享天心受天明命以有九有之師爰革夏正非天私我有商惟天佑于一德非商求于下民惟民歸于一德德惟一動罔不吉德二三動罔不凶惟吉凶不僭在人惟天降災祥在德今嗣王新服厥命惟新厥德終始惟一時乃日新任官惟賢材左右惟其人臣爲上爲德爲下爲民其難其慎惟和惟

一德無常師主善爲師善無常主協于克一仲萬姓咸曰大哉王言又曰一哉王心克綏先王之祿永底烝民之生嗚呼七世之廟可以觀德萬夫之長可以觀政后非民罔使民非后罔事無自廣以狹人匹夫匹婦不獲自盡民主罔與成厥功沃丁既葬伊尹于亳咎單遂訓伊尹事作沃丁

伊陟相大戊亳有祥桑穀共生于朝伊陟贊于巫咸作咸乂四篇

太戊贊于伊陟作伊陟原命

仲丁遷于囂作仲丁

河亶甲居相作河亶甲

祖乙圮于耿作祖乙

盤庚上

盤庚五遷將治亳殷民咨胥怨作盤庚三篇

盤庚遷于殷民不適有居率籲衆慙出矢言曰我王來既爰宅于茲重我民無盡劉不能胥匡以生卜稽曰其如台先王有服恪謹天命茲猶不常寧不常厥邑于今五

邦今不承于古罔知天之斷命矧曰其克從先王之烈若顯木之有由藥天其永我命于茲新邑紹復先王之大業底綏四方盤庚敷于民由乃在位以常舊服正法度曰無或敢伏小人之攸箴王命衆悉至于庭王若曰格汝衆予告汝訓汝猷黜乃心無傲從康古我先王亦惟圖任舊人共政王播告之脩不匿厥指王用丕欽罔有逸言民用丕變今汝聒聒起信險膚予弗知乃所訟非予自荒茲德惟汝含德不惕予一人予告若觀火予亦拙謀作乃逸若網在綱有條而不紊若農服田力穡乃亦有秋汝克黜乃心施實德于民至于婚友丕乃敢大言汝有積德乃不畏戎毒于遠邇惰農自安不昏作勞不服田畝越其罔有黍稷汝不和吉言于百姓惟汝自生毒乃敢禍姦宄以自災于厥身乃既先惡于民乃奉其恫汝悔身何及相時愴民猶胥顯于箴言其發有逸口矧予制乃短長之命汝曷弗告朕而胥勤以浮言恐沈于衆若火之燎于原不可嚮邇其猶可撲滅則惟汝衆自作弗靖非予有咎遲任有言曰人性求舊器非求舊惟新古我先王暨乃祖乃父胥及逸勤予敢動用非罰世選爾勞予不掩爾善茲予大享于先王爾祖其從與享之作福作災予亦不敢動用非德予告

汝于難若射之有志汝無侮老成人無弱孤有幼各長于厥居勉出乃力聽予一人之作猷無有遠邈用罪伐厥死用德彰厥善邦之臧惟汝衆邦之不臧惟予一人有佚罰凡爾衆其惟致告自今至于後日各恭爾事齊乃位度乃口罰及爾身弗可悔

盤庚中

盤庚作惟涉河以民遷乃話民之弗率誕告用亶其有衆咸造勿褻在王庭盤庚乃登進厥民曰明聽朕言無荒失朕命嗚呼古我前后罔不惟民之承保后胥感鮮以不浮于天時殷降大虐先王不懷厥攸作視民利用遷汝曷弗念我古后之聞承汝俾汝惟喜康共非汝有咎比于罰予若籲懷茲新邑亦惟汝故以丕從厥志今予將試以汝遷安定厥邦汝不憂朕心之攸困乃戚大不宣乃心欽念以忱動予一人爾惟自鞠自苦若乘舟汝弗濟臭厥載爾忱不屬惟得沈不其或稽自怒曷瘳汝不謀長以思乃災汝誕勸變今其有今罔後汝何生在上今予命汝一無起穢以自臭恐人倚乃身迂乃心予迓續乃命于天予豈汝威用奉畜汝衆予念我先神后之勞爾先予丕克羞爾用懷爾然失于政陳于茲高后丕乃崇降罪疾曰曷虐朕民汝萬

民乃不生。生暨予一人，猷同心先后，丕降與汝罪疾。曰曷不暨朕幼孫，有比故有爽德。自上其罰汝，汝罔能迪。古我先后既勞，乃祖乃父，汝共作我畜民。汝有戕則在，乃心我先后。綏乃祖乃父，乃祖乃父乃斷棄汝，不救乃死。茲予有亂政，同位具乃貝玉。乃祖乃父丕乃告我高后，曰：「作丕刑于朕孫。」迪高后丕乃崇降弗祥，嗚呼！今予告汝，不易永敬，大恤無胥絕遠。汝分猷念以相從，各設中于乃心，乃有不吉不迪，顛越不恭，暫遇姦宄，我乃劓殄滅之，無遺育，無俾易種于茲新邑。往哉！生生，今予將試以汝遷，永建乃家。

盤庚下

盤庚既遷，奠厥攸居，乃正厥位。綏爰有衆，曰：「無戲怠，懋建大命。」今予其敷心腹腎腸，歷告爾百姓于朕志。罔罪爾衆，爾無共怒。協比讒言，予一人古我先王將多于前功。適于山，用降我凶德。嘉績于朕邦，今我民用蕩析離居。罔有定極，爾謂朕曷震動萬民，以遷肆上帝，將復我高祖之德。亂越我家，朕及篤敬，恭承民命，用永地于新邑。肆予冲人，非廢厥謀，弔由靈，各非敢違。卜用宏茲賁，嗚呼！邦伯師長百執事之人，尚皆

隱哉予其懋簡相爾念敬我衆朕不肩好貨敢恭生生鞠人謀人之保居敘欽今我
既羞告爾于朕志若否罔有弗欽無總于貨寶生生自庸式敷民德永肩一心

說命上

高宗夢得說使百工營求諸野得諸傅巖作說命三篇

王宅憂亮陰三祀既免喪其惟弗言羣臣咸諫于王曰嗚呼知之曰明哲明哲實作
則天子惟君萬邦百官承式王言惟作命不言臣下罔攸稟命王庸作書以誥曰以
台正于四方惟恐德弗類茲故弗言恭默思道夢帝賚予良弼其代予言乃審厥象
俾以形旁求于天下說築傅巖之野惟肖爰立作相王置諸其左右命之曰朝夕納
誨以輔台德若金用汝作礪若濟巨川用汝作舟楫若歲大旱用汝作霖雨啓乃心
沃朕心若藥弗瞑眩厥疾弗瘳若跣弗視地厥足用傷惟暨乃僚罔不同心以匡乃
辟俾率先王迪我高后以康兆民嗚呼欽予時命其惟有終說復于王曰惟木從繩
則正后從諫則聖后克聖臣不命其承疇敢不祇若王之休命

說命中

惟說命總百官乃進于王曰嗚呼明王奉若天道建邦設都樹后王君公承以大夫師長不惟逸豫惟以亂民惟天聰明惟聖時憲惟臣欽若惟民從乂惟口起羞惟甲冑起戎惟衣裳在笥惟干戈省厥躬王惟戒茲允茲克明乃罔不休惟治亂在庶官官不及私昵惟其能爵罔及惡德惟其賢慮善以動勸惟厥時有其善喪厥善矜其能喪厥功惟事事乃其有備有備無患無啓寵納侮無恥過作非惟厥攸居政事惟醇黷于祭祀時謂弗欽禮煩則亂事神則難王曰旨哉說乃言惟服乃不良于言予罔聞于行說拜稽首曰非知之艱行之惟艱王忱不艱允協于先王成德惟說不言有厥咎

說命下

王曰來汝說台小子舊學于甘盤既乃遜于荒野入宅于河自河徂亳暨厥終罔顯爾惟訓于朕志若作酒醴爾惟鞠彙若作和羹爾惟鹽梅爾交脩予罔予棄予惟克邁乃訓說曰王人求多聞時惟建事學于古訓乃有獲事不師古以克永世匪說攸聞惟學遜志務時敏厥脩乃來允懷于茲道積于厥躬惟教學半念終始典于學厥

德脩罔覺監于先王成憲其永無愆惟說式克欽承旁招俊乂列于庶位王曰嗚呼說四海之內咸仰朕德時乃風股肱惟人良臣惟聖昔先正保衡作我先王乃曰予弗克俾厥后惟堯舜其心愧恥若撻于市一夫不獲則曰時予之辜佑我烈祖格于皇天爾尙明保予罔俾阿衡專美有商惟后非賢不乂惟賢非后不食其爾克紹乃辟于先王永綏民說拜稽首曰敢對揚天子之休命

高宗彤日

高宗祭成湯有飛雉升鼎耳而雝祖已訓諸王作高宗彤日高宗之訓

高宗彤日越有雝雝祖已曰惟先格王正厥事乃訓于王曰惟天監下民典厥義降年有永有不永非天天民民中絕命民有不若德不聽罪天既孚命正厥德乃曰其如台嗚呼王司敬民罔非天胤典祀無豐于昵

西伯戡黎

殷始咎周周人乘黎祖伊恐奔告于受作西伯戡黎

西伯既戡黎祖伊恐奔告于王曰天子天既訖我殷命格人元龜罔敢知吉非先王

不相我後人惟王淫戲用自絕故天棄我不有康食不虞天性不迪率典今我民罔弗欲喪曰天曷不降威大命不摯今王其如台王曰嗚呼我生不有命在天祖伊反曰嗚呼乃罪多參在上乃能責命于天殷之卽喪指乃功不無戮于爾邦

微子

殷既錯天命微子作誥父師少師

微子若曰父師少師殷其弗或亂正四方我祖底遂陳于上我用沈酗于酒用亂斂厥德于下殷罔不小大好草竊姦宄卿士師師非度凡有辜罪乃罔恆獲小民方興相爲敵讎今殷其淪喪若涉大水其無津涯殷遂喪越至于今日父師少師我其發出狂吾家老遜于荒今爾無指告予顛隲若之何其父師若曰王子天毒降災荒殷邦方興沈酗于酒乃罔畏畏拂其耇長舊有位人今殷民乃攘竊神祇之犧牲牲用以容將食無災降監殷民用乂讎斂召敵讎不怠罪合于一多瘠罔詔商今其有災我興受其敗商其淪喪我罔爲臣僕詔王子出迪我舊云刻子王子弗出我乃顛隲自靖人自獻于先王我不顧行遯

周書

泰誓上

惟十有一年武王伐殷一月戊午師渡孟津作泰誓三篇

惟十有三年春大會于孟津王曰嗟我友邦冢君越我御事庶士明聽誓惟天地萬物父母惟人萬物之靈賈聰明作元后元后作民父母今商王受弗敬上天降災下民沈湎冒色敢行暴虐罪人以族官人以世惟宮室臺榭陂池侈服以殘害于爾萬姓焚炙忠良剝剔孕婦皇天震怒命我文考肅將天威大勦未集肆予小子發以爾友邦冢君觀政于商惟受罔有悛心乃夷居弗事上帝神祇遺厥先宗廟弗祀犧牲粢盛既于凶盜乃曰吾有民有命罔懲其侮天佑下民作之君作之師惟其克相上帝寵綏四方有罪無罪予曷敢有越厥志同力度德同德度義受有臣億萬惟億萬心予有臣三千惟一心商罪貫盈天命誅之予弗順天厥罪惟鈞予小子夙夜祇懼受命文考類于上帝宜于冢土以爾有衆底天之罰天矜于民民之所欲天必從之爾尙弼予一人永清四海時哉弗可失

泰誓中

惟戊午王次于河朔羣后以師畢會王乃徇師而誓曰嗚呼西土有衆咸聽朕言我聞吉人爲善惟日不足凶人爲不善亦惟日不足今商王受力行無度播棄黎老呢比罪人淫醜肆虐臣下化之朋家作仇脅權相滅無辜籲天穢德彰聞惟天惠民惟辟奉天有夏桀弗克若天流毒下國天乃佑命成湯降黜夏命惟受罪浮于桀剝喪元良賊虐諫輔謂己有天命謂敬不足行謂祭無益謂暴無傷厥監惟不遠在彼夏王天其以予乂朕朕夢協朕卜襲于休祥戎商必克受有億兆夷人離心離德予有亂臣十人同心同德雖有周親不如仁人天視自我民視自我民聽自我民聽百姓有過在予一人今朕必往我武惟揚侵于之疆取彼凶殘我伐用張于湯有光助哉夫子罔或無畏寧執非敵百姓懷懷若崩厥角嗚呼乃一德一心立定厥功惟克永世

泰誓下

時厥明王乃大巡六師明誓衆士王曰嗚呼我西土君子天有顯道厥類惟彰今商王受狎侮五常荒怠弗敬自絕于天結怨于民斷朝涉之脛剖賢人之心作威殺戮

毒疇四海崇信姦回放黜師保屏棄典刑囚奴正士郊社不修宗廟不享作奇技淫巧以悅婦人上帝弗順祝降時喪爾其孜孜奉予一人恭行天罰古人有言曰撫我則后虐我則讎獨夫受洪惟作威乃汝世讎樹德務滋除惡務本肆予小子誕以爾衆士殄殲乃讎爾衆士其尙迪果毅以登乃辟功多有厚賞不迪有顯戮嗚呼惟我文考若日月之照臨光于四方顯于西土惟我有周誕受多方予克受非予武惟朕文考無罪受克予非朕文考有罪惟予小子無良

牧誓

武王戎車三百兩虎賁三百人與受戰于牧野作牧誓

時甲子昧爽王朝至于商郊牧野乃誓王左杖黃鉞右秉白旄以麾曰逖矣西土之人王曰嗟我友邦冢君御事司徒司馬司空亞旅師氏千夫長百夫長及庸蜀羌髣微盧彭濮人稱爾戈比爾干立爾矛予其誓王曰古人有言曰牝雞無晨牝雞之晨惟家之索今商王受惟婦言是用昏棄厥肆祀弗吝昏棄厥遺王父母弟不迪乃惟四方之多罪逋逃是崇是長是信是使是以爲大夫卿士俾暴虐于百姓以姦宄于

商邑今予發惟恭行天之罰今日之事不愆于六步七步乃止齊焉夫子勛哉不愆于四伐五伐六伐七伐乃止齊焉勛哉夫子尚桓桓如虎如貔如熊如羆于商郊弗迓克奔以役西土勛哉夫子爾所弗勛其于爾躬有戮

武成

武王伐殷往伐歸獸識其政事作武成

惟一月壬辰旁死魄越翼日癸巳王朝步自周于征伐商厥四月哉生明王來自商至于豐乃偃武修文歸馬于華山之陽放牛于桃林之野示天下弗服丁未祀于周廟邦甸侯衛駿奔走執豆籩越三日庚戌柴望大告武成既生魄庶邦冢君暨百工受命于周王若曰嗚呼羣后惟先王建邦啓土公劉克篤前烈至于大王肇基上迹王季其勤王家我文考文王克成厥勳誕膺天命以撫方夏大邦畏其力小邦懷其德惟九年大統未集予小子其承厥志底商之罪告于皇天后土所過名山大川曰惟有道曾孫周王發將有大正于商今商王受無道暴殄天物害虐烝民爲天下逋逃主萃淵藪予小子旣獲仁人敢祇承上帝以遏亂略華夏蠻貊罔不率俾恭天成

命肆予東征綏厥士女惟其士女饑厥玄黃昭我周王天休震動用附我大邑周惟爾有神尙克相予以濟兆民無作神羞既戊午師逾孟津癸亥陳于商郊俟天休命甲子昧爽受率其旅若林會于牧野罔有敵子我師前徒倒戈攻于後以北血流漂杵一戎衣天下大定乃反商政政由舊釋箕子囚封比于墓式商容闔散鹿臺之財發鉅橋之粟大賚于四海而萬姓悅服列爵惟五分土惟三建宮惟賢位事惟能重民五教惟食喪祭惇信明義崇德報功垂拱而天下治

洪範

武王勝殷殺受立武庚以箕子歸作洪範

惟十有三祀王訪于箕子王乃言曰嗚呼箕子惟天陰隲下民相協厥居我不知其彝倫攸斁箕子乃言曰我聞在昔鯀陞洪水汨陳其五行帝乃震怒不畀洪範九疇彝倫攸斁鯀則殛死禹乃嗣興天乃錫禹洪範九疇彝倫攸斁初一曰五行次二曰敬用五事次三曰農用八政次四曰協用五紀次五曰建用皇極次六曰又用三德次七曰明用稽疑次八曰念用庶徵次九曰嚮用五福威用六極一五行一曰水二

曰火三曰木四曰金五曰土水曰潤下火曰炎上木曰曲直金曰從革土爰稼穡潤下作鹹炎上作苦曲直作酸從革作辛稼穡作甘二五事一曰貌二曰言三曰視四曰聽五曰思貌曰恭言曰從視曰明聽曰聰思曰睿恭作肅從作乂明作哲聰作謀睿作聖三八政一曰食二曰貨三曰祀四曰司空五曰司徒六曰司寇七曰賓八曰師四五紀一曰歲二曰月三曰日四曰星辰五曰曆數五皇極皇建其有極斂時五福用敷錫厥庶民惟時厥庶民于汝極錫汝保極凡厥庶民無有淫朋人無有比德惟皇作極凡厥庶民有猷有爲有守汝則念之不協于極不懼于咎皇則受之而康而色曰予攸好德汝則錫之福時人斯其惟皇之極無虐贊獨而畏高明人之有能有爲使羞其行而邦其昌凡厥正人既富方穀汝弗能使有好于而家時人斯其率于其無好德汝雖錫之福其作汝用咎無偏無陂遵王之義無有作好遵王之道無有作惡遵王之路無偏無黨王道蕩蕩無黨無偏王道平平無反無側王道正直會其有極歸其有極曰皇極之敷言是彝是訓于帝其訓凡厥庶民極之敷言是訓是行以近天子之光曰天子作民父母以爲天下王六三德一曰正直二曰剛克三曰

柔克平康正直彊弗友剛克變友柔克沈潛剛克高明柔克惟辟作福惟辟作威惟
辟玉食臣無有作福作威玉食臣之有作福作威玉食其害于而家凶于而國人用
側頗僻民用僭忒七稽疑擇建立卜筮人乃命卜筮曰雨曰霽曰蒙曰驛曰克曰貞
曰悔凡七卜五占用二衍忒立時人作卜筮三人占則從二人之言汝則有大疑謀
及乃心謀及卿士謀及庶人謀及卜筮汝則從龜從筮從卿士從庶民從是之謂大
同身其康彊子孫其逢吉汝則從龜從筮從卿士逆庶民逆吉卿士從龜從筮從汝
則逆庶民逆吉庶民從龜從筮從汝則逆卿士逆吉汝則從龜從筮逆卿士逆庶民
逆作內吉作外凶龜筮共違于人用靜吉用凶人庶徵曰雨曰暘曰燠曰寒曰風
曰時五者來備各以其綏庶草蕃廡一極備凶一極無凶曰休徵曰肅時雨若曰乂
時暘若曰暫時燠若曰謀時寒若曰聖時風若曰咎徵曰狂恆雨若曰僭恆暘若曰
豫恆燠若曰急恆寒若曰蒙恆風若曰王省惟歲卿士惟月師尹惟日歲月日時無
易百穀用成乂用明俊民用章家用平康日月歲時既易百穀用不成乂用昏不明
俊民用微家用不寧庶民惟星星有好風星有好雨日月之行則有冬有夏月之從

星則以風雨九五福一日壽二曰富三曰康寧四曰攸好德五曰考終命六極一日凶短折二曰疾三曰憂四曰貧五曰惡六曰弱

武王既勝殷邦諸侯班宗彝作分器

旅獒

西旅獻獒太保作旅獒

惟克商遂通道于九夷八蠻西旅底貢厥獒太保乃作旅獒用訓于王曰嗚呼明王慎德四夷咸賓無有遠邇畢獻方物惟服食器用王乃昭德之致于異姓之邦無替厥服分寶玉于伯叔之國時庸展親人不易物惟德其物德盛不狎侮狎侮君子罔以盡人心狎侮小人罔以盡其力不役耳目百度惟貞玩人喪德玩物喪志志以道寧言以道接不作無益害有益功乃成不貴異物賤用物民乃足犬馬非其土性不畜珍禽奇獸不育于國不寶遠物則遠人格所寶惟賢則邇人安嗚呼夙夜罔或不勤不矜細行終累大德爲山九仞功虧一簣允迪茲生民保厥居惟乃世王

巢伯來朝芮伯作旅巢命

金縢

武王有疾周公作金縢

既克商二年王有疾弗豫二公曰我其爲王穆卜周公曰未可以戚我先王公乃自以爲功爲三壇同墀爲壇於南方北面周公立焉植璧秉珪乃告大王王季文王史乃册祝曰惟爾元孫某遘厲虐疾若爾三王是有丕子之責于天以旦代某之身予仁若考能多材多藝能事鬼神乃元孫不若且多材多藝不能事鬼神乃命于帝庭敷佑四方用能定爾子孫于下地四方之民罔不祇畏嗚呼無墜天之降寶命我先王亦永有依歸今我卽命于元龜爾之許我我其以璧與珪歸俟爾命爾不許我我乃屏璧與珪乃卜三龜一習吉啓籒兒書乃并是吉公曰體王其罔害予小子新命于三王惟永終是圖茲攸俟能念予一人公歸乃納册于金縢之匱中王翼日乃瘳武王既喪管叔及其羣弟乃流言於國曰公將不利於孺子周公乃告二公曰我之弗辟我無以告我先王周公居東二年則罪人斯得于後公乃爲詩以貽王名之曰鷓鴣王亦未敢諂公秋大熟未穫天大雷電以風禾盡偃大木斯拔邦人大恐王與

大夫盡弁以啓金縢之書乃得周公所自以爲功代武王之說二公及王乃問諸史與百執事對曰信噫公命我勿敢言王執書以泣曰其勿穆卜昔公勤勞王家惟予沖人弗及知今天動威以彰周公之德惟朕小子其新逆我國家禮亦宜之王出郊天乃雨反風禾則盡起二公命邦人凡大木所偃盡起而築之歲則大熟

大誥

武王崩三監及淮夷叛周公相成王將黜殷作大誥

王曰猷大誥爾多邦越爾御事弗弔天降割于我家不少延洪惟我幼沖人嗣無疆大歷服弗造哲迪民康矧曰其有能格知天命已予惟小子若涉淵水予惟往求朕攸濟敷賚敷前人受命茲不忘大功予不敢閉于天降威用寧王遺我大寶龜紹天明卽命曰有大艱于西土西土人亦不靜越茲蠢殷小腆誕敢紀其敘天降威知我國有疵民不康曰予復反鄙我周邦今蠢今翼日民獻有十夫予翼以于救寧武圖功我有大事休朕卜并吉肆予告我友邦君越尹氏庶士御事曰予得吉卜予惟以爾庶邦于伐殷適播臣爾庶邦君越庶士御事罔不反曰艱大民不靜亦惟在王宮

邦君室越予小子考翼不可征王害不遺卜肆予冲人永思艱曰嗚呼允蠢鯨寡哀哉予造天役遺大投艱于朕身越予冲人不印白恤義爾邦君越爾多士尹氏御事綏予曰無恙于恤不可不成乃寧考圖功已予惟小子不敢替上帝命天休于寧王興我小邦周寧王惟卜用克綏受茲命今天其相民矧亦惟卜用嗚呼天明畏弼我不丕基王曰爾惟舊人爾丕克遠省爾知寧王若勤哉天闕愆我成功所予不敢不極卒寧王圖事肆予大化誘我友邦君天棗忱辭其考我民予曷其不于前寧人圖功攸終天亦惟用勸愆我民若有疾予曷敢不于前寧人攸受休畢王曰若昔朕其逝朕言艱日思若考作室既底法厥子乃弗肯堂矧肯構厥父菑厥子乃弗肯播矧肯穫厥考翼其肯曰予有後弗棄基肆予曷敢不越印敕寧王大命若兄考乃有友伐厥子民養其勸弗救王曰嗚呼肆哉爾庶邦君越爾御事爽邦由哲亦惟十人迪知上帝命越天棗忱爾時罔敢易法矧今天降戾于周邦惟大艱人誕鄰胥伐于厥室爾亦不知天命不易予永念曰天惟喪殷若稽夫予曷敢不終朕畝天亦惟休于前寧人予曷其極卜敢弗于從率寧人有指疆土矧今卜并吉肆朕誕以爾東征天

命不僭卜陳惟若茲

微子之命

成王既黜殷命殺武庚命微子啓代殷後作微子之命

王若曰猷殷王元子惟稽古崇德象賢統承先王修其禮物作賓于王家與國咸休永世無窮嗚呼乃祖成湯克齊聖廣淵皇天眷佑誕受厥命撫民以寬除其邪虐功加于時德垂後裔爾惟踐修厥猷舊有令聞恪慎克孝肅恭神人予嘉乃德曰篤不忘上帝時歆下民祗協庸建爾于上公尹茲東夏欽哉往敷乃訓慎乃服命率由典常以蕃王室弘乃烈祖律乃有民永綏厥位毗予一人世世享德萬邦作式俾我有周無斃嗚呼往哉惟休無替朕命

唐叔得禾異畝同穎獻諸天子王命唐叔歸周公于東作歸禾

周公既得命禾旅天子之命作嘉禾

康誥

成王既伐管叔蔡叔以殷餘民封康叔作康誥酒誥梓材

惟三月哉生魄周公初基作新大邑于東國洛四方民大和會侯甸男邦采衛百工播民和見士于周周公咸勤乃洪大誥治王若曰孟侯朕其弟小子封惟乃丕顯考文王克明德慎罰不敢侮鰥寡庸庸祇祇威威顯民用肇造我區夏越我一二邦以修我西土惟時怙冒聞于上帝帝休天乃大命文王殪戎殷誕受厥命越厥邦厥民惟時紱乃寡兄勛肆汝小子封在茲東土王曰嗚呼封汝念哉今民將在祇遯乃文考紹聞衣德言往敷求于殷先哲王用保乂民汝丕遠惟商耆成人宅心知訓別求聞由古先哲王用康保民弘于天若德裕乃身不廢在王命王曰嗚呼小子封恫瘝乃身敬哉天畏棗忱民情大可見小人難保往盡乃心無康好逸豫乃其乂民我聞曰怨不在大亦不在小惠不惠懋不懋已汝惟小子乃服惟弘王應保殷民亦惟助王宅天命作新民王曰嗚呼封敬明乃罰人有小罪非眚乃惟終自作不典式爾有厥罪小乃不可不殺乃有大罪非終乃惟眚災適爾既道極厥辜時乃不可殺王曰嗚呼封有紱時乃大明服惟民其勅懋和若有疾惟民其畢棄咎若保赤子惟民其康乂非汝封刑人殺人無或刑人殺人非汝封又曰劓刑人無或劓刑人王曰外事

汝陳時臬司師茲殷罰有倫又曰要囚服念五六日至于旬時丕蔽要囚王曰汝陳時臬事罰蔽殷彝用其義刑義殺勿庸以次汝封乃汝盡遜曰時敘惟曰未有遜事已汝惟小子未其有若汝封之心朕心朕德惟乃知凡民自得罪寇攘姦宄殺越人于貨譬不畏死罔弗懲王曰封元惡大懲矧惟不孝不友子弗祗服厥父事大傷厥考心于父不能字厥子乃疾厥子于弟弗念天顯乃弗克恭厥兄兄亦不念鞠子哀大不友于弟惟弔茲不于我政人得罪天惟與我民彝大泯亂曰乃其速由文王作罰刑茲無赦不率大戛矧惟外庶子訓入惟厥正人越小臣諸節乃別播敷造民大譽弗念弗庸瘼厥君時乃引惡惟朕懲已汝乃其速由茲義率殺亦惟君惟長不能厥家人越厥小臣外正惟威惟虐大放王命乃非德用乂汝亦罔不克敬典乃由裕民惟文王之敬忌乃裕民曰我惟有及則予一人以懌王曰封爽惟民迪吉康我時其惟殷先哲王德用康乂民作求矧今民罔迪不適不迪則罔政在厥邦王曰封予惟不可不監告汝德之說于罰之行今惟民不靜未戾厥心迪屢未同爽惟天其罰殛我我其不怨惟厥罪無在大亦無在多矧曰其尙顯聞于天王曰嗚呼封敬哉無

作怨勿用非謀非彜蔽時忱不則敏德用康乃心願乃德遠乃猷裕乃以民寧不汝
瑕珍王曰嗚呼肆汝小子封惟命不于常汝念哉無我殄享明乃服命高乃聽用康
又民王若曰往哉封勿替敬典聽朕告汝乃以殷民世享

酒誥

王若曰明大命于妹邦乃穆考文王肇國在西土厥誥恣庶邦庶士越少正御事朝
夕曰祀茲酒惟天降命肇我民惟元祀天降威我民用大亂喪德亦罔非酒惟行越
小大邦用喪亦罔非酒惟辜文王誥教小子有正有事無彜酒越庶國飲惟祀德將
無醉惟曰我民迪小子惟土物愛厥心臧聰聽祖考之彜訓越小大德小子惟一妹
土嗣爾股肱純其藝黍稷奔走事厥考厥長肇牽車牛遠服賈用孝養厥父母厥父
母慶自洗腆致用酒庶士有正越庶伯君子其爾典聽朕教爾大克羞羞惟君爾乃
飲食醉飽不惟曰爾克永觀省作稽中德爾尙克羞饋祀爾乃自介用逸茲乃允惟
王正事之臣茲亦惟天若元德永不忘在王家王曰封我西土棗徂邦君御事小子
尙克用文王教不腆于酒故我至于今克受殷之命王曰封我聞惟曰在昔殷先哲

王迪畏天顯小民經德秉哲自成湯威至于帝乙成王畏相惟御事厥棐有恭不敢自暇自逸矧曰其敢崇飲越在外服侯甸男衛邦伯越在內服百僚庶尹惟亞惟服宗工越百姓里居罔敢溷于酒不惟不敢亦不暇惟助成王德顯越尹人祇辟我聞亦惟曰在今後嗣王酣身厥命罔顯于民祇保越怨不易誕惟厥縱淫泆于非彝用燕喪威儀民罔不謹傷心惟荒腆于酒不惟自息乃逸厥心疾很不克畏死辜在商邑越殷國滅無罹弗惟德馨香祀登聞于天誕惟民怨庶羣自酒腥聞在上故天降喪于殷罔愛于殺惟逸天非虐惟民自速辜王曰封予不惟若茲多誥古人有言曰人無於水監當於民監今惟殷墜厥命我其可不大監撫于時予惟曰汝劼毖殷獻臣侯甸男衛矧太史友內史友越獻臣百宗工矧惟爾事服休服采矧惟若疇圻父薄違農父若保宏父定辟矧汝剛制于酒厥或誥曰羣飲汝勿佚盡執拘以歸于周予其殺又惟殷之迪諸臣百工乃溷于酒勿庸殺之姑惟教之有斯明享乃不用我教辭惟我一人弗恤弗瀾乃事時同于殺王曰封汝典聽朕恣勿辯乃司民酒于酒

王曰封以厥庶民暨厥臣達大家以厥臣達王惟邦君汝若恆越曰我有師師司徒司馬司空尹旅曰予罔厲殺人亦厥君先敬勞肆徂厥敬勞肆往姦宄殺人歷人宥肆亦見厥君事戕敗人宥王啓監厥亂爲民曰無胥戕無胥虐至于敬寡至于屬婦合由以容王其效邦君越御事厥命曷以引養引恬自古王若茲監罔攸辟惟曰若稽田旣勤敷菑惟其陳修爲厥疆畷若作室家旣勤垣墉惟其塗墍茨若作梓材旣勤樸斲惟其塗丹雘今王惟曰先王旣勤用明德懷爲夾庶邦享作兄弟方來亦旣用明德后式典集庶邦丕享皇天旣付中國民越厥疆土于先王肆王惟德用和懌先後迷民用懌先王受命已若茲監惟曰欲至于萬年惟王于于孫孫永保民

召誥

成王在豐欲宅洛邑使召公先相宅作召誥

惟二月旣望越六日乙未王朝步自周則至于豐惟太保先周公相宅越若來三月惟丙午朏越三日戊申太保朝至于洛卜宅厥旣得卜則經營越三日庚戌太保乃以庶殷攻位于洛汭越五日甲寅位成若翼日乙卯周公朝至于洛則達觀于新邑

營越三日丁巳用牲于郊牛二越翼日戊午乃社于新邑牛一羊一豕一越七日甲子周公乃朝用書命庶殷侯甸男邦伯厥既命殷庶庶殷丕作太保乃以庶邦冢君出取幣乃復入錫周公曰拜手稽首旅王若公誥告庶殷越自乃御事嗚呼皇天上帝改厥元子茲大國殷之命惟王受命無疆惟休亦無疆惟恤嗚呼曷其柰何弗敬天既遐終大邦殷之命茲殷多先哲王在天越厥後王後民茲服厥命厥終智臧瘵在夫知保抱攜持厥婦子以哀籲天徂厥亡出執嗚呼天亦哀于四方民其眷命用懋王其疾敬德相古先民有夏天迪從子保面稽天若今時既墜厥命今相有殷天迪格保面稽天若今時既墜厥命今沖子嗣則無遺壽考曰其稽我古人之德矧曰其有能稽謀自天嗚呼有王雖小元子哉其不能誠于小民今休王不敢後用顧畏于民曩王來紹上帝自服于土中且曰其作大邑其自時配皇天愆祀于上下其自時中乂王厥有成命治民今休王先服殷御事比介于我有周御事節性惟日其邁王敬作所不可不敬德我不可不監于有夏亦不可不監于有殷我不敢知曰有夏服天命惟有歷年我不敢知曰不其延惟不敬厥德乃早墜厥命我不敢知曰有殷

受天命惟有歷年我不敢知曰不其延惟不敬厥德乃早歷厥命今王嗣受厥命我亦惟茲二國命嗣若功王乃初服嗚呼若生子罔不在厥初生自貽哲命今天其命哲命吉凶命歷年知今我初服宅新邑肆惟王其疾敬德王其德之用祈天永命其惟王勿以小民淫用非彝亦敢殄戮用乂民若有功其惟王位在德元小民乃惟刑用于天下越王顯上下勤恤其曰我受天命丕若有夏歷年式勿替有殷歷年欲王以小民受天永命拜手稽首曰予小臣敢以王之讎民百君子越友民保受王威命明德王末有成命王亦顯我非敢勤惟恭奉幣用供王能祈天永命

洛誥

召公既相宅周公往營成周使來告卜作洛誥

周公拜手稽首曰朕復子明辟王如弗敢及天基命定命予乃胤保大相東土其基作民明辟予惟乙卯朝至于洛師我卜河朔黎水我乃卜澗水東灑水西惟洛食我又卜灑水東亦惟洛食侂來以圖及獻卜王拜手稽首曰公不敢不敬天之休來相宅其作周匹休公既定宅侂來來視予卜休恆吉我二人共貞公其以予萬億年敬

天之休拜手稽首誨言周公曰王肇稽殷禮祀于新邑咸秩無文予齊百工倅從王于周予惟曰庶有事今王卽命曰記功宗以功作元祀惟命曰汝受命篤弼不視功載乃汝其悉自教工孺子其朋孺于其朋其往無若火始燄燄厥攸灼絃弗其絕厥若彝及撫事如予惟以在周工往新邑倅嚮卽有僚明作有功惇大成裕汝永有辭公曰己汝惟冲子惟終汝其數識百辟享亦識其有不享享多儀儀不及物惟曰不享惟不役志于享凡民惟曰不享惟事其爽侮乃惟孺子頒朕不暇聽朕教汝于羣民彝汝乃是不彝乃時惟不永哉篤絃乃正父罔不若予不敢廢乃命汝往敬哉茲予其明農哉彼裕我民無違用戾王若曰公明保予冲子公稱丕顯德以予小子揚文武烈奉蒼天命和恆四方民居師惇宗將禮稱秩元祀咸秩無文惟公德明光于上下勤施于四方旁作穆穆迓衡不迷文武勤教予冲子夙夜慙祀王曰公功棗迪篤罔不若時王曰公予小子其退卽辟于周命公後四方迪亂未定子宗禮亦未克敕公功迪將其後監我士師工誕保文武受民亂爲四輔王曰公定予往己公功肅將祗歡公無困哉我惟無斁其康事公勿替刑四方其世享周公拜手稽首曰王命

予來承保乃文祖受命民越乃光烈考武王弘朕恭孺于來相宅其大惇典殷獻民亂爲四方新辟作周恭先曰其自時中又萬邦咸休惟王有成績予且以多子越御事篤前人成烈蒼其師作周孚先考朕昭子刑乃單文祖德侔來愆殷乃命寧予以秬鬯二卣曰明禋拜手稽首休享予不敢宿則禋于文王武王惠篤敘無有違自疾萬年厭乃德殷乃引考王侔殷乃承敘萬年其永觀朕子懷德戊辰王在新邑烝祭歲文王騂牛一武王騂牛一王命作册逸祝册惟告周公其後王賓殺禋咸格王入太室裸王命周公後作册逸誥在十有二月惟周公誕保文武受命惟七年

多士

成周既成遷殷頑民周公以王命誥作多士

惟三月周公初于新邑洛用告商王士王若曰爾殷遺多士弗弔旻天大降喪于殷我有周佑命將天明威致王罰勅殷命終于帝肆爾多士非我小國敢弋殷命惟天不畀允罔固亂弼我我其敢求位惟帝不畀惟我下民秉爲惟天明畏我聞曰上帝引逸有夏不適逸則惟帝降格需于時夏弗克庸帝大淫泆有辭惟時天罔念聞厥

惟廢元命降致罰乃命爾先祖成湯革夏俊民甸四方自成湯至于帝乙罔不明德恤祀亦惟天丕建保乂有殷殷王亦罔敢失帝罔不配天其澤在今後嗣王誕罔顧予天矧曰其有聽念于先王勤家誕淫厥泆罔顧于天顯民祗惟時上帝不保降若茲大喪惟天不畀不明厥德凡四方小大邦喪罔非有辭于罰王若曰爾殷多士今惟我周王丕靈承帝事有命曰割殷告勅予帝惟我事不貳適惟爾王家我適予其曰惟爾洪無度我不爾勅自乃邑予亦念天卽于殷大戾肆不正王曰猷告爾多士予惟時其遷居西爾非我一人奉德不康寧時惟天命無違朕不敢有後無我怨惟爾知惟殷先人有册有典殷革夏命今爾又曰夏迪簡在王庭有服在百僚予一人惟聽用德肆予敢求爾于天邑商予惟率肆矜爾非予罪時惟天命王曰多士昔朕來自奄予大降爾四國民命我乃明致天罰移爾遐遜比事臣我宗多遜王曰告爾殷多士今予惟不爾殺予惟時命有申今朕作大邑于茲洛予惟四方罔攸資亦惟爾多士攸服奔走臣我多遜爾乃尙有爾土爾乃尙寧幹止爾克敬天惟畀矜爾爾不克敬爾不啻不有爾土予亦致天之罰于爾躬今爾惟時宅爾邑繼爾居爾厥有

幹有年于茲洛爾小子乃興從爾遷王曰又曰時予乃或言爾攸居

無逸

周公作無逸

周公曰嗚呼君子所其無逸先知稼穡之艱難乃逸則知小人之依相小人厥父母勤勞稼穡厥子乃不知稼穡之艱難乃逸乃諺既誕否則侮厥父母曰昔之人無聞知周公曰嗚呼我聞曰昔在殷王中宗嚴恭寅畏天命白度治民祇懼不敢荒寧肆中宗之享國七十有五年其在高宗時舊勞于外爰暨小人作其卽位乃或亮陰三年不言其惟不言言乃雍不敢荒寧嘉靖殷邦至于小大無時或怨肆高宗之享國五十有九年其在祖甲不義惟王舊爲小人作其卽位爰知小人之依能保惠于庶民不敢侮鰥寡肆祖甲之享國三十有三年自時厥後立王生則逸生則逸不知稼穡之艱難不聞小人之勞惟耽樂之從自時厥後亦罔或克壽或十年或七八年或五六年或四三年周公曰嗚呼厥亦惟我周太王王季克自抑畏文王卑服卽康功田功徽柔懿恭懷保小民惠鮮鰥寡自朝至于日中昃不遑暇食用咸和萬民文王

不敢盤于遊田以庶邦惟正之供文王受命惟中身厥享國五十年周公曰嗚呼繼自今嗣王則其無淫于觀于逸于遊于田以萬民惟正之供無皇曰今日耽樂乃非民攸訓非天攸若時人不則有愆無若殷王受之迷亂酗于酒德哉周公曰嗚呼我聞曰古之人猶胥訓告胥保惠胥教誨民無或胥壽張爲幻此厥不聽人乃訓之乃變亂先王之正刑至于小大民否則厥心違怨否則厥口詛祝周公曰嗚呼自殷王中宗及高宗及祖甲及我周文王茲四人迪哲厥或告之曰小人怨汝詈汝則皇自敬德厥愆曰朕之愆尤若時不啻不敢含怒此厥不聽人乃或壽張爲幻曰小人怨汝詈汝則信之則若時不永念厥辟不寬綽厥心亂罰無罪殺無辜怨有同是叢于厥身周公曰嗚呼嗣王其監于茲

君爽

召公爲保周公爲師相成王爲左右召公不說周公作君爽

周公若曰君爽弗弔天降喪于殷殷既墜厥命我有周既受我不敢知曰厥基永孚于休若天棗忱我亦不敢知曰其終出于不祥嗚呼君己曰時我我亦不敢寧于上

帝命弗永遠念天威越我民罔尤違惟人在我後嗣子孫大弗克恭上下遏佚前人
光在家不知天命不易天難諶乃其墜命弗克經歷嗣前人恭明德在今予小子且
非克有正迪惟前人光施于我冲子又曰天不可信我道惟寧王德延天不庸釋于
文王受命公曰君爽我聞在昔成湯既受命時則有若伊尹格于皇天在太甲時則
有若保衡在太戊時則有若伊陟臣扈格于上帝巫咸又王家在祖乙時則有若巫
賢在武丁時則有若甘盤率惟茲有陳保又有殷故殷禮陟配天多歷年所天惟純
佑命則商實百姓王人罔不秉德明恤小臣屏侯旬矧威奔走惟茲惟德稱用又厥
辟故一人有事于四方若卜筮罔不是孚公曰君爽天壽平格保又有殷有殷嗣天
滅威今汝永念則有固命厥亂明我新造邦公曰君爽在昔上帝割申勸寧王之德
其集大命于厥躬惟文王尙克修和我有夏亦惟有若虢叔有若閔天有若散宜生
有若泰顛有若南宮括又曰無能往來茲迪彝教文王蔑德降于國人亦惟純佑秉
德迪知天威乃惟時昭文王迪見冒聞于上帝惟時受有殷命哉武王惟茲四人尙
迪有祿後暨武王誕將天威威劉厥敵惟茲四人昭武王惟冒不單稱德今在予小

子且若游大川予往暨汝爽其濟小子同未在位誕無我責收罔勛不及耇造德不降我則鳴鳥不聞矧曰其有能格公曰嗚呼君肆其監子茲我受命無疆惟休亦大惟艱告君乃猷裕我不以後人迷公曰前人敷乃心乃悉命汝作汝民極曰汝明勛偶王在寬乘茲大命惟文王德丕承無疆之恤公曰君告汝朕允保爽其汝克敬以予監于殷喪大否肆念我天威予不允惟若茲誥予惟曰襄我二人汝有合哉言曰在時二人天休滋至惟時二人弗戡其汝克敬德明我俊民在讓後人于丕時嗚呼篤棗時二人我式克至于今日休我威成文王功于不怠丕冒海隅出日罔不率俾公曰君予不惠若茲多誥予惟用闕于天越民公曰嗚呼君惟乃知民德亦罔不能厥初惟其終祇若茲往敬用治

蔡仲之命

蔡叔既沒王命蔡仲踐諸侯位作蔡仲之命

惟周公位冢宰正百工羣叔流言乃致辟管叔于商囚蔡叔于郭鄰以車七乘降霍叔于庶人三年不齒蔡仲克庸祇德周公以爲卿士叔卒乃命諸王邦之蔡王若曰

小子胡惟爾率德改行克慎厥猷肆予命爾侯于東土往卽乃封敬哉爾尙蓋前人
之愆惟忠惟孝爾乃邁迹自身克勤無怠以垂憲乃後率乃祖文王之彝訓無若爾
考之違王命皇天無親惟德是輔民心無常惟惠之懷爲善不同同歸于治爲惡不
同同歸于亂爾其戒哉慎厥初惟厥終終以不困不惟厥終終以困窮懋乃攸績睦
乃四鄰以蕃王室以和兄弟康濟小民率自中無作聰明亂舊章詳乃視聽罔以側
言改厥度則予一人汝嘉王曰嗚呼小子胡汝往哉無荒棄朕命

成王東伐淮夷遂踐奄作成王政

成王既踐奄將遷其君於蒲姑周公告召公作將蒲姑

多方

成王歸自奄在宗周誥庶邦作多方

惟五月丁亥王來自奄至于宗周周公曰王若曰猷告爾四國多方惟爾殷侯尹民
我惟大降爾命爾罔不知洪惟天之命弗永寅念于祀惟帝降格于夏有夏誕厥逸
不肯感言于民乃大淫昏不克終日勸于帝之迪乃爾攸聞厥圖帝之命不克開于

民之麗乃大降罰崇亂有夏因甲于內亂不克靈承于旅罔丕惟進之恭洪舒于民亦惟有夏之民叨懼日欽劓割夏邑天惟時求民主乃大降顯休命于成湯刑殄有夏惟天不畀純乃惟以爾多方之義民不克永于多享惟夏之恭多士大不克明保享于民乃胥惟虐于民至于百爲大不克開乃惟成湯克以爾多方簡代夏作民主慎厥麗乃勸厥民刑用勸以至于帝乙罔不明德慎罰亦克用勸要囚殄戮多罪亦克用勸開釋無辜亦克用勸今至于爾辟弗克以爾多方享天之命嗚呼王若曰誥爾多方非天庸釋有夏非天庸釋有殷乃惟爾辟以爾多方大淫圖天之命膺有辭乃惟有夏圖厥政不集于享天降時喪有邦開之乃惟爾商後王逸厥逸圖厥政不蠲烝天惟降時喪惟聖罔念作狂惟狂克念作聖天惟五年須暇之子孫誕作民主罔可念聽天惟求爾多方大勳以威開厥頤天惟爾多方罔堪頤之惟我周王靈承于旅克堪用德惟典神天天惟式教我用休簡畀殷命尹爾多方今我曷敢多誥我惟大降爾四國民命爾曷不忱裕之于爾多方爾曷不夾介乂我周王享天之命今爾尙宅爾宅攷爾田爾曷不惠王熙天之命爾乃迪屢不靜爾心未愛爾乃不大宅

天命爾乃膺播天命爾乃自作不典圖忱于正我惟時其教告之我惟時其戰要囚之至于再至于三乃有不用我降爾命我乃其大罰殛之非我有周秉德不康寧乃惟爾自速辜王曰嗚呼猷告爾有方多士暨殷多士今爾奔走臣我監五祀越惟有胥伯小大多正爾罔不克臬自作不和爾惟和哉爾室不睦爾惟和哉爾邑克明爾惟克勤乃事爾尙不忌于凶德亦則以穆穆在乃位克闕于乃邑謀介爾乃自時洛邑尙永力敗爾田天惟畀矜爾我有周惟其大介賚爾迪簡在王庭尙爾事有服在大僚王曰嗚呼多士爾不克勸忱我命爾亦則惟不克享凡民惟曰不享爾乃惟逸惟頗大遠王命則惟爾多方探天之威我則致天之罰離遜爾土王曰我不惟多詰我惟祇告爾命又曰時惟爾初不克敬于和則無我怨

立政

周公作立政

周公若曰拜手稽首告嗣天子王矣用威戒于王曰王左右常伯常任準人綴衣虎賁周公曰嗚呼休茲知恤鮮哉古之人迪惟有夏乃有室大競籲俊尊上帝迪知忱

恂于九德之行乃敢告教厥后曰拜手稽首后矣曰宅乃事宅乃牧宅乃準茲惟后
矣謀面用丕訓德則乃宅人茲乃三宅無義民桀德惟乃弗作往任是惟暴德罔後
亦越成湯陟丕釐上帝之耿命乃用三有宅克卽宅曰三有俊克卽俊嚴惟丕武克
用三宅三俊其在商邑用協于厥邑其在四方用丕式見德嗚呼其在受德醫惟羞
刑暴德之人同于厥邦乃惟庶習逸德之人同于厥政帝欽罰之乃俾我有夏式商
受命奄旬萬姓亦越文王武王克知三有宅心灼見三有俊心以敬事上帝立民長
伯立政任人準夫牧作三事虎賁綴衣趣馬小尹左右攜僕百司庶府大都小伯藝
人表臣百司太史尹伯庶常吉士司徒司馬司空亞旅夷徼盧烝三毫阪尹文王惟
克厥宅心乃克立茲常事司牧人以克俊有德文王罔攸兼于庶言庶獄庶慎惟有
司之牧夫是訓用違庶獄庶慎文王罔敢知于茲亦越武王率惟敕功不敢替厥義
德率惟謀從容德以竝受此丕丕基嗚呼孺子王矣繼自今我其立政立事準人牧
夫我其克灼知厥若不乃俾亂相我受民和我庶獄庶慎時則勿有聞之自一話一
言我則末惟成德之彥以乂我受民嗚呼予且已受人之徽言咸告孺子王矣繼自

今文子文孫其勿誤于庶獄庶愼惟正是乂之自古商人亦越我周文王立政立事
牧夫準人則克宅之克由繹之茲乃俾乂國則罔有立政用愼人不訓于德是罔顯
在厥世繼自今立政其勿以愼人其惟吉士用勸相我國家今文子文孫孺子王矣
其勿誤于庶獄惟有司之牧夫其克詰爾戎兵以陟禹之迹方行天下至于海表罔
有不服以覲文王之耿光以揚武王之大力嗚呼繼自今後王立政其惟克用常人
周公若曰太史司寇蘇公式敬爾由獄以長我王國茲式有愼以列用中罰

周官

成王既黜殷命滅淮夷還歸在豐作周官

惟周王撫萬邦巡侯甸四征弗庭綏厥兆民六服羣辟罔不承德歸于宗周董正治
官王曰若昔大猷制治于未亂保邦子未危曰唐虞稽古建官惟百內有百揆四岳
外有州牧侯伯庶政惟和萬國成寧夏商官倍亦克用乂明王立政不惟其官惟其
人今予小子祇勤于德夙夜不逮仰惟前代時若訓迪厥官立大師太傅太保茲惟
三公論道經邦變理陰陽官不必備惟其人少師少傅少保曰三孤貳公弘化寅亮

天地弼予一人冢宰掌邦治統百官均四海司徒掌邦教敷五典擾兆民宗伯掌邦禮治神人和上下司馬掌邦政統六師平邦國司寇掌邦禁詰姦惡刑暴亂司空掌邦土居四民時地利六卿分職各率其屬以倡九牧阜成兆民六年五服一朝又六年王乃時巡考制度于四岳諸侯各朝于方岳大明黜陟王曰嗚呼凡我有官君子欽乃攸司慎乃出命令出惟行弗惟反以公滅私民其允懷舉古入官議事以制政乃不迷其爾典常作之師無以利口亂厥官蓄疑敗謀怠忽荒政不學牆面莅事惟煩戒爾卿士功崇惟志業廣惟勤惟克果斷乃罔後艱位不期驕祿不期侈恭儉惟德無載爾僞作德心逸日休作僞心勞日拙居寵思危罔不惟畏弗畏入畏推賢讓能庶官乃和不和政靡舉能其官惟爾之能稱匪其人惟爾不任王曰嗚呼三事暨大夫敬爾有官亂爾有政以佑乃辟永康兆民萬邦惟無斁

成王既伐東夷肅慎來賀王俾榮伯作賄肅慎之命

周公在豐將沒欲葬成周公薨成王葬于畢告周公作亳姑

君陳

周公既沒命君陳分正東郊成周作君陳

王若曰君陳惟爾令德孝恭惟孝友于兄弟克施有政命汝尹茲東郊敬哉昔周公師保萬民懷其德往慎乃司茲率厥常懋昭周公之訓惟民其乂我聞曰至治馨香感于神明黍稷非馨明德惟馨爾尙式時周公之猷訓惟日孜孜無敢逸豫凡人未見聖若不克見既見聖亦不克由聖爾其戒哉爾惟風下民惟草圖厥政莫或不艱有廢有興出入自爾師虞庶言同則繹爾有嘉謀嘉猷則入告爾后于內爾乃順之于外曰斯謀斯猷惟我后之德嗚呼臣人咸若時惟良顯哉王曰君陳爾惟弘周公丕訓無依勢作威無倚法以削寬而有制從容以和殷民在辟予曰辟爾惟勿辟予曰宥爾惟勿宥惟厥中有弗若于汝政弗化于汝訓辟以止辟乃辟狃于姦宄敗常亂俗三細不宥爾無忿疾于頑無求備于一夫必有忍其乃有濟有容備乃大簡厥修亦簡其或不修進厥良以率其或不良惟民生厚因物有遷違上所命從厥攸好爾克敬典在德時乃罔不變允升于大猷惟予一人膺受多福其爾之休終有辭於永世

顧命

成王將崩命召公畢公率諸侯相康王作顧命

惟四月哉生魄王不懌甲子王乃洸潁水相被冕服憑玉几乃同召太保爽芮伯彤伯畢公衛侯毛公師氏虎臣百尹御事王曰嗚呼疾大漸惟幾病日臻旣彌留恐不獲誓言嗣茲予審訓命汝昔君文王武王宣重光奠麗陳教則肆肄不違用克達殷集大命在後之侗敬迓天威嗣守文武大訓無敢昏逾今天降疾殆弗興弗悟爾尙明時朕言用敬保元子釗弘濟于艱難柔遠能邇安勸小大庶邦思夫人自亂于成儀爾無以釗冒貢于非幾茲旣受命還出綴衣于庭越翼日乙丑王崩太保命仲桓南宮毛俾爰齊侯呂伋以二千戈虎賁百人逆子釗於南門之外延入翼室恤宅宗丁卯命作冊度越七日癸酉伯相命士須材狄設黼屨綴衣耀問南嚮敷重篋席黼純華玉仍几四序東嚮敷重底席綴純文貝仍几東序西嚮敷重豐席畫純雕玉仍几西夾南嚮敷重筍席玄紛純漆仍几越玉五重陳寶赤刀大訓弘璧琬琰在西序大玉夷玉天球河圖在東序胤之舞衣大貝鼗鼓在西房兌之戈和之弓垂之竹矢

在東房大輅在賓階面綴輅在阼階面先輅在左塾之前次輅在右塾之前二入雀弁執惠立于畢門之內四人綦弁執戈上刃夾兩階阼一人冕執劉立于東堂一人冕執鉞立于西堂一人冕執戣立于東垂一人冕執瞿立于西垂一人冕執銳立于側階王麻冕黼裳由賓階躋卿士邦君麻冕蟻裳入卽位太保太史太宗皆麻冕彤裳太保承介圭上宗奉同瑄由阼階躋太史秉書由賓階躋御王冊命曰皇后憑玉几道揚末命命汝嗣訓臨君周邦率循大卞變和天下用荅揚文武之光訓王再拜興荅曰眇眇予末小子其能而亂四方以敬忌天威乃受同瑄王三宿三祭三咤上宗曰饗太保受同降盥以異同秉璋以酢授宗人同拜王荅拜太保受同祭疇宅授宗人同拜王荅拜太保降收諸侯出廟門俟

康王之誥

康王既尸天子遂誥諸侯作康王之誥

王出在應門之內太保率西方諸侯入應門左畢公率東方諸侯入應門右皆布乘黃朱寶稱奉圭兼幣曰一二臣衛敢執壤奠皆再拜稽首王義嗣德荅拜太保暨內

伯咸進相揖皆再拜稽首曰敬敬告天子皇天改大邦殷之命惟周文武誕受美若克恤西土惟新陟王畢協賞罰戡定厥功用敷遺後人休今王敬之哉張皇六師無壞我高祖寡命王若曰庶邦侯甸男衛惟予一人釗報誥昔君文武丕平富不務咎底至齊信用昭明于天下則亦有熊羆之士不二心之臣保乂王家用端命于上帝皇天用訓厥道付畀四方乃命建侯樹屏在我後之人今予一二伯父尚胥暨顧綏爾先公之臣服于先王雖爾身在外乃心罔不在王室用奉恤厥若無遺鞠子羞羣公既皆聽命相揖趨出王釋冕反喪服

畢命

康王命作冊畢分居里成周郊作畢命

惟十有二年六月庚午朏越三日壬申王朝步自宗周至于豐以成周之衆命畢公保釐東郊王若曰嗚呼父師惟文王武王敷大德于天下用克受殷命惟周公左右先王綏定厥家愍殷頑民遷于洛邑密邇王室式化厥訓既歷三紀世變風移四方無虞予一人以寧道有升降政由俗革不臧厥臧民罔攸勸惟公懋德克勤小物弼

亮四世正色率下罔不祇師言嘉績多于先王予小子垂拱仰成王曰嗚呼父師今予祇命公以周公之事往哉旌別淑慝表厥宅里彰善瘴惡樹之風聲弗率訓典殊厥井疆俾克畏慕申畫郊圻慎固封守以康四海政貴有恆辭尙體要不惟好異商俗靡靡利口惟賢餘風未殄公其念哉我聞曰世祿之家鮮克由禮以蕩陵德實悖天道敝化奢靡萬世同流茲殷庶士席寵惟舊怙侈滅義服美于人驕淫矜侈將由惡終雖收放心閑之惟艱資富能訓惟以永年惟德惟義時乃大訓不由古訓于何其訓王曰嗚呼父師邦之安危惟茲殷士不剛不柔厥德允修惟周公克慎厥始惟君陳克和厥中惟公克成厥終三后協心同底于道道洽政治澤潤生民四夷左衽罔不咸賴予小子永膺多福公其惟時成周建無窮之基亦有無窮之聞子孫訓其成式惟乂嗚呼罔曰弗克惟既厥心罔曰民寡惟慎厥事欽若先王成烈以休于前政

君牙

穆王命君牙爲周大司徒作君牙

王若曰嗚呼君牙惟乃祖乃父世篤忠貞服勞王家厥有成績紀于太常惟予小子嗣守文武成康遺緒亦惟先正之臣克左右亂四方心之憂危若蹈虎尾涉于春冰今命爾予翼作股肱心膂績乃舊服無忝祖考弘敷五典式和民則爾身克正罔敢弗正民心罔中惟爾之中夏暑雨小民惟曰怨咨冬祁寒小民亦惟曰怨咨厥惟艱哉思其艱以圖其易民乃寧嗚呼丕顯哉文王謨丕承哉武王烈啓佑我後人咸以正罔缺爾惟敬明乃訓用奉若于先王對揚文武之光命追配于前人王若曰君牙乃惟由先正舊典時式民之治亂在茲率乃祖考之攸行昭乃辟之有乂

罔命

穆王命伯罔爲周太僕正作罔命

王若曰伯罔惟予弗克于德嗣先人宅丕后怵惕惟厲中夜以興思免厥愆昔在文武聰明齊聖小大之臣咸懷忠良其侍御僕從罔匪正人以旦夕承弼厥辟出入起居罔有不欽發號施令罔有不臧下民祇若萬邦咸休惟予一人無良實賴左右前後有位之士匡其不及繩愆糾謬格其非心俾克紹先烈今予命汝作大正正于羣

僕侍御之臣懋乃后德交修不逮慎簡乃僚無以巧言令色便辟側媚其惟吉士僕臣正厥后克正僕臣諛厥后自聖后德惟臣不德惟臣爾無昵于儉人充耳目之官迪上以非先王之典非人其吉惟貨其吉若時瘼厥官惟爾大弗克祇厥辟惟予汝辜王曰嗚呼欽哉永弼乃后于彝憲

呂刑

呂命穆王訓夏贖刑作呂刑

惟呂命王享國百年耄荒度作刑以詰四方王曰若古有訓蚩尤惟始作亂延及于平民罔不寇賊鴟義姦宄奪攘矯虔苗民弗用靈制以刑惟作五虐之刑曰法殺戮無辜爰始淫爲劓刵椽鯨越茲麗刑并制罔差有辭民興胥漸泯泯焚罔中于信以覆詛盟虐威庶戮方告無辜于上帝監民罔有馨香德刑發聞惟腥皇帝哀矜庶戮之不辜報虐以威遏絕苗民無世在下乃命重黎絕地天通罔有降格羣后之逮在下明明棗常繅寡無蓋皇帝清問下民繅寡有辭于苗德威惟畏德明惟明乃命三后恤功于民伯夷降典折民惟刑禹平水土主名山川稷降播種農殖嘉穀三

后成功惟殷于民士制百姓于刑之中以教祇德穆穆在上明明在下灼于四方罔不惟德之勤故乃明于刑之中率乂于民棗彝典獄非訖于威惟訖于富敬忌罔有擇言在身惟克天德自作元命配享在下王曰嗟四方司政典獄非爾惟作天牧今爾何監非時伯夷播刑之迪其今爾何懲惟時苗民匪察于獄之麗罔擇吉人觀于五刑之中惟時庶威奪貨斷制五刑以亂無辜上帝不譴降咎于苗苗民無辭于罰乃絕厥世王曰嗚呼念之哉伯父伯兄仲叔季弟幼子童孫皆聽朕言庶有格命今爾罔不由慰日勸爾罔或戒不動天齊于民俾我一日非終惟終在人爾尙敬逆天命以奉我一人雖畏勿畏雖休勿休惟敬五刑以成三德一人有慶兆民賴之其寧惟永王曰吁來有邦有士告爾祥刑在今爾安百姓何擇非人何敬非刑何度非及兩造具備師聽五辭五辭簡孚正于五刑五刑不簡正于五罰五罰不服正于五過五過之疵惟官惟反惟內惟貨惟來其罪惟均其審克之五刑之疑有教五罰之疑有赦其審克之簡孚有衆惟貌有稽無簡不聽具嚴天威墨辟疑赦其罰百鍰閱實其罪劓辟疑赦其罰惟倍閱實其罪剕辟疑赦其罰倍差閱實其罪宮辟疑赦其罰

六百鍰閱實其罪大辟疑赦其罰千鍰閱實其罪墨罰之屬千劓罰之屬于剕罰之屬五百宮罰之屬三百大辟之罰其屬二百五刑之屬三于上下比罪無僭亂辭勿用不行惟察惟法其審克之上刑適輕下服下刑適重上服輕重諸罰有權刑罰世輕世重惟齊非齊有倫有要罰懲非死人極于病非佞折獄惟良折獄罔非在中察辭于差非從惟從哀敬折獄明啓刑書胥占咸庶中正其刑其罰其審克之獄成而孚輸而孚其刑上備有并兩刑王曰嗚呼敬之哉官伯族姓朕言多懼朕敬于刑有德惟刑今天相民作配在下明清于單辭民之亂罔不中聽獄之兩辭無或私家于獄之兩辭獄貨非寶惟府辜功報以庶尤永畏惟罰非天不中惟人在命天罰不極庶民罔有令政在于天下王曰嗚呼嗣孫今往何監非德于民之中尙明聽之哉哲人惟刑無疆之辭屬于五極咸中有慶受王嘉師監于茲祥刑

文侯之命

平王錫晉文侯秬鬯圭瓚作文侯之命

王若曰父義和不顯文武克慎明德昭升于上敷聞在下惟時上帝集厥命于文王

亦惟先正克左右昭事厥辟越小大謀猷罔不率從肆先祖懷在位嗚呼閔予小子嗣造天丕愆殄資澤于下民侵戎我國家純卽我御事罔或者壽俊在厥服予則罔克曰惟祖惟父其伊恤朕躬嗚呼有績予一人永綏在位父義和汝克紹乃顯祖汝肇刑文武用會紹乃辟追孝于前文人汝多修扞我于艱苦汝予嘉王曰父義和其歸視爾師寧爾邦用賚爾秬鬯一卣彤弓一彤矢百盧弓一盧矢百馬四匹父往哉柔遠能邇惠康小民無荒寧簡恤爾都用成爾顯德

費誓

魯侯伯禽宅曲阜徐夷並興東郊不開作費誓

公曰嗟人無諱聽命徂茲淮夷徐戎並興善敕乃甲冑敵乃干無敢不弔備乃弓矢鍛乃戈矛礪乃鋒刃無敢不善今惟淫舍牯牛馬杜乃撻斂乃穿無敢傷牯牯之傷汝則有常刑馬牛其風臣妾逋逃勿敢越逐祇復之我商賚爾乃越逐不復汝則有常刑無敢寇攘踰垣牆竊馬牛誘臣妾汝則有常刑甲戌我惟征徐戎峙乃糗糧無敢不逮汝則有大刑魯人三郊三遂峙乃楨榦甲戌我惟築無敢不供汝則有無餘

刑非殺魯人三郊三遂時乃芻茭無敢不多汝則有大刑

秦誓

秦穆公伐鄭晉襄公帥師敗諸緡還歸作秦誓

公曰嗟我士聽無譁予誓告汝羣言之首古人有首曰民訖自若是多盤責人斯無難惟受責俾如流是惟艱哉我心之憂日月逾邁若弗云來惟古之謀人則曰未就予忌惟今之謀人姑將以爲親雖則云然尙猷詢茲黃髮則罔所愆番番良士旅力旣愆我尙有之仡仡勇夫射御不達我尙不欲惟載載善斷言俾君子易辭我臯多有之昧昧我思之如有一介臣斷斷猗無他伎其心休休焉其如有容人之有技若已有之人之彥聖其心好之不啻若自其口出是能容之以保我子孫黎民亦職有利哉人之有技冒疾以惡之人之彥聖而還之俾不達是不能容以不能保我子孫黎民亦曰殆哉邦之杌隉曰由一人邦之榮懷亦尙一人之慶

尙書終

毛詩

國風

周南

關雎后妃之德也風之始也所以風天下而正夫婦也故用之鄉人焉用之邦國焉風風也教也風以動之教以化之詩者志之所之也在心爲志發言爲詩情動於中而形於言言之不足故嗟教之嗟歎之不足故永歌之永歌之不足不知手之舞之足之蹈之也情發於聲聲成文謂之音治世之音安以樂其政和亂世之音怨以怒其政乖亡國之音哀以思其民困故正得失動天地感鬼神莫近於詩先王以是經夫婦成孝敬厚人倫美教化移風俗故詩有六義焉一曰風二曰賦三曰比四曰興五曰雅六曰頌上以風化下下以風刺上主文而譎諫言之者無罪聞之者足以戒故曰風至于王道衰禮義廢政教失國異政家殊俗而變風變雅作矣國史明乎得失之迹傷人倫之廢哀刑政之苛吟詠情性以風其上達於事變而懷其舊俗者也故變風發乎情止乎禮義發乎情民之性也止乎禮義先王之澤也是以一國之事

繫一人之本謂之風言天下之事形四方之風謂之雅雅者正也言王政之所由廢興也政有小大故有小雅焉有大雅焉頌者美盛德之形容以其成功告於神明者也是謂四始詩之至也然則關雎麟趾之化王者之風故繫之周公南言化自北而南也鵲巢鶉虞之德諸侯之風也先王之所以教故繫之召公周南召南正始之道王化之基是以關雎樂得淑女以配君子愛在進賢不淫其色哀窈窕思賢才而無傷善之心焉是關雎之義也

關關雎鳩在河之洲窈窕淑女君子好逑 參差荇菜左右流之窈窕淑女寤寐求之 求之不得寤寐思服悠哉悠哉輾轉反側 參差荇菜左右采之窈窕淑女琴瑟友之 參差荇菜友右芼之窈窕淑女鍾鼓樂之

關雎五章章四句故言三章一章章四句二章章八句

葛覃后妃之本也后妃在父母家則志在於女功之事躬儉節用服澣濯之衣尊敬師傅則可以歸安父母化天下以婦道也

葛之覃兮施于中谷維葉萋萋黃鳥于飛集于灌木其鳴喈喈 葛之覃兮施于中

谷維葉莫莫是刈是漙爲絺爲綌服之無斁 言告師氏言告言歸薄汗我私薄漙
我衣害漙害否歸寧父母

葛覃三章章六句

卷耳后妃之志也又當輔佐君子求賢審官知臣下之勤勞內有進賢之志而無險
詖私謁之心朝夕思念至於憂勤也

采采卷耳不盈頃筐嗟我懷人寘彼周行 陟彼崔嵬我馬虺隤我姑酌彼金罍維
以不永懷 陟彼高岡我馬玄黃我姑酌彼兕觥維以不永傷 陟彼祖矣我馬瘠
矣我僕痡矣云何吁矣

卷耳四章章四句

樛木后妃逮下也言能逮下而無嫉妬之心焉

南有樛木葛藟荒之樂只君子福履將之 南有樛木葛藟荒之樂只君子福履將
之 南有樛木葛藟荒之樂只君子福履成之

樛木三章章四句

螽斯后妃子孫衆多也言若螽斯不妬忌則子孫衆多也

螽斯羽詵詵兮宜爾子孫振振兮 螽斯羽薨薨兮宜爾子孫繩繩兮 螽斯羽揖揖兮宜爾子孫蟄蟄兮

螽斯三章章四句

桃天后妃之所致也不妬忌則男女以正婚姻以時國無繲民也

桃之天天灼灼其華之子于歸宜其室家 桃之天天有實其實之子于歸宜其家室 桃之天天其葉蓁蓁之子于歸宜其家人

桃夭三章章四句

兔置后妃之化也關雎之化行則莫不好德賢人衆多也

肅肅兔置椽之丁丁赳赳武夫公侯干城 肅肅兔置施于中遠赳赳武夫公侯好仇 肅肅兔置施于中林赳赳武夫公侯腹心

兔置三章章四句

芣苢后妃之美也和乎則婦人樂有于矣

采采芣苢薄言采之采采芣苢薄言有之采采芣苢薄言掇之采采芣苢薄言捋之采采芣苢薄言結之采采芣苢薄言穡之

芣苢三章章四句

漢廣德廣所及也文王之道被于南國美化行乎江漢之域無思犯禮求而不可得也

南有喬木不可休息漢有游女不可求思漢之廣矣不可泳思江之永矣不可方思
翹翹錯薪言刈其楚之子于歸言秣其馬漢之廣矣不可泳思江之永矣不可方
思
翹翹錯薪言刈其蕪之子于歸言秣其駒漢之廣矣不可泳思江之永矣不可
方思

漢廣三章章八句

汝墳道化行也文王之化行乎汝墳之國婦人能閔其君子猶勉之以正也

遵彼汝墳伐其條枚未見君子惄如調飢遵彼汝墳伐其條肄既見君子不我遐
棄
魴魚鱣尾王室如燬雖則如燬父母孔邇

汝墳三章章四句

麟之趾關雎之應也關雎之化行則天下無犯非禮維衰世之公子皆信厚如麟趾之時也

麟之趾振振公子子嗟麟兮 麟之定振振公姓子嗟麟兮 麟之角振振公族子嗟麟兮

麟之趾三章章三句

周南之國十一篇三十六章百五十九句

召南

鷓巢夫人之德也國君積行累功以致爵位夫人起家而居有之德如鷓鳩乃可以配焉

維鷓有巢維鳩居之之子于歸百兩御之 維鷓有巢維鳩方之之子于歸百兩將之 維鷓有巢維鳩盈之之子于歸百兩成之

鷓巢三章章四句

采芣夫人不失職也夫人可以奉祭祀則不失職矣

于以采芣于沼于沚于以用之公侯之事 于以采芣于澗之中于以用之公侯之宮 被之僮僮夙夜在公被之祁祁薄言還歸

采芣三章章四句

草蟲大夫妻能以禮自防也

嘒嘒草蟲趨趨阜螽未見君子憂心忡忡亦既見止亦既覯止我心則降 陟彼南山言采其薇未見君子我心傷悲亦既見止亦既覯止我心則說 陟彼南山言采其薇未見君子我心傷悲亦既見止亦既覯止我心則夷

草蟲三章章七句

采蘋大夫妻能循法度也能循法度則可以承先祖共祭祀矣

于以采蘋南湖之濱于以采藻于彼行潦 于以盛之維筐及筥于以湘之維錡及釜 于以奠之宗室牖下誰其尸之有齊季女

采蘋三章章四句

甘棠美召伯也召伯之教明於南國

蔽芾甘棠勿剪勿伐召伯所芟 蔽芾甘棠勿剪勿敗召伯所憩 蔽芾甘棠勿剪勿拜召伯所說

甘棠三章章三句

行露召伯聽訟也衰亂之俗微貞信之教興彊暴之男不能侵陵貞女也

厭浥行露豈不夙夜謂行多露 誰謂雀無角何以穿我屋誰謂女無家何以速我獄雖速我獄室家不足 誰謂鼠無牙何以穿我墉誰謂女無家何以速我訟雖速我訟亦不女從

行露三章一章三句二章章六句

羔羊鵠巢之功致也召南之國化文王之政在位皆節儉正直德如羔羊也

羔羊之皮素絲五純退食自公委蛇委蛇 羔羊之革素絲五緘委蛇委蛇自公退食 羔羊之縫素絲五總委蛇委蛇退食自公

羔羊三章章四句

殷其雷動以義也召南之大夫違行從政不違寧處其室家能閔其勤勞動以義也
殷其雷在南山之陽何斯違斯莫敢或遑振振君子歸哉歸哉 殷其雷在南山之
側何斯違斯莫敢遑息振振君子歸哉歸哉 殷其雷在南山之下何斯違斯莫或
遑處振振君子歸哉歸哉

殷其雷三章章六句

標有梅男女及時也召南之國被文王之化男女得以及時也

標有梅其實七兮求我庶士迨其吉兮 標有梅其實三兮求我庶士迨其今兮

標有梅頃筐暨之求我庶士迨其謂之

標有梅三章章四句

小星惠及下也夫人無妬忌之行惠及賤妾進御於君知其命有貴賤能盡其心矣
嘒彼小星三五在東肅肅宵征夙夜在公寔命不同 嘒彼小星維參與昴肅肅宵
征抱衾與裯寔命不猶

小星二章章五句

江有汜美媵也勤而無怨媵能悔過也文王之時江沱之間有媵不以其媵備數媵遇勞而無怨媵亦自悔也

江有汜之子歸不我以不我以其後也悔 江有渚之子歸不我與不我與其後也處 江有沱之子歸不我過不我過其嘯也歌

江有汜三章章五句

野有死麋惡無禮也天下大亂彊暴相陵遂成淫風被文王之化雖當亂世猶惡無禮也

野有死麋白茅包之有女懷春吉士誘之 林有樛櫟野有死鹿白茅純束有女如玉 舒而脫脫兮無感我帔兮無使彪也吠

野有死麋三章二章四句一章二句

何彼穠矣美王姬也雖則王姬亦下嫁於諸侯車服不繫其夫下王后一等猶執婦道以成肅雝之德也

何彼穠矣唐棣之華曷不肅雝王姬之事 何彼穠矣華如桃李平王之孫齊侯之

子 其釣維何維絲伊縉齊侯之子平王之孫

何彼禴矣三章章四句

鷓鴣巢之應也鷓鴣巢之化行人倫既正朝廷既治天下純被文王之化則庶類蕃殖蒐田以時仁如鷓鴣則王道成也

彼茁者葭壹發五豝于嗟乎鷓鴣 彼茁者蓬壹發五豮于嗟乎鷓鴣

鷓鴣二章章三句

召南之國十四篇四十章百七十七句

邶

柏舟言仁而不遇也衛頃公之時仁人不遇小人在側

汎彼柏舟亦汎其流耿耿不寐如有隱憂微我無酒以敖以遊 我心匪鑿不可以茹亦有兄弟不可以據薄言往愬逢彼之怒 我心匪石不可轉也我心匪席不可卷也威儀棣棣不可選也 憂心悄悄愠于羣小覲閔既多受侮不少靜言思之寤辟有標 日居月諸胡迭而微心之憂矣如匪澣衣靜言思之不能奮飛

柏舟五章章六句

綠衣衛莊姜傷己也妾上僭夫人失位而作是詩也

綠兮衣兮綠衣黃裏心之憂矣曷維其已 綠兮衣兮綠衣黃裏心之憂矣曷維其
亡 綠兮絲兮女所治兮我思古人俾無訖兮 緝兮綌兮淒其以風我思古人實
獲我心

綠衣四章章四句

燕燕衛莊姜送歸妾也

燕燕于飛差池其羽之予于歸遠送于野瞻望弗及泣涕如雨 燕燕于飛頡之頡
之之子于歸遠于將之瞻望弗及佇立以泣 燕燕于飛下上其音之予于歸遠送
于南瞻望弗及實勞我心 仲氏任只其心塞淵終溫且惠淑慎其身先君之思以
勗寡人

燕燕四章章六句

日月衛莊姜傷己也遭州吁之難傷己不見答於先君以至四窮之詩也

日居月諸照臨下土乃如之人兮逝不古處胡能有定寧不我顧 日居月諸下土是冒乃如之人兮逝不相好胡能有定寧不我報 日居月諸出自東方乃如之人兮德音無良胡能有定俾也可忘 日居月諸東方自出父兮母兮畜我不卒胡能有定報我不述

日月四章章六句

終風衛莊姜傷己也遭州吁之暴見侮慢而不能正也

終風且暴願我則笑謔浪笑敖中心是悼 終風且霾惠然肯來莫往莫東悠悠我思 終風且曠不日有曠寤言不寐願言則嚏 曠曠其陰虺虺其雷寤言不寐願言則懷

終風四章章四句

擊鼓怨州吁也衛州吁用兵暴亂使公孫文仲將而平陳與宋國人怨其勇而無禮也

擊鼓其鐃跗躍用兵土國城漕我獨南行 從孫子仲平陳與宋不我以歸憂心有

仲 爰居爰處爰喪其馬于以求之子林之下 死生契闊與子成說執子之手與子偕老 于嗟闊兮不我活兮于嗟洵兮不我信兮

擊鼓五章章四句

凱風美孝子也衛之淫風流行雖有七子之母猶不能安其室故美七子能盡其孝道以慰其母心而成其志爾

凱風自南吹彼棘心棘心夭夭母氏劬勞 凱風自南吹彼棘薪母氏聖善我無令人 爰有寒泉在浚之下有子七人母氏勞苦 睨皖黃鳥載好其音有子七人莫慰母心

凱風四章章四句

雄雉刺衛宣公也淫亂不恤國事軍旅數起大夫久役男女怨曠國人患之而作是詩

雄雉于飛泄泄其羽我之懷矣自詒伊阻 雄雉于飛下上其音展矣君子實勞我心 瞻彼日月悠悠我思道之云遠曷云能來 百爾君子不知德行不忒不求何

用不臧

雄雉四章章四句

匏有苦葉刺衛宣公也公與夫人並爲淫亂

匏有苦葉濟有深涉深則厲淺則揭 有淵濟盈有鷺雉鳴濟盈不濡軌雉鳴求其牡 雝雝鳴鴈旭日始旦士如歸妻迨冰未泮 招招舟子人涉卬否人涉卬否卬須我友

匏有苦葉四章章四句

谷風刺夫婦失道也衛人化其上淫於新昏而棄其舊室夫婦離絕國俗傷敗焉 習習谷風以陰以雨黽勉同心不宜有怒采葑采菲無以下體德音莫違及爾同死 行道遲遲中心有違不遠伊邇薄送我畿誰謂荼苦其甘如薺宴爾新昏如兄如弟 溼以渭濁溼溼其沚宴爾新昏不我屑以毋逝我梁毋發我笱我躬不閱遑恤我後 就其深矣方之舟之就其淺矣泳之游之何有亡黽勉求之凡民有喪匍匐救之 不我能備反以我爲讎既阻我德賈用不售昔育恐育鞠及爾顛覆既生

既育比予于毒 我有旨蓄亦以御冬宴爾新昏以我御窮有洗有潰既詒我肄不念昔者伊余來暨

谷風六章章八句

式微黎侯寓于衛其臣勸以歸也

式微式微胡不歸微君之故胡爲乎中露 式微式微胡不歸微君之躬胡爲乎泥

中

式微二章章四句

施丘責衛伯也狄人迫逐黎侯黎侯寓于衛衛不能脩方伯連率之職黎之臣于以責於衛也

施丘之葛兮何誕之節兮叔兮伯兮何多日也 何其處也必有與也何其久也必

有以也 狐裘蒙戎匪車不東叔兮伯兮靡所與同 瑱兮尾兮流離之子叔兮伯

兮褒如充耳

施丘四章章四句

簡兮刺不用賢也衛之賢者仕於伶官皆可以承事王者也

簡兮簡兮方將萬舞日之方中在前上處碩人俟俟公庭萬舞有力如虎執轡如組左手執籥右手秉翟赫如渥赭公言錫爵山有榛隰有苓云誰之思而方美人彼美人兮西方之人兮

簡兮三章章六句

泉水衛女思歸也嫁於諸侯父母終思歸寧而不得故作是詩以自見也

瑟彼泉水亦流于淇有懷于衛靡日不思嬖彼諸姬聊與之謀出宿于泂飲餼子禰女子有行遠父母兄弟問我諸姑遂及伯姊出宿于子故餼子言載脂載盪還車言邁盪臻于衛不瑕有害我思肥泉茲之永歎思須與漕我心悠悠駕言出遊以寫我憂

泉水西章章六句

北門刺仕不得志也言衛之忠臣不得其志爾

出自北門憂心殷殷終窶且貧莫知我艱已焉哉天實爲之謂之何哉王事適我

政事一埤益我我入自外室人交徧隨我已焉哉天實爲之謂之何哉 王事敦我
政事一埤遺我我入自外室人交徧摧我已焉哉天實爲之謂之何哉

北門三章章七句

北風刺虐也衛國並爲威虐百姓不親莫不相攜持而去焉

北風其涼雨雪其雱惠而好我攜手同行其虛其邪既亟只且 北風其噤雨雪其
霏惠而好我攜手同歸其虛其邪既亟只且 莫赤匪狐莫黑匪烏惠而好我攜手
同車其虛其邪既亟只且

北風三章章六句

靜女刺時也衛君無道夫人無德

靜女其姝俟我於城隅愛而不見搔首踟躕 靜女其嬈貽我彤管彤管有煒說懌
女美 自牧歸荑洵美且異匪女之爲美美人之貽

靜女三章章四句

新臺刺衛宣公也納伋之妻作新臺于河上而要之國人惡之而作是詩也

新臺有泚河水瀾瀾燕婉之求籟籟不鮮 新臺有泗河水洸洸燕婉之求籟籟不
殄 魚網之設鴻則離之燕婉之求得此戚施

新臺三章章四句

二子乘舟思伋壽也衛宣公之二子爭相爲死國人傷而思之作是詩也

二子乘舟汎汎其景願言思子中心養養 二子乘舟汎汎其逝願言思子不瑕有
害

二子乘舟二章章四句

邶國十九篇七十一章三百六十三句

鄘

柏舟共姜白誓也衛世子共伯蚤死其妻守義父母欲奪而嫁之誓而弗許故作是
詩以絕之

汎彼柏舟在彼中河髮彼兩髦實維我儀之死矢靡它母也天只不諒人只 汎彼
柏舟在彼河側髮彼兩髦實維我特之死矢靡慝母也天只不諒人只

柏舟二章章七句

牆有茨衛人刺其上也公子頑通乎君母國人疾之而不可道也

牆有茨不可埽也中冓之言不可道也所可道也言之醜也 牆有茨不可藎也中冓之言不可詳也所可詳也言之長也 牆有茨不可束也中冓之言不可讀也所可讀也言之辱也

牆有茨三章章六句

君子偕老刺衛夫人也夫人淫亂失事君子之道故陳人君之德服飾之盛宜與君子偕老也

君子偕老副笄六珈委佗佗如山如河象服是宜子之不淑云如之何 玼兮玼兮其之翟也鬢髮如雲不屑鬢也玉之瑱也象之掇也揚且之皙也胡然而天也胡然而帝也 嗟兮嗟兮其之展也蒙彼繡絺是緼絺也子之清揚揚且之顛也展如之人兮邦之媛也

君子偕老三章一章七句一章九句一章八句

桑中刺奔也衛之公室淫亂男女相奔至于世族在位相竊妻妾期於幽遠政散民流而不可止

爰采唐矣沫之鄉矣云誰之思美孟姜矣期我乎桑中要我乎上宮送我乎淇之上矣 爰采麥矣沫之北矣云誰之思美孟弋矣期我乎桑中要我乎上宮送我乎淇之上矣 爰采葑矣沫之東矣云誰之思美孟庸矣期我乎桑中要我乎上宮送我乎淇之上矣

桑中三章章七句

鶉之奔奔刺衛宣姜也衛人以爲宣姜鶉鶉之不若也

鶉之奔奔鶉之彊彊人之無良我以爲兄 鶉之彊彊鶉之奔奔人之無良我以爲君

鶉之奔奔二章章四句

定之方中美衛文公也衛爲狄所滅東徙渡河野處漕邑齊桓公攘戎狄而封之文公徙居楚丘始建城市而營宮室得其時制百姓說之國家殷富焉

定之方中作于楚宮接之以日作于楚室樹之榛栗椅桐梓漆爰伐琴瑟 升彼虛矣以望楚矣望楚與堂景山與京降觀于桑卜云其吉終然九臧 靈雨既零命彼倌人星言夙駕說于桑田匪直也人秉心塞淵騶牡三千

定之方中三章章七句

蠖棘止奔也衛文公能以道化其民淫奔之恥國人不齒也

蠖棘在東莫之敢指女子有行遠父母兄弟 朝濟于四崇朝其兩女子有行遠兄弟父母 乃如之人也懷昏姻也大無信也不知命也

蠖棘三章章四句

相鼠刺無禮也衛文公能正其羣臣而刺在位承先君之化無禮儀也

相鼠有皮人而無儀人而無儀不死何爲 相鼠有齒人而無止人而無止不死何俟 相鼠有體人而無禮人而無禮胡不遺死

相鼠三章章四句

干旄美好善也衛文公臣子多好善賢者樂告以善道也

子子干旄在浚之郊素絲紕之良馬四之彼姝者子何以畀之 子子干旄在浚之都素絲組之良馬五之彼姝者子何以予之 子子干旄在浚之城素絲祝之良馬六之彼姝者子何以告之

干旄三章章六句

載馳許穆夫人作也閔其宗國驅覆自傷不能救也衛懿公爲狄人所滅國人分散露於漕邑許穆夫人閔衛之亡傷許之小力不能救思歸唁其兄又義不得故賦是詩也

載馳載驅歸唁衛侯驅馬悠悠言至于漕大夫跋涉我心則憂 既不我嘉不能旋反視爾不臧我思不遠 既不我嘉不能旋濟視爾不臧我思不闕 陟彼阿丘言采其蟲女子善懷亦各有行許人尤之衆穰且狂 我行其野芃芃其麥控于大邦誰因誰極大夫君子無我有尤百爾所思不如我所之

載馳五章一章六句二章四句一章六句一章八句

鄘國十篇三十章百七十六句

衛

淇奧美武公之德也有文章又能聽其規諫以禮自防故能入相子周美而作是詩也

瞻彼淇奧綠竹猗猗有匪君子如切如磋如琢如磨瑟兮僖兮赫兮咺兮有匪君子終不可諼兮 瞻彼淇奧綠竹青青有匪君子充耳琇瑩會弁如星瑟兮僖兮赫兮咺兮有匪君子終不可諼兮 瞻彼淇奧綠竹如簣有匪君子如金如錫如圭如璧寬兮綽兮倚重較兮善戲謔兮不爲虐兮

淇奧三章章九句

考槃刺莊公也不能繼先公之業使賢者退而窮處

考槃在澗碩人之寬獨寐寤言永矢弗諼 考槃在阿碩人之邁獨寐磨歌永矢弗過 考槃在陸碩人之軸獨寐寤宿永矢弗告

考槃三章章四句

碩人閔莊姜也莊公惑於嬖妾使驕上僭莊姜賢而不荅終以無子國人閔而憂之

碩人其碩衣錦褰衣齊侯之子衛侯之妻東宮之妹邢侯之姨譚公維私 手如柔
荑膚如凝脂領如蝸鬚齒如瓠犀螭首蛾眉巧笑倩兮美目盼兮 碩人敖敖說于
農郊四牡有騶朱幘鑣鑣翟芘以朝大夫夙退無使君勞 河水洋洋北流活活施
罌濊濊鱸鮪發發葭揭揭庶姜孽孽庶士有暵

碩人四章章七句

氓刺時也宣公之時禮義消亡淫風大行男女無別途相奔誘華落色衰復相棄背
或乃困而自悔喪其妃耦故序其事以風焉美反正刺淫泆也

氓之蚩蚩抱布貿絲匪來貿絲來卽我謀送子涉淇至于頓丘匪我愆期子無良媒
將子無怒秋以爲期 乘彼坳垣以望復關不見復關泣涕漣漣旣見復關載笑載
言爾卜爾筮體無咎言以爾車來以我賄遷 桑之未落其葉沃若于嗟鳩兮無食
桑甚于嗟女兮無與士耽士之耽兮猶可說也女之耽兮不可說也 桑之落矣其
黃而隕自我徂爾三歲食貧淇水湯湯漸車帷裳女也不爽士貳其行士也罔極二
三其德 三歲爲婦靡室勞矣夙興夜寐靡有朝矣言旣遂矣至于暴矣兄弟不知

嗛其笑矣靜言思之躬自悼矣 及爾偕老老使我怨淇則有岸隰則有泮總角之
宴言笑晏晏信誓旦旦不思其反反是不思亦已焉哉

氓六章章十句

竹竿衛女思歸也適異國而不見荅思而能以禮者也

籊籊竹竿以釣子淇豈不爾思遠莫致之 泉源在左淇水在右女子有行遠兄弟
父母 淇水在右泉源在左巧笑之瑳佩玉之儺 淇水漣漣檜楫松舟駕言出遊
以寫我憂

竹竿四章章四句

芄蘭刺惠公也驕而無禮大夫刺之

芄蘭之支童子佩觿雖則佩觿能不我知容兮遂兮垂帶悸兮 芄蘭之葉童子佩
鞶雖則佩鞶能不我甲容兮遂兮垂帶悸兮

芄蘭二章章六句

河廣宋襄公母歸于衛思而不止故作是詩也

木瓜美齊桓公也衛國有狄人之敗出處于漕齊桓公救而封之遺之車馬器服焉
衛人思之欲厚報之而作是詩也

投我以木瓜報之以瓊琚匪報也永以爲好也 投我以木桃報之以瓊瑤匪報也
永以爲好也 投我以木李報之以瓊玖匪報也永以爲好也

木瓜三章章四句

衛國十篇三十四章二百四句

王

黍離閔宗周也周大夫行役至于宗周過故宗廟宮室盡爲禾黍閔周室之顛覆
彷徨不忍去而作是詩也

彼黍離離彼稷之苗行邁靡靡中心搖搖知我者謂我心憂不知我者謂我何求悠
悠蒼天此何人哉 彼黍離離彼稷之穗行邁靡靡中心如醉知我者謂我心憂不
知我者謂我何求悠悠蒼天此何人哉 彼黍離離彼稷之實行邁靡靡中心如噎
知我者謂我心憂不知我者謂我何求悠悠蒼天此何人哉

黍離三章章十句

君子子役刺平王也君子行役無期度大夫思其危難以風焉

君子于役不知其期曷至哉雞棲于塙日之夕矣羊牛下來君子于役如之何勿思
君子于役不日不月曷其有佷離棲于桀日之夕矣羊牛下括君子于役苟無飢渴

君子于役二章章八句

君子陽陽閔周也君子遭亂相招爲祿仕全身遠害而已

君子陽陽左執簧右招我由房其樂只且 君子陶陶左執翫右招我由敖其樂只且

君子陽陽二章章四句

揚之水刺平王也不撫其民而遠屯戍于母家周人怨思焉

揚之水不流束薪彼其之子不與我戍申懷哉懷哉曷月予還歸哉 揚之水不流束楚彼其之子不與我戍甫懷哉懷哉曷月予還歸哉 揚之水不流束蒲彼其之

子不與我戍許懷哉懷哉曷月予還歸哉

揚之水三章章六句

中谷有藿閔周也夫婦日以衰薄凶年饑饉室家相棄爾

中谷有藿嘆其乾矣有女叱離嘒其嘆矣嘒其嘆矣遇人之艱難矣 中谷有藿嘆其脩矣有女叱離條其歎矣條其歎矣遇人之不淑矣 中谷有藿嘆其濕矣有女叱離嘖其泣矣嘖其泣矣何嗟及矣

中谷有藿三章章六句

兔爰閔周也桓王失信諸侯背叛構怨連禍王師傷敗君子不樂其生焉

有兔爰爰雉離于羅我生之初尙無爲我生之後逢此百羅尙寐無吡 有兔爰爰雉離于罝我生之初尙無造我生之後逢此百憂尙寐無覺 有兔爰爰雉離于罝我生之初尙無庸我生之後逢此百凶尙寐無聰

兔爰三章章七句

葛藟王族刺平王也周室道衰棄其九族焉

縣葛藟在河之滸終遠兄弟謂他人父謂他人父亦莫我顧 縣縣葛藟在河之
涘終遠兄弟謂他人母謂他人母亦莫我有 縣縣葛藟在河之滸終遠兄弟謂他
人昆謂他人昆亦莫我聞

葛藟三章章六句

采葛懼讖也

彼采葛兮一日不見如三月兮 彼采蕭兮一日不見如三秋兮 彼采艾兮一日
不見如三歲兮

采葛三章章三句

大車刺周大夫也禮義陵遲男女淫奔故陳古以刺今大夫不能聽男女之訟焉
大車檻檻毳衣如萋豈不爾思畏子不敢 大車啍啍毳衣如璫豈不爾思畏子不
奔 穀則異室死則同穴謂予不信有如皦日

大車三章章四句

丘中有麻思賢也莊王不明賢人放逐國人思之而作是詩也

丘中有麻彼畱子嗟彼畱子嗟將其來施施 丘中有麥彼畱子國彼畱子國將其來食 丘中有李彼畱之子彼畱之子貽我佩玖

丘中有麻三章章四句

王國十篇二十八章百六十二句

鄭

緇衣美武公也父子並爲周司徒善於其職國人宜之故美其德以明有國善善之功焉

緇衣之宜兮敝予又改爲兮適子之館兮還予授子之粢兮 緇衣之好兮敝予又改作兮適子之館兮還予授子之粢兮 緇衣之席兮敝予又改作兮適子之館兮

緇衣三章章四句

將仲子刺莊公也不勝其母以害其弟弟叔失道而公弗制祭仲諫而公弗聽小不忍以致大亂焉

將仲子兮無踰我里無折我樹杞豈敢愛之畏我父母仲可懷也父母之言亦可畏也 將仲子兮無踰我牆無折我樹桑豈敢愛之畏我諸兄仲可懷也諸兄之言亦可畏也 將仲子兮無踰我園無折我樹檀豈敢愛之畏人之多言仲可懷也人之多言亦可畏也

將仲于三章章八句

叔于田刺莊公也叔處于京繕甲治兵以出于田國人說而歸之

叔于田巷無居人豈無居人不如叔也洵美且仁 叔于狩巷無飲酒豈無飲酒不如叔也洵美且好 叔適野巷無服馬豈無服馬不如叔也洵美且武

叔于田三章章五句

大叔于田刺莊公也叔多才而好勇不義而得衆也

大叔于田乘乘馬執轡如組兩驂如舞叔在藪火烈具舉檀裼暴虎獻于公所將叔無狃戒其傷女 叔于田乘乘黃兩服上襄兩驂厲行叔在藪火烈具揚叔善射忌又良御忌抑磬控忌抑縱送忌 叔于田乘乘搗兩服齊首兩驂如手叔在藪火烈

具阜叔馬慢忌叔發罕忌抑釋擗忌抑鬯弓忌

大叔于田三章章十句

清人刺文公也高克好利而不顧其君文公惡而欲遠之不能使高克將兵而禦狄于竟陳其師旅翱翔河上久而不召衆散而歸高克奔陳公子素惡高克進之不以禮文公退之不以道危國亡師之本故作是詩也

清人在彭駟介旁旁二矛重英河上乎翱翔 清人在消駟介廡廡二矛重喬河上乎逍遙 清人在軸駟介陶陶左旋右抽中軍作好

清人三章章四句

羔裘刺朝也言古之君子以風其朝焉

羔裘如濡洵直且侯彼其之子舍命不渝 羔裘豹飾孔武有力彼其之子邦之直 羔裘晏兮三英粲兮彼其之子邦之彥兮

羔裘三章章四句

遵大路思君子也莊公失道君子去之國人思望焉

遵大路兮摻執子之祛兮無我惡兮不逮故也 遵大路兮摻執子之手兮無我醜兮不逮好也

遵大路二章章四句

女曰雞鳴刺不說德也陳古義以刺今不說德而好色也

女曰雞鳴士曰昧且子興視夜明星有爛將翱將翔弋鳧與鴈 弋言加之與子宜之宜言飲酒與子偕老琴瑟在御莫不靜好 知子之來之雜佩以贈之知子之順之雜佩以問之知子之好之雜佩以報之

女曰雞鳴三章章六句

有女同車刺忽也鄭人刺忽之不昏于齊太子忽嘗有功于齊齊侯請妻之齊女賢而不取卒以無大國之助至於見逐故國人刺之

有女同車顏如舜華將翱將翔佩玉瓊琚彼美孟姜洵美且都 有女同行顏如舜英將翱將翔佩玉將將彼美孟姜德音不忘

有女同車二章章六句

山有扶蘇刺忽也所美非美然

山有扶蘇隰有荷華不見子都乃見狂且 山有喬松隰有游龍不見子充乃見狡童

山有扶蘇二章章四句

蓍兮刺忽也君弱臣強不倡而和也

蓍兮蓍兮風其吹女叔兮伯兮倡予和女 蓍兮蓍兮風其漂女叔兮伯兮倡予要女

蓍兮二章章四句

狡童刺忽也不能與賢人圖事權臣擅命也

彼狡童兮不與我言兮維子之故使我不能餐兮 彼狡童兮不與我食兮維子之故使我不能息兮

狡童二章章四句

褻裳思見正也狂童恣行國人思大國之正己也

子惠思我褰裳涉溱子不我思豈無他人狂童之狂也且 子惠思我褰裳涉洧子不我思豈無他士狂童之狂也且

褰裳二章章五句

丰刺亂也婚姻之道缺陽倡而陰不和男行而女不隨

子之丰兮俟我乎巷兮悔予不送兮 子之昌兮俟我乎堂兮悔予不將兮 衣錦

褰衣裳錦褰裳叔兮伯兮駕予與行 裳錦褰裳衣錦褰衣叔兮伯兮駕予與歸

丰四章二章章二句二章章四句

東門之墀刺亂也男女有不待禮而相奔者也

東門之墀茹蘆在阪其室則邇其人甚遠 東門之栗有踐家室豈不爾思子不我

卽

東門之墀二章章四句

風雨思君子也亂世則思君子不改其度焉

風雨淒淒雞鳴喈喈既見君子云胡不夷 風雨瀟瀟雞鳴膠膠既見君子云胡不

瘳 風雨如晦雞鳴不已既見君子云胡不喜

風雨三章章四句

子衿刺學校廢也亂世則學校不脩焉

青青子衿悠悠我心縱我不往子寧不嗣音 青青子佩悠悠我思縱我不往子寧不來 挑兮達兮在城闕兮一日不見如三月兮

子衿三章章四句

揚之水閔無臣也君子閔忽之無忠臣良士終以死亡而作是詩也

揚之水不流束楚終鮮兄弟維予與女無信人之言人實廷女 揚之水不流束薪終鮮兄弟維予二人無信人之言人實不信

揚之水二章章六句

出其東門閔亂也公子五爭兵革不息男女相棄民人思保其室家焉

出其東門有女如雲雖則如雲匪我思存縞衣綦巾聊樂我貞 出其闔閭有女如荼雖則如荼匪我思且縞衣茹蘆聊可與娛

出其東門二章章六句

野有蔓草思遇時也君之澤不下流民窮於兵革男女失時思不期而會焉

野有蔓草零露漙漙兮有美一人清揚婉兮邂逅相遇適我願兮 野有蔓草零露漙漙有美一人婉如清揚邂逅相遇與子皆臧

野有蔓草二章章六句

溱洧刺亂也兵革不息男女相棄淫風大行莫之能救焉

溱與洧方渙渙兮士與女方秉蘭兮女曰觀乎士曰既且且往觀乎洧之外洵訏且樂維士與女伊其相謔贈之以勺藥 溱與洧瀏其清矣士與女殷其盈矣女曰觀乎士曰既且且往觀乎洧之外洵訏且樂維士與女伊其將謔贈之以勺樂

溱洧二章章十二句

鄭國二十一篇五十三章二百八十三句

齊

雞鳴思賢妃也哀公荒淫怠慢故陳賢妃貞女夙夜警戒相成之道焉

雞既鳴矣朝既盈矣匪雞則鳴蒼蠅之聲 東方明矣朝既昌矣匪東方則明月出之光 蟲飛薨薨甘與子同夢會且歸矣無庶予子憎

雞鳴三章章四句

還刺荒也哀公好田獵從禽獸而無厭國人化之遂成風俗習於田獵謂之賢閑於馳逐謂之好焉

子之還兮遭我乎狝之閒兮並驅從兩肩兮揖我謂我儂兮 子之茂兮遭我乎狝之道兮並驅從兩牡兮揖我謂我好兮 子之昌兮遭我乎狝之陽兮並驅從兩狼兮揖我謂我臧兮

還三章章四句

著刺時也時不親迎也

俟我於著乎而充耳以素乎而尚之以瓊華乎而 俟我於庭乎而充耳以青乎而尚之以瓊瑩乎而 俟我於堂乎而充耳以黃乎而尚之以瓊英乎而

著三章章三句

東方之日刺衰也君臣失道男女淫奔不能以禮化也

東方之日兮彼姝者子在我室兮在我室兮履我卽兮 東方之月兮彼姝者子在我闔兮在我闔兮履我發兮

東方之日二章章五句

東方未明刺無節也朝廷興居無節號令不時挈壺氏不能掌其職焉

東方未明顛倒衣裳顛之自公召之 東方未晞顛倒裳衣倒之顛之自公令之 折柳樊圃狂犬瞿瞿不能辰夜不夙則莫

東方未明三章章四句

南山刺襄公也鳥獸之行淫乎其妹大夫遇是惡作詩而去之

南山崔崔雄狐綏綏魯道有蕩齊子由歸既曰歸止曷又懷止 葛屨五兩冠綏雙止魯道有蕩齊子庸止既曰庸止曷又從止 蕤麻如之何衡從其畝取妻如之何必告父母既曰告止曷又鞠止 析薪如之何匪斧不克取妻如之何匪媒不得既曰得止曷又極止

南山四章章六句

甫田大夫刺襄公也無禮義而求大功不脩德而求諸侯志大心勞所以求者非其道也

無田甫田維莠騶騶無思遠人勞心忉忉 無田甫田維莠桀桀無思遠人勞心怛怛 婉兮孌兮總角卅兮未幾見兮突而弁兮

甫田三章章四句

盧令刺荒也襄公好田獵畢弋而不脩民事百姓苦之故陳古以風焉

盧令令其人美且仁 盧重環其人美且鬢 盧重鋸其人美且偲

盧令三章章二句

敝笱刺文姜也齊人惡魯桓公微弱不能防閑文姜使至淫亂爲二國患焉

敝笱在梁其魚魴鰈齊子歸止其從如雲 敝笱在梁其魚魴鱖齊子歸止其從如雨 敝笱在梁其魚唯唯齊子歸止其從如水

敝笱三章章四句

載驅齊人刺襄公也無禮義故盛其車服疾驅於通道大都與文姜淫播其惡於萬民焉

載驅薄薄簟茀朱韜魯道有蕩齊子發夕 四驪濟濟垂轡滿淵魯道有蕩齊子豈弟 汶水湯湯行人彭彭魯道有蕩齊子翩翩 汶水滔滔行人儻儻魯道有蕩齊子游敖

載驅四章章四句

猗嗟刺魯莊公也齊人傷魯莊公有威儀技藝然而不能以禮防閑其母失子之道人以爲齊侯之子焉

猗嗟昌兮頌而長兮抑若揚兮美目揚兮巧趨踰兮射則臧兮 猗嗟名兮美目清兮儀既成兮終日射侯不出正兮展我甥兮 猗嗟變兮清揚婉兮舞則選兮射則貫兮四矢反兮以禦亂兮

猗嗟三章章六句

齊國十一篇二十四章百四十三句

魏

葛屨刺褊也。魏地陘隘，其民機巧趨利，其君儉嗇，褊急而無德，以將之。

糾糾葛屨，可以履霜。摻摻女乎，可以縫裳。要之襍之，好人服之。好人提提，宛然左辟，佩其象揅。維是褊心，是以爲刺。

葛屨二章一章六句一章五句

汾沮洳刺儉也。其君儉以能勤，刺不得禮也。

彼汾沮洳，言采其莫。彼其之子，美無度。美無度，殊異乎公路。彼汾一方，言采其桑。彼其之子，美如玉。美如玉，殊異乎公族。

汾沮洳三章章六句

園有桃，刺時也。大夫憂其君國小而迫，而儉以嗇，不能用其民而無德教，日以侵削，故作是詩也。

園有桃，其實之穀。心之憂矣，我歌且謠。不知我者，謂我士也。驕彼人是哉。子曰何其。

心之憂矣其誰知之其誰知之蓋亦勿思 國有棘其實之食心之憂矣聊以行國
不我知者謂我士也罔極彼人是哉子曰何其心之憂矣其誰知之其誰知之蓋亦
勿思

國有桃二章章十二句

陟岵孝子行役思念父母也國迫而數侵削役乎大國父母兄弟離散而作是詩也
陟彼岵兮瞻望父兮父曰嗟予子行役夙夜無已上慎旃哉猶來無止 陟彼屺兮
瞻望母兮母曰嗟予季行役夙夜無寐上慎旃哉猶來無棄 陟彼岡兮瞻望兄兮
兄曰嗟予弟行役夙夜必借上慎旃哉猶來無死

陟岵三章章六句

十畝之間刺時也言其國削小民無所居焉

十畝之間兮桑者閑閑兮行與子還兮 十畝之外兮桑者泄泄兮行與子逝兮

十畝之間二章章三句

伐檀刺貪也在位貪鄙無功而受祿君子不得進仕爾

坎坎伐檀兮寘之河之干兮河水清且漣漪不稼不穡胡取禾三百廛兮不狩不獵胡瞻爾庭有縣貍兮彼君子兮不素餐兮 坎坎伐輻兮寘之河之側兮河水清且直漪不稼不穡胡取禾三百億兮不狩不獵胡瞻爾庭有縣特兮彼君子兮不素食兮 坎坎伐輪兮寘之河之漘兮河水清且淪漪不稼不穡胡取禾三百困兮不狩不獵胡瞻爾庭有縣鶉兮彼君子兮不素殮兮

伐檀三章章九句

碩鼠刺重斂也國人刺其君重斂蠶食於民不脩其政貪而畏人若大鼠也

碩鼠碩鼠無食我黍三歲貫女莫我肯顧逝將去女適彼樂土樂土樂土爰得我所 碩鼠碩鼠無食我麥三歲貫女莫我肯德逝將去女適彼樂國樂國樂國爰得我所 直 碩鼠碩鼠無食我苗三歲貫女莫我肯勞逝將去女適彼樂郊樂郊樂郊誰之

永號

碩鼠三章章八句

唐

蟋蟀刺晉僖公也儉不中禮故作是詩以閔之欲其及時以禮自虞樂也此晉也而謂之唐本其風俗憂深思遠儉而用禮乃有堯之遺風焉

蟋蟀在堂歲聿其莫今我不樂日月其除無已大康職思其居好樂無荒良士瞿瞿
蟋蟀在堂歲聿其逝今我不樂日月其邁無已大康職思其外好樂無荒良士蹶蹶
蟋蟀在堂役事其休今我不樂日月其愒無已大康職思其憂好樂無荒良士休休

蟋蟀三章章八句

山有樞刺晉昭公也不能脩道以正其國有財不能用有鍾鼓不能以自樂有朝廷不能洒埽政荒民散將以危亡四鄰謀取其國家而不知國人作詩以刺之也

山有樞隰有楡子有衣裳弗曳弗婁子有車馬弗馳弗驅宛其死矣他人是愉 山有栲隰有杻子有廷內弗洒弗埽子有鍾鼓弗鼓弗考宛其死矣他人是保 山有漆隰有栗子有酒食何不日鼓瑟且以喜樂且以永日宛其死矣他人入室

山有樞三章章八句

揚之水刺晉昭公也昭公分國以封沃沃盛強昭公微弱國人將叛而歸沃焉

揚之水白石粼粼素衣朱襮從子于沃既見君子云何不樂 揚之水白石皓皓素衣朱繡從子于鵠既見君子云何其憂 揚之水白石粼粼我聞有命不敢以告人

揚之水三章二章章六句一章四句

椒聊刺晉昭公也君子見沃之盛彊能脩其政知其蕃衍盛大子孫將有晉國焉

椒聊之實蕃衍盈升彼其之子碩大無朋椒聊且遠條且 椒聊之實蕃衍盈剝彼其之子碩大且篤椒聊且遠條且

椒聊二章章六句

綢繆刺晉亂也國亂則婚姻不得其時焉

綢繆束薪三星在天今夕何夕見此良人子兮子兮如此良人何 綢繆束芻三星在隅今夕何夕見此邂逅子兮子兮如此邂逅何 綢繆束楚三星在戶今夕何夕見此粲者子兮子兮如此粲者何

綢繆三章章六句

秋杜刺時也君不能親其宗族骨肉離散獨居而無兄弟將爲沃所并爾
有秋之杜其葉滑滑獨行踽踽豈無他人不如我同父嗟行之人胡不比焉人無兄
弟胡不攸焉 有秋之杜其葉菁菁獨行翼翼豈無他人不如我同姓嗟行之人胡
不比焉人無兄弟胡不攸焉

秋杜二章章九句

羔裘刺時也晉人刺其在位不恤其民也

羔裘豹祛自我人居居豈無他人維于之故 羔裘豹褻自我人究究豈無他人維
子之好

羔裘二章章四句

鵠羽刺時也昭公之後大亂五世君子下從征役不得養其父母而作是詩也

肅肅鵠羽集于苞栩王事靡盬不能蓺稷黍父母何怙悠悠蒼天曷其有所 肅肅
鵠翼集于苞棘王事靡盬不能蓺黍稷父母何食悠悠蒼天曷其有極 肅肅鵠行
集于苞桑王事靡盬不能蓺稻粱父母何嘗悠悠蒼天曷其有常

鵠羽三章章七句

無衣刺晉武公也武公始并晉國其大夫爲之請命乎天子之使而作是詩也

豈曰無衣七兮不如子之衣安且吉兮 豈曰無衣六兮不如子之衣安且煖兮

無衣二章章三句

有杕之杜刺晉武也武公寡特兼其宗族而不求賢以自輔焉

有杕之杜生于道左彼君子兮曠肯適我中心好之曷飲食之 有杕之杜生于道

周彼君子兮曠肯來遊中心好之曷飲食之

有杕之杜二章章六句

葛生刺晉獻公也好攻戰則國人多喪矣

葛生蒙楚薺蔓于野予美亡此誰與獨處 葛生蒙棘薺蔓于域予美亡此誰與獨

息 角枕粲兮錦衾爛兮予美亡此誰與獨旦 夏之日冬之夜百歲之後歸于其

居 冬之夜夏之日百歲之後歸于其室

葛生五章章四句

采芾刺晉獻公也獻公好聽讒焉

采芾采芾首陽之巔人之爲言苟亦無信舍旃舍旃苟亦無然人之爲言胡得焉
采芾采芾首陽之下人之爲言苟亦無與舍旃舍旃苟亦無然人之爲言胡得焉
采芾采芾首陽之東人之爲言苟亦無從舍旃舍旃苟亦無然人之爲言胡得焉

采芾三章章八句

唐國十二篇三十三章二百三句

秦

車鄰美秦仲也秦仲始大有車馬禮樂侍御之好焉

有車鄰鄰有馬白顛未見君子寺人之令 阪有漆隰有栗既見君子並坐鼓瑟今
者不樂逝者其靈 阪有桑隰有楊既見君子並坐鼓簧今者不樂逝者其亡

車鄰三章一章四句二章章六句

駟騶美襄公也始命有田狩之事圍囿之樂焉

駟騶孔阜六轡在手公之媚子從公于狩 奉時辰牡辰牡孔碩公曰左之舍拔則

獲 遊于北園四馬既閑輔車鸞鑣載獫狁駘

網賦三章章四句

小戎美襄公也備其兵甲以討四戎四戎方彊而征伐不休國人則矜其車甲婦人能閱其君子焉

小戎儀收五檠梁輶游環脅驅陰鞞蓋纘文茵暢轂駕我騏驎言念君子溫其如玉在其板屋亂我心曲 四牡孔阜六轡在手騏驎是中騶纘是驂龍盾之合蓋以饋輶言念君子溫其在邑方何爲期胡然我念之 儀駟孔羣公矛蓋錚蒙伐有苑虎輶鏤膺交輶二弓竹閉緹縻言念君子載寢載興厭厭良人秩秩德音

小戎三章章十句

蒹葭刺襄公也未能用周禮將無以固其國焉

蒹葭蒼蒼白露爲霜所謂伊人在水一方遡洄從之道阻且長溯游從之宛在水中央 蒹葭萋萋白露未晞所謂伊人在水之湄溯洄從之道阻且躋溯游從之宛在水中央 蒹葭采采白露未已所謂伊人在水之涘溯洄從之道阻且右溯游從之

宛在水中沚

蒹葭三章章八句

終南戒襄公也能取周地始爲諸侯受顯服大夫美之故作是詩以戒勸之
終南何有有條有梅君子至止錦衣狐裘顏如渥丹其君也哉 終南何有有紀有
堂君子至止黻衣繡裳佩玉將將壽考不亡

終南二章章六句

黃鳥哀三良也國人刺穆公以人從死而作是詩也

交交黃鳥止于棘誰從穆公子車奄息維此奄息百夫之特臨其穴惴惴其慄彼蒼
者天殲我良人如可贖兮人百其身 交交黃鳥止于桑誰從穆公子車仲行維此
仲行百夫之防臨其穴惴惴其慄彼蒼者天殲我良人如可贖兮人百其身 交交
黃鳥止于楚誰從穆公子車鍼虎維此鍼虎百夫之禦臨其穴惴惴其慄彼蒼者天
殲我良人如可贖兮人百其身

黃鳥三章章十二句

晨風刺康公也忘穆公之業始棄其賢臣焉

歎彼晨風鬱彼北林未見君子憂心欽欽如何如何忘我實多 山有苞棣隰有六駁未見君子憂心靡樂如何如何忘我實多 山有苞棣隰有樹櫨未見君子憂心如醉如何如何忘我實多

晨風三章章六句

無衣刺用兵也秦人刺其君好攻戰亟用兵而不與民同欲焉

豈曰無衣與子同袍王于興師脩我戈矛與子同仇 豈曰無衣與子同澤王于興師脩我矛戟與子偕作 豈曰無衣與子同裳王于興師脩我甲兵與子偕行

無衣三章章五句

渭陽康公念母也康公之母晉獻公之女文公遭麗姬之難未反而秦姬卒穆公納文公康公時爲大子贈送文公于渭之陽念母之不見也我見舅氏如母存焉及其卽位思而作是詩也

我送舅氏曰至渭陽何以贈之路車乘黃 我送舅氏悠悠我思何以贈之瓊瑰

渭陽二章章四句

權輿刺康公也忘先君之舊臣與賢者有始而無終也

於我乎夏屋渠渠今也每食無餘于嗟乎不承權輿 於我乎每食四簋今也每食不飽于嗟乎不承權輿

權輿二章章五句

秦國十篇二十七章百八十一句

陳

宛丘刺幽公也淫荒昏亂游蕩無度焉

子之湯兮宛丘之上兮洵有情兮而無望兮 坎其擊鼓宛丘之下無冬無夏值其鷺羽 坎其擊缶宛丘之道無冬無夏值其鷺翮

宛丘三章章四句

東門之枌疾亂也幽公淫荒風化之所行男女棄其舊業亟會於道路歌舞於市井

爾

東門之枌宛丘之榭子仲之子婆娑其下 穀旦于差南方之原不續其麻市也婆娑 穀旦于逝越以緹邁視爾如收貽我握椒

東門之枌三章章四句

衡門誘僖公也愿而無立志故作是詩以誘掖其君也

衡門之下可以棲遲泌之洋洋可以樂飢 豈其食魚必河之魴豈其取妻必齊之姜 豈其食魚必河之鯉豈其取妻必宋之子

衡門三章章四句

東門之池刺時也疾其君子淫昏而思賢女以配君子也

東門之池可以漚麻彼美淑姬可與晤歌 東門之池可以漚紵彼美淑姬可與晤語 東門之池可以漚菅彼美淑姬可與晤言

東門之池三章章四句

東門之楊刺時也昏姻失時男女多違親迎女猶有不至者也

東門之楊其葉牂牁昏以爲期明星煌煌 東門之楊其葉肺肺昏以爲期明星晢

哲

東門之楊二章章四句

墓門刺陳佗也陳佗無良師傅以至於不義惡加於萬民焉

墓門有棘斧以斯之夫也不良國人知之知而巳誰昔然矣 墓門有梅有鴉萃止夫也不良歌以訊之訊予不顧顛倒思予

墓門二章章六句

防有鵠巢憂讒賊也宣公多信讒君子憂懼焉

防有鵠巢邛有旨莒誰俯予美心焉切切 中唐有變邛有旨鵠誰俯予美心焉惕惕

防有鵠巢二章章四句

月出刺好色也在位不好德而說美色焉

月出皎兮佼人僚兮舒窈窕兮勞心愴兮 月出皓兮佼人憇兮舒憂受兮勞心慄兮 月出照兮佼人燎兮舒天紹兮勞心慘兮

月出三章章四句

株林刺靈公也淫乎夏姬驅馳而往朝夕不休息焉

胡爲乎株林從夏南匪適株林從夏南 駕我乘馬說于株野乘我乘駒朝食于株

株林二章章四句

澤陂刺時也言靈公君臣淫於其國男女相說憂思感傷焉

彼澤之陂有蒲與荷有美一人傷如之何寤寐無爲涕泗滂沱 彼澤之陂有蒲與

荷有美一人碩大且卷寤寐無爲中心悄悄 彼澤之陂有蒲菡萏有美一人碩大

且儼寤寐無爲輾轉伏枕

澤陂三章章六句

陳國十篇二十六章百二十四句

檜

羔裘大夫以道去其君也國小而迫君不用道好絮其衣服逍遙遊燕而不能自強於政治故作是詩也

羔裘逍遙狐裘以朝豈不爾思勞心忉忉 羔裘翱翔狐裘在堂豈不爾思我心憂傷 羔裘如膏日出有曜豈不爾思中心是悼

羔裘三章章四句

素冠刺不能三年也

庶見素冠兮棘人樂樂兮勞心博博兮 庶見素衣兮我心傷悲兮聊與子同歸兮 庶見素韞兮我心蘊結兮聊與子如一兮

素冠三章章三句

隰有萋楚疾恣也國人疾其君之淫恣而思無情慾者也

隰有萋楚猗儺其枝天之沃沃樂子之無知 隰有萋楚猗儺其華天之沃沃樂子之無家 隰有萋楚猗儺其實天之沃沃樂子之無室

隰有萋楚三章章四句

匪風思周道也國小政亂憂及禍難而思周道焉

匪風發兮匪車偁兮願瞻周道中心悵兮 匪風飄兮匪車嘒兮願瞻周道中心弔

兮 誰能亨魚漚之釜鬻誰將西歸懷之好音

匪風三章章四句

檜國四篇十二章四十五句

曹

蜉蝣刺奢也昭公國小而迫無法以自守好奢而任小人將無所依焉

蜉蝣之羽衣裳楚楚心之憂矣於我歸處 蜉蝣之翼采采衣服心之憂矣於我歸
息 蜉蝣掘閱麻衣如雪心之憂矣於我歸說

蜉蝣三章章四句

候人刺近小人也共公遠君子而好近小人焉

彼候人兮何戈與祿彼其之子三百赤芾 維鷄在梁不濡其翼彼其之子不稱其
服 維鷄在梁不濡其味彼其之子不逸其媾 蒼兮蔚兮南山朝隴婉兮變兮季

女斯飢

候人四章章四句

鵙鳩刺不壹也在位無君子用心之不壹也

鵙鳩在桑其子七兮淑人君子其儀一兮其儀一兮心如結兮 鵙鳩在桑其子在
梅淑人君子其帶伊絲其帶伊絲其弁伊騏 鵙鳩在桑其子在棘淑人君子其儀
不忒其儀不忒正是四國 鵙鳩在桑其子在榛淑人君子正是國人正是國人胡
不萬年

鵙鳩四章章六句

下泉思治也曹人疾共公侵刻下民不得其所憂而思明王賢伯也

洌彼下泉浸彼苞稂愾我寤嘆念彼周京 洌彼下泉浸彼苞蕭愾我寤嘆念彼京
周 洌彼下泉浸彼苞著愾我寤嘆念彼京師 芃芃黍苗陰雨膏之四國有王郇
伯勞之

下泉四章章四句

曹國四篇十五章六十八句

幽

七月陳王業也周公遭變故陳后稷先公風化之所由致王業之艱難也

七月流火九月授衣一之日齋發二之日栗烈無衣無褐何以卒歲三之日于耜四之日舉趾同我婦子饁彼南畝田峻至喜 七月流火九月授衣春日載陽有鳴倉

庚女執懿筐遵彼微行爰求柔桑春日遲遲采桑祁祁女心傷悲殆及公子同歸

七月流火八月萑葦蠶月條桑取彼斧斨以伐遠揚猗彼女桑七月鳴鵙八月載績載玄載黃我朱孔陽爲公子裳 四月秀葷五月鳴蜩八月其穫十月隕穽一之日

于貉取彼狐狸爲公子裘二之日其同載績武功言私其縱獻豨于公 五月斯螽

動股六月莎雞振羽七月在野八月在宇九月在戶十月蟋蟀入我牀下穹窒熏鼠塞向墜戶嗟我婦子曰爲改歲入此室處 六月食鬱及薁七月亨葵及菽八月剝

棗十月穫稻爲此春酒以介眉壽七月食瓜八月斷壺九月叔苴采荼薪樛食我農夫 九月築場圃十月納禾稼黍稷重穆禾麻菽麥嗟我農夫我稼既同上入執宮

功晝爾于茅宵爾索綯亟其乘屋其始播百穀 二之日鑿冰沖沖三之日納于凌陰四之日其蚤獻羔祭韭九月肅霜十月淠場朋酒斯饗曰殺羔羊躋彼公堂稱彼

兕觥萬壽無疆

七月八章章十一句

鷓鴣周公救亂也成王未知周公之志公乃爲詩以遺王名之曰鷓鴣焉

鷓鴣鷓鴣既取我子無毀我室恩斯勤斯鬻子之閔斯 迨天之未陰雨徹彼桑土
綯繆牖戶今女下民或敢侮予 予手拮据予所持荼予所蓄租予口卒瘁曰予未
有室家 予羽譙譙予尾脩脩予室翹翹風雨所漂搖予維音嘒嘒

鷓鴣四章章五句

東山周公東征也周公東征三年而歸勞歸士大夫美之故作是詩也一章言其完
也二章言其思也三章言其室家之望女也四章樂男女之得及時也君子之於人
序其情而閔其勞所以說也說以使民民忘其死其唯東山乎

我徂東山惛惛不歸我東自東零雨其濛我東曰歸我心西悲制彼裳衣勿士行枚
娟娟者蠟烝在桑野敦彼獨宿亦在車下 我徂東山惛惛不歸我來自東零雨其
濛果臝之實亦施于宇伊威在室蠨蛸在戶町疇鹿場熠燿宵行不可畏也伊可懷

也 我徂東山惓惓不歸我東自東零雨其濛鶴鳴于埵婦歎于室洒掃穹窒我征
聿至有敦瓜苦烝在栗薪自我不見于今三年 我徂東山惓惓不歸我來自東零
雨其濛倉庚于飛熠燿其羽之子子歸皇駁其馬親結其縶九十其儀其新孔嘉其
舊如之何

東山四章章十二句

破斧美周公也周大夫以惡四國焉

既破我斧又缺我斨周公東征四國是皇哀我人斯亦孔之將 既破我斧又缺我
斨周公東征四國是吡哀我人斯亦孔之嘉 既破我斧又缺我斨周公東征四國
是道哀我人斯亦孔之休

破斧三章章六句

伐柯美周公也周大夫刺朝廷之不知也

伐柯如何匪斧不克取妻如何匪媒不得 伐柯伐柯其則不遠我覲之子籩豆有

踐

伐柯二章章四句

九罭美周公也周大夫刺朝廷之不知也

九罭之魚鱗魴我覲之子袞衣繡裳 鴻飛遵渚公歸無所於女信處 鴻飛遵陸

公歸不復於女信宿 是以有袞衣兮無以我公歸兮無使我心悲兮

九罭四章一章四句三章章三句

狼跋美周公也周公攝政遠則四國流言近則王不知周大夫美其不失其聖也

狼跋其胡載蹇其尾公孫碩膚赤舄几几 狼蹇其尾載跋其胡公孫碩膚德音不

瑕

狼跋二章章四句

豳國七篇二十七章章二百三句

小雅

鹿鳴之什

鹿鳴燕羣臣嘉賓也既飲食之又實幣帛筐篚以將其厚意然後忠臣嘉賓得盡其

心矣

呦呦鹿鳴食野之苹我有嘉賓鼓瑟吹笙吹笙鼓簧承筐是將人之好我示我周行
呦呦鹿鳴食野之蒿我有嘉賓德音孔昭視民不怵君子是則是傲我有旨酒嘉
賓式燕以敖 呦呦鹿鳴食野之芩我有嘉賓鼓瑟鼓琴鼓瑟鼓琴和樂且湛我有
旨酒以燕樂嘉賓之心

鹿鳴三章章八句

四牡勞使臣之來也有功而見知則說矣

四牡駢駢周道倭遲豈不懷歸王事靡盬我心傷悲 四牡駢駢嘽嘽駘駘馬豈不懷
歸王事靡盬不遑啓處 翩翩者騅載飛載下集于苞栩王事靡盬不遑將父 翩
翩者騅載飛載止集于苞杞王事靡盬不遑將母 駕彼四駱載驟駸駸豈不懷歸
是用作歌將母來詵

四牡五章章五句

皇皇者華君遣使臣也送之以禮樂言遠而有光華也

皇皇者華于彼原隰駢駢征夫每懷靡及 我馬如駒六轡如濡載馳載驅周爰咨
諏 我馬維騏六轡如絲載馳載驅周爰咨謀 我馬維駉六轡沃若載馳載驅周
爰咨度 我馬維駒六轡既均載馳載驅周爰咨詢

皇皇者華五章章四句

常棣燕兄弟也閔管蔡之失道故作常棣焉

常棣之華鄂不韡韡凡今之人莫如兄弟 死喪之戚兄弟孔懷原隰哀矣兄弟求
矣 脊令在原兄弟急難每有良朋況也永歎 兄弟鬩于牆外禦其務每有良朋
蒸也無戎 喪亂既平既安且寧雖有兄弟不如友生 儻爾籩豆飲酒之飫兄弟
既具和樂且孺 妻子好合如鼓瑟琴兄弟既翕和樂且湛 宜爾家室樂爾妻帑
是究是圖亶其然乎

常棣八章章四句

伐木燕朋友故舊也自天子至于庶人未有不須友以成者親親以睦友賢不棄不
遺故舊則民德歸厚矣

伐木丁丁鳥鳴嚶嚶出自幽谷遷于喬木嚶其鳴矣求其友聲 相彼鳥矣猶求友聲矧伊人矣不求友生神之聽之終和且平 伐木許許醕酒有藇既有肥羜以速諸父寧適不來微我弗順 於粲酒埽陳饋八簋既有肥牡以速諸舅寧適不來微我有咎 伐木于阪醕酒有衍籩豆有踐兄弟無遠民之失德乾餱以愆 有酒湑我無酒酤我坎坎鼓我蹲蹲舞我迨我暇矣飲此湑矣

伐木六章章六句

天保下報上也君能下下以成其政臣能歸美以報其上焉

天保定爾亦孔之固俾爾單厚何福不除俾爾多益以莫不庶 天保定爾俾爾戩穀罄無不宜受天百祿降爾遐福維日不足 天保定爾以莫不興如山如阜如岡如陵如川之方至以莫不增 吉蠲爲饗是用孝享禴祀烝嘗于公先王君曰卜爾萬壽無疆 神之弔矣詒爾多福民之質矣日用飲食羣黎百姓徧爲爾德 如月之恆如日之升如南山之壽不騫不崩如松柏之茂無不爾或承

天保六章章六句

采薇遣戍役也文王之時西有昆夷之患北有玁狁之難以天子之命命將率遣戍役以守衛中國故歌采薇以遣之出車以勞還杖杜以勤歸也

采薇采薇薇亦作止曰歸曰歸歲亦莫止靡室靡家玁狁之故不遑啓居玁狁之故采薇薇亦柔止曰歸曰歸心亦憂止憂心烈烈載飢載渴我戍未定靡使歸聘采薇薇亦剛止曰歸曰歸歲亦陽止王事靡盬不遑啓處憂心孔疚我行不來彼爾維何維常之華彼路斯何君子之車戎車旣駕四牡業業豈敢定居一月三撻駕彼四牡四牡騤騤君子所依小人所腓四牡翼翼象弭魚服豈不日戒玁狁孔棘昔我往矣楊柳依依今我來思雨雪霏霏行道遲遲載渴載飢我心傷悲莫知我哀

采薇六章章八句

出車勞還率也

我出我車于彼牧矣自天子所謂我來矣召彼僕夫謂之載矣王事多難維其棘矣我出我車于彼郊矣設此旆矣建彼旄矣彼旟旐斯胡不旆旆憂心悄悄僕夫況

瘁 王命南仲往城于方出車彭彭旂旆夫央天子命我城彼朔方赫赫南仲玁狁于襄 昔我往矣黍稷方華今我來思雨雪載塗王事多難不遑啓居豈不懷歸畏此簡書 嗷嗷草蟲趨趨阜螽未見君子憂心忉忉既見君子我心則降赫赫南仲薄伐西戎 春日遲遲卉木萋萋倉庚喈喈采芣祁祁執訊獲醜薄言還歸赫赫南仲玁狁于夷

出車六章章八句

杕杜勞還役也

有杕之杜有皖其實王事靡盬繼嗣我日月陽止女心傷止征夫遑止 有杕之杜其葉萋萋王事靡盬我心傷悲卉木萋止女心悲止征夫歸止 陟彼北山言采其杞王事靡盬憂我父母檀車幘幘四牡瘠瘠征夫不遠 匪載匪來憂心孔疚期逝不至而多爲恤卜筮借止會言近止征夫遑止

杕杜西章章七句

魚麗美萬物盛多能備禮也文武以天保以上治內采薇以下治外始於憂勤終於

逸樂故美萬物盛多可以告於神明矣

魚麗于罭鱔鯨君子有酒旨且多 魚麗于罭魴鱧君子有酒多且旨 魚麗于罭
鯉君子有酒旨且有 物其多矣維其嘉矣 物其旨矣維其偕矣 物其有矣
維其時矣

魚麗六章三章章四句三章章二句

南陔孝子相戒以養也白華孝子之絜白也華黍時和歲豐宜黍稷也有其義而亡
其辭

鹿鳴之什十篇五十五章三百一十五句

南有嘉魚之什

南有嘉魚樂與賢也太平君子至誠樂與賢者共之也

南有嘉魚烝然罩罩君子有酒嘉賓式燕以樂 南有嘉魚烝然汕汕君子有酒嘉
賓式燕以衍 南有樛木甘瓠纍之君子有酒嘉賓式燕綏之 翩翩者雛烝然來
思君子有酒嘉賓式燕又思

南有嘉魚四章章四句

南山有臺樂得賢也得賢則能爲邦家立太平之基矣

南山有臺北山有萊樂只君子邦家之基樂只君子萬壽無期 南山有桑北山有楊樂只君子邦家之光樂只君子萬壽無疆 南山有杞北山有李樂只君子民之父母樂只君子德音不已 南山有栲北山有桤樂只君子遐不眉壽樂只君子德音是茂 南山有枸北山有棟樂只君子遐不黃耇樂只君子保艾爾後

南山有臺五章章六句

由庚萬物得由其道也崇丘萬物得極其高大也由儀萬物之生各得其宜也有其義而亡其辭

蓼蕭澤及四海也

蓼彼蕭斯零露漙兮既見君子我心寫兮燕笑語兮是以有譽處兮 蓼彼蕭斯零露漙漙既見君子爲龍爲光其德不爽壽考不忘 蓼彼蕭斯零露泥泥既見君子孔燕豈弟宜見宜弟令德壽豈 蓼彼蕭斯零露漙漙既見君子條革忡忡和鸞雝雝

離萬福攸同

蓼蕭四章章六句

淇露天子燕諸侯也

淇淇露斯匪陽不晞厭厭夜飲不醉無歸 淇淇露斯在彼豐草厭厭夜飲在宗載考 淇淇露斯在彼杞棘顯允君子莫不令德 其桐其椅其實離離豈弟君子莫不令儀

淇露四章章四句

彤弓天子錫有功諸侯也

彤弓昭兮受言藏之我有嘉賓中心貺之鐘鼓既設一朝饗之 彤弓昭兮受言載之我有嘉賓中心喜之鐘鼓既設一朝右之 彤弓昭兮受言樂之我有嘉賓中心好之鐘鼓既設一朝酬之

彤弓三章章六句

菁菁者莪樂育材也君子能長育人材則天下喜樂之矣

菁菁者莪在彼中阿既見君子樂且有儀 菁菁者莪在彼中沚既見君子我心則喜 菁菁者莪在彼中陵既見君子錫我百朋 汎汎楊舟載沈載浮既見君子我心則休

菁菁者莪四章章四句

六月宣王北伐也鹿鳴廢則和樂缺矣四牡廢則君臣缺矣皇皇者華廢則忠信缺矣常棣廢則兄弟缺矣伐木廢則朋友缺矣天保廢則福祿缺矣采芣廢則征伐缺矣出車廢則功力缺矣杕杜廢則師衆缺矣魚麗廢則法度缺矣南陔廢則孝友缺矣白華廢則廉恥缺矣華黍廢則蓄積缺矣由庚廢則陰陽失其道理矣南有嘉魚廢則賢者不安下不得其所矣崇丘廢則萬物不遂矣南山有臺廢則爲國之基險矣由儀廢則萬物失其道理矣蓼蕭廢則恩澤乖矣淇露廢則萬國離矣彤弓廢則諸夏衰矣菁菁者莪廢則無禮儀矣小雅盡廢則四夷交侵中國微矣

六月樓棲戎車既飭四牡驟驟載是常服玁狁孔熾我是用急王于出征以匡王國 比物四驥閑之維則維此六月既成我服我服既成于三十里王于出征以佐天

子 四牡脩廣其大有顛薄伐獯豷以奏膚公有嚴有翼共武之服共武之服以定
王國 獯豷匪茹整居焦穫侵鎬及方至于涇陽織文鳥章白旆央央元戎十乘以
先啓行 戎車旣安如輕如軒四牡旣佶旣佶且閑薄伐獯豷至于大原文武吉甫
萬邦爲憲 吉甫燕喜旣多受祉來歸自鎬我行永久飲御諸友魚鱉膾鯉侯誰在
矣張仲孝友

六月六章章八句

采芑宣王南征也

薄言采芑于彼新田于此菑畝方叔涖止其車三千師子之試方叔率止乘其四駢
四駢翼翼路車有奭籛芾魚服鉤膺鞞革 薄言采芑于彼新田于此中鄉方叔涖
止其車三千旂旐央央方叔率止約軹錯衡八鸞瑋瑋服其命服朱芾斯皇有玼蔥
珩 獻彼飛隼其飛戾天亦集爰止方叔涖止其車三千師干之試方叔率止鉦人
伐鼓陳師鞠旅顯允方叔伐鼓淵淵振旅闐闐 蠢爾蠻荆大邦爲讎方叔元老克
壯其猶方叔率止執訊獲醜戎車嘒嘒嘒嘒焯焯如霆如雷顯允方叔征伐獯豷蠻

荆來威

采芑四章章十二句

車攻宣王復古也宣王能內脩政事外攘夷狄復文武之境土脩車馬備器械復會諸侯于來都因田獵而選車徒焉

我車既攻我馬既同四牡龐龐駕言徂東 田車既好四牡孔阜東有甫草駕言行狩 之子于苗選徒囂囂建旆設旄搏獸于敖 駕彼四牡四牡奕奕赤芾金舄會同有繹 沒拾既飲弓矢既調射夫既同助我舉柴 四黃既駕兩驂不猗不失其馳舍矢如破 蕭蕭馬鳴悠悠旆旌徒御不驚大庖不盈 之于于征有聞無聲允矣君子展也大成

車攻八章章四句

吉日美宣王田也能慎徽接下無不自盡以奉其上焉

吉日維戊既伯既禱田車既好四牡孔阜升彼大阜從其羣醜 吉日庚午既差我馬獸之所同蹇鹿甕甕漆沮之從天子之所 瞻彼中原其祁孔有儻儻俟俟或羣

或友悉率友右以燕天子 既張我弓既挾我矢發彼小豨殪此大兕以御賓客且以酌醴

吉日四章章六句

南有嘉魚之什十篇四十六章二百七十二句

鴻鴈之什

鴻鴈美宣王也萬民雖散不安其居而能勞來還定安集之至于矜寡無不得其所焉

鴻鴈子飛肅肅其羽之于于征劬勞于野爰及矜人哀此鰥寡 鴻鴈于飛集于中澤之子于垣百堵皆作雖則劬勞其究安宅 鴻鴈于飛哀鳴磬磬維此哲人謂我劬勞維彼愚人謂我宣驩

鴻鴈三章章六句

庭燎美宣王也因以箴之

夜如何其夜未央庭燎之光君子至止鸞聲將將 夜如何其夜未艾庭燎晰晰君

子至止鸛聲噦噦 夜如何其夜鄉晨庭燎有輝君子至止言觀其旂

庭燎三章章五句

沔水規宣王也

沔彼流水朝宗于海駮彼飛隼載飛載止嗟我兄弟邦人諸友莫肯念亂誰無父母
沔彼流水其流湯湯駮彼飛隼載飛載揚念彼不蹟載起載行心之憂矣不可弭
忘 駮彼飛隼率彼中陵民之訛言寧莫之懲我友敬矣讒言其興

沔水三章二章章八句一章章六句

鶴鳴誨宣王也

鶴鳴于九臯聲聞于野魚潛在淵或在于渚樂彼之園爰有樹檀其下維擇它山之
石可以爲錯 鶴鳴于九臯聲聞于天魚在于渚或潛在淵樂彼之園爰有樹檀其
下維穀它山之石可以攻玉

鶴鳴二章章九句

祈父刺宣王也

祈父予王之爪牙胡轉予于恤靡所止居 祈父予王之爪士胡轉予于恤靡所底止 祈父寔不聽胡轉予于恤有母之尸饗

祈父三章章四句

白駒大夫刺宣王也

皎皎白駒食我場苗繫之維之以永今朝所謂伊人於焉逍遙 皎皎白駒食我場藿繫之維之以永今夕所謂伊人於焉嘉客 皎皎白駒賁然來思爾公爾侯逸豫無期慎爾優游勉爾遁思 皎皎白駒在彼空谷生芻一束其人如玉毋金玉爾音而有遐心

白駒四章章六句

黃鳥刺宣王也

黃鳥黃鳥無集于穀無啄我粟此邦之人不我肯穀言旋言歸復我邦族 黃鳥黃鳥無集于桑無啄我梁此邦之人不可與明言旋言歸復我諸兄 黃鳥黃鳥無集于柎無啄我黍此邦之人不可與處言旋言歸復我諸父

黃鳥三章章七句

我行其野刺宣王也

我行其野蔽芾其樗昏姻之故言就爾居爾不我畜復我邦家 我行其野言采其
蕞昏姻之攸言就爾宿爾不我畜言歸斯復 我行其野言采其蕞不思舊姻求爾
新特成不以富亦祇以異

我行其野三章章六句

斯干宣王考室也

秩秩斯干幽幽南山如竹苞矣如松茂矣兄及弟矣式相好矣無相猶矣 似續妣
祖築室百堵西南其戶爰居爰處爰笑爰語 約之閣閣椽之橐橐風雨攸除鳥鼠
攸去君子攸芋 如跂斯翼如矢斯棘如鳥斯革如蠶斯飛君子攸躋 殖殖其庭
有覺其楹噲噲其正嘖嘖其冥君子攸寧 下莞上簟乃安斯寢乃寢乃興乃占我
夢吉夢維何維熊維羆維虺維蛇 大人占之維熊維羆男子之祥維虺維蛇女子
之祥 乃生男子載寢之牀載衣之裳載弄之璋其泣煌煌朱芾斯皇室家君王

乃生女子載寢之地載衣之裼載弄之瓦無非無儀唯酒食是議無父母詒權

斯干九章四章章七句五章章五句

無羊宣王考牧也

誰謂爾無羊三百維羣誰謂爾無牛九十其犝爾羊來思其角濺濺爾牛來思其耳濕濕或降于阿或飲于池或寢或訛爾牧來思何養何笠或負其餼三十維物爾牲則具爾牧來思以薪以蒸以雌以雄爾羊來思矜矜兢兢不騫不崩靡之以肱畢來既升牧人乃夢衆維魚矣旆維旗矣大人占之衆維魚矣實維豐年旆維旗矣室家溱溱

無羊四章章八句

鴻鴈之什十篇三十二章二百三十句

節南山之什

節南山家父刺幽王也

節彼南山維石巖巖赫赫師尹民具爾瞻憂心如惓不敢戲談國既卒斬何用不監

節彼南山有實其猗赫赫師尹不平謂何天方薦瘥喪亂弘多民言無嘉慴莫懲
嗟 尹氏大師維周之氏秉國之均四方是維天子是毗俾民不迷不弔昊天不宜
空我師 弗躬弗親庶民弗信弗問弗仕勿罔君子式夷式已無小人殆瑣瑣姻亞
則無臚仕 昊天不備降此鞠誥昊天不惠降此大戾君子如屆俾民心闕君子如
夷惡怒是遘 不弔昊天亂靡有定式月斯生俾民不寧憂心如醒誰秉國成不自
爲政卒勞百姓 駕彼四牡四牡項領我瞻四方蹙蹙靡所騁 方茂爾惡相爾矛
矣既夷既憚如相齟矣 昊天不平我王不寧不懲其心覆怨其正 家父作誦以
究王誥式訛爾心以畜萬邦

節南山十章六章章八句四章章四句

正月大夫刺幽王也

正月繁霜我心憂傷民之訛言亦孔之將念我獨兮憂心京京哀我小心瘋憂以瘁
父母生我胡俾我瘵不自我先不自我後好言自口莠言自口憂心愈愈是以有
侮 憂心惻惻念我無祿民之無辜并其臣僕哀我人斯于何從祿瞻烏爰止于誰

之屋 瞻彼中林侯薪侯蒸民今方殆視天夢夢既克有定靡人弗勝有皇上帝伊
誰云憎 謂山蓋卑爲岡爲陵民之訛言寧莫之懲召彼故老訊之占夢具曰予聖
誰知烏之雌雄 謂天蓋高不敢不局謂地蓋厚不敢不踣維號斯言有倫有脊哀
今之人胡爲虺蜴 瞻彼阪田有苑其特天之扞我如不我克彼求我則如不我得
執我仇仇亦不我力 心之憂矣如或結之今茲之正胡然厲矣燎之方揚寧或滅
之赫赫宗周褒姒威之 終其永懷又窘陰雨其車既載乃棄爾輔載輸爾載將伯
助予 無棄爾輔負于爾輻屨顧爾侯不輸爾載終踰絕險曾是不意 魚在于沼
亦匪克樂潛雖伏矣亦孔之炤憂心慘慘念國之爲虐 彼有旨酒又有嘉穀洽比
其鄰昏姻孔云念我獨兮憂心慙慙 眇眇彼有屋蔌蔌方有穀民今之無祿天天
是稼舒矣富人哀此惻獨

正月十三章八章章八句五章章六句

十月之交大夫刺幽王也

十月之交朔月辛卯日有食之亦孔之醜彼月而微此日而微今此下民亦孔之哀

日月告凶不用其行四國無政不用其良彼月而食則維其常此日而食于何不
滅 燂燂震電不寧不令百川沸騰山冢峯崩高岸爲谷深谷爲陵哀今之人胡憮
莫懲 皇父驛士番維司徒家伯維宰仲允膳夫聚子內史蹶維趨馬楛維師氏豔
妻爨方處 抑此皇父豈曰不時胡爲我作不卽我謀徹我牆屋田卒汙萊曰予不
戕禮則然矣 皇父孔聖作都于向擇三有事亶侯多藏不慈遺一老俾守我王擇
有車馬以居徂向 黽勉從事不敢告勞無罪無辜讒口誦誦下民之孽匪降自天
嚙沓背憎職競由人 悠悠我里亦孔之瘁四方有羨我獨居憂民莫不逸我獨不
敢休天命不徹我不敢傲我友自逸

十月八章章八句

雨無正大夫刺幽王也雨自上下者也衆多如雨而非所以爲政也

浩浩昊天不駿其德降喪饑饉斬伐四國旻天疾威弗慮弗圖舍彼有罪旣伏其辜
若此無罪淪胥以鋪 周宗旣滅靡所止戾正大夫離居莫知我勸三事大夫莫肯
夙夜邦君諸侯莫肯朝夕庶曰式臧覆出爲惡 如何昊天辟言不信如彼行邁則

靡所臻凡百君子各敬爾身胡不相畏不畏于天 戎成不退飢成不遂曾我誓御
憚憚日瘁凡百君子莫肯用訊聽言則荅譖言則退 哀哉不能言匪舌是出維躬
是瘁芻矣能言巧言如流俾躬處休 維曰予仕孔棘且殆云不可使得罪于天子
亦云可使怨及朋友 謂爾遷于王都曰予未有室家鼠思泣血無言不疾昔爾出
居誰從作爾室

雨無正七章二章章十句二章章八句三章章六句

小旻大夫刺幽王也

旻天疾威敷于下土謀猶回遹何日斯沮謀臧不從不臧覆用我視謀猶亦孔之叩
滄滄詆訛亦孔之哀謀之其臧則具是違謀之不臧則具是依我視謀猶伊于胡
底 我龜既厭不我告猶謀夫孔多是用不集發言盈庭誰敢執其咎如匪行邁謀
是用不得于道 哀哉爲猶匪先民是程匪大猶是經維邇言是聽維邇言是爭如
彼築室于道謀是用不潰于成 國雖靡止或聖或否民雖靡靡或哲或謀或肅或
艾如彼泉流無淪胥以敗 不敢暴虎不敢馮河人知其一莫知其他戰戰兢兢如

臨深淵如履薄冰

小旻六章三章章八句三章章七句

小宛大夫刺宣王也

宛彼鳴鳩翰飛戾天我心憂傷念昔先人明發不寐有懷二人 人之齊聖飲酒溫克彼昏不知壹醉日富各敬爾儀天命不又 中原有菽庶民采之螟蛉有子蜾蠃負之教誨爾子式穀似之 題彼脊令載飛載鳴我日斯邁而月斯征夙興夜寐毋忝爾所生 交交桑扈率場啄粟哀我填寡宜岸宜獄握粟出卜自何能穀 溫溫恭人如集于木惴惴小心如臨于谷戰戰兢兢如履薄冰

小宛六章章六句

小弁刺幽王也太子之傅作焉

弁彼鸞斯歸飛提提民莫不穀我獨于罹何辜于天我罪伊何心之憂矣云如之何 踉蹌周道翰爲茂草我心憂傷惄焉如擣假寐永歎維憂用老心之憂矣疢如疾首 維桑與梓必恭敬止靡瞻匪父靡依匪母不屬於毛不罹于裏天之生我我辰

安在 菀彼柳斯鳴蜩嘒嘒有漙者淵萑葦淠淠譬彼舟流不知所屆心之憂矣不
遑假寐 鹿斯之奔維足伎伎雉之朝雛尙求其雌譬彼壞木疾用無枝心之憂矣
寧莫之知 相彼投兔尙或先之行有死人尙或瑾之君子秉心維其忍之心之憂
矣涕旣隕之 君子信讒如或讎之君子不惠不舒究之伐木掎矣析薪地矣舍彼
有罪予之佗矣 莫高匪山莫浚匪泉君子無易由言耳屬子垣無逝我梁無發我
筍我躬不閱遑恤我後

小弁八章章八句

巧言刺幽王也大夫傷於讒故作是詩也

悠悠昊天曰父母且無罪無辜亂如此撫昊天已威予慎無罪昊天大撫予慎無辜
亂之初生僭始旣誦亂之又生君子信讒君子如怒亂庶遄沮君子如祉亂庶遄
已 君子屢盟亂是用長君子信盜亂是用暴盜言孔甘亂是用餓匪其止共維王
之弓 奕奕寢廟君子作之秩秩大猷聖人莫之他人有心予忖度之躍躍冕兔遇
犬獲之 荏染柔木君子樹之往來行言心焉數之蛇蛇碩言出自口矣巧言如簧

顏之厚矣 彼何人斯居河之樂無拳無勇職爲亂階既微且慙爾勇伊何爲猶將多爾居徒幾何

巧言六章章八句

何人斯蘇公刺暴公也暴公爲卿士而譖蘇公焉故蘇公作是詩以絕之

彼何人斯其心孔艱胡逝我梁不入我門伊誰云從誰暴之云 二人從行誰爲此禍胡逝我梁不入唁我始者不如今云不我可 彼何人斯胡逝我陳我聞其聲不見其身不愧于人不畏于天 彼何人斯其爲飄風胡不自北胡不自南胡逝我梁祇攪我心 爾之安行亦不遑舍爾之亟行遑脂爾車壹者之來云何其吁 爾還而入我心易也還而不入否難知也壹者之來俾我祇也 伯氏吹壎仲氏吹篪及爾如貫諒不我知出此三物以詛爾斯 爲鬼爲蜮則不可得有覲面目視人罔極作此好歌以極反側

何人斯八章章六句

巷伯刺幽王也寺人傷於讒故作是詩也

斐兮斐兮成是貝錦彼譖人者亦已大甚 哆兮侈兮成是南箕彼譖人者誰適與
謀 緝緝翩翩謀欲譖人慎爾言也謂爾不信 捷捷幡幡謀欲譖言豈不爾受既
其女遷 驕人好好勞人草草蒼天蒼天視彼驕人矜此勞人 彼譖人者誰適與
謀取彼譖人投畀豺虎豺虎不食投畀有北有北不受投畀有昊 楊園之遺猗于
畝丘寺人孟子作爲此詩凡百君子敬而聽之

巷伯七章四章章四句一章五句一章八句一章六句

節南山之什十篇七十九章五百五十二句

谷風之什

谷風刺幽王也天下俗薄朋友道絕焉

習習谷風維風及雨將恐將懼維予與女將安將樂女轉棄予 習習谷風維風及
頽將恐將懼寘予于懷將安將樂棄予如遺 習習谷風維山崔嵬無草不死無木
不萎忘我大德思我小怨

谷風三章章六句

蓼莪刺幽王也民人勞苦孝子不得終養爾

蓼蓼者莪匪莪伊蒿哀哀父母生我劬勞 蓼蓼者莪匪莪伊蔚哀哀父母生我勞
瘁 餅之罄矣維罍之恥鮮民之生不如死之久矣無父何怙無母何恃出則銜恤
入則靡至 父兮生我母兮鞠我拊我畜我長我育我顧我復我出入腹我欲報之
德昊天罔極 南山烈烈颯風發發民莫不穀我獨何害 南山律律颯風弗弗民
莫不穀我獨不卒

蓼莪六章四章章四句二章章八句

大東刺亂也東國困於役而傷於財譚大夫作是詩以告病焉

有饑篔簹有揀棘七周道如砥其直如矢君子所履小人所視瞻言顧之潛焉出涕
小東大東杼柚其空糾糾葛屨可以履霜佻佻公子行彼周行既往既來使我心
疚 有洌汎泉無浸穫薪契寤歎哀我憚人薪是穫薪尙可載也哀我憚人亦可
息也 東人之子職勞不來西人之子粲粲衣服舟人之子熊羆是裘私入之子百
僚是試 或以其酒不以其漿鞞鞞佩璫不以其長維天有漢監亦有光跂彼織女

終日七襄 雖則七襄不成報章 皖彼牽牛不以服箱 東有啟明西有長庚 有捄天
畢載施之行 維南有箕不可以簸揚 維北有斗不可以挹酒漿 維南有箕載翕其
舌 維北有斗西柄之揭

大東七章章八句

四月大夫刺幽王也在位貪殘下國構禍怨亂並興焉

四月維夏六月徂暑先祖匪人胡寧忍予 秋日淒淒百卉具腓 亂離瘼矣爰其適
歸 冬日烈烈飄風發發民莫不穀我獨何害 山有嘉卉侯栗侯梅 靡爲殘賊莫
知其尤 相彼泉水載清載濁我日構禍曷云能穀 滔滔江漢南國之紀 盡瘁以
仕寧莫我有 匪鶉匪鳶翰飛戾天 匪鱸匪鮪潛逃于淵 山有蕨薇隰有杞楸 君
子作歌維以告哀

四月八章章四句

北山大夫刺幽王也役使不均已勞於從事而不得養其父母焉

陟彼北山言采其杞 偕偕士子朝夕從事 王事靡盬憂我父母 溥天之下莫非王

土率土之濱莫非王臣大夫不均我從事獨賢 四牡彭彭王事傍傍嘉我未老鮮我方將旅力方剛經營四方 或燕燕居息或盡瘁事國或息偃在牀或不已于行 或不知叫號或慘慘劬勞或棲遲偃仰或王事鞅掌 或湛樂飲酒或慘慘畏咎 或出入風議或靡事不爲

北山六章三章章六句三章章四句

無將大車大夫悔將小人也

無將大車祇自塵兮無思百憂祇自疢兮 無將大車維塵冥冥無思百憂不出于類 無將大車維塵雍兮無思百憂祇自重兮

無將大車三章章四句

小明大夫悔仕於亂世也

明明上天照臨下土我征徂西至于朏野二月初吉載離寒暑心之憂矣其毒大苦念彼共人涕零如雨豈不懷歸畏此罪罟 昔我往矣日月方除曷云其還歲聿云莫念我獨兮我事孔庶心之憂矣憚我不暇念彼共人晷晷懷顧豈不懷歸畏此譴

怒 昔我往矣日月方奧曷云其還政事愈蹙歲聿云莫采蕭穫菽心之憂矣自詒
伊戚念彼共人興言出宿豈不懷歸畏此反覆 嗟爾君子無恒安處靖共爾位正
直是與神之聽之式穀以女 嗟爾君子無恒安息靖共爾位好是正直神之聽之
介爾景福

小明五章三章章十二句二章章六句

鼓鍾刺幽王也

鼓鍾將將淮水湯湯憂心且傷淑人君子懷允不忘 鼓鍾喑喑淮水潛潛憂心且
悲淑人君子其德不回 鼓鍾伐鼗淮有三洲憂心且妯淑人君子其德不猶 鼓
鍾欽欽鼓瑟鼓琴笙磬同音以雅以南以籥不僭

鼓鍾四章章五句

楚茨刺幽王也政煩賦重田萊多荒饑饉降喪民卒流亡祭祀不饗故君子思古焉
楚楚者茨言抽其棘自昔何爲我蓺黍稷我黍與與我稷翼翼我倉既盈我庾維億
以爲酒食以享以祀以妥以侑以介景福 濟濟跄跄絜爾牛羊以往烝嘗或剝或

亨或肆或將祝祭于祊祀事孔明先祖是皇神保是饗孝孫有慶報以介福萬壽無疆 執饗踏踏爲俎孔碩或燔或炙君婦莫莫爲豆孔庶爲賓爲客獻饋交錯禮儀卒度笑語卒獲神保是格報以介福萬壽攸酢 我孔熯矣式禮莫愆工祝致告徂賚孝孫苾芬孝祀神嗜飲食卜爾百福如幾如式既齊既稷既匡既勅永錫爾極時萬時億 禮儀既備鍾鼓既戒孝孫徂位工祝致告神具醉止皇尸載起鼓鍾送尸神保聿歸諸宰君婦廢徹不遲諸父兄弟備言燕私 樂具入奏以綏後祿爾穀既將莫怨具慶既醉既飽小大稽首神嗜飲食使君壽考孔惠孔時維其盡之子子孫孫勿替引之

楚茨六章章十二句

信南山刺幽王也不能脩成王之業疆理天下以奉禹功故君子思古焉

信彼南山維禹甸之哶哶原隰曾孫田之我疆我理南東其畝 上天同雲雨雪雰雰益之以霡霂既優既渥既霑既足生我百穀 疆場翼翼黍稷彧彧曾孫之穡以爲酒食畀我尸賓壽考萬年 中田有廬疆場有瓜是剝是蒞獻之皇祖曾孫壽考

受天之祜 祭以清酒從以騂牡享千祖考執其鸞刀以啓其毛取其血骨 是烝
是享苾苾芬芬祀事孔明先祖是皇報以介福萬壽無疆

信南山六章章六句

谷風之什十篇五十四章三百五十六句

甫田之什

甫田刺幽王也君子傷今而思古焉

倬彼甫田歲取十千我取其陳食我農人自古有年今適南畝或耘或耔黍稷薿薿
攸介攸止烝我髦士 以我齊明與我犧羊以社以方我田既臧農夫之慶琴瑟擊
鼓以御田祖以祈甘雨以介我稷黍以穀我士女 曾孫來止以其婦子饁彼南畝
田峻至喜攘其左右嘗其旨否禾易長畝終善且有曾孫不怒農夫克敏 曾孫之
稼如茨如梁曾孫之庾如坻如京乃求千斯倉乃求萬斯箱黍稷稻粱農夫之慶報
以介福萬壽無疆

甫田四章章十句

大田刺幽王也言矜寡不能自存焉

大田多稼既種既戒既備乃事以我覃耜俶載南畝播厥百穀既庭且碩曾孫是若
既方既皂既堅既好不稂不莠去其螟螣及其蠹賊無害我田穉田祖有神秉畀
炎火 有渰萋萋興雨祈雨我公田遂及我私彼有不穫穉此有不斂穧彼有遺
秉此有滯穗伊寡婦之利 曾孫來止以其婦子饁彼南畝田峻至喜來方禋祀以
其騂黑與其黍稷以享以祀以介景福

大田四章二章章八句二章章九句

瞻彼洛矣刺幽王也思古明王能爵命諸侯賞善罰惡焉

瞻彼洛矣維水泱泱君子至止福祿如茨韎韐有奭以作六師 瞻彼洛矣維水泱
泱君子至止韜琫有珌君子萬年保其家室 瞻彼洛矣維水泱泱君子至止福祿
既同君子萬年保其家邦

瞻彼洛矣二章章六句

裳裳者華刺幽王也古之仕者世祿小人在位則讒詔並進棄賢者之類絕功臣之

世焉

裳裳者華其葉湑兮我覲之子我心寫兮我心寫兮是以有譽處兮 裳裳者華芸其黃矣我覲之子維其有章矣維其有章矣是以有慶矣 裳裳者華或黃或白我覲之子乘其四駱乘其四駱六轡沃若 左之左之君子宜之右之右之君子有之維其有之是以似之

裳裳者華四章章六句

桑扈刺幽王也君臣上下勳無禮文焉

交交桑扈有鶯其羽君子樂胥受天之祜 交交桑扈有鶯其領君子樂胥萬邦之屏 之屏之輪百辟爲憲不戢不難受福不那 兕觥其觶旨酒思柔彼交匪敖萬福來求

桑扈四章章四句

鶯鶯刺幽王也思古明王交於萬物有道自奉養有節焉

鶯鶯于飛畢之羅之君子萬年福祿宜之 鶯鶯在梁戢其左翼君子萬年宜其選

福 乘馬在廐摧之秣之君子萬年福祿艾之 乘馬在廐秣之摧之君子萬年福祿綏之

鴛鴦四章章四句

頍弁諸公刺幽王也暴戾無親不能宴樂同姓親睦九族孤危將亡故作是詩也
有頍者弁實維伊何爾酒既旨爾穀既嘉豈伊異人兄弟匪他薦與女蘿施于松柏
未見君子憂心弈弈既見君子庶幾說懌 有頍者弁實維何期爾酒既旨爾穀既
時豈伊異人兄弟具來薦與女蘿施于松上未見君子憂心怲怲既見君子庶幾有
臧 有頍者弁實維在首爾酒既旨爾穀既阜豈伊異人兄弟甥舅如彼雨雪先集
維饑死喪無日無幾相見樂酒今夕君子維宴

頍弁三章章十二句

車牽大夫刺幽王也褒姒嫉妬無道並進讒巧敗國德澤不加於民周人思得賢女
以配君子故作是詩也

間關車之舉兮思變季女逝兮匪飢匪渴德音來括雖無好友式燕且喜 依彼平

林有集維鷄辰彼碩女令德來教式燕且譽好爾無射 雖無旨酒式飲庶幾雖無
嘉穀式食庶幾雖無德與女式歌且舞 陟彼高岡析其柞薪析其柞薪其葉湑兮
鮮我親爾我心寫兮 高山仰止景行行止四牡騤騤六轡如琴親爾新昏以慰我
心

車羣五章章六句

青蠅大夫刺幽王也

營營青蠅止于樊豈弟君子無信讒言 營營青蠅止于棘讒人罔極交亂四國
營營青蠅止于榛讒人罔極構我二人

青蠅三章章四句

賓之初筵衛武公刺時也幽王荒廢蝶近小人飲酒無度天下化之君臣上下沈酒
淫液武公既入而作是詩也

賓之初筵左右秩秩籩豆有楚穀核維旅酒既和旨飲酒孔偕鍾鼓既設舉醴逸逸
大侯既抗弓矢斯張射夫既同獻爾發功發彼有的以祈爾爵 籥舞笙鼓樂既和

奏烝衍烈祖以洽百禮百禮既至有壬有林錫爾純嘏子孫其湛其湛曰樂各奏爾能賓載手仇室人入又酌彼康爵以奏爾時 賓之初筵温温其恭其未醉止威儀反反曰既醉止威儀幡幡舍其坐遷屢舞僂僂其未醉止威儀抑抑曰既醉止威儀怩怩是曰既醉不知其秩 賓既醉止載號載嘷我籩豆屢舞傲傲是曰既醉不知其郵側弁之俄屢舞僂僂既醉而出並受其福醉而不出是謂伐德飲酒孔嘉維其令儀 凡此飲酒或醉或否既立之監或佐之史彼醉不臧不醉反恥式勿從謂無俾大怠匪言勿言匪由勿語由醉之言俾出童殺三爵不識矧敢多又

賓之初筵五章章十四句

甫田之什十篇三十九章二百九十六句

魚藻之什

魚藻刺幽王也言萬物失其性王居鎬京將不能以自樂故君子思古之武王焉

魚在在藻有頌其首王在在鎬豈樂飲酒 魚在在藻有莘其尾王在在鎬飲酒樂

豈 魚在在藻依于其蒲王在在鎬有那其居

魚藻三章章四句

采芣刺幽王也侮慢諸侯諸侯來朝不能錫命以禮數徵會之而無信義君子見微而思古焉

采芣采芣筐之筐之君子來朝何錫予之雖無予之路車乘馬又何予之玄衮及黼
鸞沸檻泉言采其芹君子來朝言觀其旂其旂淠淠鸞聲嘒嘒載駟載駟君子所
屆赤芾在股邪幅在下彼交匪紓天子所予樂只君子天子命之樂只君子福祿
申之維柞之枝其葉蓬蓬樂只君子殿天子之邦樂只君子萬福攸同平平左右
亦是率從汎汎楊舟緇纒維之樂只君子天子葵之樂只君子福祿臝之優哉游
哉亦是戾矣

采芣五章章八句

角弓父兄刺幽王也不親九族而好讒佞骨肉相怨故作是詩也

辟辟角弓翮其反矣兄弟昏姻無胥遠矣爾之遠矣民胥然矣爾之教矣民胥傲
矣此令兄弟綽綽有裕不令兄弟交相爲瘡民之無良相怨一方受爵不讓至

于已斯亡 老馬反爲駒不顧其後如食宜餼如酌孔取 毋教猱升木如塗塗附
君子有微猷小人與屬 雨雪瀟瀟見暝日消莫肯下遺式居婁驕 雨雪浮浮見
暝日流如蠻如鬢我是用憂

角弓八章章四句

菀柳刺幽王也暴虐無親而刑罰不中諸侯皆不欲朝言王者之不可朝事也
有菀者柳不尙息焉上帝甚蹈無自暱焉俾予靖之後予極焉 有菀者柳不尙愒
焉上帝甚蹈無自療焉俾予靖之後予邁焉 有鳥高飛亦傳于天彼人之心于何
其臻曷予靖之居以凶矜

菀柳三章章六句

都人士周人刺衣服無常也古者長民衣服不貳從容有常以齊其民則民德歸壹
傷今不復見古人也

彼都人士狐裘黃黃其容不改出言有章行歸于周萬民所望 彼都人士臺笠緇
撮彼君子女綢直如髮我不見兮我心不說 彼都人士充耳琇實彼君子女謂之

尹吉我不見兮我心苑結 彼都人士垂帶而厲彼君子女卷髮如養我不見兮言從之邁 匪伊垂之帶則有餘匪伊卷之髮則有厲我不見兮云何盱矣

都人士五章章六句

采綠刺怨曠也幽王之時多怨曠者也

終朝采綠不盈一匊予髮曲局薄言歸沐 終朝采藍不盈一擔五日爲期六日不詹 之子于狩言褰其弓之子于釣言綸之繩 其釣維何維魴及鱖維魴及鱖薄言觀者

采綠四章章四句

黍苗刺幽王也不能膏潤天下卿士不能行召伯之職焉

芄芄黍苗陰雨膏之悠悠南行召伯勞之 我任我輦我車我牛我行既集蓋云歸哉 我徒我御我師我旅我行既集蓋云歸處 肅肅謝功召伯營之烈烈征師召伯成之 原隰旣平泉流旣清召伯有成王心則寧

黍苗五章章四句

隰桑刺幽王也小人在位君子在野思見君子盡心以事之

隰桑有阿其葉有難既見君子其樂如何 隰桑有阿其葉有沃既見君子云何不樂 隰桑有阿其葉有幽既見君子德音孔膠 心乎愛矣遐不謂矣中心藏之何日忘之

隰桑四章章四句

白華周人刺幽后也幽王取申女以爲后又得褒姒而黜申后故下國化之以妾爲妻以孽代宗而王弗能治周人爲之作是詩也

白華菅兮白茅束兮之子之遠俾我獨兮 英英白雲露彼菅茅天步艱難之子不猶 滌池北流浸彼稻田嘯歌傷懷念彼碩人 樛彼桑薪印烘于熾維彼碩人實勞我心 鼓鍾于宮聲聞于外念子懔懔視我邁邁 有鷺在梁有鶴在林維彼碩人實勞我心 鴛鴦在梁戢其左翼之子無良二三其德 有扁斯石履之卑兮之子之遠俾我疋兮

白華八章章四句

蘇蠻微臣刺亂也大臣不用仁心遺忘微賤不肯飲食教載之故作是詩也

蘇蠻黃鳥止于丘阿道之云遠我勞如何飲之食之教之誨之命彼後車謂之載之
蘇蠻黃鳥止于丘隅豈敢憚行畏不能趨飲之食之教之誨之命彼後車謂之載之
蘇蠻黃鳥止于丘側豈敢憚行畏不能極飲之食之教之誨之命彼後車謂之載之

蘇蠻三章章八句

瓠葉大夫刺幽王也上棄禮而不能行雖有牲牢饗餼不肯用也故思古之人不以微薄廢禮焉

幡幡瓠葉采之亨之君子有酒酌言嘗之 有兔斯首炮之燔之君子有酒酌言獻之 有兔斯首燔之炙之君子有酒酌言酢之 有兔斯首燔之炮之君子有酒酌言醕之

瓠葉四章章四句

漸漸之石下國刺幽王也戎狄叛之荆舒不至乃命將率東征役久病於外故作是

詩也

漸漸之石維其高矣山川悠遠維其勞矣武人東征不皇朝矣 漸漸之石維其卒矣山川悠遠曷其沒矣武人東征不皇出矣 有豕白蹄烝涉波矣月離于畢俾滂沱矣武人東征不皇他矣

漸漸之石三章章六句

芑之華大夫閔時也幽王之時西戎東夷交侵中國師旅並起囚之以饑饉君子閔周室之將亡傷已逢之故作是詩也

芑之華芸其黃矣心之憂矣維其傷矣 芑之華其葉青青知我如此不如無生 牂羊墳首三星在罍人可以食鮮可以飽

芑之華三章章四句

何草不黃下國刺幽王也四夷交侵中國背叛用兵不息視民如禽獸君子憂之故作是詩也

何草不黃何日不行何人不將經營四方 何草不玄何人不矜哀我征夫獨爲匪

民匪兕匪虎率彼曠野哀我征夫朝夕不暇
有芃者狐率彼幽草有棧之車行
彼周道

何草不黃四章章四句

魚藻之什十四篇六十二章三百二句

大雅

文王之什

文王文王受命作周也

文王在上於昭于天周雖舊邦其命維新有周不顯帝命不時文王陟降在帝左右
齊魯文王令聞不已陳錫哉周侯文王孫子文王孫子本支百世凡周之士不顯
亦世世之不顯厥猶翼翼思皇多士生此王國王國克生維周之楨濟濟多士文
王以寧穆穆文王於緝熙敬止假哉天命有商孫子商之孫子其麗不億上帝既
命侯于周服侯服于周天命靡常殷士膚敏禩將于京厥作禩將常服黼鬯王之
盥臣無念爾祖無念爾祖聿脩厥德永言配命自求多福殷之未喪師克配上帝

宜鑿于殷駿命不易 命之不易無遏爾躬宣昭義問有虞殷自天上天之載無聲
無臭儀刑文王萬邦作孚

文王七章章八句

大明文王有明德故天復命武王也

明明在下赫赫在上天難忱斯不易維王天位殷適使不挾四方 摯仲氏任自彼
殷商來嫁于周曰嬪于京乃及王季維德之行 大任有身生此文王維此文王小
心翼翼昭事上帝聿懷多福厥德不回以受方國 天監在下有命既集文王初載
天作之合在洽之陽在渭之涘 文王嘉止大邦有子大邦有子倪天之妹文定厥
祥親迎于渭造舟爲梁不顯其光 有命自天命此文王于周于京續女維莘長子
維行篤生武王保右命爾夔伐大商 殷商之旅其會如林矢于牧野維予侯興上
帝臨女無貳爾心 牧野洋洋檀車煌煌駟騶彭彭維師尙父時維鷹揚涼彼武王
肆伐大商會朝清明

大明八章四章章六句四章章八句

繇文王之興本由大王也

繇繇瓜瓞民之初生自土沮漆古公亶父陶復陶穴未有家室 古公亶父來朝走馬率西水滸至于岐下爰及姜女聿來胥宇 周原膺膺萁茶如飴爰始爰謀爰契我龜曰止曰時築室于茲 廼慰廼止廼左廼右廼疆廼理廼宣廼畝自西徂東周爰執事 乃召司空乃召司徒俾立室家其繩則直縮版以載作廟翼翼 揀之墠墠度之薨薨築之登登削屨馮馮百堵皆興鼙鼓弗勝 廼立臯門臯門有伉廼立應門應門將將廼立冢土戎醜攸行 肆不殄厥愠亦不隕厥問柞械拔矣行道兌矣混夷駮矣維其喙矣 虞芮質厥成文王蹶厥生予曰有䟽附予曰有先後予曰有奔奏予曰有禦侮

繇九章章六句

械樸文王能官人也

芘芘械樸薪之標之濟濟辟王左右趨之 濟濟辟王左右奉璋奉璋峨峨髦士攸宜 滂彼涇舟烝徒楫之周王于邁六師及之 倬彼雲漢爲章于天周王壽考遐

不作人 追琢其章金玉其相勉勉我王綱紀四方

棫樸五章章四句

旱麓受祖也周之先祖世脩后稷公劉之業大王王季申以百福于祿焉

瞻彼旱麓榛楛濟濟豈弟君子子祿豈弟 瑟彼玉瓚黃流在中豈弟君子福祿攸降 鸛飛戾天魚躍于淵豈弟君子遐不作人 清酒既載騂牡既備以享以祀以介景福 瑟彼柞棫民所燎矣豈弟君子神所勞矣 莫莫葛藟施于條枚豈弟君子求福不回

旱麓六章章四句

思齊文王所以聖也

思齊大任文王之母思媚周姜京室之婦大姒嗣徽音則百斯男 惠于宗公神罔時怨神罔時恫刑于寡妻至于兄弟以御于家邦 雖離在宮蕭蕭在廟不顯亦臨 無射亦保肆戎疾不殄烈假不瑕 不聞亦式不諫亦入肆成人有德小子有造古之人無斃譽髦斯士

思齊四章章六句故言五章章六句三章章四句

皇矣美周也天監代殷莫若周周世世脩德莫若文王

皇矣上帝臨下有赫監觀四方求民之莫維此二國其政不獲維彼四國爰究爰度
上帝耆之憎其式廓乃眷西顧此維與宅 作之屏之其菑其翳脩之平之其灌其
榑啓之辟之其禋其楛攘之剔之其壓其柘帝遷明德串夷載路天立厥配受命既
固 帝省其山柞械斯拔松柏斯兌帝作邦作對自大伯王季維此王季因心則友
則友其兄則篤其慶載錫之光受祿無喪奄有四方 維此王季帝度其心貊其德
晉其德克明克明克類克長克君王此大邦克順克比于文王其德廓侮既受帝
祉施于孫子 帝謂文王無然畔援無然歆羨誕先登于岸密人不恭敢距大邦侵
阮徂共王赫斯怒爰整其旅以按徂旅以篤于周祜以對于天下 依其在京侵自
阮疆陟我高岡無矢我陵我陵我阿無飲我泉我泉我池度其鮮原居岐之陽在渭
之將萬邦之方下民之王 帝謂文王予懷明德不大聲以色不長夏以革不識不
知順帝之則帝謂文王詢爾仇方同爾兄弟以爾鉤援與爾臨衝以伐崇墉 臨衝

閑閑崇墉言言執訊連連攸馘安安是類是禡是致是附四方以無侮臨衝芾芾崇墉屹屹是伐是肆是絕是忽四方以無拂

皇矣八章章十二句

靈臺民始附也文王受命而民樂其有靈德以及鳥獸昆蟲焉

經始靈臺經之營之庶民攻之不日成之 經始勿亟庶民子來王在靈囿麀鹿攸伏 麀鹿濯濯白鳥嚮嚮王在靈沼於物魚躍 虞業維樅賁鼓維鏞於論鼓鍾於樂辟雍 於論鼓鍾於樂辟雍鼙鼓逢逢矇瞍奏公

靈臺五章章四句

下武繼文也武王有聖德復受天命能昭先人之功焉

下武維周世有哲王三后在天王配于京 王配于京世德作求永言配命成王之孚 成王之孚下土之武永言孝思孝思維則 媚茲一人應侯類德永言孝思昭哉嗣服 昭茲來許繩其祖武於萬斯年受天之祜 受天之祜四方來賀於萬斯年不遐有佐

下武六章章四句

文王有聲繼伐也武王能廣文王之聲卒其伐功也

文王有聲遙駿有聲遙求厥寧遙觀厥成文王烝哉 文王受命有此武功既伐于

崇作邑于豐文王烝哉 築城伊滅作豐伊匹匪棘其欲遙追來孝王后烝哉 王

公伊濯維豐之垣四方攸同王后維翰王后烝哉 豐水東注維禹之績四方攸同

皇王維辟皇王烝哉 鎬京辟靡自西自東自南自北無思不服皇王烝哉 考卜

維王宅是鎬京維龜正之武王成之武王烝哉 豐水有芑武王豈不仕詒厥孫謀

以燕翼子武王烝哉

文王有聲八章章五句

文王之什十篇六十六章四百一十四句

生民之什

生民尊祖也后稷生於姜嫄文武之功起於后稷故推以配天焉

厥初生民時維姜嫄生民如何克禋克祀以弗無子履帝武敏歆攸介故止載震載

夙載生載育時維后稷 誕彌厥月先生如達不拆不副無舊無害以赫厥靈上帝
不寧不康禋祀居然生子 誕寘之隘巷牛羊腓字之誕寘之平林會伐平林誕寘
之寒冰鳥覆翼之鳥乃去矣后稷呱矣 實覃實訐厥聲載路誕實匍匐克岐克嶷
以就口食蓺之荏菹荏菹施施禾役穰穰麻麥幪幪瓜瓞嗒嗒 誕后稷之穡有相
之道弗厥豐草種之黃茂實方實苞實種實發實秀實堅實好實穎實栗卽有
邇家室 誕降嘉種維秬維秠維糜維芑恒之秬秠是種是畝恒之糜芑是任是負
以歸肇祀 誕我祀如何或春或揄或簸或蹂釋之叟叟烝之浮浮載謀載惟取蕭
祭脂取羝以較載燔載烈以興嗣歲 卽盛于豆于登其香始升上帝居歆胡
臭亶時后稷肇祀庶無罪悔以迄于今

生民八章四章章十句四章章八句

行葦忠厚也周家忠厚仁及草木故能內睦九族外尊事黃耆養老乞言以成其福

禱焉

敦彼行葦牛羊勿踐履方苞方體維葉泥泥 戚戚兄弟莫遠具爾或肆之筵或授

之几 肆筵設席授几有緝御或獻或酢洗爵奠俎 醕醢以薦或燔或炙嘉穀脾
臠或歌或琴 敦弓既堅四鍤既鈞舍矢既均序賓以賢 敦弓既句既挾四鍤四
鍤如樹序賓以不侮 曾孫維主酒醕維醕酌以大斗以祈黃耇 黃耇台背以引
以翼壽考維祺以介景福

行葦八章章四句故言七章二章章六句五章章四句

既醉大平也醉酒飽德人有士君子之行焉

既醉以酒既飽以德君子萬年介爾景福 既醉以酒爾殺既將君子萬年介爾昭
明 昭明有融高朗令終令終有俶公尸嘉舍 其告維何籩豆靜嘉朋友故攝攝
以威儀 威儀孔時君子有孝子孝子不匱永錫爾類 其類維何室家之壺君子
萬年永錫祚胤 其胤維何天被爾祿君子萬年景命有僕 其僕維何釐爾女士
釐爾女士從以孫子

既醉八章章四句

龜鷺守成也大平之君子能持盈守成神祇祖考安樂之也

鳧鷖在涇公尸來燕來寧爾酒既清爾殺既馨公尸燕攸福祿來成 鳧鷖在沙公尸來燕來宜爾酒既多爾殺既嘉公尸燕飲福祿來爲 鳧鷖在渚公尸來燕來處爾酒既滑爾殺伊脯公尸燕飲福祿來下 鳧鷖在漵公尸來燕來宗既燕于宗福祿攸降公尸燕攸福祿來崇 鳧鷖在壑公尸來止熏熏旨酒欣欣燔炙芬芬公尸燕攸無有後艱

鳧鷖五章章六句

假樂嘉成王也

假樂君子顯顯令德宜民宜人受祿于天保右命之自天申之 千祿百福子孫千億穆穆皇皇宜君宜王不愆不忘率由舊章 威儀抑抑德音秩秩無怨無惡率由羣匹受福無疆四方之綱 之綱之紀燕及朋友百辟卿士媚于天子不解于位民之攸壻

假樂四章章六句

公劉召康公戒成王也成王將泚政戒以民事美公劉之厚於民而獻是詩也

篤公劉匪居匪康迺場迺疆迺積迺倉邇裏餼糧于棗于蕞思輯用光弓矢斯張干戈戚揚爰方啓行 篤公劉于胥斯原既庶既繁既順迺宣而無永歎陟則在嚳復降在原何以舟之維玉及瑤鞞琫容刀 篤公劉逝彼百泉瞻彼溥原迺陟南岡乃覲于京京師之野于時處處于時廬旅于時言言于時語語 篤公劉于京斯依踰踰濟濟俾筵俾几既登乃依乃造其曹執豕于牢酌之用匏食之攸之君之宗之篤公劉既溥既長既景迺岡相其陰陽觀其流泉其軍三單度其隰原徹田爲糧度其夕陽闢居允荒 篤公劉于幽斯館涉渭爲亂取厲取鍛止基迺理爰衆爰有夾其皇迺邇其過迺止旅乃密芮鞠之卽

公劉六章章十句

澗酌召康公戒成王也言皇天親有德饗有道也

澗酌彼行潦挹彼注茲可以饒餽豈弟君子民之父母 澗酌彼行潦挹彼注茲可以濯漑豈弟君子民之攸歸 澗酌彼行潦挹彼注茲可以濯漑豈弟君子民之攸

暨

洞酌三章章五句

卷阿召康公戒成王也言求賢用吉士也

有卷者阿飄風自南豈弟君子來游來歌以矢其音 仲奭爾游矣優游爾休矣豈弟君子俾爾彌爾性似先公曾矣 爾土宇販章亦孔之厚矣豈弟君子俾爾彌爾性百神爾主矣 爾受命長矣第祿爾康矣豈弟君子俾爾彌爾性純嘏爾常矣 有馮有翼有孝有德以引以翼豈弟君子四方爲則 顛顛印印如圭如璋令聞令望豈弟君子四方爲綱 鳳皇于飛翩翩其羽亦集爰止藹藹王多吉士維君子使媚于天子 鳳皇于飛翩翩其羽亦傳于天藹藹王多吉人維君子命媚于庶人 鳳皇鳴矣于彼高岡梧桐生矣于彼朝陽萋萋離離喈喈 君子之車旣庶且多君子之馬旣閑且馳矢詩不多維以遂歌

卷阿十章六章章五句四章章六句

民勞召穆公刺厲王也

民亦勞止汙可小康惠此中國以綏四方無縱詭隨以謹無良式遏寇虐憚不畏明

柔遠能邇以定我王 民亦勞止汔可小休惠此中國以爲民遠無縱詭隨以謹愔
愔式遏寇虐無俾民憂無棄爾勞以爲王休 民亦勞止汔可小息惠此京師以綏
四國無縱詭隨以謹罔極式遏寇虐無俾作慝敬慎威儀以近有德 民亦勞止汔
可小惕惠此中國俾民憂泄無縱詭隨以謹醜厲式遏寇虐無俾正敗戎雖小子而
式弘大 民亦勞止汔可小安惠此中國國無有殘無縱詭隨以謹繡繡式遏寇虐
無俾正反王欲玉女是用大諫

民勞五章章十句

板凡伯刺厲王也

上帝板板下民卒瘁出話不然爲猶不遠靡聖管管不實於亶猶之未遠是用大諫
天之方難無然憲憲天之方蹶無然泄泄辭之輯矣民之洽矣辭之憖矣民之莫
矣 我雖異事及爾同寮我卽爾謀聽我誦誦我言維服勿以爲笑先民有言詢于
芻蕘 天之方虐無然譖譖老夫灌灌小子躑躑匪我言耄爾用憂譖多將煽煽不
可救藥 天之方憤無爲夸毗威儀卒迷善人載尸民之方殿屎則莫我敢葵喪亂

蕩資曾莫惠我師 天之靡民如壘如鏡如璋如圭如取如攘攘無曰益綱民孔易
民之多辟無自立辟 佻人維藩大師維垣大邦維屏大宗維翰懷德維寧宗子維
城無俾城壞無獨斯畏 敬天之怒無敢戲豫敬天之渝無敢馳驅昊天曰明及爾
出王昊天曰旦及爾游衍

板八章章八句

生民之什十篇六十五章四百三十三句

蕩之什

蕩召穆公傷周室大壞也厲王無道天下蕩蕩無綱紀文章故作是詩也

蕩蕩上帝下民之辟疾威上帝其命多辟天生烝民其命匪謬靡不有初鮮克有終

文王曰咨咨汝殷商曾是彊禦曾是掎克曾是在位曾是在服天降滔德女興是

力 文王曰咨咨女殷商而秉義類彊禦多愆流言以對寇攘式內侯作侯祝靡屆

靡究 文王曰咨咨女殷商女魚然于中國斂怨以爲德不明爾德時無背無側爾

德不明以無陪無羈 文王曰咨咨女殷商天不湏爾以酒不義從式既愆爾止靡

明靡晦式號式呼俾晝作夜 文王曰咨咨女殷商如蠋如蟥如沸如羹小大近喪
人尙乎由行內爨于中國覃及鬼方 文王曰咨咨女殷商匪上帝不時殷不用舊
雖無老成人尙有典刑曾是莫聽大命以傾 文王曰咨咨女殷商人亦有言顛沛
之揭枝葉未有害本實先撥殷鑒不遠在夏后之世

蕩八章章八句

抑衛武公刺厲王亦以自警也

抑抑威儀維德之隅人亦有言靡哲不愚庶人之愚亦職維疾哲人之愚亦維斯辰
無競維人四方其訓之有覺德行四國順之訐譎定命遠猶辰告敬慎威儀維民
之則 其在于今興迷亂于政顛覆厥德荒湛于酒女雖湛樂從弗念厥紹罔敷求
先王克共明刑 肆皇天弗尙如彼泉流無淪胥以亡夙興夜寐洒掃庭內維民之
章脩爾車馬弓矢戎兵用戒戎作用邊蠻方 質爾人民謹爾侯度用戒不虞慎爾
出話敬爾威儀無不柔嘉白圭之玷尙可磨也斯言之玷不可爲也 無易由言無
曰苟矣莫捫朕舌言不可逝矣無言不讎無德不報惠于朋友庶民小子子孫繩繩

萬民靡不承 視爾友君子輯柔爾顏不遇有愆相在爾室尙不愧于屋漏無曰不顯莫予云覲神之格思不可度思矧可射思 辟爾爲德俾臧俾嘉淑慎爾止不愆于儀不僭不賊鮮不爲則投我以桃報之以李彼童而角實虹小子 荏染柔木言縉之絲温温恭人維德之基其維哲人告之話言順德之行其維愚人覆謂我僭民各有心 於乎小子未知藏否匪手攜之言示之事匪面命之言提其耳借曰未知亦既抱子民之靡盬誰夙知而莫成 昊天孔昭我生靡樂視爾夢夢我心慘慘誨爾諄諄聽我藐藐匪用爲教覆用爲虐借曰未知亦聿既迄 於乎小子告爾舊止聽用我謀庶無大悔天方艱難曰喪厥國取譬不遠昊天不忒回遹其德俾民大棘

抑十二章三章章八句九章章十句

桑柔芮伯刺厲王也

苑彼桑柔其下侯甸掎采其劉瘼此下民不殄心憂倉兄填兮倬彼昊天寧不我矜
四牡騤騤旗旐有翩亂生不夷靡國不泯民靡有黎具禍以燼於乎有哀國步斯頽 國步滅資天不我將靡所止疑云徂何往君子實維秉心無競誰生厲階至今

爲梗 憂心慙慙念我土宇我生不辰逢天俾怒自西徂東靡所定處多我親瘠孔
棘我園 爲謀爲愆亂況斯削告爾憂恤誨爾序爵誰能執熱逝不以濯其何能淑
載胥及溺 如彼遡風亦孔之僂民有肅心非云不逮好是稼穡力民代食稼穡維
寶代食維好 天降喪亂滅我立王降此蝥賊稼穡卒瘁哀恫中國具贅卒荒靡有
旅力以念穹蒼 維此惠君民人所瞻秉心宣猶考慎其相維彼不順自獨俾臧自
有肺腸俾民卒狂 瞻彼中林犧牲其鹿朋友已譖不胥以穀人亦有言進退維谷
維此聖人瞻言百里維彼愚人覆狂以喜匪言不能胡斯畏忌 維此良人弗求
弗迪維彼忍心是願是復民之貪亂寧爲荼毒 大風有隧有空大谷維此良人作
爲式穀維彼不順征以中垢 大風有隧貪人敗類聽言則對誦言如醉匪用其良
覆俾我悖 嗟爾朋友予豈不知而作如彼飛蟲時亦弋獲旣之陰女反予來赫
民之罔極職涼善背爲民不利如云不克民之回遘職競用力 民之未戾職盜爲
寇涼曰不可覆背善譽雖曰匪予旣作爾歌

桑柔十六章八章章八句八章章六句

雲漢仍叔美宣王也宣王承厲王之烈內有撥亂之志遇裁而懼側身脩行欲銷去之天下喜於王化復行百姓見憂故作是詩也

倬彼雲漢昭回于天王曰於乎何辜今之人天降喪亂饑饉薦臻靡神不舉靡愛斯牲圭璧既卒寧莫我聽 旱既大甚蘊隆蟲蟲不殄禋祀自郊徂宮上下奠瘙靡神不宗后稷不克上帝不臨耗斁下土寧丁我躬 旱既大甚則不可推兢兢業業如霆如雷周餘黎民靡有子遺昊天上帝則不我遺胡不相畏先祖于摧 旱既大甚則不可沮赫赫炎炎云我無所大命近止靡瞻靡顧羣公先正則不我助父母先祖胡寧忍予 旱既大甚滌滌山川旱魃爲虐如倏如焚我心憚暑憂心如薰羣公先正則不我聞昊天上帝寧俾我遜 旱既大甚黽勉畏去胡寧瘼我以旱憯不知其故祈年孔夙方社不莫昊天上帝則不我虞敬恭明神宜無悔怒 旱既大甚散無友紀鞠哉庶正疚哉冢宰趣馬師氏膳夫左右靡人不周無不能止瞻卬昊天云如何里 瞻卬昊天有嘒其星大夫君子昭假無羸大命近止無棄爾成何求爲我以戾庶正瞻卬昊天曷惠其寧

雲漢八章章十句

崧高尹吉甫美宣王也天下復平能建國親諸侯褒賞申伯焉

崧高維嶽駿極于天維嶽降神生甫及申維申及甫維周之翰四國于蕃四方于宣
齊齊申伯王纘之事于邑于謝南國是式王命召伯定申伯之宅登是南邦世執
其功 王命申伯式是南邦因是謝人以作爾庸王命召伯徹申伯土田王命傅御
遷其私人 申伯之功召伯是營有俶其城寢廟既成既成藐藐王錫申伯四牡躡
躡鉤膺濯濯 王遣申伯路車乘馬我圖爾居莫如南土錫爾介圭以作爾寶往近
王舅南土是保 申伯信邁王饒于鄙申伯還南謝于誠歸王命召伯徹申伯土疆
以時其糗式遄其行 申伯番番既入于謝徒御嘽嘽周邦咸喜戎有良翰不顯申
伯王之元舅文武是憲 申伯之德柔惠且直揉此萬邦聞于四國吉甫作誦其詩
孔碩其風肆好以贈申伯

崧高八章章八句

烝民尹吉甫美宣王也任賢使能周室中興焉

天生烝民有物有則民之秉彝好是懿德天監有周昭假于下保茲天子生仲山甫
仲山甫之德柔嘉維則令儀令色小心翼翼古訓是式威儀是力天子是若明命
使賦 王命仲山甫式是百辟續戎祖考王躬是保出納王命王之喉舌賦政于外
四方爰發 肅肅王命仲山甫將之邦國若否仲山甫明之既明且哲以保其身夙
夜匪解以事一人 人亦有言柔則茹之剛則吐之維仲山甫柔亦不茹剛亦不吐
不侮矜寡不畏強禦 人亦有言德輶如毛民鮮克舉之我儀圖之維仲山甫舉之
愛莫助之袞職有闕維仲山甫補之 仲山甫出祖四牡業業征夫捷捷每懷靡及
四牡彭彭八鸞鏘鏘王命仲山甫城彼東方 四牡騤騤八鸞喈喈仲山甫徂齊式
遄其歸吉甫作誦穆如清風仲山甫永懷以慰其心

烝民八章章八句

韓奕尹吉甫美宣王也能錫命諸侯

奕奕梁山維禹甸之有倬其道韓侯受命王親命之續戎祖考無廢朕命夙夜匪解
虔共爾位朕命不易榦不庭方以佐戎辟 四牡奕奕孔脩且張韓侯入覲以其介

圭入覲于王王錫韓侯淑旂綏章鞶革錯衡玄袞赤舄鉤膺鏤錫鞶鞶淺纁肇革金
厄 韓侯出祖出宿于屠顯父餞之清酒百壺其轂維何魚鼈鮮魚其萩維何維筭
及蒲其贈維何乘馬路車籩豆有且侯氏燕胥 韓侯取妻汾王之甥蹇父之子韓
侯迎止于蹇之里百兩彭彭八鸞鏘鏘不顯其光諸娣從之祁祁如雲韓侯顧之爛
其盈門 蹇父孔武靡國不到爲韓姑相攸莫如韓樂孔樂韓土川澤訐訐魴鱖甫
甫墜鹿嘖嘖有熊有羆有貓有虎慶旣令居韓姑燕譽 溥彼韓城燕師所完以先
祖受命因時百蠻王錫韓侯其追其貊奄受北國因以其伯實墉實壑實畝實藉獻
其貔皮赤豹黃羆

韓奕六章章十二句

江漢尹吉甫美宣王也能興衰撥亂命召公平淮夷

江漢浮浮武夫滔滔匪安匪遊淮夷來求旣出我車旣設我旗匪安匪舒淮夷來鋪
江漢湯湯武夫泱泱經營四方告成于王四方旣平王國庶定時靡有爭王心載
寧 江漢之濟王命召虎式辟四方徼我疆土匪疚匪棘王國來極于疆于理至于

南海 王命召虎來旬來宣文武受命召公維翰無曰予小子召公是似肇敏戎公用錫爾祉 釐奮圭瓊秬鬯一卣告于文人錫山士田于周受命自召祖命虎拜稽首天子萬年 虎拜稽首對揚王休作召公考天子萬壽明明天子令聞不已矢其文德洽此四國

江漢六章章八句

常武召穆公美宣王也有常德以立武事因以爲戒然

赫赫明明王命卿士南仲大祖大師皇父整我六師以修我戎旣敬旣戒惠此南國 王謂尹氏命程伯休父左右陳行戒我師旅率彼淮浦省此徐士不留不處三事就緒 赫赫業業有嚴天子王舒保作匪紹匪遊徐方繹騷震驚徐方如雷如霆徐方震驚 王奮厥武如震如怒進厥虎臣闕如虓虎鋪敦淮漬仍執醜虜截彼淮浦王師之所 王旅嘽嘽如飛如翰如江如漢如山之苞如川之流縣縣翼翼不測不克濯征徐國 王猶允塞徐方旣來徐方旣同天子之功四方旣平徐方來庭徐方不回王曰還歸

常武六章章八句

瞻卬凡伯刺幽王大壞也

瞻卬昊天則不我惠孔填不寧降此大厲邦靡有定士民其瘵蠹賊蠹疾靡有夷屆
罪咎不收靡有夷瘳 人有土田女反有之 人有民人女覆奪之 此宜無罪女反收
之彼宜有罪女覆說之 哲夫成城哲婦傾城 懿厥哲婦爲梟爲鴟婦有長舌維厲
之階亂匪降自天生自婦人 匪教匪誨時維婦寺 輸人伎忒譖始竟背豈曰不極
伊胡爲慝如賈三倍君子是識婦無公事休其蠶織 天何以刺何神不富舍爾介
狄維予胥忌不弔不祥威儀不類人之云亡邦國殄瘁 天之降罔維其優矣人之
云亡心之憂矣天之降罔維其幾矣人之云亡心之悲矣 燔沸檻泉維其深矣心
之憂矣寧自今矣不自我先不自我後藐藐昊天無不克鞏無忝皇祖式救爾彼

瞻卬七章三章章十句四章章八句

召旻凡伯刺幽王大壞也旻閔也閔天下無如召公之臣也

旻天疾威天篤降喪瘵我饑饉民卒流亡我居圉卒荒 天降罪罟蠹賊內訌昏椽

靡共潰潰回逌實靖夷我邦 阜臯讒訛曾不知其玷兢兢業業孔填不寧我位孔
貶 如彼歲旱草不潰茂如彼樓莝我相此邦無不潰止 維昔之富不如時維今
之疚不如茲彼疏斯稗胡不自替職兄斯引 池之竭矣不云自頽泉之竭矣不云
自中溥斯害矣職兄斯弘不裁我躬 昔先王受命有如召公日辟國百里今也日
蹙國百里於乎哀哉維今之人不尙有舊

召旻七章四章章五句三章七句

蕩之什十一篇九十二章七百六十九句

周頌

清廟之什

清廟祀文王也周公既成洛邑朝諸侯率以祀文王焉

於穆清廟肅雝顯相濟濟多士秉文之德對越在天駿奔走在廟不顯不承無射於
人斯

清廟一章八句

維天之命大平告文王也

維天之命於穆不已於乎不顯文王之德之純假以溢我我其收之駿惠我文王曾孫篤之

維天之命一章八句

維清奏象舞也

維清緝熙文王之典肇禋迄用有成維周之禎

維清一章五句

烈文成王卽政諸侯助祭也

烈文辟公錫茲祉福惠我無疆子孫保之無封靡于爾邦維王其崇之念茲戎功繼序其皇之無競維人四方其訓之不顯維德百辟其刑之於乎前王不忘

烈文一章十三句

天作祀先王先公也

天作高山大王荒之彼作矣文王康之彼徂矣岐有夷之行子孫保之

天作一章七句

昊天有成命郊祀天地也

昊天有成命二后受之成王不敢康夙夜基命宥密於緝熙單厥心肆其靖之

昊天有成命一章七句

我將祀文王於明堂也

我將我享維羊維牛維天其右之儀式刑文王之典日靖四方伊嘏文王既右饗之

我其夙夜畏天之威于時保之

我將一章十句

時邁巡守告祭柴望也

時邁其邦昊天其子之實右序有周薄言震之莫不震疊儀柔百神及河喬嶽允王

維后明昭有周式序在位載戢干戈載櫜弓矢我求懿德肆于時夏允王保之

時邁一章十五句

執競祀武王也

執競武王無競維烈不顯成康上帝是皇自彼成康奄有四方斤斤其明鐘鼓嗷嗷
磬筦將將降福稷穰降福簡簡威儀反反既醉既飽福祿來反

執競一章十四句

思文后稷配天也

思文后稷克配彼天立我烝民莫匪爾極貽我來牟帝命率育無此疆爾界陳常于
時夏

思文一章八句

清廟之什十篇十章九十五句

臣工之什

臣工諸侯助祭遣於廟也

嗟嗟臣工敬爾在公王釐爾成來咨來茹嗟嗟保介維莫之春亦又何求如何新畀
於皇來牟將受厥明明昭上帝迄用康年命我衆人唐乃錢鎛奄觀銍艾

臣工一章十五句

噫嘻春夏祈穀于上帝也

噫嘻成王既昭假爾率時農夫播厥百穀駿發爾私終三十里亦服爾耕十千維耦

噫嘻一章八句

振鷺二王之後來助祭也

振鷺于飛于彼西雝我客戾止亦有斯容在彼無惡在此無斃庶幾夙夜以永終譽

振鷺一章八句

豐年秋冬報也

豐年多黍多稌亦有高廩萬億及秭爲酒爲醴烝畀祖妣以洽百禮降福孔皆

豐年一章七句

有瞽始作樂而合乎祖也

有瞽有瞽在周之庭設業設虞崇牙樹羽應田縣鼓鞀磬祝圉既備乃奏簫管備舉
嗶嗶厥聲肅雝和鳴先祖是聽我客戾止永觀厥成

有瞽一章十三句

潛季冬薦魚春獻鮪也

猗與漆沮潛有多魚有鱸有鮪鱗鱮鰓鯉以享以祀以介景福

潛一章六句

離禘大祖也

有來離離至止肅肅相維辟公天子穆穆於薦廣牡相予肆祀假哉皇考綏予孝子
宣哲維人文武維后燕及皇天克昌厥後綏我眉壽介以繁祉既右烈考亦右文母

離一章十六句

載見諸侯始見乎武王廟也

載見辟王曰求厥章龍旂陽陽和鈴央央條革有鶴休有烈光率見昭考以孝以享
以介眉壽永言保之思皇多祐烈文辟公綏以多福俾緝熙于純嘏

載見一章十四句

有客微子來見祖廟也

有客有客亦白其馬有斐有且敦琢其旅有客宿宿有客信信言授之繫以繫其馬

薄言追之左右綏之既有淫威降福孔夷

有客一章十二句

武奏大武也

於皇武王無競維烈允文文王克開厥後嗣武受之勝殷遏劉者定爾功

武一章七句

臣工之什十篇十章一百六句

閔予小子之什

閔予小子嗣王朝於廟也

閔予小子遭家不造孌孌在疚於乎皇考永世克孝念茲皇祖陟降庭止維予小子夙夜敬止於乎皇王繼序思不忘

閔予小子一章十一句

訪落嗣王謀於廟也

訪予落止率時昭考於乎悠哉朕未有艾將予就之繼猶判渙維予小子未堪家多

難紹庭上下陟降厥家休矣皇考以保明其身

訪落一章十二句

敬之羣臣進戒嗣王也

敬之敬之天維顯思命不易哉無曰高高在上陟降厥士日監在茲維予小子不聰
敬止日就月將學有緝熙于光明佛時仔肩示我顯德行

敬之一章十二句

小恙嗣王求助也

予其懲而恙後患莫予弃蜂自求辛螫肇允彼桃蟲拚飛維鳥未堪家多難予又集
于蓼

小恙一章八句

載芟春籍田而祈社稷也

載芟載柞其耕澤澤千耦其耘徂隰徂畛侯主侯伯侯亞侯旅侯疆侯以有噲其饋
思媚其婦有依其士有略其耜俶載南畝播厥百穀實函斯活驛驛其達有厭其隄

厭厭其苗緜緜其庶載穫濟濟有實其積萬億及秬爲酒爲醴烝畀祖妣以洽百禮有餽其香邦家之光有椒其馨胡考之寧匪且有且匪今斯今振古如茲

載芟一章三十一句

良耜秋報社稷也

畷畷良耜俶載載南畝播厭百穀實函斯活或來瞻女載筐及筥其饒伊黍其笠伊糾其縛斯趙以蔞荼蔞荼蔞朽止黍稷茂止穫之掙掙積之栗栗其崇如墉其比如櫛以開百室百室盈止婦子寧止殺時稇牡有球其角以似以續續古之人

良耜一章二十三句

絲衣繹賓尸也高子曰靈星之尸也

絲衣其杯載弁俶俶自堂徂基自羊徂牛鼐鼎及鼐兕觥其觶旨酒思柔不吳不敖胡考之休

絲衣一章九句

酌告成大武也言能酌先祖之道以養天下也

於鑠王師遵養時晦時純熙矣是用大介我龍受之躡躡王之造載用有嗣實維爾
公允師

酌一章九句

桓講武類禡也桓武志也

綏萬邦婁豐年天命匪解桓桓武王保有厥土于以四方克定厥家於昭于天皇以
間之

桓一章九句

賚大封於廟也賚予也言所以錫予善人也

文王既勤止我應受之敷時繹思我徂維求定時周之命於繹思

賚一章六句

般巡守而祀四嶽河海也

於皇時周陟其高山隋山喬嶽允猶翕河敷天之下真時之對時周之命

般一章七句

閔予小子之什十一篇十一章百三十七句

魯頌

駟之什

駟頌僖公也僖公能遵伯禽之法儉以足用寬以愛民務農重穀牧于坰野魯人尊之於是季孫行父請命子周而史克作是頌

駟駟牡馬在坰之野薄言駟者有騶有皇有驪有黃以車彭彭思無疆思馬斯臧
駟駟牡馬在坰之野薄言駟者有騶有駟有騂有騏以車伾伾思無期思馬斯才
駟駟牡馬在坰之野薄言駟者有騶有駟有騂有騏以車繹繹思無斃思馬斯作
駟駟牡馬在坰之野薄言駟者有駟有駟有駟有駟以車祛祛思無邪思馬斯徂

駟四章章八句

有駟頌僖公君臣之有道也

有駟有駟彼乘黃夙夜在公在公明明振振鷩鷩于下鼓咽咽醉言舞于胥樂兮
有駟有駟彼乘牡夙夜在公在公飲酒振振鷩鷩于飛鼓咽咽醉言歸于胥樂

兮 有駉有駉彼乘駉夙夜在公在公載燕自今以始歲其有君子有載詒孫子
于胥樂兮

有駉三章章九句

泮水頌僖公能脩泮宮也

思樂泮水薄采其芹魯侯戾止言觀其旂旒旒聲嘖嘖無小無大從公于邁
思樂泮水薄采其藻魯侯戾止其馬蹻蹻其馬蹻蹻其音昭昭載色載笑匪怒伊
教 思樂泮水薄采其芣魯侯戾止在泮飲酒既飲旨酒永錫難老順彼長道屈此
羣醜 穆穆魯侯敬明其德敬慎威儀維民之則允文允武昭假烈祖靡有不孝自
求伊祜 明明魯侯克明其德既作泮宮淮夷攸服矯矯虎臣在泮獻馘淑問如阜
陶在泮獻囚 濟濟多士克廣德心桓桓于征狄彼東南烝烝皇皇不吳不揚不告
于訥在泮獻功 角弓其觶東矢其搜戎車孔博徒御無數既克淮夷孔淑不逆式
固爾猶淮夷卒獲 翩彼飛鸞集于泮林食我桑黹懷我好音悵彼淮夷來獻其琛
元龜象齒大路南金

泮水八章章八句

闕宮頌僖公能復周公之宇也

闕宮有恤實實枚枚赫赫姜嫄其德不回上帝是依無災無害彌月不遲是生后稷降之百福黍稷重穰稗種芻麥奄有下國俾民稼穡有稷有黍有稻有秬奄有下土纘禹之緒 后稷之孫實維大王居岐之陽實始翦商至于文武纘大王之緒致天之屆于牧之野無貳無虞上帝臨女敦商之旅克威厥功王曰叔父建爾元子俾侯于魯大啓爾宇爲周室輔 乃命魯公俾侯于東錫之山川土田附庸周公之孫莊公之子龍旂承祀六轡耳耳春秋匪解享祀不忒皇皇后帝皇祖后稷 享以騂犧是饗是宜降福旣多周公皇祖亦其福女秋而載嘗夏而福衡白牡騂剛犧尊將將毛魚載蘩籩豆大房萬舞洋洋孝孫有慶俾爾熾而昌俾爾壽而臧保彼東方魯邦是嘗不虧不崩不震不騰三壽作朋如岡如陵公車千乘朱英綠縵二矛重弓公徒三萬貝冑朱紱烝徒增增戎狄是膺荆舒是懲則莫我敢承俾爾昌而熾俾爾壽而富黃髮台背審胥與試俾爾昌而大俾爾耆而艾萬有千歲眉壽無有害 泰山巖

巖魯邦所詹奄有龜蒙遂荒大東至于海邦淮夷來同莫不率從魯侯之功 保有
冕繹遂荒徐宅至于海邦淮夷蠻貊及彼南夷莫不率從莫敢不諾魯侯是若 天
錫公純嘏眉壽保魯居常與許復周公之宇魯侯燕喜令妻壽母宜大夫庶士邦國
是有既多受祉黃髮兒齒 徂來之松新甫之柏是斷是度是尋是尺松栢有鳥路
寢孔碩新廟奕奕奚斯所作孔曼且碩萬民是若

閟宮八章二章章十七句一章十二句一章二十八句二章章八句二章章
十句

駉四篇二十三章二百四十三句

商頌

那祀成湯也微子至于戴公其間禮樂廢壞有正考甫者得商頌十二篇於周之大
師以那爲首

猗與那與置我鞀鼓奏鼓簡簡衍我烈祖湯孫奏假綏我思成鞀鼓淵淵嘒嘒管聲
既和且平依我磬聲於赫湯孫穆穆厥聲庸鼓有數萬舞有奕我有嘉客亦不夷憚

自古在昔先民有作温恭朝夕執事有恪顧予烝嘗湯孫之將

那一章二十二句

烈祖祀中宗也

嗟嗟烈祖有秩斯祐申錫無疆及爾斯所既載清酏賚我思成亦有和羹既戒既平
禮假無言時靡有爭綏我眉壽黃耆無疆約軋錯衡八鸞鶴鶴以假以享我受命溥
將自天降康豐年穰穰來假來饗降福無疆顧予烝嘗湯孫之將

烈祖一章二十二句

玄鳥祀高宗也

天命玄鳥降而生商宅殷土芒芒古帝命武湯正域彼四方方命厥后奄有九有商
之先后受命不殆在武丁孫子武丁孫子武王靡不勝龍旂十乘大糇是承邦畿千
里維民所止肇域彼四海四海來假來假祁祁景員維河殷受命咸宜百祿是何

玄鳥一章二十二句

長發大禘也

濬哲維商長發其祥洪水茫茫禹敷下土方外大國是疆幅隕既長有城方將帝立
子生商 玄王桓撥受小國是達受大國是達率履不越遂視既發相土烈烈海外
有截 帝命不違至于湯齊湯降不遲聖敬日躋昭假遲遲上帝是祗帝命式于九
圍 受小球大球爲下國綴旒何天之休不競不綈不剛不柔敷政優優百祿是遒
受小共大共爲下國駿厯何天之龍敷奏其勇不震不動不懟不竦百祿是總
武王載旆有虔秉鉞如火烈烈則莫我敢曷苞有三蘖莫遂莫達九有有截韋顧既
伐昆吾夏桀 昔在中葉有震且業允也天子降予卿士實維阿衡實左右商王

長發七章一章八句四章章七句一章九句一章六句

殷武祀高宗也

捷彼殷武奮伐荆楚深入其阻襄荆之旅有截其所湯孫之緒 維女荆楚居國南
鄉昔有成湯自彼氐羌莫敢不來享莫敢不來王曰商是常 天命多辟設都于禹
之績歲事來辟勿予禍適稼穡匪解 天命降監下民有嚴不僭不濫不敢怠遑命
于下國封建厥福 商邑翼翼四方之極赫赫厥聲濯濯厥靈壽考且寧以保我後

生 陟彼景山松柏丸丸是斷是遷方斲是虔松栢有槩旅楹有閑寢成孔安

殷武六章三章章六句二章章七句一章五句

那五篇十六章百五十四句

周禮

天官冢宰

惟王建國辨方正位體國經野設官分職以爲民極乃立天官冢宰使帥其屬而掌邦治以佐王均邦國治官之屬大宰卿一人小宰中大夫二人宰夫下大夫四人上士八人中士十有六人旅下士三十有二人府六人史十有二人胥十有二人徒百有二十人 宮正上士二人中士四人下士八人府二人史四人胥四人徒四十人 宮伯中士二人下士四人府一人史二人胥二人徒二十人 膳夫上士二人中士四人下士八人府二人史四人胥十有二人徒百有二十人 庖人中士四人下士八人府二人史四人胥十有二人徒百有二十人 甸師下士二人府一人史二人胥五人徒五十人 甸師下士二人府一人史二人胥三十人徒三百人 獸人中士四人下士八人府二人史四人胥四人徒四十人 獸人中士二人下士四人府二人史四人胥三十人徒三百人 鱓人下士

四人府二人史二人徒十有六人 膳人下士四人府二人史二人徒二十人 醫師上士二人下士四人府二人史二人徒二十人 食醫中士二人 疾醫中士八人 瘍醫下士八人 獸醫下士四人 酒正中士四人下士八人府二人史八人 胥八人徒八十人 酒人奄十人女酒三十人奚三百人 漿人奄五人女漿十有五人奚百有五十人 凌人下士二人府二人史二人胥八人徒八十人 籩人奄一人女籩十人奚二十人 醴人奄一人女醴二十人奚四十人 醢人奄二人女醢二十人奚四十人 鹽人奄二人女鹽二十人奚四十人 羸人奄一人女羸十人奚二十人 宮人中士四人下士八人府二人史四人胥八人徒八十人 掌舍下士四人府二人史四人徒四十人 幕人下士一人府二人史二人徒四十人 掌次下士四人府四人史二人徒八十人 大府下大夫二人上士四人下士八人 府四人史八人賈十有六人胥八人徒八十人 玉府上士二人中士四人府二人史二人工八人賈八人胥四人徒四十有八人 內府中士二人府一人史二人徒十人 外府中士二人府一人史二人徒十人 司會中大夫二人下大夫四人上

士八人中士十有六人府四人史八人胥五人徒五十人 司書上士二人中士四人府二人史四人徒八人 職內上士二人中士四人府四人史四人徒二十人 職歲上士四人中士八人府四人史八人徒二十人 職幣上士二人中士四人府二人史四人胥四人徒二十人 司裘中士二人下士四人府二人史四人徒四十人 掌皮下士四人府二人史四人徒四十人 內宰下大夫二人上士四人中士八人府四人史八人胥八人徒八十人 內小臣奄上士四人史二人徒八人 闈人王宮每門四人圍游亦如之 寺人王之正內五人 內豎倍寺人之數 九嬪 世婦 女御 女祝四人奚八人 女史八人奚十有六人 典婦功中士二人下士四人府二人史四人工四人賈四人徒二十人 典絲下士二人府二人史二人賈四人徒十有二人 典枲下士二人府二人史二人徒二十人 內司服奄一人女御二人奚八人 縫人奄二人女御八人女工八十人奚三十人 染人下士二人府二人史二人徒二十人 追師下士二人府一人史二人工二人徒四人 屨人下士二人府一人史一人工八人徒四人 夏采下士四人史一人徒

四人

大宰之職掌建邦之六典以佐王治邦國一曰治典以經邦國以治官府以紀萬民
二曰教典以安邦國以教官府以擾萬民三曰禮典以和邦國以統百官以諧萬民
四曰政典以平邦國以正百官以均萬民五曰刑典以詰邦國以刑百官以糾萬民
六曰事典以富邦國以任百官以生萬民以八灋治官府一曰官屬以舉邦治二曰
官職以辨邦治三曰官聯以會官治四曰官常以聽官治五曰官成以經邦治六曰
官灋以正邦治七曰官刑以糾邦治八曰官計以弊邦治以八則治都鄙一曰祭祀
以馭其神二曰灋則以馭其官三曰廢置以馭其吏四曰祿位以馭其士五曰賦貢
以馭其用六曰禮俗以馭其民七曰刑賞以馭其威八曰田役以馭其衆以八柄詔
王馭羣臣一曰爵以馭其貴二曰祿以馭其富三曰予以馭其幸四曰置以馭其行
五曰生以馭其福六曰奪以馭其貧七曰廢以馭其罪八曰誅以馭其過以八統詔
王馭萬民一曰親親二曰敬故三曰進賢四曰使能五曰保庸六曰尊貴七曰達吏
八曰禮賓以九職任萬民一曰三農生九穀二曰園圃毓草木三曰虞衡作山澤之

材四曰藪牧養蕃鳥獸五曰百工飭化八材六曰商賈阜通貨賄七曰嬖婦化治絲
枲八曰臣妾聚斂疏材九曰閒民無常職轉移執事以九賦斂財賄一曰邦中之賦
二曰四郊之賦三曰邦甸之賦四曰家削之賦五曰邦縣之賦六曰邦都之賦七曰
關市之賦八曰山澤之賦九曰弊餘之賦以九式均節財用一曰祭祀之式二曰賓
客之式三曰喪荒之式四曰羞服之式五曰工事之式六曰幣帛之式七曰芻秣之
式八曰匪頒之式九曰好用之式以九貢致邦國之用一曰祀貢二曰嬖貢三曰器
貢四曰幣貢五曰材貢六曰貨貢七曰服貢八曰旂貢九曰物貢以九兩繫邦國之
民一曰牧以地得民二曰長以貴得民三曰師以賢得民四曰儒以道得民五曰宗
以族得民六曰主以利得民七曰吏以治得民八曰友以任得民九曰藪以富得民
正月之吉始利布治于邦國都鄙乃縣治象之灋于象魏使萬民觀治象挾日而斂
之乃施典于邦國而建其牧立其監設其參傳其伍陳其殷置其輔乃施則于都鄙
而建其長立其兩設其伍陳其殷置其輔乃施灋于官府而建其正立其貳設其攷
陳其殷置其輔凡治以典待邦國之治以則待都鄙之治以灋待官府之治以官成

待萬民之治以禮待賓客之治祀五帝則掌百官之誓戒與其具備前期十日帥執事而卜日遂戒及執事眡滌濯及納亨贊王牲事及祀之日贊玉幣爵之事祀大神亦亦如之享先王亦如之贊玉几玉爵大朝覲會同贊玉幣玉獻玉几玉爵大喪贊贈玉含玉作大事則戒于百官贊王命王眡治朝則贊聽治眡四方之聽朝亦如之凡邦之小治則冢宰聽之待四方之賓客之小治歲終則令百官府各正其治受其會聽其致事而詔王廢置三歲則大計羣吏之治而誅賞之

小宰之職掌建邦之宮刑以治王宮之政令凡宮之糾禁掌邦之六典八灋八則之貳以逆邦國都鄙官府之治執邦之九貢九賦九式之貳以均財節邦用以官府之六敘正羣吏一曰以敘正其位二曰以敘進其治三曰以敘作其事四曰以敘制其食五曰以敘受其會六曰以敘聽其情以官府之六屬舉邦治一曰天官其屬六十掌邦治大事則從其長小事則專達二曰地官其屬六十掌邦教大事則從其長小事則專達三曰春官其屬六十掌邦禮大事則從其長小事則專達四曰夏官其屬六十掌邦政大事則從其長小事則專達五曰秋官其屬六十掌邦刑大事則從其

長小事則專達六曰冬官其屬六十掌邦事大事則從其長小事則專達以官府之六職辨邦治一曰治職以平邦國以均萬民以節財用二曰教職以安邦國以寧萬民以懷賓客三曰禮職以和邦國以諧萬民以事鬼神四曰政職以服邦國以正萬民以聚百物五曰刑職以詰邦國以糾萬民以除盜賊六曰事職以富邦國以養萬民以生百物以官府之六聯合邦治一曰祭祀之聯事二曰賓客之聯事三曰喪荒之聯事四曰軍旅之聯事五曰田役之聯事六曰斂弛之聯事凡小事皆有聯以官府之八成經邦治一曰聽政役以比居二曰聽師田以簡稽三曰聽閭里以版圖四曰聽稱責以傅別五曰聽祿位以禮命六曰聽取予以書契七曰聽賣買以質劑八曰聽出入以要會以聽官府之六計弊羣吏之治一曰廉善二曰廉能三曰廉敬四曰廉正五曰廉漙六曰廉辨以遵掌祭祀朝覲會同賓客之戒具軍旅田役喪荒亦如之七事者令百官府共其財用治其施會聽其治訟凡祭祀贊王幣爵之事祿將之事凡賓客贊祿凡受爵之事凡受幣之事喪荒受其會襁幣玉之事月終則以官府之敘受羣吏之要贊冢宰受歲會歲終則令羣吏致事正歲帥治官之屬而親治

象之灋徇以木鐸曰不用灋者國有常刑乃退以宮刑憲禁于王官令于百官府曰各脩乃職攷乃灋待乃事以聽王命其有不共則國有大刑

宰夫之職掌治朝之灋以正王及三公六卿大夫羣吏之位掌其禁令敍羣吏之治以待賓客之令諸臣之復萬民之逆掌百官府之徵令辨其八職一曰正掌官灋以治要二曰師掌官成以治凡三曰司掌官灋以治目四曰旅掌官常以治數五曰府掌官契以治藏六曰史掌官書以贊治七曰胥掌官敍以治敍八曰徒掌宮令以徵令掌治灋以考百官府羣都縣鄙之治乘其財用之出入凡失財用物辟名者以官刑詔冢宰而誅之其足用長財善物者賞之以式灋掌祭祀之戒具與其薦羞從大宰而砥滌濯凡禮事贊小宰比官府之具凡朝覲會同賓客以牢禮之灋掌其牢禮委積膳獻飲食賓賜之殮牽與其陳數凡邦之弔事掌其戒令與其幣器財用凡所共者大喪小喪掌小官之戒令帥執事而治之三公六卿之喪與職喪帥宮有司而治之凡諸大夫之喪使其旅帥有司而治之歲終則令羣吏正歲會月終則令正月要旬終則令正日成而以攷其治治不以時舉者以告而誅之正歲則以灋警戒羣

吏令脩宮中之職事書其能者與其良者而以告于上

宮正掌王宮之戒令糾禁以時比宮中之官府次舍之衆寡爲之版以待夕擊柝而比之國有故則令宿其比亦如之辨外內而時禁穡其功緒糾其德行幾其出入均其稍食去其淫息與其奇袤之民會其什伍而教之道義月終則會其稍食歲終則會其行事凡邦之大事令于王宮之官府次舍無去守而聽政令春秋以木鐸脩火禁凡邦之事蹕宮中廟中則執燭大喪則授廬舍辨其親疏貴賤之居

宮伯掌王宮之士庶子凡在版者掌其政令行其秩敘作其徒役之事授八次八舍之職事若邦有大事作宮衆則令之月終則均秩歲終則均敘以時頒其衣裘掌其誅賞

膳夫掌王之食飲膳羞以養王及后世子凡王之饋食用六穀膳用六牲飲用六清羞用百二十品珍用八物醬用百有二十醴王日一舉鼎十有二物皆有俎以樂侑食膳夫授祭品嘗食王乃食卒食以樂徹于造王齊日三舉大喪則不舉大荒則不舉大札則不舉天地有烱則不舉邦有大故則不舉王燕食則奉膳贊祭凡王祭祀

賓客食則徹王之胙俎凡王之稍事設薦脯醢王燕飲酒則爲獻主掌后及世子之膳羞凡肉脩之頒賜皆掌之凡祭祀之致福者受而膳之以饗見者亦如之歲終則會唯王及后世子之膳不會

庖人掌共六畜六獸六禽辨其名物凡其死生蠶蕤之物以共王之膳與其薦羞之物及后世子之膳羞共祭祀之好羞共喪紀之庶羞賓客之禽獻凡令禽獻以灋授之其出入亦如之凡用禽獸春行羔豚膳膏香夏行腍鱠膳膏臊秋行饋臠膳膏腥冬行蠶羽膳膏羶歲終則會唯王及后之膳禽不會

內饗掌王及后世子膳羞之割亨煎和之事辨體名肉物辨百品味之物王舉則陳其鼎俎以牲體實之選百羞醬物珍物以俟饋共后及世子之膳羞辨腥臊羶香之不可食者牛夜鳴則病羊冷毛而羸羶犬赤股而躁臊鳥鱗色而沙鳴鬱豕盲眊而交睫膳馬黑脊而般臂螻凡宗廟之祭祀掌割亨之事凡燕飲食亦如之凡掌共羞脩刑臠胙骨鱠以待共膳凡王之好賜肉脩則饗人共之

外饗掌外祭祀之割亨共其脯脩刑臠陳其鼎俎實之牲體魚腊凡賓客之飧饗饗

食之事亦如之邦饗耆老孤子則掌其割亨之事饗士庶于亦如之師役則掌共其獻賜脯肉之事凡小喪紀陳其鼎俎而實之

亨人掌共鼎鑊以給水火之齊職外內饗之鬻亨煮辨膳羞之物祭祀共大羹鉶羹賓客亦如之

甸師掌帥其屬而耕耨王藉以時入之以共齋盛祭祀共蕭茅共野果蔬之薦喪事代王受眚裁王之同姓有舉則死刑焉帥其徒以薪蒸役外內饗之事

獸人掌罟田獸辨其名物冬獻狼夏獻麋春秋獻獸物時田則守罟及弊田令禽注于虞中凡祭祀喪紀賓客共其死獸生獸凡獸入于腊人皮毛筋角入于玉府凡田獸者掌其政令

獸人掌以時獻爲梁春獻王鮪辨魚物爲鱻以共王膳羞凡祭祀賓客喪紀共其魚之鱻凡獻者掌其政令凡獻征入于玉府

鼈人掌取互物以時簞魚鼈龜蜃凡狸物春獻鼈秋獻龜魚祭祀共麇羸蜺以授醢人掌凡邦之籍事

腊人掌乾肉凡田獸之脯腊臠胾之事凡祭祀共豆脯薦脯臠胾凡腊物賓客喪紀共其脯腊凡乾肉之事

醫師掌醫之政令聚毒藥以共醫事凡邦之有疾病者疔瘍者造焉則使醫分而治之歲終則稽其醫事以制其食十全爲上十失一次之十失二次之十失三次之十失四爲下

食醫掌和王之六食六飲六膳百醬百醬八珍之齊凡食眠齊春時羹齊眠夏時醬齊眠秋時飲齊眠冬時凡和春多酸夏多苦秋多辛冬多鹹調以滑甘凡會腊食之宜牛宜稷羊宜黍豕宜稷犬宜粱鴈宜麥魚宜菰凡君子之食恒放焉

疾醫掌養萬民之疾病四時皆有癘疾春時有疢首疾夏時有痒疥疾秋時有癘寒疾冬時有漱上氣疾以五味五穀五藥養其病以五氣五聲五色眠其死生兩之以丸散之變參之以九藏之動凡民之有疾病者分而治之死終則各書其所以而入于醫師

瘍醫掌腫瘍潰瘍金瘍折瘍之祝藥劑殺之齊凡療瘍以五毒攻之以五氣養之以

五藥療之以五味節之凡藥以醱養骨以辛養筋以鹹養脈以苦養氣以甘養肉以滑養腠凡有瘍者受其藥焉

獸醫掌療獸病療獸瘍凡療獸病灌而行之以節之以動其氣觀其所發而養之凡療獸瘍灌而副之以發其惡然後藥之養之食之凡獸之有病者有瘍者使療之死則計其數以進退之

酒正掌酒之政令以式灋授酒材凡爲公酒者亦如之辨五齊之名一曰泛齊二曰醴齊三曰盎齊四曰緹齊五曰沈齊辨三酒之物一曰事酒二曰昔酒三曰清酒辨四飲之物一曰清二曰醫三曰漿四曰醕掌其厚薄之齊以共王之四飲三酒之饌及后世子之飲與其酒凡祭祀以灋共五齊三酒以實八尊大祭三貳中祭再貳小祭壹貳皆有酌數唯齊酒不貳皆有器量共賓客之禮酒共后之致飲于賓客之禮醫醕糟皆使其士奉之凡王之燕飲酒共其計酒正奉之凡饗士庶子饗耆老孤子皆共其酒無酌數掌酒之賜頒皆有灋以行之凡有秩酒者以書契授之酒正之出入入其成月入其要小宰聽之歲終則會唯王及后之飲酒不會以酒式誅賞

酒人掌爲五齊三酒祭祀則共奉之以役世婦共賓客之禮酒飲酒而奉之凡事共酒而入于酒府凡祭祀共酒以往賓客之陳酒亦如之

漿人掌共王之六飲水漿醴涼醫醕入于酒府共賓客之稍禮共夫人致飲于賓客之禮清醴醫醕糟而奉之凡飲共之

凌人掌冰正歲十有二月令斬冰三其凌春始治鑑凡外內饗之膳羞鑑焉凡酒漿之酒醴亦如之祭祀共冰鑑賓客共冰大喪共夷漿冰夏頒冰掌事秋刷

籩人掌四籩之實朝事之籩其實饗實白黑形鹽臠鮑魚鱸饋食之籩其實棗棗桃乾榛榛實加籩之實蒨茨棗脯蒨茨棗脯羞籩之實糗餌粉麥凡祭祀共其籩薦羞之實喪事及賓客之事共其薦籩羞籩爲王及后世子共其內羞凡籩事掌之

醢人掌四豆之實朝事之豆其實韭菹醢昌本麩菁菹鹿麩茆菹麩饋食之豆其實葵菹羸醢脾析麩醢蜃蜃醢豚拍魚醢加豆之實芹菹兔醢深蒲醢醢菹菹厲醢筍菹魚醢羞豆之實醢食糝食凡祭祀共薦羞之豆實賓客喪紀亦如之爲王及后世子共其內羞王舉則共醢六十糝以五齊七醢七菹三麩實之賓客之禮共

醴五十糝凡事共醴

醴人掌共五齊七菹凡醴物以共祭祀之齊菹凡醴醬之物賓客亦如之王舉則共齊菹醴物六十糝共后及世子之醬齊菹賓客之禮共醴五十糝凡事共醴

鹽人掌鹽之政令以共百事之鹽祭祀共其苦鹽散鹽賓客共其形鹽散鹽王之膳羞共飴鹽后及世子亦如之凡齊事糝鹽以待戒令

冪人掌共巾冪祭祀以疏布巾冪八尊以畫布巾冪六彝凡王巾皆黼

宮人掌王之六寢之脩爲其井匱除其不蠲去其惡臭共王之沐浴凡寢中之事埽除執燭共鑪炭凡勞事四方之舍事亦如之

掌舍掌王之會同之舍設檜栝再重設車宮轅門爲壇墼宮棘門爲帷宮設旌門無宮則共人門凡舍事則掌之

幕人掌帷幕幄帟綬之事凡朝覲會同軍旅田役祭祀共其帷幕幄帟綬大喪共帷幕帟綬三公及卿大夫之喪共其帟

掌次掌王次之灋以待張事王大族上帝則張氈案設皇邸朝日祀五帝則張大次

小次設重帑重案合諸侯亦如之師田則張幕設重帑重案諸侯朝覲會同則張大次小次師田則張幕設案孤卿有邦事則張幕設案凡喪王則張帑三重諸侯再重孤卿大夫不重凡祭祀張其旅幕張尸次射則張耦次掌凡邦之張事

大府掌九貢九賦九功之貳以受其貨賄之入頒其貨于受藏之府頒其賄于受用之府凡官府都鄙之吏及執事者受財用焉凡頒財以式灋授之關市之賦以待王之膳服邦中之賦以待賓客四郊之賦以待稍秣家削之賦以待匪頒邦甸之賦以待工事邦縣之賦以待幣帛邦都之賦以待祭祀山澤之賦以待喪紀幣餘之賦以待賜予凡邦國之貢以待帛用凡萬民之貢以充府庫凡式貢之餘財以共玩好之用凡邦之賦用取具焉歲終則以貨賄之入出會之

玉府掌王之金玉玩好兵器凡良貨賄之藏共王之服玉佩玉珠玉王齊則共食玉大喪共含玉復衣裳角枕角桐掌王之燕衣服衽席牀第凡養器若合諸侯則共珠槃玉敦凡王之獻金玉兵器文織良貨賄之物受而藏之凡王之好賜共其貨賄內府掌受九貢九賦九功之貨賄良兵良器以待邦之大用凡四方之幣獻之金玉

齒革兵器凡良貨賄入焉凡適四方使者共其所受之物而奉之凡王及冢宰之好賜予則共之

外府掌邦布之入出以共百物而待邦之用凡有濼者共王及后世子之衣服之用凡祭祀賓客喪紀會同軍旅共其財用之幣齎賜予之財用凡邦之小用皆受焉歲終則會唯王及后之服不會

司會掌邦之六典八濼八則之貳以逆邦國都鄙官府之治以九貢之濼致邦國之財用以九賦之濼令田野之財用以九功之濼令民職之財用以九式之濼均節邦之財用掌國之官府郊野縣都之百物財用凡在書契版圖者之貳以逆羣吏之治而聽其會計以參互攷日成以月要攷月成以歲會攷歲成以周知四國之治以詔王及冢宰廢置

司書掌邦之六典八濼八則九職九正九事邦中之版土地之圖以周知入出百物以敘其財受其幣使入于職幣凡上之用財用必攷于司會三歲則大計羣吏之治以知民之財器械之數以知田野夫家六畜之數以知山林川澤之數以逆羣吏之

徵令凡稅斂掌事者受灋焉及事成則入要貳焉凡邦治攷焉

職內掌邦之賦入辨其財用之物而執其總以貳官府都鄙之財入之數以逆邦國之賦用凡受財者受其貳令而書之及會以逆職歲與官府財用之出而敘其財以待邦之移用

職歲掌邦之賦出以貳官府都鄙之財出賜之數以待會計而攷之凡官府都鄙羣吏之出財用受式灋于職歲凡上之賜予以敘與職幣授之及會以式灋贊逆會職幣掌式灋以斂官府都鄙與凡用邦財者之幣振掌事者之餘財皆辨其物而奠其錄以書揭之以詔上之小用賜予歲終則會其出凡邦之會事以式灋贊之

司裘掌爲大裘以共王祀天之服中秋獻良裘王乃行羽物季秋獻功裘以待頒賜王大射則共虎侯熊侯豹侯設其鵠諸侯則共熊侯豹侯卿大夫則共麋侯皆設其鵠大喪廡裘飾皮車凡邦之皮事掌之歲終則會唯王之裘與其皮事不會

掌皮掌秋斂皮冬斂革春獻之遂以式灋頒皮革于百工共其毳毛爲氈以待邦事歲終則會其財齋

內宰掌書版圖之灋以治王內之政令均其稍食分其人民以居之以陰禮教六宮以陰禮教九嬪以婦職之灋教九御使各有屬以作二事正其服禁其奇袤展其功緒大祭祀后裸獻則贊瑤爵亦如之正后之服位而詔其禮樂之儀贊九嬪之禮事凡賓客之裸獻瑤爵皆贊致后之賓客之禮凡喪事佐后使治外內命婦正其服位凡建國佐后立市設其次置其敍正其肆陳其貨賄出其度量淳制祭之以陰禮中春詔后帥外內命婦始蠶于北郊以爲祭服歲終則會內人之稍食稽其功事佐后而受獻功者比其小大與其蠶良而賞罰之會內宮之財用正歲均其稍食施其功事憲禁令于王之北宮而糾其守上春詔王后帥六宮之人而生種種之種而獻之于王

內小臣掌王后之命正其服位后出入則前驅若有祭祀賓客喪紀則擯詔后之禮事相九嬪之禮事正內人之禮事徹后之俎后有好事于四方則使往有好令於卿大夫則亦如之掌王之陰事陰令

閹人掌守王宮之中門之禁喪服凶器不入宮潛服賊器不入宮奇服怪民不入宮

凡內人公器賓客無帥則幾其出入以時敢閉凡外內命夫命婦出入則爲之闢掌掃門庭大祭祀喪紀之事設門燎蹕宮門廟門凡賓客亦如之

寺人掌王之內人及女宮之戒令相道其出入之事而糾之若有喪紀賓客祭祀之事則帥女宮而致於有司佐世婦治禮事掌內人之禁令凡內人弔臨于外則帥而往立于其前而詔相之

內豎掌內外之通令凡小事若有祭祀賓客喪紀之事則爲內人蹕王后之喪遷于宮中則前蹕及葬執褻器以從遺車

九嬪掌婦學之灋以教九御婦德婦言婦容婦功各帥其屬而以時御絃于王所凡祭祀贊玉璫贊后薦徹豆籩若有賓客則從后大喪帥絃哭者亦如之

世婦掌祭祀賓客喪紀之事帥女宮而濯概爲齋盛及祭之日澠陳女宮之具凡內羞之物掌弔臨于卿大夫之喪

女御掌御絃于王之燕寢以歲時獻功事凡祭祀贊世婦大喪掌沐浴后之喪持鬻從世婦而弔于卿大夫之喪

女祝掌王后之內祭祀凡內禱祠之事掌以時招梗禴禳之事以除疾殃

女史掌王后之禮職掌內治之貳以詔后治內政逆內宮書內令凡后之事以禮從典婦功掌婦式之灋以授嬪婦及內人女功之事齋凡授嬪婦功及秋獻功辨其苦良比其小大而賈之物書而揭之以共王及后之用頒之于內府

典絲掌絲入而辨其物以其賈揭之掌其藏與其出以待興功之時頒絲于外內工皆以物授之凡上之賜予亦如之及獻功則受良功而藏之辨其物而書其數以待有司之政令上之賜予凡祭祀共黼黻組就之物喪紀共其絲纁組文之物凡飾邦器者受文織絲組焉歲終則各以其物會之

典枲掌布總縷紵之麻草之物以待時頒功而授齋及獻功受苦功以其賈揭而藏之以待時頒頒衣服授之賜予亦如之歲終則各以其物會之

內司服掌王后之六服禕衣揄狄鞠衣展衣綠衣素沙辨外內命婦之服鞠衣展衣綠衣素沙凡祭祀賓客共后之衣服及九嬪世婦凡命婦共其衣服共喪衰亦如之后之喪共其衣服凡內具之物

縫人掌王宮之縫線之事以役女御以縫王及后之衣服喪縫棺飾焉衣襲柳之材掌凡內之縫事

染人掌染絲帛凡染春暴練夏纁玄秋染夏冬獻功掌凡染事

追師掌王后之首服爲副編次追衡笄爲九嬪及外內命婦之首服以待祭祀賓客喪紀共笄經亦如之

屨人掌王及后之服屨爲赤舄黑舄赤纁黃纁青句素屨葛屨辨外內命夫命婦之命屨功屨散屨凡四時之祭祀以宜服之

夏采掌大喪以冕服復于大祖以乘車建綏復于四郊

地官司徒

惟王建國辨方正位體國經野設官分職以爲民極乃立地官司徒使帥其屬而掌邦教以佐王安擾邦國教宮之屬大司徒卿一人小司徒中大夫二人鄉師下大夫四人上士八人中士十有六人族下士三十有二人府六人史十有二人胥十有二人徒百有二十人 鄉老二鄉則公一人鄉大夫每鄉卿一人州長每州中大夫一

人黨正每黨下大夫一人族師每族上士一人閭胥每閭中士一人比長五家下士一人 封人中士四人下士八人府二人史四人胥六人徒六十人 鼓人中士六人府二人史二人徒二十人 舞師下士二人胥四人舞徒四十人 牧人下士六人府一人史二人徒六十人 牛人中士二人下士四人府二人史四人胥二十人徒二百人 充人下士二人史二人胥四人徒四十人 載師上士二人中士四人府二人史四人胥六人徒六十人 閭師中士二人史二人徒二十人 縣師上士二人中士四人府二人史四人胥八人徒八十人 遺人中士二人下士四人府二人史四人胥四人徒四十人 均人中士二人下士四人府二人史四人胥四人徒四十人 師氏中大夫一人上士二人府二人史二人胥十有二人徒百有二十人 保氏下大夫一人中士二人府二人史二人胥六人徒六十人 司諫中士二人史二人徒二十人 司救中士二人史二人徒二十人 調人下士二人史二人徒十人 媒氏下士二人史二人徒十人 司市下大夫二人上士四人中士八人下士十有六人府四人史八人胥十有二人徒百有二十人 質人中士二人下士四

人府二人史四人胥二人徒二十人 廛人中士二人下士四人府二人史四人胥
二人徒二十人胥師二十肆則一人皆二史賈師二十肆則一人皆二史司職十肆
則一人司稽五肆則一人胥二肆則一人肆長每肆則一人 泉府上士四人中士
八人下士十有六人府四人史八人賈八人徒八十人 司門下大夫二人上士四
人中士八人下士十有六人府二人史四人胥四人徒四十人每門下士二人府一
人史二人徒四人 司關上士二人中士四人府二人史四人胥八人徒八十人每
關下士二人府一人史二人徒四人 掌節上士二人中士四人府二人史四人胥
二人徒二十人 遂人中大夫二人遂師下大夫四人上士八人中士十有六人旅
下士三十有二人府四人史十有二人胥十有二人徒百有二十人遂大夫每遂中
大夫一人縣正每縣下大夫一人鄙師每鄙上士一人鄴長每鄴中士一人里宰每
里下士一人鄰長五家則一人 旅師中士四人下士八人府二人史四人胥八人
徒八十人 稍人下士四人史二人徒十有二人 委人中士二人下士四人府二
人史四人徒四十人 土均上士二人中士四人下士八人府二人史四人胥四人

徒四十人 草人下士四人史二人徒十有二人 稻人上士二人中士四人下士
八人府二人史四人胥十人徒百人 土訓中士二人下士四人史二人徒八人
誦訓中士二人下士四人史二人徒八人 山虞每大山中士四人下士八人府二
人史四人胥八人徒八人中山下士六人史二人胥六人徒六十人小山下士二
人史一人徒二十人 林衡每大林麓下士十有二人史四人胥十有二人徒百有
二十人中林麓如中山之虞小林麓如小山之虞 川衡每大川下士十有二人史
四人胥十有二人徒百有二十人中川下士六人史二人胥六人徒六十人小川下
士二人史一人徒二十人 澤虞每大澤大藪中士四人下士八人府二人史四人
胥八人徒八十人中澤中藪如中川之衡小澤小藪如小川之衡 迹人中士四人
下士八人史二人徒四十人 升人中士二人下士四人府二人史二人胥四人徒
四十人 角人下士二人府一人徒八人 羽人下士二人府一人徒八人 掌葛
下士二人府一人史一人胥二人徒二十人 掌染草下士二人府一人史二人徒
八人 掌炭下士二人史二人徒二十人 掌荼下士二人府一人史一人徒二十

人 掌釐下士二人府一人史一人徒八人 圜人中士四人下士八人府二人胥
八人徒八十人 場人每場下士二人府一人史一人徒二十人 廩人下大夫二
人上士四人中士八人下士十有六人府八人史十有六人胥三十人徒三百人
舍人上士二人中士四人府二人史四人胥四人徒四十人 倉人中士四人下士
八人府二人史四人胥四人徒四十人 司祿中士四人下士八人府二人史四人
徒四十人 司稼下士八人史四人徒四十人 春人奄二人女春挑二人奚五人
饔人奄二人女饔八人奚四十人 橐人奄八人女橐每奄二人奚五人

大司徒之職掌建邦之土地之圖與其人民之數以佐王安擾邦國以天下土地之
圖周知九州之地域廣輪之數辨其山林川澤丘陵墳衍原隰之名物而辨其邦國
都鄙之數制其畿疆而溝封之設其社稷之壇而樹之田主各以其野之所宜木遂
以名其社與其野以土會之灋辨五地之物生一曰山林其動物宜毛物其植物宜
早物其民毛而方二曰川澤其動物宜鱗物其植物宜膏物其民黑而津三曰丘陵
其動物宜羽物其植物宜覈物其民專而長四曰墳衍其動物宜介物其植物宜莢

物其民哲而瘠五曰原隰其動物宜羸物其植物宜叢物其民豐肉而庫因此五物者民之常而施十有二教焉一曰以祀禮教教則民不苟二曰以陽禮教讓則民不爭三曰以陰禮教親則民不怨四曰以樂禮教和則民不乖五曰以儀辨等則民不越六曰以俗教安則民不偷七曰以刑教中則民不越八曰以誓教恤則民不怠九曰以度教節則民知足十曰以世事教能則民不失職十有一曰以賢制爵則民慎德十有二曰以庸制祿則民興功以土宜之濼辨十有二土之名物以相民宅而知其利害以阜人民以蕃鳥獸以毓草木以任土事辨十有二壤之物而知其穡以教稼穡樹藝以土均之濼辨五物九等制天下之地征以作民職以令地貢以斂財賦以均齊天下之政以土圭之濼測土深正日景以求地中日南則景短多暑日北則景長多寒日東則景夕多風日而則景朝多陰日至之景尺有五寸謂之地中天地之所合也四時之所交也風雨之所會也陰陽之所和也然則百物阜安乃建王國焉制其畿方千里而封樹之凡建邦國以土圭土其地而制其域諸公之地封疆方五百里其食者半諸侯之地封疆方四百里其食者參之一諸伯之地封疆方三百

里其食者參之一諸子之地封疆方二百里其食者四之一諸男之地封疆方百里其食者四之一凡造都鄙制其地域而封溝之以其室數制之不易之地家百畷一易之地家二百畷再易之地家三百畷乃分地職奠地守制地貢而頒職事焉以爲地澧而待政令以荒政十有二聚萬民一曰散利二曰薄征三曰緩刑四曰弛力五曰舍禁六曰去幾七曰告禮八曰殺哀九曰蕃樂十曰多昏十有一曰索鬼神十有二曰除盜賊以保息六養萬民一曰慈幼二曰養老三曰振窮四曰恤貧五曰寬疾六曰安富以本俗六安萬民一曰媿宮室二曰族墳墓三曰聯兄弟四曰聯師儒五曰聯朋友六曰同衣服正月之吉始和布教于邦國都鄙乃縣教象之澧于象魏使萬民觀教象挾日而斂之乃施教澧于邦國都鄙使之各以教其所治民令五家爲比使之相保五比爲閭使之相受四閭爲族使之相葬五族爲黨使之相救五黨爲州使之相闢五州爲鄉使之相賓頒職事十有二于邦國都鄙使以登萬民一曰稼穡二曰樹藝三曰作材四曰阜蕃五曰飭材六曰通財七曰化材八曰斂材九曰生材十曰學藝十有一曰世事十有二曰服事以鄉三物教萬民而賓興之一曰六德

知仁聖義忠和二曰六行孝友睦婣任恤三曰六藝禮樂射御書數以鄉八刑糾萬
民一曰不孝之刑二曰不睦之刑三曰不婣之刑四曰不弟之刑五曰不任之刑六
曰不恤之刑七曰造言之刑八曰亂民之刑以五禮防萬民之僞而教之中以六樂
防萬民之情而教之和凡萬民之不服教而有獄訟者與有地治者聽而斷之其附
于刑者歸于士祀五帝奉牛牲羞其肆享先王亦如之大賓客令野脩道委積大喪
帥六鄉之衆庶屬其六引而治其政令大軍旅大田役以旗致萬民而治其徒庶之
政令若國有大故則政萬民於王門令無節者不行於天下大荒大札則令邦國移
民通財舍禁弛力薄征緩刑歲終則令教官正治而致事正歲令于教官曰各共爾
職脩乃事以聽王命其有不正則國有常刑

小司徒之職掌建邦之教灋以稽國中及四郊都鄙之夫家九比之數以辨其貴賤
老幼廢疾凡征役之施舍與其祭祀飲食喪紀之禁令乃頒比灋于六鄉之大夫使
各登其鄉之衆寡六畜車輦辨其物以歲時入其數以施政教行徵令及三年則大
比大比則受邦國之比要乃會萬民之卒伍而用之五人爲伍五伍爲兩四兩爲卒

五卒爲旅五旅爲師五師爲軍以起軍旅以作田役以比追胥以令貢賦乃均土地以稽其人民而周知其數上地家七人可任也者家三人中地家六人可任也者二家五人下地家五人可任也者家二人凡起徒役毋過家一人以其餘爲羨唯田與追胥竭作凡用衆庶則掌其政教與其戒禁聽其辭訟施其賞罰誅其犯命者凡國之大事致民大故致餘子乃經土地而井牧其田野九夫爲井四井爲邑四邑爲丘四丘爲甸四甸爲縣四縣爲都以任地事而令貢賦凡稅斂之事乃分地域而辨其守施其職而平其政凡小祭祀奉牛牲羞其肆小賓客令野脩道委積大軍旅帥其衆庶小軍旅巡役治其政令大喪帥邦役治其政教凡建邦國立其社稷正其畿疆之封凡民訟以地比正之地訟以圖正之歲終則攷其屬官之治成而誅賞令羣吏正要會而致事正歲則帥其屬而觀教灋之象徇以木鐸曰不用灋者國有常刑令羣吏憲禁令脩灋糾職以待邦治及大比六鄉四郊之吏平教治正政事攷夫屋及其衆寡六畜兵器以待政令

鄉師之職各掌其所治鄉之教而聽其治以國比之灋以時稽其夫家衆寡辨其老

幼貴賤廢疾馬牛之物辨其可任者與其施舍者掌其戒令糾禁聽其獄訟大役則帥民徒而至治其政令既役則受州里之役要以致司空之辟以逆其役事凡邦事令作秩敘大祭祀羞牛牲共茅藉大軍旅會同正治其徒役與其葦輦戮其犯舍者大喪用役則帥其民而至遂治之及葬執賤以與匠師御隴而治役及窆執斧以涖匠師凡四時之田前期出田澶于州里簡其鼓鐸旗物兵器脩其卒伍及期以司徒之大旗致衆庶而陳之以旗物辨鄉邑而治其政令刑禁巡其前後之屯而戮其犯命者斷其爭禽之訟凡四時之徵令有常者以木鐸徇於市朝以歲時巡國及野而闢萬民之糴阨以王命施惠歲終則攷六鄉之治以詔廢置正歲稽其鄉器比共吉凶二服闋共祭器族共喪器黨共射器州共賓器鄉共吉凶禮樂之器若國大比則攷教察辭稽器展事以詔誅賞

鄉大夫之職各掌其鄉之政教禁令正月之吉受教澶于司徒退而頒之于其鄉吏使各以教其所治以攷其德行察其道藝以歲時登其夫家之衆寡辨其可任者國中自七尺以及六十野自六尺以及六十有五皆征之其舍者廢中貴者賢者能者

服公事者老者疾者皆會以歲時入其書三年則大比攷其德行道藝而與賢者能者鄉老及鄉大夫帥其吏與其衆寡以禮禮賓之厥明鄉老及鄉大夫羣吏獻賢能之書于王王再拜受之登于天府內史貳之退而以鄉射之禮五物詢衆庶一曰和二曰容三曰主皮四曰和容五曰興舞此謂使民興賢出使長之使民興能入使治之歲終則令六鄉之吏皆會政致事正歲令羣吏攷灋于司徒以退各憲之於其所治之國大詢于衆庶則各帥其鄉之衆寡而致於朝國有大故則令民各守其閭以待政令以旌節輔令則達之

州長各掌其州之教治政令之灋正月之吉各屬其州之民而讀灋以攷其德行道藝而勸之以糾其過惡而戒之若以歲時祭祀州社則屬其民而讀灋亦如之春秋以禮會民而射于州序凡州之大祭祀大喪皆蒞其事若國作民而師田行役之事則帥而致之掌其戒令與其賞罰歲終則會其州之政令正歲則讀教灋如初三年大比則大攷州里以贊鄉大夫廢興

黨正各掌其黨之政令教治及四時之孟月吉日則屬民而讀邦灋以糾戒之春秋

祭禁亦如之國索鬼神而祭祀則以禮屬民而飲酒于序以正齒位壹命齒于鄉里再命齒于父族三命而不齒凡其黨之祭祀喪紀昏冠飲酒教其禮事掌其戒禁凡作民而師田行役則以其灋治其政事歲終則會其黨政帥其吏而致事正歲屬民讀灋而書其德行道藝以歲時浚校比及大比亦如之

族師各掌其族之戒令政事月吉則屬民而讀邦灋書其孝弟睦婣有學者春秋祭醕亦如之以邦比之灋帥四閭之吏以時屬民而校登其族之夫家衆寡辨其貴賤老幼廢疾可任者及其六畜車輦五家爲比十家爲聯五人爲伍十人爲聯四閭爲族八閭爲聯使之相保相受刑罰慶賞相及相共以受邦職以役國事以相葬埋若作民而師田行役則合其卒伍簡其兵器以鼓鐸旗物帥而至掌其治令戒禁刑罰歲終則會政致事

閭胥各掌其閭之徵令以歲時各數其閭之衆寡辨其施舍凡春秋之祭祀役政喪紀之數聚衆庶旣比則讀灋書其敬敏任恤者凡事掌其比鱗撻罰之事

比長各掌其比之治五家相受相和親有舉奇妾則相及徙于國中及郊則從而授

之若徙于他則爲之旌節而行之若無授無節則唯圖土內之

封人掌詔王之社壝爲畿封而樹之凡封國設其社稷之壝封其四疆造都邑之封域者亦如之令社稷之職凡祭祀飾其牛牲設其楅衡置其縶共其水凜歌舞牲及毛炮之豚凡喪紀賓客軍旅大盟則飾其牛牲

鼓人掌教六鼓四金之音聲以節聲樂以和軍旅以正田役教爲鼓而辨其聲用以雷鼓鼓神祀以靈鼓鼓社祭以路鼓鼓鬼享以鼗鼓鼓軍事以鞀鼓鼓役事以晉鼓鼓金奏以金鐃和鼓以金鐃節鼓以金鐃止鼓以金鐃通鼓凡祭祀百物之神鼓兵舞敝舞者凡軍旅夜鼓鼗軍動則鼓其衆田役亦如之救日月則詔王鼓大喪則詔大僕鼓

舞師掌教兵舞帥而舞山川之祭祀教敝舞帥而舞社稷之祭祀教羽舞帥而舞四方之祭祀教皇舞帥而舞旱暵之事凡野舞則皆教之凡小祭祀則不興舞

牧人掌牧六牲而阜蕃其物以共祭祀之牲牲凡陽祀用騂牲毛之陰祀用黝牲毛之望祀各以其方之色牲毛之凡時祀之牲必用牲物凡外祭毀事用彪可也凡祭

祀共其犧牲以授充人繫之凡牲不繫者共奉之

牛人掌養國之公牛以待國之政令凡祭祀共其享牛求牛以授職人而芻之凡賓客之事共其牢禮積膳之牛饗食賓射共其膳羞之牛軍事共其犒牛喪事共其奠牛凡會同軍旅行役共其兵軍之牛與其牽徬以載公任器凡祭祀共其牛牲之互與其盆箠以待事

充人掌繫祭祀之牲牲祀五帝則繫于牢芻之三月享先王亦如之凡散祭祀之牲繫于國門使養之展牲則告牲碩牲則贊

載師掌任土之灋以物地事授地職而待其政令以廛里任國中之地以場國任園地以宅田士田買田任近郊之地以官田牛田賞田牧田任遠郊之地以公邑之田任甸地以家邑之田任稍地以小都之田任縣地以大都之田任疆地凡任地國宅無征園廛二十而一近郊十一遠郊二十而三甸稍縣都皆無過十二唯其漆林之征二十而五凡宅不毛者有里布凡田不耕者出屋粟凡民無職事者出夫家之征以時徵其賦

閭師掌國中及四郊之人民六畜之數以任其力以待其政令以時徵其賦凡任民任農以耕事貢九穀任圃以樹事貢草木任工以飭材事貢器物任商以市事貢貨賄任牧以畜事貢鳥獸任嬪以女事貢布帛任衡以山事貢其物任虞以澤事貢其物凡無職者出夫布凡庶民不畜者祭無牲不耕者祭無盛不樹者無榘不蠶者不帛不績者不衰

縣師掌邦國都鄙稍甸郊里之地域而辨其夫家人民田萊之數及其六畜車輦之稽三年大比則以攷羣吏而以詔廢置若將有軍旅會同田役之戒則受灋于司馬以作其衆庶及馬牛車輦會其車人之卒伍使皆備旗鼓兵器以帥而至凡造都邑量其地辨其物而制其域以歲時徵野之賦貢

遺人掌邦之委積以待施惠鄉里之委積以恤民之躅阨門關之委積以養老孤郊里之委積以待賓客野鄙之委積以待羈旅縣都之委積以待凶荒凡賓客會同師役掌其道路之委積凡國野之道十里有廬廬有飲食三十里有宿宿有路室路室有委五十里有市市有候館候館有積凡委積之事巡而比之以時頒之

均人掌均地政均地守均地職均人民牛馬車輦之力政凡均力政以歲上下豐年則公旬用三日焉中年則公旬用二日焉無年則公旬用一日焉凶札則無力政無財賦不收地守地職不均地政三年大比則大均

師氏掌以燬詔王以三德教國子一曰至德以爲道本二曰敏德以爲行本三曰孝德以知逆惡教三行一曰孝行以親父母二曰友行以尊賢良三曰順行以學師長居虎門之左司王朝掌國中失之事以教國子弟凡國之貴遊子弟學焉凡祭祀賓客會同喪紀軍旅王舉則從聽治亦如之使其屬帥四夷之隸各以其兵服守王之門外且蹕朝在野外則守內列

保氏掌諫王惡而養國子以道乃教之六藝一曰五禮二曰六樂三曰五射四曰五馭五曰六書六曰九數乃教之六儀一曰祭祀之容二曰賓客之容三曰朝廷之容四曰喪紀之容五曰軍旅之容六曰車馬之容凡祭祀賓客會同喪紀軍旅王舉則從聽治亦如之使其屬守王闈

司諫掌糾萬民之德而勸之朋友正其行而強之道藝巡問而觀察之以時書其德

行道藝辨其能而可任於國事者以攷鄉里之治以詔廢置以行赦宥

司救掌萬民之喪惡過失而誅讓之以禮防禁而救之凡民之有喪惡者三讓而罰三罰而士加明刑恥諸嘉石役諸司空其有過失者三讓而罰三罰而歸於園土凡歲時有天患民病則以節巡國中及郊野而以王命施惠

調人掌司萬民之難而諧和之凡過而殺傷人者以民成之鳥獸亦如之凡和難父之讎辟諸海外兄弟之讎辟諸子里之外從父兄弟之讎不同國君之讎既父師長之讎既兄弟主友之讎既從父兄弟弗辟則與之瑞節而以執之凡殺人有反殺者使邦國交讎之凡殺人而義者不同國令勿讎讎之則死凡有鬪怒者成之不可成者則書之先動者誅之

媒氏掌萬民之判凡男女自成名以上皆書年月日名焉令男三十而娶女二十而嫁凡娶判妻入子者皆書之中春之月令會男女於是時也奔者不禁若無故而不令者罰之司男女之無夫家者而會之凡嫁子娶妻入幣純帛無過五兩禁遷葬者與嫁殤者凡男女之陰訟聽之于勝國之社其附于刑者歸之于士

司市掌市之治教政刑量度禁令以次敘分地而經市以陳肆辨物而平市以政令禁物靡而均市以商賈阜貨而行布以量度成買而徵債以質劑結信而止訟以買民禁僞而除詐以刑罰禁竊而去盜以泉府同貨而斂賒大市日昃而市百族爲主朝市朝時而市商賈爲主夕市夕時而市販夫販婦爲主凡市人則胥執鞭度守門市之羣吏平肆展成奠買上旌于思次以令市市師涖焉而聽大治大訟胥師買師涖于介次而聽小治小訟凡萬民之期于市者辟布者量度者刑戮者各於其地之敘凡得貨賄六畜者亦如之三日而舉之凡治市之貨賄六畜珍異亡者使有利者使阜害者使亡靡者使微凡通貨賄以璽節出入之國凶荒札喪則市無征而作布凡市僞飾之禁在民者十有二在商者十有二在買者十有二在工者十有二市刑小刑憲罰中刑徇罰大刑扑罰其附于刑者歸于士國君過市則刑人赦夫人過市罰一幕世子過市罰一帑命夫過市罰一蓋命婦過市罰一帷凡會同師役市司帥買師而從治其市政掌其賣債之事

質人掌成市之貨賄人民牛馬兵器珍異凡賣僞者質劑焉大市以質小市以劑掌

稽市之書契同其度量壹其淳制巡而攷之犯禁者舉而罰之凡治質劑者國中一旬郊二旬野三旬都三月邦國朞期內聽期外不聽

屬人掌斂市斂布總布質布罰布屬布而入于泉府凡屠者斂其皮角筋骨入于玉府凡珍異之有滯者斂而入于膳府

胥師各掌其次之政令而平其貨賄憲刑禁焉察其詐僞飾行儷惡者而誅罰之聽其小治小訟而斷之

買師各掌其次之貨賄之治辨其物而均平之展其成而奠其買然後令市凡天患禁貴儷者使有恒買四時之珍異亦如之凡國之賣儷各帥其屬而嗣掌其月凡師役會同亦如之

司競掌憲市之禁令禁其鬪鬪者與其諷亂者出入相陵犯者以屬遊飲食于市者若不可禁則搏而戮之

司稽掌巡市而察其犯禁者與其不物者而搏之掌執市之盜賊以徇且刑之胥各掌其所治之政執鞭度而巡其前掌其坐作出入之禁令變其不正者凡有罪

者撻戮而罰之

肆長各掌其肆之政令陳其貨賄名相近者相遠也實相近者相爾也而平正之敘其總布掌其戒禁

泉府掌以市之征布斂市之不售貨之滯於民用者以其買賣之物楬而書之以待不時而買者買者各從其抵都鄙從其主國人郊人從其有司然後予之凡賒者祭祀無過旬日喪紀無過三月凡民之貸者與其有司辨而授之以國服爲之息凡國之財用取具焉歲終則會其出人而納其餘

司門掌授管鍵以啟閉國門幾出入不物者正其貨賄凡財物犯禁者舉之以其財養死政之老與其孤祭祀之牛牲繫焉監門養之凡歲時之門受其餘凡四方之賓客造焉則以告

司關掌國貨之節以聯門市司貨賄之出入者掌其治禁與其征塵凡貨不出於關者舉其貨罰其人凡所達貨賄者則以節傳出之國凶札則無關門之征猶幾凡四方之賓客敏關則爲之告有外內之送令則以節傳出內之

掌節掌守邦節而辨其用以輔王命守邦國者用玉節守都鄙者用角節凡邦國之使節山國用虎節土國用人節澤國用龍節皆金也以英蕩輔之門關用符節貨賄用璽節道路用旌節皆有期以反節凡通達於天下者必有節以傳輔之無節者有幾則不達

遂人掌邦之野以土地之圖經田野造縣鄙形體之濶五家爲鄰五鄰爲里四里爲鄕五鄕爲鄙五鄙爲縣五縣爲遂皆有地域溝樹之使各掌其政令刑禁以歲時稽其人民而授之田野簡其兵器教之稼穡凡治野以下劑致甿以田里安甿以樂昏擾甿以土宜教甿稼穡以興耨利甿以時器勸甿以彊予任甿以土均平政辨其野之土上地中地地下地以頒田里上地夫一廛田百晦萊五十晦餘夫亦如之中地夫一廛田百晦萊百晦餘夫亦如之下地夫一廛田百晦萊二百晦餘夫亦如之凡治野夫間有遂遂上有徑十夫有溝溝上有畛百夫有洫洫上有涂千夫有澮澮上有道萬夫有川川上有路以達于畿以歲時登其夫家之衆寡及其六畜車輦辨其老幼廢疾與其施舍者以頒職作事以令貢賦以令師田以起政役若起野役則令各

帥其所治之民而至以遂之大旗致之其不用命者誅之凡國祭祀共野牲令野職凡賓客令脩野道而委積大喪帥六遂之役而致之掌其政令及葬帥而屬六綽及窆陳役凡事致野役而師田作野民帥而至掌其政治禁令

遂師各掌其遂之政令戒禁以時登其夫家之衆寡六畜車輦辨其施舍與其可任者經牧其田野辨其可食者周知其數而任之以徵財征作役事則聽其治訟巡其稼穡而移用其民以救其時事凡國祭祀審其誓戒共其野牲入野職野賦于玉府賓客則巡其道脩庀其委積大喪使帥其屬以幄帟先道野役及窆抱磨共巨籠及蜃車之役軍旅田獵平野民掌其禁令比敍其事而賞罰

遂大夫各掌其遂之政令以歲時稽其夫家之衆寡六畜田野辨其可任者與其可施舍者以教稼穡以稽功事掌其政令戒禁聽其治訟令爲邑者歲終則會政致事正歲簡稼器脩稼政三歲大比則帥其吏而興眡明其有功者屬其地治者凡爲邑者以四達戒其功事而誅賞廢興之

縣正各掌其縣之政令徵比以頒田里以分職事掌其治訟趨其稼事而賞罰之若

將用野民師田行役移執事則帥而至治其政令既役則稽功會事而誅賞

鄙師各掌其鄙之政令祭祀凡作民則掌其戒令以時數其衆庶而察其媿惡而誅賞歲終則會其鄙之政而致事

鄙長各掌其鄙之政令以時校登其夫家比其衆寡以治其喪紀祭祀之事若作其民而用之則以旗鼓兵革帥而至若歲時簡器與有司數之凡歲時之戒令皆聽之趨其耕耨稽其女功

里宰掌比其邑之衆寡與其六畜兵器治其政令以歲時合耦于耨以治稼穡趨其耕耨行其秩敘以待有司之政令而徵斂其財賦

鄰長掌相糾相受凡邑中之政相贊徙于他邑則從而授之

旅師掌聚野之勦粟屋粟間粟而用之以質劑致民平頒其興積施其惠散其利而均其政令凡用粟春頒而秋斂之凡新阡之治皆聽之使無征役以地之媿惡爲之等

稍人掌令丘乘之政令若有會同師田行役之事則以縣師之濇作其同徒輦輦帥

而以至治其政令以聽於司馬大喪帥蜃車與其役以至掌其政令以聽於司徒
委人掌斂野之賦斂薪芻凡疏材木材凡畜聚之物以稍聚待賓客以甸聚待羈旅
凡其余聚以待頒賜以式灋共祭祀之薪蒸木材賓客共其芻薪喪紀共其薪蒸木
材軍旅共其委積薪芻凡疏材共野委兵器與其野圉財用凡軍旅之賓客館焉
土均掌平土地之政以均地守以均地事以均地貢以和邦國都鄙之政令刑禁與
其施舍禮俗喪紀祭祀皆以地嫩惡爲輕重之灋而行之掌其禁令

草人掌土化之法以物地相其宜而爲之種凡糞種駢剛用牛赤緹用羊墳壤用麩
渴澤用鹿鹹瀉用貍勃壤用狐壇壇用豕彊藥用費輕要用犬

稻人掌稼下地以瀦畜水以防止水以溝蕩水以遂均水以列舍水以澮寫水以涉
揚其芟作田凡稼澤夏以水殄草而芟夷之澤草所生種之芒種旱暵共其雩斂喪
紀共其葦事

土訓掌道地圖以詔地事道地歷以辨地物而原其生以詔地求王巡守則夾王車
誦訓掌道方志以詔觀事掌道方歷以詔辟忌以知地俗王巡守則夾王車

山虞掌山林之政令物爲之厲而爲之守禁仲冬斬陽木仲夏斬陰木凡服耜斬季材以時入之令萬民時斫材有期日凡邦工入山林而掄材不禁春秋之斫木不入禁凡竊木者有刑罰若祭山林則爲主而脩除且蹕若大田獵則萊山田之野及弊田植虞旗于中致禽而珥焉

林衡掌巡林麓之禁令而平其守以時計林麓而賞罰之若斫木材則受灋于山虞而掌其政令

川衡掌巡川澤之禁令而平其守以時舍其守犯禁者執而誅罰之祭祀賓客共川奠

澤虞掌國澤之政令爲之厲禁使其地之人守其財物以時入之于玉府頒其餘于萬民凡祭祀賓客共澤物之奠喪紀共其葦蒲之事若大田獵則萊澤野及弊田植虞旌以屬禽

迹人掌邦田之地政爲之厲禁而守之凡田獵者受令焉禁麇卵者與其毒矢射者升人掌金玉錫石之地而爲之厲禁以守之若以時取之則物其地圖而授之巡其

禁令

角人掌以時徵齒角凡骨物於山澤之農以當邦賦之秋令以度量受之以共財用羽人掌以時徵羽翮之政于山澤之農以當邦賦之政令凡受羽十羽爲審百羽爲搏十搏爲縛

掌葛掌以時徵絺綌之材于山農凡葛征徵草貢之材于澤農以當邦賦之政令以權度受之

掌染草掌以春秋斂染草之物以權量受之以待時而頒之

掌炭掌灰物炭物之徵令以時入之以權量受之以共邦之用凡炭灰之事

掌荼掌以時聚荼以共喪事斂野疏材之物以待邦事凡畜聚之物

掌蜃掌斂互物蜃物以共闕壤之蜃祭祀共蜃器之蜃共白盛之蜃

圉人掌圉游之獸禁牧百獸祭祀表紀賓客共其生獸死獸之物

場人掌國之場圃而樹之果蓏珍異之物以時斂而藏之凡祭祀賓客共其果蓏享亦如之

廩人掌九穀之數以待國之匪頒賜賙稍食以歲之上下數邦用以知足否以詔穀用以治年之凶豐凡萬民之食食者人四鬴上也人三鬴中也人二鬴下也若食不能人二鬴則令邦移民就穀詔王殺邦用凡邦有會同師役之事則治其糧與其食大祭祀則共其接盛

舍人掌平宮中之政分其財守以灋掌其出入凡祭祀共簠簋實之陳之賓客亦如之共其禮車米芻米芻禾喪紀共飯米熬穀以歲時縣種稷之種以共王后之春獻種掌米粟之出入辨其物歲終則會計其政

倉人掌粟入之藏辨九穀之物以待邦用若穀不足則止餘灋用有餘則藏之以待凶而頒之凡國之大事共道路之穀積食飲之具

司祿闕

司稼掌巡邦野之稼而辨種稷之種周知其名與其所宜地以爲灋而縣于邑閭巡野觀稼以年之上下出斂灋掌均萬民之食而調其急而平其興

春人掌共米物祭祀共其齎盛之米賓客共其牢禮之米凡饗共其食米掌凡米事

饌人掌凡祭祀共盛共王及后之六食凡賓客共其簠簋之實饗食亦如之
粢人掌共外內朝宥食者之食若饗耆老孤子士庶子共其食掌參祭祀之犬

春官宗伯

惟王建國辨方正位體國經野設官分職以爲民極乃立春官宗伯使帥其屬而掌
邦禮以佐王和邦國禮官之屬大宗伯卿一人小宗伯中大夫二人肆師下大夫四
人上士八人中士十有六人旅下士三十有二人府六人史十有二人胥十有二人
徒百有二十人 鬱人下士二人府二人史一人徒八人 鬯人下士二人府一人
史一人徒八人 雞人下士一人史一人徒四人 司尊彝下士二人府四人史二
人胥二人徒二十人 司几筵下士二人府二人史一人徒八人 天府上士一人
中士二人府四人史二人胥二人徒二十人 典瑞中士二人府二人史二人胥一
人徒十人 典命中士二人府二人史二人胥一人徒十人 司服中士二人府二
人史一人胥一人徒十人 典祀中士二人下士四人府二人史二人胥四人徒四
十人 守祿奄八人女祧每廟二人奚四人 世婦每宮卿二人下大夫四人中士

八人女府二人女史二人奚十有六人 內宗凡內女之有爵者 外宗凡外女之有爵者 冢人下大夫二人中士四人府二人史四人胥十有二人徒百有二十人 墓大夫下大夫二人中士八人府二人史四人胥二十人徒二百人 職喪上士二人中士四人下士八人府二人史四人胥四人徒四十人 大司樂中大夫二人樂師下大夫四人上士八人下士十有六人府四人史八人胥八人徒八十人 大胥中士四人小胥下士八人府二人史四人徒四十人 大師下大夫二人小師上士四人瞽矇上瞽四十人中瞽百有六十人眡瞭三百人府四人史八人胥十有二人徒百有二十人 典同中士二人府一人史一人胥二人徒二十人 磬師中士四人下士八人府四人史二人胥四人徒四十人 鍾師中士四人下士八人府二人史二人胥六人徒六十人 笙師中士二人下士四人府二人史二人胥二人徒二十人 鐃師中士二人下士四人府二人史二人胥二人徒二十人 鞀師下士二人府一人史一人舞者十有六人徒四十人 旄人下士四人舞者衆寡無數府二人史二人胥二人徒二十人 籥師中士四人府二人史二人胥二人徒

二十人 籒章中士二人下士四人府一人史一人胥二人徒二十人 鞶鞻氏下士四人府一人史一人胥二人徒二十人 典庸器下士四人府四人史二人胥八人徒八十人 司千下士二人府二人史二人徒二十人 大卜下大夫二人卜師上士四人卜人中士八人下士十有六人府二人史二人胥四人徒四十人 龜人中士二人府二人史二人工四人胥四人徒四十人 蕤氏下士二人史一人徒八人 占人下士八人府一人史二人徒八人 簪人中士二人府一人史二人徒四人 占夢中士二人史二人徒四人 眠禭中士二人史二人徒四人 大祝下大夫二人上士四人小祝中士八人下士十有六人府二人史四人胥四人徒四十人 喪祝上士二人中士四人下士八人府二人史二人胥四人徒四十人 甸祝下士二人府一人史一人徒四人 詛祝下士二人府一人史一人徒四人 司巫中士二人府一人史一人胥一人徒十人 男巫無數女巫無數其師中士四人府二人史四人胥四人徒四十人 大史下大夫二人上士四人小史中士八人下士十有六人府四人史八人胥四人徒四十人 馮相氏中士二人下士四人府二人史

四人徒八人 保章氏中士二人下士四人府二人史四人徒八人 內史中大夫一人下大夫二人上士四人中士八人下士十有六人府四人史八人胥四人徒四十人 外史上士四人中士八人下士十有六人胥二人徒二十人 御史中士八人下士十有六人其史百有二十人府四人胥四人徒四十人 巾車下大夫二人上士四人中士八人下士十有六人府四人史八人工百人胥五人徒五十人 典路中士二人下士四人府二人史二人胥二人徒二十人 車僕中士二人下士四人府二人史二人胥二人徒二十人 司常中士二人下士四人府二人史二人胥二人徒二十人 都宗人上士二人中士四人府二人史四人胥四人徒四十人 冢宗人如都宗人之數 凡以神士者無數以其藝爲之貴賤之等

大宗伯之職掌建邦之天神人鬼地示之禮以佐王建保邦國以吉禮事邦國之鬼神而以禋祀祀昊天上帝以實柴祀日月星辰以禋燎祀司中司命觀師雨師以血祭祭社稷五祀五嶽以狸沈祭山林川澤以醯辜祭四方百物以肆獻裸享先王以饋食享先王以祠春享先王以禴夏享先王以嘗秋享先王以烝冬享先王以凶禮

哀邦國之憂以喪禮哀死亡以荒禮哀凶札以弔禮哀禍裁以禱禮哀圍敗以恤禮
哀寇亂以賓禮親邦國春見曰朝夏見曰宗秋見曰覲冬見曰遇時見曰會殷見曰
同時聘曰問殷覲曰視以軍禮同邦國大師之禮用衆也大均之禮恤衆也大田之
禮簡衆也大役之禮任衆也大封之禮合衆也以嘉禮親萬民以飲食之禮親宗族
兄弟以昏冠之禮親成男女以賓射之禮親故舊朋友以饗燕之禮親四方之賓客
以脈膳之禮親兄弟之國以賀慶之禮親異姓之國以九儀之命正邦國之位壹命
受職再命受服三命受位四命受器五命賜則六命賜官七命賜國八命作牧九命
作伯以玉作六瑞以等邦國王執鎮圭公執桓圭侯執信圭伯執躬圭子執穀璧男
執蒲璧以禽作六摯以等諸臣孤執皮帛卿執羔大夫執鴈士執雉庶人執鷩工商
執雞以玉作六器以禮天地四方以蒼璧禮天以黃琮禮地以青圭禮東方以赤璋
禮南方以白琥禮西方以玄璜禮北方皆有牲幣各放其器之色以天產作陰德以
中禮防之以地產作陽德以和樂防之以禮樂合天地之化百物之產以事鬼神以
諧萬民以致百物凡祀大神享大鬼祭大示帥執事而卜日宿眡滌濯淅玉鬯省牲

饋奉玉盥詔大號治其大禮詔相王之禮若王不與祭祀則攝位凡大祭祀王后不與則攝而薦豆籩徹大賓客則攝而載果朝覲會同則爲上相大喪亦如之王娶諸侯亦如之王命諸侯則饋國有大故則族上帝及四望王大封則先告后土乃頒祀于邦國都家鄉邑

小宗伯之職掌建國之神位右社稷左宗廟兆五帝於四郊四望四類亦如之兆山川丘陵墳衍各因其方掌五禮之禁令與其用等辨廟祧之昭穆辨吉凶之五服車旗宮室之禁掌三族之別以辨親疏其正室皆謂之門子掌其政令毛六牲辨其名物而頒之于五官使共奉之辨六齎之名物與其用使六宮之人共奉之辨六彝之名物以待果將辨六尊之名物以待祭祀賓客掌衣服車旗宮室之賞賜掌四時祭祀之序事與其禮若國大貞則奉玉帛以詔號大祭祀省牲祗滌濯祭之日逆盥省饋告時于王告備于王凡祭祀賓客以時將瓊果詔相祭祀之小禮凡大禮佐大宗伯賜卿大夫士爵則饋小祭祀掌事如大宗伯之禮大賓客受其將幣之齋若大師則帥有司而立軍社奉主車若軍將有事則與祭有司將事于四望若大甸則帥有

司而饒獻于郊遂頒禽大裁及執事禱祠于上下神而王崩大肆以柩嚙漚及執事
洩大斂小斂帥異族而佐縣衰冠之式于路門之外及執事既葬獻器遂哭之下葬
兆甫窆亦如之既葬詔相喪祭之禮成葬而祭墓爲位凡王之會同軍族甸役之禱
祠肆儀爲位國有禍裁則亦如之凡天地之大裁類社稷宗廟則爲位凡國之大禮
佐大宗伯凡小禮掌事如大宗伯之儀

肆師之職掌立國祀之禮以佐大宗伯立大祀用玉帛牲牲立次祀用牲幣立小祀
用牲以歲時序其祭祀及其祈珥大祭祀展犧牲繫于牢頒于職人凡祭祀之卜日
宿爲期詔相其禮既滌濯亦如之祭之日表齋盛告絜展器陳告備及果築壝相治
小禮誅其慢怠者掌兆中廟中之禁令凡祭祀禮成則告事畢大賓客洩筵凡築壝
釐果將大朝覲佐儋共設匪籜之禮饗食授祭與祝侯禴于蠶及郊大喪大湖以鬯
則築壝令外內命婦序哭禁外內命男女之衰不中灑者且授之杖凡師甸用牲于
社宗則爲位類造上帝封于大神祭兵于山川亦如之凡師不功則助牽主車凡四
時之大甸獵祭表貉則爲位嘗之日洩卜來歲之芟禰之日洩卜來歲之戒社之日

治下來歲之稼若國有大故則令國人祭歲時之祭祀亦如之凡卿大夫之喪相其禮凡國之大事治其禮儀以佐宗伯凡國之小事治其禮儀而掌其事如宗伯之禮鬱人掌裸器凡祭祀賓客之裸事和鬱鬯以實彝而陳之凡裸玉濯之陳之以贊裸事詔裸將之儀與其節凡裸事沃盥大喪之濯共其肆器及葬共其裸器遂狸之大祭祀與量人受舉罍之卒爵而飲之

鬯人掌共秬鬯而飾之凡祭祀社壺用大罍禁門用瓢齋廟用脩凡山川四方用蜃凡裸事用概凡鬻事用散大喪之大濯設斗共其鬯鬯凡王之齊事共其秬鬯凡王弔臨共介鬯

雞人掌共雞牲辨其物大祭祀夜嘑旦以蹕百官凡國之大賓客會同軍旅喪紀亦如之凡國事爲期則告之時凡祭祀面禴釐共其雞牲

司尊彝掌六尊六彝之位詔其酌辨其用與其實春祠夏禴裸用雞彝鳥彝皆有舟其朝踐用兩獻尊其再獻用兩象尊皆有鬯諸臣之所昨也秋嘗冬烝裸用罍彝黃彝皆有舟其朝獻用兩著尊其饋獻用兩壺尊皆有鬯諸臣之所昨也凡四時之間

祀追享朝享祿用虎彝雌彝皆有舟其朝踐用兩大尊其再獻用兩山尊皆有魯諸臣之所昨也凡六彝六尊之酌鬱齊獻酌醴齊縮酌盎齊澆酌凡酒脩酌大喪存奠彝大旅亦如之

司几筵掌五几五席之名物辨其用與其位几大朝覲大饗射凡封國命諸侯王位設黼依依前南鄉設莞筵紛純加纁席畫純加次席黼純左右玉几祀先王昨席亦如之諸侯祭祀席蒲筵纁純加莞席紛純右彫几昨席莞筵紛純加纁席畫純筵國賓于牖前亦如之左彤几甸役則設熊席右漆几凡喪事設葦席右素凡其柏席用雀黼純諸侯則紛純每敦一几凡吉事變几凶事仍几

天府掌祖廟之守藏與其禁令凡國之玉鎮大寶器藏焉若有大祭大喪則出而陳之既事藏之凡官府鄉州及都鄙之治中受而藏之以詔王察羣吏之治上春鸞寶鎮及寶器凡吉凶之事祖廟之中沃盥執燭季冬陳玉以貞來歲之蠹惡若遷寶則奉之若祭天之司民司祿而獻民數穀數則受而藏之

典瑞掌玉瑞玉器之藏辨其名物與其用事設其服飾王晉大圭執鎮圭纁藉五采

五就以朝日公執桓圭侯執信圭伯執躬圭縹皆三采三就子執穀璧男執蒲璧親皆二采再就以朝覲宗遇會同于王諸侯相見亦如之璋圭璋璧琮縹皆二采一就以覲聘四圭有邸以祀天旅上帝兩圭有邸以祀地旅四望裸圭有瓚以肆先王以縣賓客圭璧以祀日月星辰璋邸射以祀山川以造贈賓客土圭以致四時日月封國則以土地珍圭以徵守以恤凶荒牙璋以起軍旅以治兵守璧羨以起度駟圭璋璧琮琥璜之渠眉疏璧琮以斂尸穀圭以和難以聘女琬圭以治德以結好琰圭以易行以除惡大祭祀大旅凡賓客之事共其玉器而奉之大喪共飯玉含玉贈玉凡玉器出則共奉之

典命掌諸侯之五儀諸臣之五等之命上公九命爲伯其國家宮室車旗衣服禮儀皆以九爲節侯伯七命其國家宮室車旗衣服禮儀皆以七爲節子男五命其國家宮室車旗衣服禮儀皆以五爲節王之三公八命其卿六命其大夫四命及其出封皆加一等其國家宮室車旗衣服禮儀亦如之凡諸侯之適子誓於天子攝其君則下其君之禮一等未誓則以皮帛繼子男公之孤四命以皮帛眡小國之君其卿三

命其大夫再命其士一命其宮室車旗衣服禮儀各眡其命之數侯伯之卿大夫士亦如之子男之卿再命其大夫一命其士不命其宮室車旗衣服禮儀各眡其命之數

司服掌王之吉凶衣服辨其名物與其用事王之吉服祀昊天上帝則服大裘而冕祀五帝亦如之享先王則袞冕享先公饗射則鷩冕祀四望山川則毳冕祭社稷五祀則希冕祭羣小祀則玄冕凡兵事章弁服眡朝則皮弁服凡甸冠弁服凡凶事服弁服凡弔事弁絰服凡喪爲天王斬衰爲王后齊衰王爲三公六卿錫衰爲諸侯緇衰爲大夫士疑衰其首服皆弁絰大札大荒大裁素服公之服自袞冕而下如王之服侯伯之服自鷩冕而下如公之服子男之服自毳冕而下如侯伯之服孤之服自希冕而下如子男之服卿大夫之服自玄冕而下如孤之服其凶服加以大功小功士之服自皮弁而下如大夫之服其凶服亦如之其齊服有玄端素端凡大祭祀大賓客共其衣服而奉之大喪共其復衣服斂衣服奠衣服廡衣服皆掌其陳序

典祀掌外祀之兆守皆有域掌其政令若以時祭祀則帥其屬而脩除徵役于司隸

而役之及祭帥其屬而守其厲禁而蹕之

守祧掌守先王先公之廟祧其遺衣服藏焉若將祭祀則各以其服授尸其廟則有司脩除之其祧則守祧黜陞之既祭則藏其陪與其服

世婦掌女宮之宿戒及祭祀比其具詔王后之禮事帥六宮之人共盥盛相外內宗之禮事大賓客之饗食亦如之大喪比外內命婦之朝莫哭不敬者而苛罰之凡王后有操事於婦人則詔相凡內事有達於外官者世婦掌之

內宗掌宗廟之祭祀薦加豆籩及以樂徹則佐傳豆籩賓客之饗食亦如之王后有事則從大喪序哭者哭諸侯亦如之凡卿大夫之喪掌其弔臨

外宗掌宗廟之祭祀佐王后薦玉豆胾豆籩及以樂徹亦如之王后以樂羞盥則贊凡王后之獻亦如之王后不與則贊宗伯小祭祀掌事賓客之事亦如之大喪則敍外內朝莫哭者哭諸侯亦如之

冢人掌公墓之地辨其兆域而爲之圖先王之葬居中以昭穆爲左右凡諸侯居左右以前卿大夫士居後各以其族凡死於兵者不入兆域凡有功者居前以爵等爲

丘封之度與其樹數大喪既有日請度甫窆遂爲之尸及窆以度爲丘隧共喪之窆器及葬言鸞車象人及窆執斧以泄遂入藏凶器正墓位蹕墓域守墓禁凡祭墓爲尸凡諸侯及諸臣葬於墓者授之兆爲之蹕均其禁

墓大夫掌凡邦墓之地域爲之圖令國民族葬而掌其禁令正其位掌其度數使皆有私地域凡爭墓地者聽其獄訟帥其屬而巡墓厲居其中之室以守之

職喪掌諸侯之喪及卿大夫士凡有爵者之喪以國之喪禮泄其禁令序其事凡國有司以王命有事焉則詔贊主人凡其喪祭詔其號治其禮凡公有司之所共職喪令之趣其事

大司樂掌成均之灋以治建國之學政而合國之子弟焉凡有道者有德者使教焉死則以爲樂祖祭於瞽宗以樂德教國子中和祗庸孝友以樂語教國子興道諷誦言語以樂舞教國子舞雲門大卷大咸大磬大夏大濩大武以六律六同五聲八音六舞大合樂以致鬼神示以和邦國以諧萬民以安賓客以說遠人以作動物乃分樂而序之以祭以享以祀乃奏黃鍾歌大呂舞雲門以祀天神乃奏大蕤歌應鍾舞

咸池以祭地示乃奏姑洗歌南呂舞大磬以祀四望乃奏蕤賓歌函鍾舞大夏以祭山川乃奏夷則歌小呂舞大濩以享先妣乃奏無射歌夾鍾舞大武以享先祖凡六樂者文之以五聲播之以八音凡六樂者一變而致羽物及川澤之示再變而致羸物及山林之示三變而致鱗物及丘陵之示四變而致毛物及墳衍之示五變而致介物及土示六變而致象物及天神凡樂圜鍾爲宮黃鍾爲角大蕤爲徵姑洗爲羽靈鼓靈鼓孤竹之管雲和之琴瑟雲門之舞冬日至於地上之圜丘奏之若樂六變則天神皆降可得而禮矣凡樂函鍾爲宮大蕤爲角姑洗爲徵南呂爲羽靈鼓靈鼓孫竹之管空桑之琴瑟咸池之舞夏日至於澤中之方丘奏之若樂八變則地示皆出可得而禮矣凡樂黃鍾爲宮大呂爲角大蕤爲徵應鍾爲羽路鼓路鼓陰竹之管龍門之琴瑟九德之歌九磬之舞於宗廟之中奏之若樂九變則人鬼可得而禮矣凡樂事大祭祀宿縣遂以聲展之王出入則令奏王夏尸出入則令奏肆夏牲出入則令奏昭夏帥國子而舞大饗不入牲其他皆如祭祀大射王出入令奏王夏及射令奏騶虞詔諸侯以弓矢舞王大食三宥皆令奏鍾鼓王師大獻則令奏愷樂凡日

月食四鎮五嶽崩大傀異裁諸侯薨令去樂入札大凶大裁大臣死凡國之大憂令弛縣凡建國禁其淫聲過聲凶聲慢聲大喪泣廡樂器及葬藏樂器亦如之

樂師掌國學之政以教國子小舞凡舞有帔舞有羽舞有皇舞有旄舞有干舞有人舞教樂儀行以肆夏趨以采薺車亦如之環拜以鍾鼓爲節凡射王以騶虞爲節諸侯以貍首爲節大夫以采蘋爲節士以采芣爲節凡樂掌其序事治其樂政凡國之小事用樂者令奏鍾鼓凡樂成則告備詔來幣臯舞詔及徹帥學士而歌徹令相饗食諸侯序其樂事令奏鍾鼓令相如祭之儀燕射帥射夫以弓矢舞樂出入令奏鍾鼓凡軍大獻教愷歌遂倡之凡喪陳樂器則帥樂官及序哭亦如之凡樂官掌其政令聽其治訟

大胥掌學士之版以待致諸子春入學舍采合舞秋頒學合聲以六樂之會正舞位以序出入舞者比樂官展樂器凡祭祀之用樂者以鼓徵學士序宮中之事

小胥掌學士之徵令而比之觶其不敬者巡舞列而撻其怠慢者正樂縣之位王宮縣諸侯軒縣卿大夫判縣士特縣辨其聲凡縣鍾磬半爲堵全爲肆

大師掌六律六同以合陰陽之聲陽聲黃鍾大蕤姑洗蕤賓夷則無射陰聲大呂應鍾南呂函鍾小呂夾鍾皆文之以五聲宮商角徵羽皆播之以八音金石土革絲木匏竹教六詩曰風曰賦曰比曰興曰雅曰頌以六德爲之本以六律爲之晉大祭祀帥瞽登歌令奏擊拊下管播樂器令奏鼓鞀大饗亦如之大射帥瞽而數射節大師執同律以聽軍聲而詔吉凶大喪帥瞽而厥作匱謚凡國之瞽矇正焉

小師掌教鼓鼗祝敵塤簫管弦敵大祭祀登鼓擊拊下管擊應鼓徵敵大饗亦如之大喪與厥凡小祭祀小樂事鼓鞀掌六樂聲音之節與其和

瞽矇掌播鼗祝敵塤簫管弦敵諷誦詩世奠繫鼓琴瑟掌九德六詩之歌以役大師既瞭掌凡樂事播鼗擊頌磬笙磬掌大師之縣凡樂事相瞽大喪厥樂器大旗亦如之賓射皆奏其鍾鼓鑿愷獻亦如之

典同掌六律六同之和以辨天地四方陰陽之聲以爲樂器凡聲高聲礪正聲緩下聲肆陂聲散險聲斂達聲贏徵聲籥回聲衍侈聲柝弁聲鬱薄聲甄厚聲石凡爲樂器以十有二律爲之數度以十有二聲爲之齊量凡和樂亦如之

磬師掌教擊磬擊編鍾教綬樂燕樂之鍾磬凡祭祀奏綬樂

鍾師掌金奏凡樂事以鍾鼓奏九夏王夏肆夏昭夏納夏章夏齊夏族夏祓夏騶夏凡祭祀饗食奏燕樂凡射王奏騶虞諸侯奏狸首卿大夫奏采蘋士奏采蘋掌擊鼓綬樂

笙師掌教教竽笙塤箛簫篴篥管春牘應雅以教祓樂凡祭祀饗射共其鍾笙之樂燕樂亦如之大喪廡其樂器及葬奉而藏之大旅則陳之

鐃師掌金奏之鼓凡祭祀鼓其金奏之樂饗食賓射亦如之軍大獻則鼓其愷樂凡軍之夜三鑿皆鼓之守鑿亦如之大喪廡其樂器奉而藏之

鞀師掌教鞀樂祭祀則帥其屬而舞之大饗亦如之

旄人掌教舞散樂舞夷樂凡四方之以舞仕者屬焉凡祭祀賓客舞其燕樂

籥師掌教國子舞羽籥籥祭祀則鼓羽籥之舞賓客饗食則亦如之大喪廡其樂器奉而藏之

籥章掌土鼓豳籥中春晝擊土鼓歛豳詩以逆暑中秋夜迎寒亦如之凡國祈年于

田祖獻鬯雅擊土鼓以樂田峻國祭蜡則獻鬯頌擊土鼓以息老物

程饗氏掌四夷之樂與其聲歌祭祀則獻而歌之燕亦如之

典庸器掌藏樂器庸器及祭祀帥其屬而設筵虞陳庸器饗食賓射亦如之大喪廡

筵虞

司干掌舞器祭祀舞者既陳則授舞器既舞則受之賓饗亦如之大喪廡舞器及葬奉而藏之

大卜掌三兆之灋一曰玉兆二曰瓦兆三曰原兆其經兆之體皆百有二十其頌皆千有二百掌三易之灋一曰連山二曰歸藏三曰周易其經卦皆八其別皆六十有四掌三夢之灋一曰致夢二曰觥夢三曰咸陟其經連十其別九十以邦事作龜之八命一曰征二曰象三曰與四曰謀五曰果六曰至七曰雨八曰瘳以八命者釐三兆三易三夢之占以觀國家之吉凶以詔救政凡國大貞卜立君卜大封則眡高作龜大祭祀則眡高命龜凡小事涖卜國大遷大師則貞龜凡旅陳龜凡喪事命龜卜師掌開龜之四兆一曰方兆二曰功兆三曰義兆四曰弓兆凡卜事眡高揚火以

作龜致其墨凡卜辨龜之上下左右陰陽以授命龜者而詔相之

龜人掌六龜之屬各有名物天龜曰靈屬地龜曰繹屬東龜曰果屬西龜曰蠶屬南龜曰獵屬北龜曰若屬各以其方之色與其體辨之凡取龜用秋時攻龜用春時各以其物入于龜室上春釐龜祭祀先卜若有祭祀則奉龜以往旅亦如之喪亦如之
華氏掌共燠契以待卜事凡卜以明火熬燠遂歛其燠契以授卜師遂役之

占人掌占龜以八簪占八頌以八卦占簪之八故以眊吉凶凡卜簪君占體大夫占色史占墨卜人占坼凡卜簪既事則繫幣以比其命歲終則計其占之中否

簪人掌三易以辨九簪之名一曰連山二曰歸藏三曰周易九簪之名一曰巫更二曰巫式三曰巫目四曰巫比五曰巫祠六曰巫參七曰巫環八曰巫目九曰巫比十曰巫式十一曰巫目十二曰巫比十三曰巫祠十四曰巫參十五曰巫環十六曰巫目十七曰巫比十八曰巫式十九曰巫目二十曰巫比二十一曰巫祠二十二曰巫參二十三曰巫環二十四曰巫目二十五曰巫比二十六曰巫式二十七曰巫目二十八曰巫比二十九曰巫式三十曰巫目三十一曰巫比三十二曰巫式三十三曰巫目三十四曰巫比三十五曰巫式三十六曰巫目三十七曰巫比三十八曰巫式三十九曰巫目四十曰巫比四十一曰巫式四十二曰巫目四十三曰巫比四十四曰巫式四十五曰巫目四十六曰巫比四十七曰巫式四十八曰巫目四十九曰巫比五十曰巫式五十一曰巫目五十二曰巫比五十三曰巫式五十四曰巫目五十五曰巫比五十六曰巫式五十七曰巫目五十八曰巫比五十九曰巫式六十曰巫目六十一曰巫比六十二曰巫式六十三曰巫目六十四曰巫比六十五曰巫式六十六曰巫目六十七曰巫比六十八曰巫式六十九曰巫目七十曰巫比七十一曰巫式七十二曰巫目七十三曰巫比七十四曰巫式七十五曰巫目七十六曰巫比七十七曰巫式七十八曰巫目七十九曰巫比八十曰巫式八十一曰巫目八十二曰巫比八十三曰巫式八十四曰巫目八十五曰巫比八十六曰巫式八十七曰巫目八十八曰巫比八十九曰巫式九十曰巫目九十一曰巫比九十二曰巫式九十三曰巫目九十四曰巫比九十五曰巫式九十六曰巫目九十七曰巫比九十八曰巫式九十九曰巫目一百曰巫比

占夢掌其歲時觀天地之會辨陰陽之氣以日月星辰占六夢之吉凶一曰正夢二曰噩夢三曰思夢四曰寤夢五曰喜夢六曰懼夢季冬聘王夢獻吉夢于王王拜而受之乃舍萌于四方以贈惡夢遂令始難歐疫

祗祿掌十輝之灋以觀妖祥辨吉凶一曰祿二曰象三曰鑑四曰監五曰闇六曰菁
七曰彌八曰敍九曰躋十曰想掌安宅敍降正歲則行事歲終則弊其事

大祝掌六祝之辭以事鬼神而祈福祥求永貞一曰順祝二曰年祝三曰吉祝四曰
化祝五曰瑞祝六曰筮祝掌六祈以同鬼神而一曰類二曰造三曰禴四曰禘五曰
攻六曰說作六辭以通上下親疏遠近一曰祠二曰命三曰誥四曰舍五曰禱六曰
誅辨六號一曰神號二曰鬼號三曰示號四曰牲號五曰齋號六曰幣號辨九祭一
曰命祭二曰衍祭三曰炮祭四曰周祭五曰振祭六曰播祭七曰絕祭八曰繚祭九
曰共祭辨九擗一曰稽首二曰頓首三曰空首四曰振動五曰吉擗六曰凶擗七曰
奇擗八曰褒擗九曰肅擗以享右祭祀凡大禋祀肆享祭而則執明水火而號祝隋
贊逆牲逆尸令鐘鼓右亦如之來瞽令皋舞相尸禮既祭令徹大喪始崩以肆鬯溲
尸相飯贊斂徹奠言旬人讀禱付練祥掌國事國有大故天裁彌祀社稷禱祠大師
宜于社造于祖設軍社類上帝國將有事于四望及軍歸獻于社則前祝大會同造
于廟宜于社過大山川則用事焉反行舍奠建邦國先告后土用牲幣禁督逆祀命

者頒祭號于邦國都鄙

小祝掌小祭祀將事侯禴禘祠之祝號以祈福祥順盥年逆時雨寧風旱彌裁兵遠
舉疾大祭祀逆盥盛送逆尸沃尸盥贊陪贊徹贊奠凡事佐大祝大喪贊禭設熬置
銘及葬設道齋之奠分禱五祀大師掌釁祈號祝有寇戎之事則保郊祀于社凡外
內小祭祀小喪紀小會同小軍旅掌事焉

喪祝掌大喪勸防之事及辟令啓及朝御匱乃奠及祖飾棺乃載遂御及葬御匱出
宮乃代及壙說載除飾小喪亦如之掌喪祭祝號王弔則與巫前掌勝國邑之社稷
之祝號以祭祀禱祠焉凡卿大夫之喪掌事而斂飾棺焉

甸祝掌四時之田表貉之祝號舍奠于祖廟禴亦如之師甸致禽于虞中乃屬禽及
郊饋獸舍奠于祖禴乃斂禽禴牲禴馬皆掌其祝號

詛祝掌盟詛類造攻說禱禱之祝號作盟詛之載辭以敍國之信用以質邦國之劑
信

司巫掌羣巫之政令若國大旱則帥巫而舞雩國有大裁則飾巫而造巫恒祭祀則

共匪主及道布及菴館凡祭事守瘞凡喪事掌巫降之禮

男巫掌望祀望衍授號旁招以茅冬堂贈無方無筭春招弭以除疾病王弔則與祝前

女巫掌歲時祓除蠶浴旱暵則舞雩若王后弔則與祝前凡邦之大裁歌哭而請

大史掌建邦之六典以逆邦國之治掌灋以道官府之治掌則以逆都鄙之治凡辨灋者攷焉不信者刑之凡邦國都鄙及萬民之有約劑者藏焉以貳六官六官之所登若約劑亂則辟灋不信者刑之正歲年以序事頒之于官府及都鄙頒告朔于邦國閏月詔王居門終月大祭祀與執事卜日戒及宿之日與羣執事讀禮書而協事祭之日執書以次位常辨事者攷焉不信者誅之大會同朝覲以書協禮事及將幣之日執書以詔王大師抱天時與大師同事大選國抱灋以前大喪執灋以淠勸防遣之日讀誅凡喪事攷焉小喪賜諡凡射事飾中舍筭執其禮事

小史掌邦國之志奠繫世辨昭穆若有事則詔王之忌諱大祭祀讀禮灋史以書敍昭穆之俎簋大喪大賓客大會同大軍旅佐大史凡國事之用禮灋者掌其小事卿

大夫之喪賜諡讀誄

馮相氏掌十有二歲十有二月十有二辰十日二十有八星之位辨其敘事以會天位冬夏致日春秋致月以辨四時之敘

保章氏掌天星以志星辰日月之變動以觀天下之遷辨其吉凶以星土辨九州之地所封域皆有分星以觀妖祥以十有二歲之相觀天下之妖祥以五雲之物辨吉凶水旱降豐荒之祲象以十有二風察天地之和命乖別之妖祥凡此五物者以詔救政訪序事

內史掌王之八枋之灋以詔王治一曰書二曰祿三曰廢四曰置五曰殺六曰生七曰予八曰奪執國灋及國令之貳以攷政事以逆會計掌敘事之灋受納訪以詔王聽治凡命諸侯及孤卿大夫則策命之凡四方之事書內史讀之王制祿則贊爲之以方出之賞賜亦如之內史掌書王命遂貳之

外史掌書外令掌四方之志掌三皇五帝之書掌達書名于四方若以書使于四方則書其令

御史掌邦國都鄙及萬民之治令以贊冢宰凡治者受灋令焉掌贊書凡數從政者
巾車掌公車之政令辨其用與其旗物而等敍之以治其出入王之五路一曰玉路
錫樊纓十有再就建大常十有二旂以祀金路鈎樊纓九就建大旂以賓同姓以封
象路朱樊纓七就建大赤以朝異姓以封革路龍勒條纓五就建大白以即戎以封
四衛木路前樊鵠纓建大麾以田以封蕃國王后之五路重翟錫面朱總厭翟勒面
纁總安車彫面鷲總皆有容蓋翟車貝面組總有握輦車組輓有嬰羽蓋王之喪車
五乘木車蒲蔽犬禛尾囊疏飾小服皆疏素車芬蔽犬禛素飾小服皆素藻車藻蔽
鹿淺禛革飾駢車翟蔽然禛髮飾漆車藩蔽紆禛雀飾服車五乘孤乘夏篆卿乘夏
纁大夫乘墨車士乘棧車庶人乘役車凡良車散車不在等者其用無常凡車之出
入歲終則會之凡賜闕之毀折入齋于職幣大喪飾遺車途廡之行之及葬執蓋從
車持旌及墓噉啟關陳車小喪共匱路與其飾歲時更纁共其幣車大祭祀鳴鈴以
應雞人

典路掌王及后之五路辨其名物與其用說若有大祭祀則出路贊駕說大喪大賓

客亦如之凡會同軍旅弔于四方以路從

車僕掌戎路之萃廣車之萃闕車之萃萃車之萃輕車之萃凡師共革車各以其萃會同亦如之大喪廡革車大射共三乏

司常掌九旗之物名各有屬以待國事日月爲常交龍爲旂通帛爲旛雜帛爲物熊虎爲旗烏隼爲旟龜蛇爲旐全羽爲旟析羽爲旒及國之大閱贊司馬頒旗物王建大常諸侯建旂孤卿建旛大夫士建物師都建旗州里建旗縣鄙建旐道車載旟旂車載旒皆畫其象焉宮府各象其事州里各象其名家各象其號凡祭祀各建其旗會同賓客亦如之置旌門大喪共銘旌建廡車之旌及葬亦如之凡軍事建旌旗及致民置旗弊之甸亦如之凡射共獲旌歲時共更旌

都宗人掌都宗祀之禮凡都祭祀致福于國正都禮與其服若有寇戎之事則保羣神之遠國有大故則令禱祠既祭反命于國

家宗人掌家祭祀之禮凡祭祀致福國有大故則令禱祠反命祭亦如之掌家禮與其衣服宮室車旗之禁令

凡以神仕者掌三辰之灋以猶鬼神示之居辨其名物以冬日至政天神人鬼以夏日至致地示物彪以禴國之凶荒民之札喪

夏官司馬

惟王建國辨方正位體國經野設官分職以爲民極乃立夏官司馬使帥其屬而掌邦政以佐王平邦國政官之屬大司馬卿一人小司馬中大夫二人軍司馬下大夫四人輿司馬上士八人行司馬中士十有六人旅下士三十有二人府六人史十有六人胥三十有二人徒三百有二十人凡制軍萬有二千五百人爲軍王六軍大國三軍次國二軍小國一軍軍將皆命卿二千有五百人爲師師帥皆中大夫五百人爲旅旅帥皆下大夫百人爲卒卒長皆上士二十五人爲兩兩司馬皆中士五人爲伍伍皆有長一軍則二府六史胥十人徒百人 司勳上士二人下士四人府二人史四人胥二人徒二十人 馬質中士二人府一人史二人賈四人徒八人 量人下士二人府一人史四人徒八人 小子下士二人史一人徒八人 羊人下士二人史一人賈二人徒八人 司燧下士二人徒六人 掌固上士二人下士八人府

二人史四人胥四人徒四十人 司險中士二人下士四人史二人徒四十人 掌
疆中士八人史四人胥十有六人徒百有六十人 候人上士六人下士十有二人
史六人徒百有二十人 環人下士六人史二人徒十有二人 挈壺氏下士六人
史二人徒十有二人 射人下大夫二人上士四人下士八人府二人史四人胥二
人徒二十人 服不氏下士一人徒四人 射鳥氏下士一人徒四人 羅氏下士
一人徒八人 掌畜下士二人史二人胥二人徒二十人 司士下大夫二人中士
六人下士十有二人府二人史四人胥四人徒四十人 諸子下大夫二人中士四
人府二人史二人胥二人徒二十人 司右上士二人下士四人府四人史四人胥
八人徒八十人 虎賁氏下大夫二人中士十有二人府二人史八人胥八十人虎
士八百人 旅賁氏中士二人下士十有六人史二人徒八人 節服氏下士八人
徒四人 方相氏狂夫四人 大僕下大夫二人小臣上士四人祭僕中士六人御
僕下士十有二人府二人史四人胥二人徒二十人 隸僕下士二人府一人史二
人胥四人徒四十人 弁師下士二人工四人史二人徒四人 司甲下大夫二人

中士八人府四人史八人胥八人徒八十人 司兵中士四人府二人史四人胥二人徒二十人 司戈盾下士二人府一人史二人徒四人 司弓矢下大夫二人中士八人府四人史八人胥八人徒八十人 繕人上士二人下士四人府一人史二人胥二人徒二十人 橐人中士四人府二人史四人胥二人徒二十人 戎右中大夫二人上士二人 齊右下大夫二人 道右上士二人 大馭中大夫二人 戎僕中大夫二人 齊僕下大夫二人 道僕上士十有二人 田僕上士十有二人 馭夫中士二十人下士四十人 校人中大夫二人上士四人下士十有六人 府四人史八人胥八人徒八十人 趣馬下士卓一人徒四人 巫馬下士二人醫四人府一人史二人賈二人徒二十人 牧師下士四人胥四人徒四十人 廋人下士閑二人史二人徒二十人 圉師乘一人徒二人圉人良馬匹一人駑馬麗一人 職方氏中大夫四人下大夫八人中士十有六人府四人史十有六人胥十有六人徒百有六十人 土方氏上士五人下士十人府二人史五人胥五人徒五十人 懷方氏中士八人府四人史四人胥四人徒四十人 合方氏中士八人府四

人史四人胥四人徒四十人 訓方氏中士四人府四人史四人胥四人徒四十人
形方氏中士四人府四人史四人胥四人徒四十人 山師中士二人下士四人府
二人史四人胥四人徒四十人 川師中士二人下士四人府二人史四人胥四人
徒四十人 遼師中士四人下士八人府四人史八人胥八人徒八十人 匡人中
士四人史四人徒八人 擇人中士四人史四人徒八人 都司馬每都上士二人
中士四人下士八人府二人史八人胥八人徒八十人 家司馬各使其臣以正於
公司馬

大司馬之職掌建邦國之九灋以佐王平邦國制畿封國以正邦國設儀辨位以等
邦國進賢興功以作邦國建牧立監以維邦國制軍詰禁以糾邦國施貢分職以任
邦國簡稽鄉民以用邦國均守平則以安邦國比小事大以和邦國以九伐之灋正
邦國馮弱犯寡則嘗之賊賢害民則伐之暴內陵外則壇之野荒民散則削之負固
不服則侵之賊殺其親則正之放弑其君則殘之犯令陵政則杜之外內亂鳥獸行
則滅之正月之吉始和布政于邦國都鄙乃縣政象之灋于象魏使萬民觀政象挾

日而斂之乃以九畿之籍施邦國之政職方千里曰國畿其外方五百里曰侯畿又其外方五百里曰甸畿又其外方五百里曰男畿又其外方五百里曰采畿又其外方五百里曰衛畿又其外方五百里曰蠻畿又其外方五百里曰夷畿又其外方五百里曰鎮畿又其外方五百里曰蕃畿凡令賦以地與民制之上地食者參之二其民可用者家三人中地食者半其民可用者二家五人下地食者參之一其民可用者家二人中春教振旅司馬以旗致民平列陳如戰之陳辨鼓鐸鐃之用王執路鼓諸侯執賁鼓軍將執晉鼓師帥執提旅帥執鞞卒長執饒兩司馬執鐸公司馬執鐃以教坐作進退疾徐疏數之節遂以蒐田有司表貉誓民鼓遂圍禁火弊獻禽以祭社中夏教芟舍如振旅之陳羣吏撰車徒讀書契辨號名之用帥以門名縣鄙各以其名家以號名鄉以州名野以邑名百家各象其事以辨軍之夜事其他皆如振旅遂以蒐田如蒐之禮車弊獻禽以享約中秋教治兵如振旅之陳辨旗物之用王載大常諸侯載旂軍吏載旗師都載旛鄉遂載物郊野戴旒百官載旗各書其事與其號焉其他皆如振旅遂以獮田如蒐田之禮羅弊致禽以祀社中冬教大圍前期

羣吏戒衆庶脩戰禮虞人萊所田之野爲表百步則一爲三表又五十步爲一表田之日司馬建旗于後表之中羣吏以旗物鼓鐸錫鏡各帥其民而致質明弊旗誅後至者乃陳車徒如戰之陳皆坐羣吏聽誓于陳前斬牲以左右徇陳曰不用命者斬之中軍以擘令鼓鼓人皆三鼓司馬振鐸羣吏作旗車徒皆作鼓行鳴錫車徒皆行及表乃止三鼓攬鐸羣吏弊旗車徒皆坐又三鼓振鐸作旗車徒皆作鼓進鳴錫車驟徒趨及表乃止坐作如初乃鼓車馳徒走及表乃止鼓戒三闕車三發徒三刺乃鼓退鳴鏡且卻及表乃止坐作如初遂以狩田以旌爲左右和之門羣吏各帥其車徒以敍和出左右陳車徒有司平之旗居卒間以分地前後有屯百步有司巡其前後險野人爲主易野車爲主旣陳乃設驅逆之車有司表貉于陳前中軍以擘令鼓鼓人皆三鼓羣司馬振鐸車徒皆作遂鼓行徒銜枚而進大獸公之小禽私之獲者取左耳及所弊鼓皆馘車徒皆譟徒乃弊致禽饁獸于郊入獻禽以享烝及師大合軍以行禁令以救無辜伐有罪若大師則掌其戒令淪大卜帥執事淪釁主及軍器及致建大常比軍衆誅後至者及戰巡陳旤事而賞罰若師有功則左執律右秉鉞

以先愷樂獻于社若師不功則厭而奉主車王弔勞士庶子則相大役輿慮事屬其植受其要以待攷而賞誅大會同則帥士庶子而掌其政令若大射則合諸侯之六耦大祭祀饗食羞牲魚授其祭大喪平士大夫喪祭奉詔馬牲

小司馬之職掌凡小祭祀會同饗射師田喪祀掌其事如大司馬之灋

軍司馬 闕

輿司馬 闕

行司馬 闕

司勳掌六鄉賞地之灋以等其功王功曰勳國功曰功民功曰庸事功曰勞治功曰力戰功曰多凡有功者銘書於王之常祭於大烝司勳詔之大功司勳藏其貳掌賞地之政令凡賞無常輕重眠功凡頒賞地參之一食惟加田無國正

馬質掌質馬馬量三物一曰戎馬二曰田馬三曰騶馬皆有物賈綱惡馬凡受馬於有司者書其齒毛輿其賈馬死則旬之內更旬之外入馬耳以其物更其外否馬及行則以任齊其行若有馬訟則聽之禁原蠶者

量人掌建國之澆以分國爲九州營國城郭營后宮量市朝道巷門渠造都邑亦如之營軍之壘舍量其市朝州涂軍社之所里邦國之地與天下之涂數皆書而藏之凡祭祀饗賓制其從獻脯燔之數量掌喪祭奠竊之俎實凡宰祭與鬱人受學歷而皆飲之

小子掌祭祀羞羊肆羊彘肉豆而掌珥于社稷祈于五祀凡沈辜侯禴飾其牲彘邦器及軍器凡帥田斬牲以左右徇陳祭祀贊羞受徹焉

羊人掌羊牲凡祭祀帥羔祭祀割羊牲登其首凡祈珥共其羊牲賓客共其澆羊凡沈辜侯禴彘積共其羊牲若牧人無牲則受布于司馬使其買買牲而共之

司燼掌行火之政令四時變國火以救時疾季春出火民咸從之季秋內火民亦如之時則施火令凡祭祀則祭燼凡國失火野焚萊則有刑罰焉

掌固掌脩城郭溝池樹渠之固頒其士庶子及其衆庶之守設其飾器分其財用均其稍食任其萬民用其材器凡守者受灋焉以通守政有移甲與其役財用唯是得通與國有司帥之以養其不足者晝三巡之夜亦如之夜三襲以號戒若造都邑則

治其固與其守濶凡國都之竟有溝樹之固郊亦如之民皆有職焉若有山川則因之

司險掌九州之圖以周知其山林川澤之阻而達其道路設國之五溝五涂而樹之林以爲阻固皆有守禁而達其道路國有故則藩塞阻路而止行者以其屬守之唯有節者達之

掌疆闕

候人各掌其方之道治與其禁令以設候人若有方治則帥面致于朝及歸送之于竟

環人掌致師察軍慝環四方之故巡邦國搏謀賊訟敵國揚軍旅降圍邑

挈壺氏掌挈壺以令軍井挈轡以令舍挈舂以令糧凡軍事縣壺以序聚櫜凡喪縣壺以代哭者皆以水火守之分以日夜及冬則以火鑿鼎水面沸之面沃之

射人掌國之二公孤卿大夫之位三公北而孤東面卿大夫西面其挈三公執璧孤執皮帛卿執羔大夫鴈諸侯在朝則皆北面詔相其濶若有國事則掌其戒令詔相

其事掌其治達以射灋治射儀王以六耦射三侯三獲三容樂以鷓虞九節五正諸侯以四耦射二侯二獲二容樂以狸首七節三正孤卿大夫以三耦射一侯一獲一容樂以采蘋五節二正士以三耦射豻侯一獲一容樂以采蘋五節二正若王大射則以狸步張三侯王射則令去侯立于後以矢行告卒令取矢祭侯則爲位與大史數射中佐司馬治射正祭祀則贊射牲相孤卿大夫之灋儀會同朝覲作大夫介凡有爵者大師令有爵者乘王之倅車有大賓客則作卿大夫從戒大史及大夫介大喪與僕人遷尸作卿大夫掌事比其廬不敬者苛罰之

服不氏掌養猛獸而教擾之凡祭祀共猛獸賓客之事則抗皮射則贊張侯以旌居乏而待獲

射鳥氏掌射鳥祭祀以弓矢馘鳥鳶凡賓客會同軍旅亦如之射則取矢矢在侯高則以并夾取之

羅氏掌羅鳥鳥蜡則作羅襦中春羅春鳥獻鳩以養國老行羽物

掌畜掌養鳥而阜蕃教擾之祭祀共卵鳥歲時貢鳥物共膳獻之鳥

司士掌羣臣之版以治其政令歲登下其損益之數辨其年歲與其貴賤周知邦國都家縣鄙之數卿大夫士庶子之數以詔王治以德詔爵以功詔祿以能詔事以久奠食惟賜無常正朝儀之位辨其貴賤之等王南鄉三公北面東上孤東面北上卿大夫西面北上王族故士虎士在路門之右南面東上大僕大右大僕從者在路門之左南西西上司士擯孤卿特揖大夫以其等旅揖士旁三揖王還揖門左揖門右大僕前王入內朝皆退掌國中之士治凡其戒令掌擯士者膳其擊凡祭祀掌士之戒令詔相其灋事及賜爵呼昭穆西進之帥其屬而割牲羞俎豆凡會同作士從賓客亦如之作士適四方使爲介大喪作士掌事作六軍之事執披凡士之有守者令哭無去守國有故則致士而頒其守凡邦國三歲則稽士任而進退其爵祿

諸子掌國子之倅掌其戒令與其教治辨其等正其位國有大事則帥國子西致於天子惟所用之若有兵甲之事則授之車甲合其卒伍置其有司以軍灋治之司馬弗正凡國正弗及大祭祀正六牲之體凡樂事正舞位授舞器大喪正羣子之服位會同賓客作羣子從凡國之政事國子存遊倅使之脩德學道春合諸學秋合諸射

以攷其藝而進退之

司右掌翠右之政令凡軍旅會同合其車之卒伍而比其乘屬其右凡國之勇力之士能用五兵者屬焉掌其政令

虎賁氏掌先後王而趨以卒伍軍旅會同亦如之舍則守王閑王在國則守王宮國有大故則守王門大喪亦如之及葬從遣車而哭適四方使則從士大夫若道路不通有徵事則奉書以使於四方

旅賁氏掌執戈盾夾王車而趨左八人右八人車止則持輪凡祭祀會同賓客則服而趨喪紀則衰葛執戈盾軍旅則介而趨

節服氏掌祭祀朝覲袞冕六人維王之太常諸侯則四人其服亦如之郊祀袞冕二人執戈送逆尸從車

方相氏掌蒙熊皮黃金四目玄衣朱裳執戈揚盾帥百隸而時難以索室殿燹大喪先隴及墓人壙以戈擊四隅馘方良

大僕掌正王之服位出入王之大命掌諸侯之復逆王胝朝則前正位而退入亦如

之建路鼓于大寢之門外而掌其政以待達窮者與遽令聞鼓聲則速逆御僕與御庶子祭祀賓客喪紀正王之服位詔灋儀贊王牲事王出入則自左馭而前驅凡軍旅田役贊王鼓救日月亦如之大喪始崩戒鼓傳達于四方窆亦如之縣喪首服之灋于宮門掌三公孤卿之弔勞王燕飲則相其灋王射則贊弓矢王眡燕朝則正位掌擯相王不眡朝則辭於三公及孤卿

小臣掌王之小命詔相王之小灋儀掌三公及孤卿之復逆正王之燕服位王之燕出入則前驅大祭祀朝覲沃王盥小祭祀賓客饗射掌事如大僕之灋掌士大夫之弔勞凡大事佐大僕

祭僕掌受命于王以眡祭祀而警戒祭祀有司糾百宮之戒具既祭帥羣有司而反命以王命勞之誅其不敬者大喪復于小廟凡祭祀王之所不與則賜之禽都家亦如之凡祭祀致福者展而受之

御僕掌羣吏之逆及庶民之復與其弔勞大祭祀相盥而登大喪持鬻掌王之燕令以序守路鼓

隸僕掌五寢之埽除糞洒之事祭祀脩寢王行洗乘石掌蹕宮中之事大喪復于小寢大寢

弁師掌王之五冕皆玄冕朱裏延紐五采纁十有二就皆五采玉十有二玉笄朱紘諸侯之纁旒九就璫玉三采其餘如王之事纁旒皆就玉璫玉笄王之皮弁會五采玉璫象邸玉笄王之弁絰弁而加環絰諸侯及孤卿大夫之冕韋弁皮弁弁絰各以其等爲之而掌其禁令

司甲關

司兵掌五兵五盾各辨其物與其等以待軍事及授兵從司馬之灋以頒之及其受兵輸亦如之及其用兵亦如之祭祀授舞者兵大喪廡五兵軍事建車之五兵會同亦如之

司戈盾掌戈盾之物而頒之祭祀授旅賁及故士戈盾授舞者兵亦如之軍旅會同授貳車戈盾建乘車之戈盾授旅賁及虎士戈盾及舍設藩盾行則斂之

司弓矢掌六弓四弩八矢之灋辨其名物而掌其守藏與其出入中春獻弓弩中秋

獻矢箠及其頌之王弓弧弓以授射甲革楛質者夾弓庾弓以授射豸侯鳥獸者唐弓大弓以授學射者使者勞者其矢箠皆從其弓凡弩夾庾利攻守唐大利車戰野戰凡矢枉矢絜矢利火射用諸守城車戰殺矢鏃矢用諸近射田獵瓘矢箠矢用諸弋射恒矢痺矢用諸散射天子之弓合九而成規諸侯合七而成規大夫合五而成規士合三而成規句者謂之弊弓凡祭祀共射牲之弓矢澤共射楛質之弓矢大射燕射共弓矢如數并夾大喪共明弓矢凡師役會同頒弓弩各以其物從授兵至之儀田弋充籬箠矢共瓘矢凡亡矢者弗用則更

繕人掌王之用弓弩矢箠瓘弋挾拾掌詔王射贊王弓矢之事凡乘車充其籬箠載其弓弩既射則斂之無會計

橐人掌受財于職金以齎其工弓六物爲三等弩四物亦如之矢八物皆三等箠亦如之春獻素秋獻成書其等以饗工乘其事試其弓弩以下上其食而誅賞乃入功于司弓矢及繕人凡齎財與其出入皆在橐人以待會而攷之亡者闕之

戎右掌戎車之兵革使詔贊王鼓傳王命于陳中會同充革車盟則以玉敦辟盟遂

役之贊牛耳桃茆

齊右掌祭祀會同賓客前齊車王乘則持馬行則陪乘凡有牲事則前馬

道右掌前道車王出入則持馬陪乘如齊車之儀自車上諭命于從車詔王之車儀

王式則下前馬王下則以蓋從

大馭掌馭王路以祀及犯軼王自左馭馭下祝登受轡犯軼遂驅之及祭酌僕僕左

執轡右祭兩軼祭軛乃飲凡馭路行以肆夏趨以采薺凡馭路儀以鸞和爲節

戎僕掌馭戎軍掌王倅車之政正其服犯軼如玉路之儀凡巡守及兵車之會亦如

之掌凡戎車之儀

齊僕掌馭金路以賓朝覲宗過饗食皆乘金路其灋儀各以其等爲車送道之節

道僕掌馭象路以朝夕燕出入其灋儀如齊車掌貳車之政令

田僕掌馭田路以田以鄙掌佐車之政設驅逆之車令獲者植旌及獻比禽凡田王

提馬而走諸侯晉大夫馳

馭夫掌馭貳車從車使車分公馬而駕治之

校人掌王馬之政辨六馬之屬種馬一物戎馬一物齊馬一物道馬一物田馬一物
騶馬一物凡頒良馬而養乘之乘馬一師四圉三乘爲阜車一趣馬三車爲繫繫一
馭夫六繫爲廐廐一僕夫六廐成校校有左右駕馬三良馬之數麗馬一圉八麗一
師八師一趣馬八趣馬一馭夫天子十有二閑馬六種邦國六閑馬四種家四閑馬
二種凡馬特居四之一春祭馬祖執駒夏祭先牧頒馬攻特秋祭馬社臧僕冬祭馬
步獻馬講馭夫凡大祭祀朝覲會同毛馬而頒之飾幣馬執扑而從之凡賓客受其
幣馬大喪飾遣車之馬及葬埋之田獵則帥驅逆之車凡將事于四海山川則飾黃
駒凡國之使者共其幣馬凡軍事物馬而頒之等馭夫之祿宮中之稍食

趣馬掌贊正良馬而齊其飲食簡其六節掌駕說之頒辨四時之居治以聽馭夫
巫馬掌養疾馬而乘治之相醫而藥攻馬疾受財于校人馬死則使其賈粥之入其
布于校人

牧師掌牧地皆有厲禁而頒之孟春焚牧中春通淫掌其政令凡田事贊焚萊
廋人掌十有二閑之政教以阜馬佚特教駮攻駒及祭馬祖祭閑之先牧及執駒散

馬耳圍馬正校人員選馬八尺以上爲龍七尺以上爲騾六尺以上爲馬

圉師掌教圉人養馬春除瘴蠶應始牧夏庠馬冬獻馬射則充楛質茨牆則翦鬮

圉人掌養馬芻牧之事以役圉師凡賓客喪紀牽馬而入陳厥馬亦如之

職方氏掌天下之圖以掌天下之地辨其邦國都鄙西夷八蠻七閩九貉五戎六狄之人民與其財用九穀六畜之數要周知其利害乃辨九州之國使同貫利東南曰揚州其山鎮曰會稽其澤藪曰具區其川三江其浸五湖其利金錫竹箭其民二男五女其畜宜鳥獸其穀宜稻正南曰荊州其山鎮曰衡山其澤藪曰雲瞢其川江漢其浸潁滿其利丹銀齒革其民一男二女其畜宜鳥獸其穀宜稻河南曰豫州其山鎮曰華山其澤藪曰圃田其川焚雒其浸波澨其利林漆絲枲其民二男三女其畜宜六擾其穀宜五種正東曰青州其山鎮曰沂山其澤藪曰望諸其川淮泗其浸沂沐其利蒲魚其民二男二女其畜宜雞狗其穀宜稻麥河東曰兗州其山鎮曰岱山其澤藪曰大野其川河沛其浸廬維其利蒲魚其民二男三女其畜宜六擾其穀宜四種正西曰雍州其山鎮曰嶽山其澤藪曰弦蒲其川涇汭其浸渭洛其利玉石其

民三男二女其畜宜牛馬其穀宜黍稷東北曰幽州其山鎮曰醫無閭其澤藪曰獲
養其川河沛其浸菑時其利魚鹽其民一男三女其畜宜四擾其穀宜三種河內曰
冀州其山鎮曰霍山其澤藪曰楊紆其川漳其浸汾潞其利松柏其民五男三女其
畜宜牛羊其穀宜黍稷正北曰并州其山鎮曰恒山其澤藪曰昭餘祁其川庫池嘔
夷其浸涑易其利布帛其民二男三女其畜宜五擾其穀宜五稷乃辨九服之邦國
方千里曰王畿其外方五百里曰侯服又其外方五百里曰甸服又其外方五百里
曰男服又其外方五百里曰采服又其外方五百里曰衛服又其外方五百里曰蠻
服又其外方五百里曰夷服又其外方五百里曰鎮服又其外方五百里曰藩服凡
邦國千里封公以方五百里則四公方四百里則六侯方三百里則七伯方二百里
則二十五子方百里則百男以周知天下凡邦國小大相維王設其牧制其職各以
其所能制其貢各以其所有王將巡守則戒于四方曰各脩平乃守攷乃職事無敢
不敬戒國有大刑及王之所行先道帥其屬而巡戒令王殷國亦如之

土方氏掌土圭之法以致日景以土地相宅而建邦國都鄙以辨土宜土化之灋而

授任地者王巡守則樹王舍

懷方氏掌來遠方之民致方貢致遠物而送逆之達之以節治其委積館舍飲食合方氏掌達天下之道路通其財利同其數器壹其度量除其怨惡同其好善

訓方氏掌道四方之政事與其上下之志誦四方之傳道正歲則布而訓四方而觀新物

形方氏掌制邦國之地域而正其封疆無有華離之地使小國事大國大國比小國山師掌山林之名辨其物與其利害而頒之于邦國使致其珍異之物川師掌川澤之名辨其物與其利害而頒之于邦國使致其珍異之物邊師掌四方之地名辨其丘陵墳衍邊疆之名物之可以封邑者

匡人掌達灋則匡邦國而觀其慝使無敢反側以聽王命

擇人掌誦王志道國之政事以巡天下之邦國而語之使萬民和說而正王而都司馬掌都之士庶子及其衆庶車馬兵甲之戒令以國灋掌其政學以聽國司馬家司馬亦如之

秋官司寇

惟王建國辨方正位體國經野設官分職以爲民極乃立秋官司寇使帥其屬而掌邦禁以佐王刑邦國刑官之屬大司寇卿一人小司寇中大夫二人士師下大夫四人鄉士上士八人中士十有六人旅下士三十有二人府六人史十有二人胥十有二人徒百有二十人 縣士中士三十有二人府八人史十有六人胥十有六人徒百有六十人 方士中士十有六人府八人史十有六人胥十有六人徒百有六十人 訝士中士八人府四人史八人胥八人徒八十人 朝士中士六人府三人史六人胥六人徒六十人 司民中士六人府三人史六人胥三人徒三十人 司刑中士二人府一人史二人胥二人徒二十人 司刺下士二人府一人史二人徒四人 司約下士二人府一人史二人徒四人 司盟下士二人府一人史二人徒四人 職金上士二人下士四人府二人史四人胥八人徒八十人 司厲下士二人史一人徒十有二人 犬人下士二人府一人史二人賈四人徒十六人 司圜中士六人下

士十有二人府三人史六人胥十有六人徒百有六十人 掌囚下士十有二人府
六人史十有二人徒百有二十人 掌戮下士二人史一人徒十有二人 司隸中
士二人下士十有二人府五人史十人胥二十人徒二百人 罪隸百有二十人
蠻隸百有二十人 閩隸百有二十人 夷隸百有二十人 貉隸百有二十人
布憲中士二人下士四人府二人史四人胥四人徒四十人 禁殺戮下士二人史
一人徒十有二人 禁暴氏下士六人史三人胥六人徒六十人 野廬氏下士六
人胥十有二人徒百有二十人 蜡氏下士四人徒四十人 雍氏下士二人徒八
人 萍氏下士二人徒八人 司寤氏下士二人徒八人 司烜氏下士六人徒十
有六人 條狼氏下士六人胥六人徒六十人 脩閭氏下士二人史一人徒十有
二人 冥氏下士二人徒八人 庶氏下士一人徒四人 穴氏下士一人徒四人
蠶氏下士二人徒八人 柞氏下士八人徒二十人 蘿氏下士二人徒二十人
蒼族氏下士一人徒二人 翦氏下士一人徒二人 赤友氏下士一人徒二人
鬻氏下士一人徒二人 壺涿氏下士一人徒二人 庭氏下士一人徒二人

銜枚氏下士二人徒八人 伊耆氏下士一人徒二人 大行人中大夫二人小行人下大夫四人司儀上士八人中士十有六人行夫下士三十有二人府四人史八人胥八人徒八十人 環人中士四人史四人胥四人徒四十人 象胥每翟上士一人中士二人下士八人徒二十人 掌客上士二人下士四人府一人史二人胥二人徒三十人 掌訝中士八人府二人史四人胥四人徒四十人 掌交中士八人府二人史四人徒三十有二人 掌察四方中士八人史四人徒十有六人 掌貨賄下士十有六人史四人徒三十有二人 朝大夫每國上士二人下士四人府一人史二人庶子八人徒二十人 都則中士一人下士二人府一人史二人庶子四人徒八十人 都士中士二人下士四人府二人史四人胥四人徒四十人家士亦如之

大司寇之職掌建邦之三典以佐王刑邦國詰四方一曰刑新國用輕典二曰刑平國用中典三曰刑亂國用重典以五刑糾萬民一曰野刑上功糾力二曰軍刑上命糾守三曰鄉刑上德糾孝四曰官刑上能糾職五曰國刑上愿糾暴以圜土聚教罷

民凡害人者實之圖土而施職事焉以明刑恥之其能改過反于中國不齒三年其不能改而出圖土者殺以兩造禁民訟入束矢於朝然後聽之以兩劑禁民獄入鈞金三日乃致于朝然後聽之以嘉石平罷民凡萬民之有罪過而未麗於灋而害於州里者桎梏而坐諸嘉石役諸司空重罪旬有三日坐葶役其次九日坐九月役其次七日坐七月役其次五日坐五月役其次三日坐三月役使州里任之則宥而舍之以肺石遠窮民凡遠近惇獨老幼之欲有復於上而其長弗達者立於肺石三日士聽其辭以告於上而罪其長正月之吉始和布刑于邦國都鄙乃縣刑象之灋于象魏使萬民觀刑象挾日而斂之凡邦之大盟約泚其盟書而登之于天府大史內史司會及六官皆受其貳而藏之凡諸侯之獄訟以邦典定之凡卿大夫之獄訟以邦灋斷之凡庶民之獄訟以邦成弊之大祭祀奉犬牲若禋祀五帝則戒之日泚誓百官戒于百族及納亨前王祭之日亦如之奉其明水火凡朝覲會同前王大喪亦如之大軍旅泚戮于社凡邦之大事使其屬蹕

小司寇之職掌外朝之政以致萬民而詢焉一曰詢國危二曰詢國遷三曰詢立君

其位王南鄉三公及州長百姓北面羣臣四面羣吏東面小司寇擯以敘進而問焉以衆輔志而弊謀以五刑聽萬民之獄訟附于刑用情訊之至于旬乃弊之讀書則用灋凡命夫命婦不躬坐獄訟凡王之同族有罪不卽市以五聲聽獄訟求民情一曰辭聽二曰色聽三曰氣聽四曰耳聽五曰目聽以八辟麗邦灋附刑罰一曰議親之辟二曰議故之辟三曰議賢之辟四曰議能之辟五曰議功之辟六曰議貴之辟七曰議勤之辟八曰議賓之辟以三刺斷庶民獄訟之中一曰訊羣臣二曰訊羣吏三曰訊萬民聽民之所刺宥以施上服下服之刑及大比登民數自生齒以上登于天府內史司會冢宰貳之以制國用小祭祀奉犬牲凡禋祀五帝實饌水納享亦如之大賓客前王而辟后世子之喪亦如之小師涖戮凡國之大事使其屬蹕孟冬祀司民獻民數於王王拜受之以圖國用而進退之歲終則令羣士計獄弊訟登中于天府正歲帥其屬而觀刑象令以木鐸曰不用灋者國有常刑令羣士乃宣布于四方憲刑禁乃命其屬入會乃致事

士師之職掌國之五禁之灋以左右刑罰一曰宮禁二曰官禁三曰國禁四曰野禁

五曰軍禁皆以木鐸徇之于朝書而懸于門閭以五戒先後刑罰毋使罪麗于民一曰誓用之于軍旅二曰誥用之于會同三曰禁用諸田役四曰糾用諸國中五曰憲用諸都鄙掌鄉合州黨族閭比之聯與其民人之什伍使之相安相受以比追胥之事以施刑罰慶賞掌官中之政令察獄訟之辭以詔司寇斷獄弊訟致邦令掌士之八成一曰邦約二曰邦賊三曰邦謀四者犯邦令五曰橋邦令六曰爲邦盜七曰爲邦朋八曰爲邦誣若邦凶荒則以荒辯之法治之令移民通財糾守緩刑凡以財獄訟者正之以傅別約劑若祭勝國之社稷則爲之尸王燕出入則前驅而辟祀五帝則沃尸及王盥泊鑊水凡刳珥則奉犬牲諸侯爲賓則帥其屬而蹕于王宮大喪亦如之大師帥其屬而禁逆軍旅者與犯師禁者而戮之歲終則令正冢會正歲帥其屬而憲禁令于國及郊野

鄉士掌國中各掌其鄉之民數而糾戒之聽其獄訟察其辭辯其獄訟異其死刑之罪而要之旬而職聽于朝司寇聽之斷其獄弊其訟于朝羣士司刑皆在各麗其灋以議獄訟獄訟成士師受中協日刑殺肆之三日若欲免之則王會其期大祭祀大

喪紀大軍旅大賓客則各掌其鄉之禁令帥其屬夾道而蹕三公若有邦事則爲之前驅而辟其喪亦如之凡國有大事則戮其犯命者

遂士掌四郊各掌其遂之民數而糾其戒令聽其獄訟察其辭辨其獄訟異其死刑之罪而要之二旬而職聽于朝司寇聽之斷其獄弊其訟于朝羣士司刑皆在各麗其灋以議獄訟獄訟成士師受中協日就郊而刑殺各於其遂肆之三日若欲免之則王令三公會其期若邦有大事聚衆庶則各掌其遂之禁令帥其屬而蹕六卿若有邦事則爲之前驅而辟其喪亦如之凡郊有大事則戮其犯命者

縣士掌野各掌其縣之民數糾其戒令而聽其獄訟察其辭辨其獄訟異其死刑之罪而要之三旬而職聽于朝司寇聽之斷其獄弊其訟于朝羣士司刑皆在各麗其灋以議獄訟獄訟成士師受中協日刑殺各就其縣肆之三日若欲免之則王命六卿會其期若邦有大役聚衆庶則各掌其縣之禁令若大夫有邦事則爲之前驅而辟其喪亦如之凡野有大事則戮其犯命者

方士掌都家聽其獄訟之辭辨其死刑之罪而要之三月而上獄訟于國司寇聽其

成于朝羣士司刑皆在各麗其灋以議獄訟獄訟成士師受中書其刑殺之成與其聽獄訟者凡都家之大事聚衆庶則各掌其方之禁令以時脩其縣灋若歲終則省之而誅賞焉凡都家之士所上治則主之

訝士掌四方之獄訟論罪刑于邦國凡四方之有治於士者造焉四方有亂獄則往而成之邦有賓客則與行人送逆之入於國則爲之前驅而辟野亦如之居館則帥其屬而爲之蹕誅戮暴客者客出入則道之有治則贊之凡邦之大事聚衆庶則讀其誓禁

朝士掌建邦外朝之灋左九棘孤卿大夫位焉羣士在其後右九棘公侯伯子男位焉羣吏在其後面三槐三公位焉州長衆庶在其後左嘉石平罷民焉右肺石達窮民焉帥其屬而以鞭呼趨且辟禁慢朝錯立族談者凡得獲貨賄人民六畜者委于朝告于士旬而舉之大者公之小者庶民私之凡士之治有期日國中一旬郊二旬野三旬都三月邦國其期內之治聽期外不聽凡有責者有判書以治則聽凡民間貨財者令以國灋行之犯令者刑罰之凡屬責者以其地傅而聽其辭凡盜賊軍鄉

邑及家人殺之無罪凡報仇讎者書於士殺之無罪若邦凶荒札喪寇戎之故則令邦國都家縣鄙慮刑貶

司民掌登萬民之數自生齒以上皆書於版辨其國中與其都鄙及其郊野異其男女歲登下其死生及三年大比以萬民之數詔司寇司寇及孟冬祀司民之日獻其數于王王拜受之登于天府內史司會冢宰貳之以贊王治

司刑掌五刑之灋以麗萬民之罪墨罪五百劓罪五百宮罪五百剕罪五百殺罪五百若司寇斷獄弊訟則以五刑之灋詔刑罰而以辨罪之輕重

司刺掌三刺三宥三赦之灋以贊司寇聽獄訟壹刺曰訊羣臣再刺曰訊羣史三刺曰訊萬民壹宥曰不識再宥曰過失三宥曰遺忘壹赦曰幼弱再赦曰老旄三赦曰愆愚以此三灋者求民情斷民中而施上服下服之罪然後刑殺

司約掌邦國及萬民之約劑治神之約爲上治民之約次之治地之約次之治功之約次之治器之約次之治摯之約次之凡大約劑書於宗彝小約劑書於丹圖若有訟者則珥而辟藏其不信者服墨刑若大亂則六官辟藏其不信者殺

司盟掌盟載之灋凡邦國有疑會同則掌其盟約之載及其禮儀北而詔明神既盟則貳之盟萬民之犯命者詛其不信者亦如之凡民之有約劑者其貳在司盟有獄訟者則使之盟詛凡盟詛各以其地域之衆庶共其牲而致焉既盟則爲司盟共祈酒脯

職金掌凡金玉錫石丹青之戒令受其入征者辨其物之媿惡與其數量揭而璽之入其金錫于爲兵器之府入其玉石丹青于守藏之府入其要掌受士之金罰貨罰入于司兵旅于上帝則共其金版饗諸侯亦如之凡國有大故而用金石則掌其令司厲掌盜賊之任器貨賄辨其物皆有數量賈而揭之入于司兵其奴男子入于罪隸女子入于春槩凡有爵者與七十者與未亂者皆不爲奴

犬人掌犬牲凡祭祀共犬牲用牲物伏瘞亦如之凡幾珥沈辜用駟可也凡相犬牽犬者屬焉掌其政治

司圜掌收教罷民凡害人者弗使冠飾而加明刑焉任之以事而收教之能改者上罪三年而舍中罪二年而舍下罪一年而舍其不能改而出圜土者殺雖出三年不

齒凡鬪土之刑人也不虧體其罰人也不虧財

掌囚掌守盜賊凡囚者上罪梏拑而桎中罪桎梏下罪梏王之同族拑有爵者桎以待弊罪及刑殺告刑于王奉而適朝士加明梏以適市而刑殺之凡有爵者與王之同族奉而適甸師氏以待刑殺

掌戮掌斬殺賊諜而搏之凡殺其親者焚之殺王之親者辜之凡殺人者陪諸市肆之三日刑盜于市凡罪之麗於灋者亦如之唯王之同族與有爵者殺之于甸師氏凡軍旅田役斬殺刑戮亦如之墨者使守門劓者使守關宮者使守內刑者使守國髡者使守積

司隸掌五隸之灋辨其物而掌其政令帥其民而搏盜賊役國中之辱事爲百官積任器凡囚執人之事邦有祭祀賓客喪紀之事則役其煩辱之事掌帥四翟之隸使之皆服其邦之服執其邦之兵守王官與野舍之屬禁

罪隸掌役百官府與凡有守者掌使令之小事凡封國若冢牛助爲牽傍其守王宮與其屬禁者如蠻隸之事

蠻隸掌役校人養馬其在王宮者執其國之兵以守王宮在野外則守厲禁

閩隸掌役畜養鳥而阜蕃教擾之掌子則取隸焉

夷隸掌役牧人養牛馬與鳥言其守王宮者與其守厲禁者如蠻隸之事

貉隸掌役服不氏而養獸而教擾之掌與獸言其守王宮者與其守厲禁者如蠻隸之事

布憲掌憲邦之刑禁正月之吉執旌節以宣布于四方而憲邦之刑禁以詰四方邦國及其都鄙達于四海凡邦之大事合衆庶則以刑禁號令

禁殺戮掌司斬殺戮者凡傷人見血而不以告者攘獄者退訟者以告而誅之

禁暴氏掌禁庶民之亂暴力正者橋誣犯禁者作言語而不信者以告而誅之凡國聚衆庶則戮其犯禁者以徇凡奚隸聚而出人者則司牧之戮其犯禁者

野廬氏掌達國道路至于四畿比國郊及野之道貉宿息井樹若有賓客則令守涂地之人聚櫛之有相翔者誅之凡道路之舟車擊互者敍而行之凡有節者及有爵者至則爲之辟禁野之橫行徑踰者凡國之大事比脩除道路者掌凡道禁邦之大

師則令埽道路且以幾禁行作不時者不物者

蜡氏掌除飮凡國之大祭祀令州里除不蠲禁刑者任人及凶服者以及郊野大師大賓客亦如之若有死於道路者則令埋而置楬焉書其日月焉縣其衣服任器于有地之官以待其人掌凡國之飮禁

雍氏掌溝瀆滄池之禁凡害於國稼者春令爲阱獲溝瀆之利於民者秋令塞阱杜獲禁山之爲苑澤之沈者

萍氏掌國之水禁幾酒謹酒禁川游者

司寤氏掌夜時以星分夜以詔夜士夜禁禦晨行者禁宵行者夜遊者

司烜氏掌以夫遂取明火於日以鑿取明水於月以共祭祀之明甕明燭共明水凡邦之大事共墳燭庭燎中春以木鐸修火禁于國中軍旅修火禁邦若屋誅則爲明寤焉

條狼氏掌執鞭以趨辟王出入則八人夾道公則六人侯伯則四人子男則二人凡誓執鞭以趨於前且命之誓僕右曰殺誓馭曰車轅誓大夫曰敢不關鞭五百誓師

曰三百誓邦之大史曰殺誓小史曰墨

脩閭氏掌比國中宿互櫜者與其國粥而比其追胥者而賞罰之禁徑踰者與以兵革趨行者與馳騁於國中者邦有故則令守其閭互唯執節者不幾

冥氏掌設弧張爲阱獲以攻猛獸以靈鼓敵之若得其獸則獻其皮革齒須備

庶氏掌除毒蠱以攻說禴之嘉草攻之凡敵蠱則令之比之

穴氏掌攻螫獸各以其物火之以時獻其珍異皮革

窻氏掌攻猛鳥各以其物爲媒而掎之以時獻其羽翮

柞氏掌攻草木及林麓夏日至令刊陽木而火之冬日至今剝陰木而水之若欲其化也則春秋變其水火凡攻木者掌其政令

雍氏掌殺草春始生而萌之夏日至而夷之秋繩而芟之冬日至而耜之若欲其化也則以水火變之掌凡殺草之政令

蒼族氏掌覆天鳥之巢以方書十日之號十有二辰之號十有二月之號十有二歲之號二十有八星之號縣其巢上則去之

藺氏掌除蠹物以攻榮攻之以莽草熏之凡庶蠱之事

赤友氏掌除牆屋以蜃炭攻之以灰洒毒之凡隙屋除其狸蟲

蠋氏掌去鼃黽焚牡禱以灰洒之則死以其煙被之則凡水蠱無聲

壺涿氏掌除水蟲以炮土之鼓殿之以焚石投之若欲殺其神則以牡櫛午貫象齒而沈之則其神死淵爲陵

庭氏掌射國中之天鳥若不見其鳥獸則以救日之弓與救月之矢射之若神也則以大陰之弓與枉矢射之

銜枚氏掌司矚國之大祭祀令禁無矚軍旅田役令銜枚禁踣呼歎鳴於國中者行歌哭於國中之道者

伊耆氏掌國之大祭祀共其杖咸軍旅授有爵者杖共王之齒杖

大行人掌大賓之禮及大客之儀以親諸侯春朝諸侯而圖天下之事秋覲以比邦國之功夏宗以陳天下之謨冬遇以協諸侯之慮時會以發四方之禁殷同以施天下之政時聘以結諸侯之好殷覲以除邦國之懸問問以諭諸侯之志歸服以交諸

侯之福賀慶以贊諸侯之喜致禴以補諸侯之裁以九儀辨諸侯之命等諸臣之爵以同邦國之禮而待其賓客上公之禮執桓圭九寸纁藉九寸冕服九章建常九旒樊纓九就貳車九乘介九人禮九牢其朝位賓主之間九十步立當車軹擯者五人廟中將幣三享王禮再裸而酢饗禮九獻食禮九舉出入五積三問三勞諸侯之禮執信圭七寸纁藉七寸冕服七章建常七旒樊纓七就貳車七乘介七人禮七牢朝位賓主之間七十步立當前疾擯者四人廟中將幣三享王禮壹裸而酢饗禮七獻食禮七舉出入四積再問再勞諸伯執躬圭其他皆如諸侯之禮諸子執穀璧五寸纁藉五寸冕服五章建常五旒樊纓五就貳車五乘介五人禮五牢朝位賓主之間五十步立當車衡擯者三人廟中將幣三享王禮壹裸不酢饗禮五獻食禮五舉出入三積壹問壹勞諸男執蒲璧其他皆如諸子之禮凡大國之孤執皮帛以纁小國之君出入三積不問壹勞朝位當車前不交擯廟中無相以酒禮之其他皆眡小國之君凡諸侯之卿其禮各下其君二等以下及其大夫士皆如之邦畿方千里其外方五百里謂之侯服歲壹見其貢祀物又其外方五百里謂之甸服二歲壹見其貢

贖物又其外方五百里謂之男服三歲壹見其貢器物又其外方五百里謂之采屬四歲壹見其貢服物又其外方五百里謂之衛服五歲壹見其貢材物又其外方五百里謂之要服六歲壹見其貢貨物九州之外謂之蕃國世壹見各以其所貴寶爲擊王之所以撫邦國諸侯者歲徧存三歲徧覲五歲徧省七歲屬象胥諭言語協辭命九歲屬瞽史諭書名聽聲音十有一歲達瑞節同度量成牢禮同數器脩濬則十有二歲王巡守殷國凡諸侯之王事辨其位正其等協其禮賓而見之若有大喪則相諸侯之禮若有四方之大事則受其幣聽其辭凡諸侯之邦交歲相問也殷相聘也世相朝也

小行人掌邦國賓客之禮籍以待四方之使者令諸侯春入貢秋獻功王親受之各以其國之籍禮之凡諸侯入王則逆勞于畿及郊勞胝館將幣爲承而擯凡四方之使者大客則擯小客則受其幣而聽其辭使適四方協九儀賓客之禮朝覲宗遇會同君之禮也存規省聘問臣之禮也達天下之六節山國用虎節土國用人節澤國用龍節皆以金爲之道路用旌節門關用符節都鄙用管節皆以竹爲之成六瑞王

用瓊圭公用桓圭侯用信圭伯用躬圭子用穀璧男用蒲璧合六幣圭以馬璋以皮璧以帛琮以錦琥以繡璜以黼此六物者以和諸侯之好故若國札喪則令賻補之若國凶荒則令調委之若國師役則令檣禴之若國有福事則令慶賀之若國有禍裁則令哀弔之凡此五物者治其事故及其萬民之利害爲一書其禮俗政事教治刑禁之逆順爲一書其悖逆暴亂作慝猶犯令者爲一書其札喪凶荒厄貧爲一書其康樂和親安平爲一書凡此物者每國辨異之以反命于王以周知天下之故司儀掌九儀之賓客擯相之禮以詔儀容辭令揖讓之節將合諸侯則令爲壇三成宮旁一門詔王儀南鄉見諸侯土揖庶姓時揖異姓天揖同姓及其擯之各以其禮公於上等侯伯於中等子男於下等其將幣亦如之其禮亦如之王燕則諸侯毛凡諸公相爲賓主國五積三問皆三辭拜受皆旅擯再勞三辭三揖登拜受拜送主君郊勞交擯三辭車逆拜辱三揖三辭拜受車送三還再拜致館亦如之致餼如致積之禮及將幣交擯三辭車逆拜辱賓車進荅拜三揖三讓每門止一相及廟唯上相入賓三揖三讓登再拜授幣賓拜送幣每事如初賓亦如之及出車送三請三進再

拜賓三還三辭告辟致饗餼還圭饗食致贈郊送皆如將幣之儀賓之拜禮拜饗餼拜饗食賓繼主君皆如主國之禮諸侯諸伯諸子諸男之相爲賓也各以其禮相待也如諸公之儀諸公之臣相爲國客則三積皆三辭拜受及大夫郊勞旅擯三辭拜辱三讓登聽命下拜登受賓使者如初之儀及退拜送致館如初之儀及將幣旅擯事如初之儀及禮私面私獻皆再拜稽首君答拜出及中門之外問君客再拜對君拜客辟而對君問大夫客對君勞客客再拜稽首君答拜客趨辟致饗餼如勞之禮饗食還圭如將幣之儀君館客客辟介受命遂送客從拜辱于朝明日客拜禮賜遂行如入之積凡諸伯子男之臣以其國之爵相爲客而相禮其儀亦如之凡四方之賓客禮儀辭命餼牢賜獻以二等從其爵而上下之凡賓客送逆同禮凡諸侯之交各稱其邦而爲之幣以其幣爲之禮凡行人之儀不朝不夕不正其主面亦不肯容行夫掌邦國傳遽之小事媿惡而無禮者凡其使也必以旌節雖道有難而不時必達居於其國則掌行人之勞辱事焉使則介之

環人掌送逆邦國之通賓客以路節達諸四方舍則授館令聚櫟有任器則令環之凡門關無幾送逆及疆

象胥掌蠻夷閩貉戎狄之國使掌傳王之言而諭說焉以和親之若以時入賓則協其禮與其辭言傳之凡其出入送逆之禮節幣帛辭令而賓相之凡國之大喪詔相國客之禮儀而正其位凡軍旅會同受國客幣而賓禮之凡作事王之大事諸侯次事卿次事大夫次事上士下事庶子

掌客掌四方賓客之牢禮餼獻飲食之等數與其政治王合諸侯而饗禮則具十有二牢庶具百物備諸侯長十有再獻王巡守殷國則國君膳以牲饋令百官百牲皆具從者三公眡上公之禮卿眡侯伯之禮大夫眡子男之禮士眡諸侯之卿禮庶子壹眡其大夫之禮凡諸侯之禮上公五積皆眡餼牽三問皆脩羣介行人宰史皆有牢餼五牢食四十簋十豆四十錮四十有二壺四十鼎簋十有二牲三十有六皆陳饗餼九牢其死牢如餼之陳牽四牢米百有二十筥醢醢百有二十糝事皆陳車米眡生牢牢十車車乘有五簋車禾眡死牢牢十車車三秬芻薪倍禾皆陳乘禽日九

十雙股膳大牢以及歸三饗三食三燕若弗酌則以幣致之凡介行人宰史皆有殮饗餼以其爵等爲之牢禮之陳數唯上介有禽獻夫人致禮八壺八豆八籩膳大牢致饗大牢食大牢卿皆見以羔膳大牢侯伯四積皆眡殮牽再間皆脩殮四牢食三十有二簠八豆三十有二罍二十有八壺三十有二鼎簋十有二腥二十有七皆陳饗餼七牢其死牢如殮之陳牽三牢米百筥醢醢百饗皆陳米三十車禾四十車芻薪倍禾皆陳乘禽日七十雙股膳大牢三饗再食再燕凡介行人宰史皆有殮饗餼以其爵等爲之禮唯上介有禽獻夫人致禮八壺八豆八籩膳大牢致饗大牢卿皆見以羔膳特牛子男三積皆眡殮牽壹間以脩殮三牢食二十有四簠六豆二十有四罍十有八壺二十有四鼎簋十有二牲十有八皆陳饗餼五牢其死牢如殮之陳牽二牢米八十筥醢醢八十饗皆陳米二十車禾三十車芻薪倍禾皆陳乘禽日五十雙壹饗壹食壹燕凡介行人宰史皆有殮饗餼以其爵等爲之禮唯上介有禽獻夫人致禮六壺六豆六籩膳眡致饗親見卿皆膳特牛凡諸侯之卿大夫士爲國客則如其介之禮以待之凡禮賓客國新殺禮凶荒殺禮札喪殷禮禍裁殺禮在野在

外殺禮凡賓客死致禮以喪用賓客有喪惟芻積之受遭主國之喪不受饗食受牲禮

掌訝掌邦國之等籍以待賓客若將有國賓客至則戒官脩委積與士逆賓于疆爲前驅而入及宿則令聚櫜及委則致積至于國賓入館次于舍門外待事于客及將幣爲前驅至于朝詔其位入復及退亦如之凡賓客之治令訝訝治之凡從者出則使人道之及歸送亦如之凡賓客諸侯有卿訝卿有大夫訝大夫有士訝士皆有訝凡訝者賓客至而往詔相其事而掌其治令

掌交掌以節與幣巡邦國之諸侯及其萬民之所聚者道王之德意志慮使咸知王之好惡辟行之使和諸侯之好達萬民之說掌邦國之通事而結其交好以諭九稅之利九禮之親九牧之維九禁之難九戎之威

掌察闕

掌貨賄闕

朝大夫掌都家之國治日朝以聽國事故以告其君長國有政令則令其朝大夫凡

都家之治於國者必因其朝大夫然後聽之唯大事弗因凡都家之治有不及者則誅其朝大夫在軍旅則誅其有司

都則闕

都士闕

家士闕

冬官考工記

國有六職百工與居一焉或坐而論道或作而行之或審曲而執以飭五材以辨民器或通四方之珍異以資之或飭力以長地財或治絲麻以成之坐而論道謂之王公作而行之謂之士大夫審曲而執以飭五材以辨民器謂之百工通四方之珍異以資之謂之商旅飭力以長地財謂之農夫治絲麻以成之謂之婦功粵無罇燕無函秦無廬胡無弓車粵之無罇也非無罇也夫人而能爲罇也燕之無函也非無函也夫人而能爲函也秦之無廬也非無廬也夫人而能爲廬也胡之無弓車也非無弓車也夫人而能爲弓車也知者創物巧者述之守之世謂之下百工之事皆聖人

之作也燧金以爲刃凝土以爲器作車以行陸作舟以行水此皆聖人之所作也天有時地有氣材有美工有巧合此四者然後可以爲良材美工巧然而不良則不時不得地氣也橘踰淮而北爲枳鸚鵡不踰濟貉踰汶則死此地氣然也鄭之刀宋之斤魯之削吳粵之劍遷乎其地而弗能爲良地氣然也燕之角荆之幹胡之筈吳粵之金錫此材之美者也天有時以生有時以殺草木有時以生有時以死石有時以泐水有時以凝有時以澤此天時也凡攻木之工七攻金之工六攻皮之工五設色之工五刮摩之工五搏埴之工二攻木之工輪輿弓廬匠車梓攻金之工築冶鳧槩段桃攻皮之工函鮑鞞韋裘設色之工畫績鍾筐幪刮摩之工玉柳雕矢磬搏埴之工陶旃有虞氏上陶夏后氏上匠殷人上梓周人上輿故一器而工聚焉者車爲多車有六等之數車軫四尺謂之一等戈秘六尺有六寸旣建而逆崇於軫四尺謂之二等人長八尺崇於戈四尺謂之三等戈長尋有四尺崇於人四尺謂之四等車戟常崇於戈四尺謂之五等酋矛常有四尺崇於戟四尺謂之六等車謂之六等之數凡察車之道必自載於地者始也是故察車自輪始凡察車之道欲其樸屬而微

至不樸屬無以爲完久也不徹至無以爲戚速也輪已崇則人不能登也輪已庳則於馬終古登阨也故兵車之輪六尺有六寸田車之輪六尺有三寸乘車之輪六尺有六寸六尺有六寸之輪軹崇三尺有三寸也加軫與轅焉四尺也人長八尺登下以爲節

輪人爲輪斬三材必以其時三材旣具巧者和之轂也者以爲利轉也輻也者以爲直指也牙也者以爲固抱也輪微三材不失職謂之完望而眡其輪欲其輶爾而下進也進而眡之欲其微至也無所取之取諸圓也望其輻欲其掣爾而纖也進而眡之欲其肉稱也無所取之取諸易直也望其轂欲其眼也進而眡之欲其轉之廉也無所取之取諸急也眡其綆欲其蚤之正也察其菑蚤不齟則輪雖敝不匡凡斬轂之道必矩其陰陽陽也者稭理而堅陰也者疏理而柔是故以火養其陰而齊諸其陽則轂雖敝不齟轂小而長則柞大而短則擊是故六分其輪崇以其一爲之牙圍參分其牙圍而漆其二椹其漆內而中誦之以爲之轂長以其長爲之圍以其圍之防稍其轂五分其轂之長去一以爲賢去三以爲軹容轂必直陳篆必正施膠必厚

施筋必數轉必負幹既摩革色青白謂之穀之善參分其穀長二在外一在內以置其輻凡輻量其鑿深以爲輻廣輻廣而鑿淺則是以大抗雖有良工莫之能固鑿深而輻小則是固有餘而強不足也故竝其輻廣以爲之弱則雖有重任穀不折參分其輻之長而殺其一則雖有深泥亦弗之濼也參分其股圍去一以爲骸圍揉輻必齊平沈必均直以指牙牙得則無槩而固不得則有槩必足見也六尺有六寸之輪經參分寸之二謂之輪之固凡爲輪行澤者欲杼行山者欲侷杼以行澤則是刀以割塗也是故塗不附侷以行山則是搏以行石也是故輪雖敵不輒於鑿凡揉牙外不廉而內不挫旁不腫謂之用火之善是故規之以眡其圓也萬之以眡其匡也縣之以眡其輻之直也水之以眡其平沈之均也量其藪以黍以眡其同也權之以眡其輕重之侷也故可規可萬可水可縣可量可權也謂之國工

輪人爲蓋達常圍三寸程圍倍之六寸信其程圍以爲部廣部廣六寸部長二尺程長倍之四尺者二十分寸之一謂之枚部尊一枚弓鑿廣四枚鑿上二枚鑿下四枚鑿深二寸有半下直二枚鑿端一枚弓長六尺謂之底軹五尺謂之底輪四尺謂之

庇軫參分弓長而揉其一參分其股圍去一以爲蚤圍參分弓長以其一爲之尊上欲尊而宇欲卑上尊而宇卑則吐水疾而霽遠蓋已崇則難爲門也蓋已卑長蔽目也是故蓋崇十尺良蓋弗冒弗絃殷啟而馳不隊謂之圍工

輿人爲車輪崇車廣衡長參如一謂之參稱參分車廣去一以爲隧參分其隧一在前二在後以揉其式以其廣之半爲之式崇以其隧之半爲之較崇六分其廣以一爲之軫圍參分軫圍去一以爲式圍參分式圍去一以爲較圍參分較圍去一以爲軹圍參分軹圍去一以爲轡圍圍者中規方者中矩立者中縣衡者中水直者如生焉繼者如附焉凡居材大與小無并大倚小則摧引之則絕棧車欲奔飾車欲侈轉人爲轉轉有三度軸有三理國馬之轉深四尺有七寸田馬之轉深四尺駕馬之轉深三尺有三寸軸有三理一者以爲嫩也二者以爲久也三者以爲利也軌前十尺而策半之凡任木任正者十分其轉之長以其一爲之圍衡任者五分其長以其一爲之圍小於度謂之無任五分其軫間以其一爲之軸圍十分其轉之長以其一爲之當免之圍參分其免圍去一以爲頸圍五分其頸圍去一以爲踵圍凡揉轉欲

其孫而無弧深今夫大車之轅攀其登又難既克其登其覆車也必易此無故唯轅直且無橈也是故大車平地既節軒攀之任及其登陲不伏其轅必縊其牛此無故唯轅直且無橈也故登陲者倍任者也猶能以登及其下陲也不援其邸必縊其牛後此無故唯轅直且無橈也是故朝欲頌典轉深則折淺則負轉注則利準利準則久和則安轉欲弧而折經而無絕進則與馬謀退則與人謀終日馳騁左不橈行數千里馬不契需終歲御衣衽不敝此唯轉之和也勸登馬力馬力既竭轉猶能一取焉良轉環潛自伏兔不至軌七寸軌中有濶謂之國轉軫之方也以象地也蓋之圓也以象天也輪輻三十以象日月也蓋弓二十有八以象星也龍旂九旂以象大火也鳥旗七旂以象鶉火也熊旗六旂以象伐也龜蛇四旂以象營室也弧旌枉矢以象弧也攻金之工築氏執下齊冶氏軌上齊鬼氏爲聲棗氏爲量段氏爲鑄器桃氏爲刃金有六齊六分其金而錫居一謂之鍾鼎之齊五分其金而錫居一謂之斧斤之齊四分其金而錫居一謂之戈戟之齊參分其金而錫居一謂之大刃之齊五分其金而錫居二謂之削殺矢之齊金錫半謂之鑿燧之齊

築氏爲削長尺博寸合六而成規欲新而無窮敵盡而無惡

冶氏爲殺矢刃長寸圍寸鋌十之重三垓戈廣二寸內倍之胡三之援四之已倨則不入已句則不決長內則折前短內則不疾是故倨句外博重三鈞戟廣寸有半寸內三之胡四之援五之倨句中矩與刺重三鈞

桃氏爲劔臘廣二寸有半寸兩從半之以其臘廣爲之莖圍長倍之中其莖設其後參分其臘廣去一以爲首廣而圍之身長五其莖長重九鈞謂之上制上士服之身長四其莖長重七鈞謂之中制中士服之身長三其莖長重五鈞謂之下制下士服之

鳧氏爲鍾兩欒謂之鈇鈇間謂之于于上謂之鼓鼓上謂之鉦鉦上謂之舞舞上謂之甬甬上謂之衡鍾縣謂之旋旋蟲謂之幹鍾帶謂之篆篆間謂之枚枚謂之景于上之攏謂之隧十分其鈇去二以爲鉦以其鉦爲之鈇間去二分以爲之鼓間以其鼓間爲之舞脩去二分以爲舞廣以其鉦之長爲之甬長以其甬長爲之圍參分其圍去一以爲衡圍參分其甬長二在上一下在下以設其旋薄厚之所震動清濁之所

由出侈奔之所由與有說鍾已厚則石已薄則播侈則柞奔則鬱長甬則震是故大鍾十分其鼓間以其一爲之厚小鍾十分其鉦間以其一爲之厚鍾大而短則其聲疾而短聞鍾小而長則其聲舒而遠聞爲遂六分其厚以其一爲之深而圓之

虞氏爲量改煎金錫則不耗不耗然後權之權之然後準之準之然後量之量之以爲甬深尺內方尺而圓其外其實一誦其臀一寸其實一豆其耳三寸其實一升重一鈞其聲中黃鍾之宮槩而不稅其銘曰時文思素允臻其極嘉量旣成以觀四圍永啟厥後茲器維則凡鑄金之狀金與錫黑濁之氣竭黃白次之黃白之氣竭青白次之青白之氣竭青氣次之然後可鑄也

段氏闕

函人爲甲犀甲七屬兕甲六屬合甲五屬犀甲壽百年兕甲壽二百年合甲壽三百年凡爲甲必先爲容然後制革權其上旅與其下旅而重若一以其長爲之圍凡甲鍛不擊則不堅已敵則橈凡察革之道眡其鑽空欲其窳也眡其裏欲其易也眡其朕欲其直也藥之欲其約也舉而眡之欲其豐也衣之欲其無齡也眡其鑽空而窳

則革堅也。眡其裏而易則材更也。眡其脰而直則制善也。囊之而約則周也。舉之而豐則明也。衣之無餘則變也。

鮑人之事望而眡之。欲其茶白也。進而握之。欲其柔而滑也。卷而搏之。欲其無迪也。眡其著。欲其淺也。察其線。欲其藏也。革欲其茶白而疾澣之。則堅。欲其柔滑而臞脂之。則需。引而信之。欲其直也。信之而直。則取材正也。信之而枉。則是一方緩一方急也。若苟一方緩一方急。則及其用之也。必自其急者先裂。若苟自急者先裂。則是以博爲屨也。卷而搏之而不迪。則厚薄序也。眡其著而淺。則革信也。察其線而藏。則雖斂不類。

鞀人爲臯。陶長六尺。有六寸。左右端廣六寸。中尺厚三寸。穹者三之一。上三正。鼓長八尺。鼓四尺。中圍加三之一。謂之鼗。鼓爲臯。鼓長尋。有四尺。鼓四尺。倨句。擊折。凡冒鼓。必以啟。蟄之日。良鼓。瑕如積環。鼓大而短。則其聲疾。而短聞。鼓小而長。則其聲舒。而遠聞。

韋氏闕

裘氏闕

畫績之事雜五色東方謂之青南方謂之赤西方謂之白北方謂之黑天謂之玄地謂之黃青與白相次也赤與黑相次也玄與黃相次也青與赤謂之文赤與白謂之章白與黑謂之黼黑與青謂之黻五采備謂之繡土以黃其象方天時變火以圓山以章水以龍鳥獸蛇雜四時五色之位以章之謂之巧凡畫績之事後素功

鍾氏染羽以朱洪丹秣三月而熾之淳而漬之三入爲縹五入爲緞七入爲緇筐人闕

幌氏凍絲以澆水漚其絲七日去地尺暴之晝暴諸日夜宿諸井七日七夜是謂水凍凍帛以欄爲灰渥淳其帛實諸澤器淫之以蜃清其灰而盥之而揮之而沃之而盥之而塗之而宿之明日沃而盥之晝暴諸日夜宿諸井七日七夜是謂水凍

玉人之事鎮圭尺有二寸天子守之命圭九寸謂之桓圭公守之命圭七寸謂之信圭侯守之命圭七寸謂之躬圭伯守之天子執冒四寸以朝諸侯天子用全上公用龍侯用瓚伯用將繼子男執皮帛天子圭中必四圭尺有二寸以祀天大圭長三尺

柎上終葵首天子服之土圭尺有五寸以致日以土地祿圭尺有二寸有瓚以祀廟
琬圭九寸而縹以象德琮圭九寸判規以除慝以易行璧羨度尺好三寸以爲度圭
璧五寸以祀日月星辰璧琮九寸諸侯以享天子穀圭七寸天子以聘女大璋中璋
九寸邊璋七寸射四寸厚寸黃金勺青金外朱中鼻寸衡四寸有纁天子以巡守宗
祝以前馬大璋亦如之諸侯以聘女琮圭璋八寸璧琮八寸以覲聘牙璋中璋七寸
射二寸厚寸以起軍旅以治兵守駟琮五寸宗后以爲權大琮十有二寸射四寸厚
寸是謂內鎮宗后守之駟琮七寸鼻寸有半寸天子以爲權兩圭五寸有邸以祀地
以旅四望琮琮八寸諸侯以享夫人案十有二寸棗棗十有二列諸侯純九大夫純
五夫人以勞諸侯璋邸射素功以祀山川以致稍餼

柳人闕

雕人闕

磬氏爲磬倨句一矩有半其博爲一股爲二鼓爲三參分其股博去一以爲鼓博參
分其鼓博以其一爲之厚已上則摩其旁已下則摩其端

矢人爲矢鏃矢參分第矢參分一在前二在後兵矢田矢五分二在前三在後殺矢七分三在前四在後參分其長而殺其一五分其長而羽其一以其筭厚爲之羽深水之以辨其陰陽夾其陰陽以設其比夾其比以設其羽參分其羽以設其刃則雖有疾風亦弗之能憚矣刃長寸圍寸銚十之重三垞前弱則俛後弱則翔中弱則紆中強則揚羽豐則遲羽殺則捷是故夾而搖之以眡其豐殺之節也橈之以眡其鴻殺之稱也凡相筭欲生而搏同搏欲重同重節欲疏同疏欲舉

陶人爲甗實二鬴厚半寸脣寸盆實二鬴厚半寸脣寸甗實二鬴厚半寸脣寸七穿高實五穀厚半寸脣寸庾實二穀厚半寸脣寸

瓶人爲簋實一穀崇尺厚半寸脣寸豆實三而成穀崇尺凡陶瓶之事鬻壘薛暴不入市器中膊豆中縣膊崇四尺方四寸

梓人爲筍箠天下之大獸五脂者羸者羽者鱗者宗廟之事脂者膏者以爲牲羸者羽者鱗者以爲筍處外骨內骨卻行仄行連行紆行以脰鳴者以注鳴者以旁鳴者以翼鳴者以股鳴者以胷鳴者謂之小蟲之屬以爲雕琢厚脣弁口出目短耳

大胸燿後大體短脰若是者謂之羸屬恒有力而不能走其聲大而宏有力而不能走則於任重宜大聲而宏則於鍾宜若是者以爲鍾虞是飲擊其所縣而由其虞鳴銳喙決吻數目顯脰小體奮腹若是者謂之羽屬恒無力而輕其聲清陽而遠聞無力而輕則於任輕宜其聲清陽而遠聞於磬宜若是者以爲磬虞故擊其所縣而由其虞鳴小首而長搏身而鴻若是者謂之鱗屬以爲筍凡攬網援簪之類必深其爪出其目作其鱗之而深其爪出其目作其鱗之而則於甌必撥爾而怒苟撥爾而怒則於任重宜且其匪色必似鳴矣爪不深目不出鱗之而不作則必贄爾如委矣苟贄爾如委則加任焉則必如將廢措其匪色必似不鳴矣

梓人爲飲器勺一升爵一升觚三升獻以爵而酬以觚一獻而三酬則一豆矣食一豆肉飲一豆酒中人之食也凡試梓飲器鄉衡而實不盡梓師罪之

梓人爲侯廣與崇方參分其廣而鵠居一焉上兩個與其身三下兩個半之上綱與下綱出舌尋縷寸焉張皮侯而棲鵠則春以功張五采之侯則遠國屬張獸侯則王以息燕祭侯之禮以酒脯醢其辭曰惟若寧侯母或若女不寧侯不屬于王所故抗

而射女強飲強食詒女曾孫諸侯百福

廬人爲廬器戈秘六尺有六寸爰長尋有四尺車戟常曾矛常有四尺夷矛三尋凡兵無過三其身過三其身弗能用也而無已又以害人故攻國之兵欲短守國之兵欲長攻國之人衆行地遠食飲飢且涉山林之阻是故兵欲短守國之人寡食飲飽行地不遠且不涉山林之阻是故兵欲長凡兵旬兵欲無彈刺兵欲無蝟是故旬兵棁刺兵擗毆兵同強舉圍欲細細則校刺兵同強舉圍欲重重欲傳人傳人則密是故侵之凡爲爰五分其長以其一爲之被而圍之參分其圍去一以爲晉圍五分其晉圍去一以爲首圍凡爲曾矛參分其長二在前一在後而圍之五分其圍去一以爲晉圍參分其晉圍去一以爲刺圍凡試廬事置而搖之以眡其蝟也灸諸牆以眡其椽之均也橫而搖之以眡其勁也六建旣備車不反覆謂之國工

匠人建國水地以縣置槷以縣眡以景爲規識日出之景與日入之景畫參諸日中之景夜考之極星以正朝夕

匠人營國方九里旁三門國中九經九緯經涂九軌左祖右社面朝後市市朝一夫

夏后氏世室堂脩二七廣四脩一五室三西步西三尺九階四旁兩夾窻白盛門堂三之二室三之一殿人重屋堂脩七尋堂崇三尺四阿重屋周人明堂度九尺之筵東西九筵南北七筵堂崇一筵五室凡室二筵室中度以凡堂上度以筵宮中度以尋野度以步涂度以軌廟門容大扇七個闌門容小扇參個路門不容乘車之五個應門二徹參個內有九室九嬪居之外有九室九卿朝焉九分其國以爲九分九卿治之王宮門阿之制五雉宮隅之制七雉城隅之制九雉經涂九軌環涂七軌野涂五軌門阿之制以爲都城之制宮隅之制以爲諸侯之城制環涂以爲諸侯經涂野涂以爲都經涂

匠人爲溝洫耜廣五寸二耜爲耦一耦之伐廣尺深尺謂之畝田首倍之廣二尺深二尺謂之遂九夫爲井井間廣西尺深西尺謂之溝方十里爲成成間廣八尺深八尺謂之洫方百里爲同同間廣二尋深二仞謂之澮專達於川各載其名凡天下之地執兩山之間必有川焉大川之上必有涂焉凡溝逆地防謂之不行水屬不理孫謂之不行梢溝三十里而廣倍凡行奠水磬折以參伍欲爲淵則句於矩凡溝必因

水執防必因地執善溝者水漱之善防者水淫之凡爲防廣與崇方其綱參分去一大防外綱凡溝防必一日先深之以爲式里爲式然後可以傳衆力凡任索約大汲其版謂之無任葺屋參分瓦屋四分困窳倉城逆牆六分堂涂十有二分竇其崇三尺牆厚三尺崇三之

車人之事半矩謂之宜一宜有半謂之櫪一櫪有半之柯一柯有半謂之磬折

車人爲耒庇長尺有一寸中直者三尺有三寸上句者二尺有二寸自其庇緣其外以至於首以弦其內六尺有六寸與步相中也堅地欲直庇柔地欲句庇直庇則利推句庇則利發倨句磬折謂之中地

車人爲車柯長三尺博三寸厚一寸有半五分其長以其一爲之首轂長半柯其圍一柯有半輻長一柯有半其博三寸厚三之一渠三柯者三行澤者欲短轂行山者欲長轂短轂則利長轂則安行澤者反轆行山者仄轆反轆則易仄轆則完六分其輪崇以其一爲之牙圍柏車轂長一柯其圍二柯其輻一柯其渠二柯者三五分其輪崇以其一爲之牙圍大車崇三柯綆寸牝服二柯有參分柯之二羊車二柯有參

分柯之一柏車二柯凡爲轅三其輪崇參分其長二在前一在後以鑿其鈎徹廣六尺兩長六尺

弓人爲弓取六材必以其時六材既聚巧者和之幹也者以爲遠也角也者以爲疾也筋也者以爲深也膠也者以爲和也絲也者以爲固也漆也者以爲受霜露也凡取幹之道七柘爲上楸次之檟桑次之橘次之木瓜次之荆次之竹爲下凡相幹欲赤黑而陽聲赤黑則鄉心陽聲則遠根凡析幹射遠者用執射深者用直居幹之道菑栗不弛則弓不發凡相角秋纒者厚春纒者薄穉牛之角直而澤老牛之角終而昔疾疾險中瘠牛之角無澤角欲青白而豐末夫角之末蹙於剗而休於氣是故柔故欲其執也白也者執之徵也夫角之中恒當弓之畏畏也者必橈橈故欲其堅也青也者堅之徵也夫角之末遠於剗而不休於氣是故脆脆故欲其柔也豐末也者柔之徵也角長二尺有五寸三色不失理謂之牛戴牛凡相膠欲朱色而昔昔也者深瑕而澤紵而搏廉鹿膠青白馬膠赤白牛膠火赤鼠膠黑魚膠餌犀膠黃凡呢之類不能方凡相筋欲小簡而長大結而澤小簡而長大結而澤則其爲獸必剗以

爲弓則豈異於其獸筋欲敵之敵漆欲測絲欲沈得此六材之全然後可以爲良凡爲弓冬析幹而春液角夏治筋秋合三材寒奠體冰析滑冬析幹則易春液角則合夏治筋則不煩秋合三材則合寒奠體則張不流冰析滑則審環春被弦則一年之事析幹必倫析角無邪斷目必茶斷目不茶則及其大脩也筋代之受病夫目也者必強強者在內而摩其筋夫筋之所由瞻恒由此作故角三液而幹再液厚其幫則木堅薄其幫則需是故厚其液而節其幫約之不皆約疏數必侷斲擊必中膠之必均斲擊不中膠之不均則及其大脩也角代之受病夫懷膠於內而摩其角夫角之所由挫恒由此作凡居角長者以次需恒角而短是謂逆機引之則縱釋之則不校桓角而達譬如終繼非弓之利也今夫菱解中有變焉故校於挺臂中有柎焉故剽恒角而達引如終繼非弓之利橋幹欲執於火而無羸橋角欲執於火而無燬引筋欲盡而無傷其力鬻膠欲執而水火相得然則居旱亦不動居濕亦不動苟有賤工必因角幹之濕以爲之柔善者在外動者在內雖善於外必動於內雖善亦弗可以爲良矣凡爲弓方其峻而高其柎長其畏而薄其敵宛之無已應下柎之弓末應將

輿爲柁而發必動於綱弓而羽綱末應將發弓有六材焉維幹弦之張如流水維體防之引之中參維角常之欲宛而無負弦引之如環釋之無失體如環材美工巧爲之時謂之參均角不勝幹幹不勝筋謂之參均量其力有三均均者三謂之九和九和之弓角與幹權筋三侷膠三鈞絲三邸漆三剡上工以有餘下工以不足爲天子之弓合九而成規爲諸侯之弓合七而成規大夫之弓合五而成規士之弓合三而成規弓長六尺有六寸謂之上制上士服之弓長六尺有三寸謂之中制中士服之弓長六尺謂之下制下士服之凡爲弓各因其君之躬志慮血氣豐肉而短寬緩以荼若是者爲之危弓危弓爲之安矢骨直以立忿執以奔若是者爲之安弓安弓爲之危矢其人安其弓安其矢安則莫能以速中且不深其人危其弓危其矢危則莫能以愿中往體多來體寡謂之夾臬之屬利射侯與弋往體寡末體多謂之王弓之屬利射革與質往體來體若一謂之唐弓之屬利射深大和無濇其次筋角皆有濇而深其次有濇而疏其次角無濇合濇若背手文角環濇牛筋黃濇藥筋斥蠖濇和弓轂摩覆之而角至謂之句弓覆之而幹至謂之侯弓覆之而筋至謂之深弓 終

儀禮

士冠禮

士冠禮筮于席門主人玄冠朝服緇帶素鞶卽位于門東西面有司如主人服卽位于西方東面北上筮與席所卦者具饌于西塾布席于門中闈西闈外西面筮人執筴抽上韝兼執之進受命于主人宰自右少退贊命筮人許諾右還卽席坐西面卦者在左卒筮書卦執以示主人主人受眡反之筮人還東面旅占卒進告吉若不吉則筮遠日如初儀徹筮席宗人告事畢主人戒賓賓禮辭許主人再拜賓荅拜主人退賓拜送前期三日筮賓如求日之儀乃宿賓賓如主人服出門左西面再拜主人東面荅拜乃宿賓賓許主人再拜賓荅拜主人退賓拜送宿贊冠者一人亦如之厥明夕爲期于席門之外主人立于門東兄弟在其南少退西面北上有司皆如宿服立于西方東面北上擯者請期宰告曰質明行事告兄弟及有司告事畢擯者告期于賓之家夙興設洗直于東榮南北以堂深水在洗東

陳服于房中西墉下東領北上爵弁服纁裳純衣緇帶鞶韠韠皮弁服素積緇帶素鞶

玄端玄裳黃裳雜裳可也緇帶爵鞶緇布冠缺項青組纓屬于缺緇纓廣終幅長六尺皮弁笄爵弁笄緇組紘纁邊同篋櫛實于篋蒲筵二在南側尊一顛醴在服北有篋實勺觶角柶脯醢南上爵弁皮弁緇布冠各一匱執以待于西坫南南面東上賓升則東面主人玄端爵鞶立于阼階下直東序西面兄弟畢袵玄立于洗東西面北上摺者玄端負東塾將冠者采衣紒在房中南面賓如主人服贊者玄端從之立于外門之外摺者告主人迎出門左西面再拜賓荅拜主人揖贊者與賓揖先入每曲揖至于席門揖入三揖至于階三讓主人升立于序端西面賓西序東面贊者盥于洗西升立于房中西面南上主人之贊者筵于東序少北西面將冠者出房南面贊者奠纁笄櫛于筵南端賓揖將冠者將冠者卽筵坐贊者坐櫛設纁賓降主人降賓辭主人對賓盥卒登揖壹讓升主人升復初位賓筵前坐正纁興降西階一等執冠者升一等東面授賓賓右手執項左手執前進容乃祝坐如初乃冠興復位贊者卒冠者與賓揖之適房服玄端爵鞶出房南面賓揖之卽筵坐櫛設笄賓盥正纁如初降二等受皮弁右執項左執前進祝加之如初復位贊者卒紘興賓揖之適房服素

積素鞞容出房南面賓降三等受爵弁加之服纁裳鞞鞞其他如加皮弁之儻徹皮弁冠櫛筵入于房筵于戶西南面贊者洗于房中側酌醴加柶覆之面葉賓揖冠者就筵筵西南面賓受醴于戶東加柶面枋筵前北面冠者筵西拜受鞞賓東面荅拜薦脯醢冠者卽筵坐左執鞞右祭脯醢以柶祭醴三興筵末坐啐醴建柶興降筵坐奠鞞拜執鞞興賓荅拜冠者奠鞞于薦東降筵北面坐取脯降自西階適東壁北面見于母母拜受子拜送母又拜賓降直西序東面主人降復初位冠者立于面階東南面賓字之冠者對賓出主人送于厠門外請醴賓禮辭許賓就次冠者見於兄弟兄弟再拜冠者荅拜見贊者西面拜亦如之入見姑姑如見母乃易服服玄冠玄端爵鞞奠摯見於君遂以摯見於鄉大夫鄉先生乃醴賓以壹獻之禮主人酬賓東帛儻皮贊者皆與贊冠者爲介賓出主人送于外門外再拜歸賓俎

若不醴則醴用酒尊于房戶之間兩甔有禁玄酒在西如勺南枋洗有篚在西南順始加醴用脯醢賓降取爵子篚辭降如初卒洗升酌冠者拜受賓荅拜如初冠者升筵坐左執爵右祭脯醢祭酒興筵末坐啐酒降筵拜賓荅拜冠者奠爵于薦東立于

筵西徹薦爵筵尊不徹加皮弁如初儀再醮攝酒其他皆如初加爵弁如初儀三醮有乾肉折俎噉之其他如初北面取脯見于母若殺則特豚載合升離肺實于鼎設局冪始醮如初再醮兩豆葵菹羸醢兩簋栗脯三醮攝酒如再醮加俎噉之皆如初噉肺卒醮取籩脯以降如初若孤子則父兄戒宿冠之日主人紛而迎賓拜揖讓立于序端皆如冠主禮於阼凡拜北面于阼階上賓亦北面于西階上荅拜若殺則舉鼎陳於門外直東塾北面若庶子則冠于房外南面遂醮焉冠者母不在則使人受脯于西階下戒賓曰某有子某將加布於其首願吾子之教之也賓對曰某不敏恐不能共事以病吾子敢辭主人曰某猶願吾子之終教之也賓對曰吾子重有命某敢不從宿曰某將加布於某之首吾子將莅之敢宿賓對曰某敢不夙興始加祝曰令月吉日始加元服棄爾幼志順爾成德壽考惟祺介爾景福再加曰吉月令辰乃申爾服敬爾威儀淑慎爾德眉壽萬年永受胡福三加曰以歲之正以月之令咸加爾服兄弟具在以成厥德黃耆無疆受天之慶醴辭曰甘醴惟厚嘉薦令芳拜受祭之以定爾祥承天之休壽考不忘醴辭曰旨酒既清嘉薦賔時始加元服兄弟具來

孝友時格永乃保之再醮曰旨酒既滑嘉薦伊脯乃申爾服禮儀有序祭此嘉爵承天之祐三醮曰旨酒令芳籩豆有楚咸加爾服肴升折俎承天之慶受福無疆字辭曰禮儀既備令月吉日昭告爾字爰字孔嘉髦士攸宜宜之于假永受保之曰伯某甫仲叔季唯其所當屨夏用葛玄端黑屨青絢纁純純博寸素積白屨以魁桴之縉絢纁純純博寸爵弁纁屨黑絢纁純純博寸冬皮屨可也不屨總服記冠義始冠縉布之冠也大古冠布齊則緇之其綏也孔子曰吾未之聞也冠而敝之可也適子冠於阼以著代也醮於客位加有成也三加彌尊論其志也冠而字之敬其名也委貌周道也章甫殷道也毋追夏后氏之道也周弁殷尋夏收三王共皮弁素積無大夫冠禮而有其昏禮古者五十而后爵何大夫冠禮之有公侯之有冠禮也夏之末造也天子之元子猶士也天下無生而貴者也繼世以立諸侯象賢也以官爵人德之殺也死而諡今也古者生無爵死無諡

士昏禮

昏禮下達納采用鴈主人筵于戶而西上右几使者玄端至擯者出請事入告主人

如賓服迎于門外再拜賓不荅拜揖入至于廟門揖入三揖至于階三讓主人以賓升西面賓升西階當阿東面致命主人阼階上北面再拜授于楹間南面賓降出主人降授老鷹擯者出請賓執鴈請問名主人許賓入授如初禮擯者出請賓告事畢入告出請醴賓賓禮辭許主人徹几改筵東上側尊飯醴于房中主人迎賓於席門外揖讓如初升主人北面再拜賓西階上北面荅拜主人拂几授校拜送賓以几辟北面設于坐左之西階上荅拜贊者酌醴加角柶面葉出于房主人受醴面枋筵前西北面賓拜受醴復位主人阼階上拜送贊者薦脯醢賓卽筵坐左執解祭脯醢以柶祭醴三西階上北面坐啐醴建柶與坐奠解遂拜主人荅拜賓卽筵奠于薦左降筵北面坐取脯主人辭賓降授人脯出主人送于門外再拜納吉用薦如納采禮納徵玄纁束帛儷皮如納吉禮請期用鴈主人辭賓許告期如納徵禮期初昏陳三鼎于寢門外東方北面上其實特豚合升去蹄舉肺脊二祭肺二魚十有四腊一醢醢不升皆飪設扁廝設洗于阼階東南饌于房中醢醬二豆菹醢四豆兼巾之黍稷四敦皆蓋大羹滫在饗尊于室中北墉下有禁玄酒在西綌罍加勺在南枋尊于房

戶之東無玄酒饌在南實四爵合盞主人爵弁纁裳緇袍從者舉玄端乘墨車從車
二乘執燭前馬婦車亦如之有褻至于門外主人筵于戶西西上右几

女次純衣纁褌立于房中南面姆纁笄宵衣在其右女從者舉袵玄纁笄被纁繡在
其後主人玄端迎于門外西面再拜賓東面荅拜主人揖人賓執鷹從至于席門揖
入三揖至于階三讓主人升西面賓升北面奠鷹再拜稽首降出婦從降自西階主
人不降送壻御婦車授綏姆辭不受婦乘以几姆加景乃驅御者代壻乘其車先俟
于門外婦至主人揖婦以入及寢門揖入升自西階媵布席于奧夫入于室卽席婦
尊西南面媵御沃盥交贊者徹尊罍舉者盥出除罍舉鼎人陳于阼階南西面北上
匕俎從設北面載執而俟匕者逆退復位于門東北面西上贊者設醬于席前菹醢
在其北俎入設于豆東魚次腊特于俎北贊設黍于醬東稷在其東設滫于醬南設
對醬于東菹醢在其南北上設黍于腊北其西稷設滫于醬北御布對席贊啟會卻
于敦南對敦于北贊告具揖婦卽對筵皆坐皆祭薦黍稷肺贊爾黍授肺脊皆食
以滫醬皆祭舉食舉也三飯卒食贊洗爵酌醕主人主人拜受贊戶內北面荅拜醕

婦亦如之皆祭贊以肝從皆振祭臍肝皆實于菹豆卒爵皆拜贊荅拜受爵再醕如初無從三醕用盥亦如之贊洗爵酌于戶外尊入戶西北面奠爵拜皆荅拜坐祭卒爵拜皆荅拜興主人出婦復位乃徹于房中如設于室尊否主人說服于房媵受婦說服于室御受姆授巾御衽于奧媵衽良席在東皆有枕北止主人人親說婦之纓燭出媵餼主人之餘御餼婦餘贊酌外尊醕之媵侍于戶外呼則聞夙興婦沐浴纒笄宵衣以俟見賓明贊見婦于舅姑席于阼舅卽席席于房外南面姑卽席婦執笄棗栗自門入升自西階進拜奠于席舅坐撫之興荅拜婦還又拜降階受笄媵脩升進北面拜奠于席姑坐舉以興拜授人贊醴婦席于戶牖間側尊甝醴于房中婦疑立于席西贊者酌醴加枓而枋出房席前北面婦東面拜受贊西階上北面拜送婦又拜薦脯醢婦升席左執解右祭脯醢以柶祭醴三降席東面坐啐醴建柶興拜贊荅拜婦又拜奠于薦東北面坐取脯降出授人于門外舅姑入于室婦盥饋特豚合升側載無魚腊無稷並南上其他如取女禮婦贊成祭卒食一醕無從席于北墉下婦徹設席前如初西上婦餼舅辭易醬婦餼姑之饌御贊祭豆黍肺舉肺脊乃食卒

姑醕之婦拜受姑拜送坐祭卒爵姑受奠之婦徹于房中媵御餞姑醕之雖無媵媵先於是與始飯之錯舅姑共饗婦以一獻之禮舅洗于南洗姑洗于北洗奠酬舅姑先降自西階婦降自阼階婦俎于婦氏人舅饗送者以一獻之禮酬以束錦姑饗婦人送者酬以束錦若異邦則贈丈夫送者以束錦

若舅姑既沒則婦入三月乃奠菜席于席與東面右几席于北方南面祝盥婦盥于門外婦執筭菜祝帥婦以入祝告稱婦之姓曰某氏來婦敢奠嘉菜于皇舅某子婦拜扱地坐奠菜于几東席上還又拜如初婦降堂取筭菜入祝曰某氏來婦敢告于皇姑某氏奠菜于席如初禮婦出祝闔牖戶老醕婦于房中南面如舅姑醕婦之禮壻饗婦送者丈夫婦人如舅姑饗禮記士昏禮凡行事必用昏昕受諸廟廟辭無不腆無辱擊不用死皮帛必可制腊必用鮮魚用鮓必殺全女子許嫁筭而醕之稱字祖席未毀教于公宮三月若祖廟已毀則教于宗室問名主人受鴈還西面對賓受命乃降祭醕始扱壹祭又扱再祭賓右取脯左奉之乃歸執以反命納徵執皮攝之內文兼執足左首隨入西上參分庭一在南賓致命釋外足見文主人受幣士受皮

者自東出于後自左受遂坐攝皮逆退適東壁父醴女而俟迎者毋南面于房外女出于母左父西面戒之必有正焉若衣若笄毋戒諸西階上不降婦乘以几從者二人坐持几相對婦入寢門贊者徹尊罍酌玄酒三屬于尊棄餘水于堂下階閒加勺笄緇被纒裏加于橋舅荅拜宰徵笄婦薦饌于房饗婦姑薦焉婦洗在北堂直室東隅篋在東北面盥婦酢舅更爵自薦不敢辭洗舅降則辟子房不敢拜洗凡婦人相饗無降婦入三月然後祭行庶婦則使人醮之婦不饋昏辭曰吾子有惠貺室某也某有先人之禮使某也請納采對曰某之子蠢愚又弗能教吾子命之某不敢辭致命曰敢納采問名曰某既受命將加諸卜敢請女爲誰氏對曰吾子有命且以儷數而擇之某不敢辭醴曰子爲事故至於某之室某有先人之禮請醴從者對曰某既得將事矣敢辭先人之禮敢固以請某辭不得命敢不從也納吉曰吾子有貺命某加諸卜占曰吉使某也敢告對曰某之子不教唯恐弗堪子有吉我與在某不敢辭納徵曰吾子有嘉命貺室某也某有先人之禮儷皮束帛使某也請納徵致命曰某敢納徵對曰吾子順先典貺某重禮某不敢辭敢不承命請期曰吾子有賜命某

既申受命矣惟是三族之不虞使某也請吉日對曰某既前受命矣唯命是聽曰某命某聽命于吾子對曰某固唯命是聽使者曰某使某受命吾子不許某敢不告期曰某日對曰某敢不敬須凡使者歸反命曰某既得將事矣敢以禮告主人曰聞命矣父醮子命之曰往迎爾相承我宗事勗帥以敬先妣之嗣若則有常子曰諾唯恐弗堪不敢忘命賓至擯者請對曰吾子命某以茲初昏使某將請承命對曰某固敬具以須父送女命之曰戒之敬之夙夜母違命母施衿結帨曰勉之敬之夙夜無違宮事庶母及門內施鞶巾之以父母之命命之曰敬恭聽宗爾父母之言夙夜無愆視諸衿鞶壻授綏姆辭曰未教不足與爲禮也宗子無父母命之親皆沒已躬命之支子則稱其宗弟稱其兄若不親迎則婦入三月然後壻見曰某以得爲外昏姻請覲主人對曰某以得爲外昏姻之數某之子未得灌溉於祭祀是以未敢見今吾子辱請吾子之就宮某將走見對曰某以非他故不足以辱命請終賜見對曰某得以爲昏姻之故不敢固辭敢不從主人出門左西面壻入門東面奠摯再拜出擯者以摯出請受壻禮辭許受摯入主人再拜受壻再拜送出見主婦主婦闔扉立于其內

壻立于門外東面主婦一拜壻荅再拜主婦又拜壻出主人請醴及揖讓入醴以一獻之禮主婦薦奠酬無幣壻出主人送再拜

士相見禮

士相見之禮摯冬用雉夏用脰左頭奉之曰某也願見無由達某子以命命某見主人對曰某子命某見吾子有辱請吾子之就家也某將走見賓對曰某不足以辱命請終賜見主人對曰某不敢爲儀固請吾子之就家也某將走見賓對曰某不敢爲儀固以請主人對曰某也固辭不得命將走見聞吾子請摯敢辭摯賓對曰某不以摯不敢見主人對曰某不足以習禮敢固辭賓對曰某也不依於摯不敢見固以請主人對曰某也固辭不得命敢不敬從出迎于門外再拜賓荅再拜主人揖入門右賓奉摯入門左主人再拜受賓再拜送摯出主人請見賓反見退主人送于門外再拜主人復見之以其摯曰鼎者吾子辱使某見請還摯於將命者主人對曰某也既得見矣敢辭賓對曰某也非敢求見請還摯子將命者主人對曰某也既得見矣敢固辭賓對曰某不敢以聞固以請於將命者主人對曰某也固辭不得命敢不從賓

奉摯入主人再拜受賓再拜送摯出主人送于門外再拜士見於大夫終辭其摯於其入也一拜其辱也賓退送再拜若嘗爲臣者則禮辭其摯曰某也辭不得命不敢固辭賓入奠摯再拜主人荅壹拜賓出使擯者還其摯于門外曰某也使某還摯賓對曰某也既得見矣敢辭擯者對曰某也命某某非敢爲儀也敢以請賓對曰某也夫子之賤私不足以踐禮敢固辭擯者對曰某也使某不敢爲儀也固以請賓對曰某固辭不得命敢不從再拜受下大夫相見以鷹飾之以布維之以索如執雉上大夫相見以羔飾之以布四維之結于面左頭如麇執之如士相見之禮始見于君執摯至下容彌盛庶人見於君不爲容進退走士大夫則奠摯再拜稽首君荅壹拜若他邦之人則使擯者還其摯曰寡君使某還摯賓對曰君不有其外臣臣不敢辭再拜稽首受凡燕見于君必辯君之南面若不得則正方不疑君君在堂升見無方階辯君所在凡言非對也妥而後傳言與君言言使臣與大人言言事君與老者言言使弟子與幼者言言孝弟於父兄與衆言言忠信慈祥與居官者言言忠信凡與大人言始視面中視抱卒視面毋改衆皆若是若父則遊目毋上於面毋下於帶若不

言立則視足坐則視膝凡侍坐於君子君子欠伸問日之早晏以食具告改居則請退可也夜侍坐問夜膳董請退可也若君賜之食則君祭先飯徧當膳飲而俟君命之食然後食若有將食者則俟君之食然後食若君賜之爵則下席再拜稽首受爵升席祭卒爵而俟君卒爵然後授虛爵退坐取屨隱辟而后屨君爲之興則曰君無爲興臣不敢辭君若降送之則不敢顧辭遂出大夫則辭退下比及門三辭若先生異爵者請見之則辭辭不得命則曰某以出見辭不得命將走見先見之非以君命使則不稱寡大夫士則曰寡君之老凡執幣者不趨容彌蹙以爲儀執玉者則唯舒武舉前曳踵凡自稱於君士大夫則曰下臣宅者在邦則曰市井之臣在野則曰草茅之臣庶人則曰刺草之臣他國之人則曰外臣

鄉飲酒禮

鄉飲酒之禮主人就先生而謀賓介主人戒賓賓拜辱主人荅拜乃請賓賓禮辭許主人再拜賓荅拜主人退賓拜辱介亦如之乃席賓主人介衆賓之席皆不屬焉尊兩壺于房戶閒斯禁有玄酒在西設籩于禁南東肆加二勺于兩壺設洗于阼階東

南南北北以堂深東西當東榮水在洗東篋在洗西南肆鑿定主人速賓賓拜辱主人
荅拜還賓拜辱介亦如之賓及衆賓皆從之主人一相迎于門外再拜賓賓荅拜拜
介介荅拜揖衆賓主人揖先入賓厭介入門左介厭衆賓入衆賓皆入門左北上主
人與賓三揖至于階三讓主人升賓升主人阼階上當楣北面再拜賓面階上當楣
北面荅拜主人坐取爵于篋降洗賓降主人坐奠爵于階前辭賓對主人坐取爵與
適洗南面坐奠爵于篋下盥洗賓進東北面辭洗主人坐奠爵于篋與對賓復位當
西序東面主人坐取爵沃洗者西北面卒洗主人壹揖壹讓升賓拜洗主人坐奠爵
遂拜降盥賓降主人辭賓對復位當西序卒盥揖讓升賓西階上疑立主人坐取爵
實之賓之席前西北面獻賓賓西階上拜主人少退賓進受爵以復位主人阼階上
拜送爵賓少退薦脯醢賓升席自西方乃設折俎主人阼階東疑立賓坐左執爵祭
脯醢奠爵于薦西與右手取肺卻左手執本坐弗繚右絕末以祭尚左手嘑之興加
于俎坐挽手遂祭酒興席末坐啐酒降席坐奠爵拜告言執爵興主人阼階上荅拜
賓西階上北面坐卒爵興坐奠爵遂拜執爵興主人阼階上荅拜

賓降洗主人降賓坐奠爵興辭主人對賓坐取爵適洗南北面主人阼階東南面辭
洗賓坐奠爵于篚興對主人復阼階東西面賓東北面盥坐取爵卒洗揖讓如初升
主人拜洗賓荅拜興降盥如主人禮賓實爵主人之席前東南面酢主人主人阼階
上拜賓少退主人進受爵復位賓西階上拜送爵薦脯醢主人升席自北方設折俎
祭如賓禮不告言自席前適阼階上北面坐卒爵興坐奠爵遂拜執爵興賓西階上
荅拜主人坐奠爵于序端阼階上北面再拜崇酒賓西階上荅拜主人坐取解于篚
降洗賓降主人辭降賓不辭洗立當西序東面卒洗揖讓升賓西階上疑立主人實
解酬賓阼階上北面坐奠解遂拜執解興賓西階上荅拜坐祭遂飲卒解興坐奠解
遂拜執解興賓西階上荅拜主人降洗賓降辭如獻禮升不拜洗賓西階上立主人
實解賓之席前北面賓西階上拜主人少退卒拜進坐奠解于薦西賓辭坐取解復
位主人阼階上拜送賓北面坐奠解于薦東復位主人揖降賓降立于階西當序東
面主人以介揖讓升拜如賓禮主人坐取爵于東序端降洗介降主人辭降介辭洗
如賓禮升不拜洗介西階上立主人實爵介之席前西南面獻介介西階上北面拜

主人少退介進北面受爵復位主人介右北面拜送爵介少退主人立于西階東薦脯醢介升席自北方設折俎祭如賓禮不噴肺不啐酒不告言自南方降席北面坐卒爵興坐奠爵遂拜執爵興主人介右荅拜介降洗主人復阼階降辭如初卒洗主人盥介揖讓升授主人爵于兩楹之間介西階上立主人實爵酢于西階上介右坐奠爵遂拜執爵興介荅拜主人坐祭遂飲卒爵興坐奠爵遂拜執爵興介荅拜主人坐奠爵于西楹南介右再拜崇酒介荅拜主人復阼階揖降介降立于賓南主人西南面三拜衆賓衆賓皆荅拜主人揖升坐取爵于西楹下降洗升實爵于西階上獻衆賓衆賓之長升拜受者三人主人拜送坐祭立飲不拜既爵授主人爵降復位衆賓獻則不拜受爵坐祭立飲每一人獻則薦諸其席衆賓辯有脯醢主人以爵降奠于篚揖讓升賓厭介升介厭衆賓升衆賓序升卽席一人洗升舉觶于賓實觶西階上坐奠觶遂拜執觶興賓席末荅拜坐祭遂飲卒觶興坐奠觶遂拜執觶興賓荅拜降洗升實觶立于西階上賓拜進坐奠觶于薦西賓辭坐受以興舉觶者西階上拜送賓坐奠觶于其所舉觶者降設席于堂廉東上工西人二瑟瑟先相者二人皆

左何瑟後首掩越內弦右手相樂正先升立于面階東工入升自西階北面坐相者東面坐遂授瑟乃降工歌鹿鳴四牡皇皇者華卒歌主人獻工工左瑟一人拜不興受爵主人阼階上拜送爵薦脯醢使人相祭工飲不拜既爵授主人爵衆工則不拜受爵祭飲辯有脯醢不祭大師則爲之洗賓介降主人辭降工不辭洗笙入堂下磬南北面立樂南陔白華華黍主人獻之于西階上一人拜盡階不升堂受爵主人拜送爵階前坐祭立飲不拜既爵升授主人爵衆笙則不拜受爵坐祭立飲辯有脯醢不祭乃閒歌魚麗笙由庚歌南有嘉魚笙崇丘歌南山有臺笙由儀乃合樂周南關雎葛覃卷耳召南鵲巢采芣采蘋工告于樂正曰正歌備樂正告于賓乃降主人降席自南方側降作相爲司正司正禮辭許諾主人拜司正荅拜主人升復席司正洗觶升自西階阼階上北面受命于主人主人曰請安于賓司正告于賓賓禮辭許司正告于主人主人阼階上再拜賓西階上荅拜司正立于楹閒以相拜皆揖復席司正實觶降自西階階閒北面坐奠觶退共少立坐取觶不祭遂飲卒觶興坐奠觶遂拜執觶興盥洗北面坐奠觶于其所退立于觶南

賓北面坐取俎西之鱓阼階上北面酬主人主人降席立于賓東賓坐奠鱓遂拜執鱓興主人荅拜不祭立飲不拜卒鱓不洗實鱓東南面授主人主人阼階上拜賓少退主人受鱓賓拜送于主人之西賓揖復席主人西階上酬介介降席自南方立于主人之西如賓酬主人之禮主人揖復席司正升相旅曰某子受酬受酬者降席司正退立于序端東面受酬者自介右衆受酬者受自左拜興飲皆如賓酬主人之禮辯卒受者以解降坐奠于篚司正降復位使二人舉鱓于賓介洗升實鱓于西階上皆坐奠鱓遂拜執鱓興賓介席末荅拜皆坐祭遂飲卒鱓興坐奠鱓遂拜執鱓興賓介席末荅拜逆降洗升實鱓皆立于西階上賓介皆拜皆進薦西奠之賓辭坐取鱓以興介則薦南奠之介坐受以興退皆拜送降賓介奠于其所司正升自面階受命于主人主人曰請坐于賓賓辭以俎主人請徹俎賓許司正降階前命弟子俟徹俎司正升立于席端賓降席北面主人降席阼階上北面介降席西階上北面遽者降席席東南面賓取俎還授司正司正以降賓從之主人取俎還授弟子弟子以降自西階主人降自阼階介取俎還授弟子弟子以降介從之若有諸公大夫則使人受

俎如賓禮衆賓皆降說屨揖讓如初升坐乃羞無筭爵無筭樂賓出奏陔主人送于門外再拜賓若有違者諸公大夫則既一人舉解乃入席于賓東公三重大夫再重公如大夫入主人降賓介降衆賓皆降復初位主人迎揖讓升公升如賓禮辭一席使一人去之大夫則如介禮有諸公則辭加席委于席端主人不徹無諸公則大夫辭加席主人對不去加席明日賓服鄉服以拜賜主人如賓服以拜辱主人釋服乃息司正無介不殺薦脯醢羞唯所有徵唯所欲以告於先生君子可也賓介不與鄉樂唯欲記鄉朝服而謀賓介皆使能不宿戒蒲筵緇布純尊綌鞶賓至徹之其牲狗也亨于堂東北獻用爵其他用解薦脯五烝橫祭于其上出自左房俎由東壁自西階升賓俎脊脅肩肺主人俎脊脅臂肺介俎脊脅肱膈肺脯皆離皆右體進腠以爵拜者不徒作坐卒爵者拜既爵立卒爵者不拜既爵凡奠者於左將舉於右衆賓之長一人辭洗如賓禮立者東面北上若有北面者則東上樂正與立者皆薦以齒凡舉爵三作而不徒爵樂作大夫不入獻工與笙取爵于上篚既獻奠于下篚其笙則獻諸西階上磬階閒縮鼙北面鼓之主人介凡升席自北方降自南方司正既舉解

而薦諸其位凡旅不洗不洗者不祭既旅士不徹俎賓介遵者之俎受者以降遂出授從者主人之俎以東樂正命奏陔賓出至于階陔作若有諸公則大夫於主人之北西面主人之贊者西面北上不與無算爵然後與

鄉射禮

鄉射之禮主人戒賓賓出迎再拜主人荅再拜乃請賓禮辭許主人再拜賓荅再拜主人退賓送再拜無介乃席賓南面東上衆賓之席繼而西席主人於阼階上西面尊於賓席之東兩壺斯禁左玄酒皆加勺篚在其南東肆設洗于阼階東南南北以堂深東西當東築水在洗東篚在洗西南肆縣于洗東北西面乃張侯下綱不及地武不繫左下綱中掩束之乏參侯道居侯黨之一西五步羹定主人朝服乃速賓賓朝服出迎再拜主人荅再拜退賓送再拜賓及衆賓遂從之及門主人一相出迎于門外再拜賓荅再拜揖衆賓主人以賓揖先入賓厭衆賓衆賓皆入門左東面北上賓少進主人以賓三揖皆行及階三讓主人升一等賓升主人阼階上當楣北面再拜賓西階上當楣北面荅再拜主人坐取爵於上篚以降賓降主人阼階前面面坐

奠爵興辭降賓對主人坐取爵興適洗南西坐奠爵于簠下盥洗賓進東北面辭洗主人坐奠爵于篚興對賓反位主人卒洗壹揖壹讓以賓升賓西階上北面拜洗主人阼階上北面奠爵遂荅拜乃降賓降主人辭降賓對主人卒盥壹揖壹讓升賓升西階上疑立主人坐取爵實之賓席之前西北面獻賓賓西階上北面拜主人少退賓進受爵于席前復位主人阼階上拜送爵賓少退薦脯醢賓升席自西方乃設折俎主人阼階東疑立賓坐左執爵右祭脯醢奠爵于薦西興取肺坐絕祭尙左手擘之興加于俎坐挽手執爵遂祭酒興席末坐啐酒降席坐奠爵拜告言執爵興主人阼階上荅拜賓西階上北面坐卒爵興坐奠爵遂拜執爵興主人阼階上荅拜賓以虛爵降主人降賓西階前東面坐奠爵興辭降主人對賓坐取爵適洗北面坐奠爵于篚下興盥洗主人阼階之東南面辭洗賓坐奠爵于篚興對主人反位賓卒洗揖讓如初升主人拜洗賓荅拜興降盥如主人之禮賓升實爵主人之席前東南面酢主人主人阼階上拜賓少退主人進受爵復位賓西階上拜送爵薦脯醢主人升席自北方乃設折俎祭如賓禮不告言自席前適阼階上北面坐卒爵興坐奠爵遂拜

執爵奠賓西階上北面荅拜主人坐奠爵于序端阼階上再拜崇酒賓西階上荅再拜主人坐取觶于篚以降賓降主人奠觶辭降賓對東面立主人坐取觶洗賓不辭洗卒洗揖讓升賓西階上疑立主人實觶酬之阼階上北面坐奠觶遂拜執觶與賓西階上北面荅拜主人坐祭遂飲卒觶興坐奠觶遂拜執觶與賓西階上北面荅拜主人降洗賓降辭如獻禮升不拜洗賓西階上立主人實觶賓之席前北面賓西階上拜主人坐奠觶于薦西賓辭坐取觶以興反位主人阼階上拜送賓北面坐奠觶于薦東反位主人揖降賓降東面立于西階西當西序主人面南面三拜衆賓衆賓皆荅壹拜主人揖升坐取爵于序端降洗升實爵西階上獻衆賓衆賓之長升拜受者三人主人拜送坐祭立飲不拜既爵授主人爵降復位衆賓皆不拜受爵坐祭立飲每一人獻則薦諸其席衆賓辯有脯醢主人以虛爵降奠于篚揖讓升賓厭衆賓升衆賓皆升就席一人洗舉觶於賓升實觶西階上坐奠觶拜執觶與賓席末荅拜舉觶者坐祭遂飲卒觶興坐奠觶拜執觶與賓荅拜降洗升實之西階上北面賓拜舉觶者進坐奠觶于薦西賓辭坐取以興舉觶者西階上拜送賓反奠于其所舉觶

者降大夫若有違者則人門左主人降賓及衆賓皆降復初位主人揖讓以大夫升拜至大夫荅拜主人以爵降大夫降主人辭降大夫辭洗如賓禮席于尊東升不拜洗主人實爵席前獻于大夫大夫面階上拜進受爵反位主人大夫之右拜送大夫辭加席主人對不去加席乃薦脯醢大夫升席設折俎祭如賓禮不啣肺不啐酒不告言西階上卒爵拜主人荅拜大夫降洗主人復阼階降辭如初卒洗主人盥揖讓升大夫授主人爵于兩楹間復位主人實爵以酢于西階上坐奠爵拜大夫荅拜坐祭卒爵拜大夫荅拜主人坐奠爵于西楹南再拜崇酒大夫荅拜主人復阼階揖降大夫降立于賓南主人揖讓以賓升大夫及衆賓皆升就席席工于四階上少東樂正先升北面立于其西工四人二瑟瑟先相者皆左何瑟面鼓執越內弦右手相人升自西階北面東上工坐相者坐授瑟乃降笙入立于縣中面面乃合樂周南關雎葛覃卷耳召南鵲巢采芣采蘋工不興告于樂正曰正歌備樂正告于賓乃降主人取爵于上饌獻工大師則爲之洗賓降主人辭降工不辭洗卒洗升實爵工不興左瑟一人拜受爵主人阼階上拜送爵薦脯醢使人相祭工飲不拜既爵授主人爵衆

工不拜受爵祭飲辯有脯醢不祭不洗遂獻筮于西階上筮一人拜于下盡階不升堂受爵主人拜送爵階前坐祭立飲不拜既爵升授主人爵衆筮不拜受爵坐祭立飲辯有脯醢不祭主人以爵降奠于篚反升就席主人降席自南方側降作相爲司正司正禮辭許諾主人再拜司正荅拜主人升就席司正洗解升自西階由楹內適阼階上北面受命于主人西階上北面請安于賓賓禮辭許司正告于主人遂立于楹閒以相拜主人阼階上再拜賓西階上荅再拜皆揖就席司正實解降自西階中庭北面坐奠解興退少立進坐取解興反坐不祭遂卒解興坐奠解拜執解興洗北面坐奠于其所與少退北面立于解南未旅三耦俟于堂西南面東上司射適堂西祖決遂取弓于階西兼挾乘矢升自西階階上北面告于賓曰弓矢既具有司請射賓對曰某不能爲二三子許諾司射適阼階上東北面告于主人曰請射于賓賓許司射降自西階階前西面命弟子納射器乃納射器皆在堂西賓與大夫之弓倚于西序矢在弓下北括衆弓倚于堂西矢在其上主人之弓矢在東序東司射不釋弓矢遂以比三耦於堂面三耦之南北西命上射曰某御於于命下射曰子與某子射

司正爲司馬司馬命張侯弟子說東遂繫左下綱司馬又命獲者倚旌于侯中獲者由西方坐取旌倚于侯中乃退樂正適西方命弟子贊上選樂于下弟子相工如初入降自西階阼階下之東南堂前三筭西面北上坐樂正北面立于其南

司射猶挾乘矢以命三耦各與其耦讓取弓矢拾三耦皆袒決遂有司左執附右執弦而授弓遂授矢三耦皆執弓搯三而挾一个司射先立于所設中之西南東面三耦皆進由司射之西立于其西南東面北上而侯司射東面立于三耦之北搯三而挾一个揖進當階北面揖及階揖升堂揖豫則鉤楹內堂則由楹外當左物北面揖及物揖左足履物不方足還視侯中俯正足不去旌誘射將乘矢執弓不挾右執弦南面揖揖如升射降出于其位南適堂西改取一个挾之遂適階西取扑搯之以反位司馬命獲者執旌以負侯獲者適侯執旌負侯而侯司射還當上耦西面作上耦射司射反位上耦揖進上射在左並行當階北面揖及階揖上射先升三等下射從之中等上射升堂少左下射升上射揖並行皆當其物北面揖及物揖皆左足履物還視侯中合足而侯司馬適堂西不決遂袒執弓出于司射之南升自西階鉤楹由

上射之後西南面立于物閒右執籥南揚弓命去俟獲者執旌許諾聲不絕以至于
乏坐東面偃旌興而俟司馬出于下射之南還其後降自西階反由司射之南適堂
西釋弓襲反位立于司射之南司射進與司馬交于階前相左由堂下西階之東北
面視上射命曰無射獲無獵獲上射揖司射退反位乃射上射既發挾弓矢而后下
射射拾發以將乘矢獲者坐而獲舉旌以宮偃旌以商獲面未釋獲卒射皆執弓不
挾南面揖揖如升射上射降三等下射少右從之中等並行上射於左與升射者相
左交于階前相揖由司馬之南適堂西釋弓說決拾襲而俟于堂西南面東上三耦
卒射亦如之司射去扑倚于西階之西升堂北面告于賓曰三耦卒射賓揖司射降
摺扑反位司馬適堂西袒執弓由其位南進與司射交于階前相左升自西階鉤楹
自右物之後立于物閒西南面揖弓命取矢獲者執旌許諾聲不絕以旌負俟而俟
司馬出于左物之南還其後降自西階遂適堂前北面立于所設楹之南命弟子設
楹乃設楹于中庭南當洗東肆司馬由司射之南退釋弓于堂西襲反位弟子取矢
北面坐委于楹北括乃退司馬襲進當楹南北面坐左右撫矢而乘之若矢不備則

司馬又袒執弓如初升命曰取矢不索弟子自西方應曰諾乃復求矢加于楅司射倚扑于階西升請射于賓如初賓許諾賓主人大夫若皆與射則遂告于賓適阼階上告于主人主人與賓爲耦遂告于大夫大夫雖衆皆與士爲耦以耦告于大夫曰某御於子西階上北面作衆賓射司射降摺扑由司馬之南適堂西立比衆耦衆賓將與射者皆降由司馬之南適堂西繼三耦而立東上大夫之耦爲上若有東面者則北上賓主人與大夫皆未降司射乃比衆耦辯遂命三耦拾取矢司射反位三耦拾取矢皆袒決遂執弓進立于司馬之西南司射作上耦取矢司射反位上耦揖進當楅北面揖及楅揖上射東面下射西面上射揖進坐橫弓卻手自弓下取一个兼諸射順羽且興執弦面左還退反位東面揖下射進坐橫弓覆手自弓上取一个興其他如上射既拾取乘矢揖皆左還南面揖皆少進當楅南皆左還北面摺三挾一个揖皆左還上射於右與進者相左相揖反位三耦拾取矢亦如之後者遂取誘射之矢兼乘矢而取之以授有司于西方而后反位衆賓未拾取矢皆袒決遂執弓摺三挾一个由堂西進繼三耦之南而立東面北上大夫之耦爲上司射作射如初一

耦揖升如初司馬命去侯獲者許諾司馬降釋弓反位司射猶挾一个去扑與司馬交于階前升請釋獲于賓賓許降搯扑西而立于所設中之東北面命釋獲者設中遂視之釋獲者執鹿中一人執筭以從之釋獲者坐設中南當楅馿西當西序東面與受筭坐實八筭于中橫委其餘于中西南末與共而俟司射遂進由堂下北而命曰不貫不釋上射揖司射退反位釋獲者坐取中之八筭改實八筭于中與執而俟乃射若中則釋獲者坐而釋獲每一个釋一筭上射於右下射於左若有餘筭則反委之又取中之八筭改實八筭于中與執而俟三耦卒射賓主人大夫揖皆由其階降揖主人堂東袒決遂執弓搯三挾一个賓於堂西亦如之皆由其階階下揖升堂揖主人爲下射皆當其物北面揖及物揖乃射卒南面揖皆由其階階上揖降階揖賓序西主人序東皆釋弓說決拾襲反位升及階揖升堂揖皆就席大夫袒決遂執弓搯三挾一个由堂西出于司射之西就其耦大夫爲下射揖進耦少退揖如三耦及階耦先升卒射揖如升射耦先降降階耦少退皆釋弓于堂西襲耦遂止于堂西大夫升就席衆賓繼射釋獲皆如初司射所作唯上耦卒射釋獲者遂以所執餘獲升

自西階盡階不升堂告于賓曰左右卒射降反位坐委餘獲于中西興共西俟司馬
袒決執弓升命取矢如初獲者許諾以旌負俟如初司馬降釋弓反位弟子委矢如
初大夫之矢則兼束之以茅上握焉司馬乘矢如初司射遂適西階西釋弓去扑襲
進由中東立于中南北面視筭釋獲者東面于中西坐先數右獲二筭爲純一純以
取實于左手十純則縮而委之每委異之有餘純則橫於下一筭爲奇奇則又縮諸
純下興自前適左東面坐兼斂筭實于左手一純以委十則異之其餘如右獲司射
復位釋獲者遂進取賢獲執以升自西階盡階不升堂告于賓若右勝則曰右賢於
左若左勝則曰左賢於右以純數告若有奇者亦曰奇若左右鈞則左右皆執一筭
以告曰左右鈞降復位坐兼斂筭實八筭于中委其餘於中西興共而俟司射適堂
西命弟子設豐弟子奉豐升設于西楹之西乃降勝者之弟子洗解升酌南面坐奠
于豐上降袒執弓反位司射遂袒執弓挾一个摺扑北面于三耦之南命三耦及衆
賓勝者皆袒決遂執張弓不勝者皆襲說決拾卻左手右加弛弓于其上遂以執射
司射先反位三耦及衆射者皆與其耦進立于射位北上司射作升斂者如作射一

耦進揖如升射及階勝者先升升堂少右不勝者進北面坐取豐上之解與少退立
卒解進坐奠于豐下與揖不勝者先降與升飲者相左交于階前相揖出于司馬之
南遂適堂西釋弓襲而俟有執爵者執爵者坐取解實之反奠於豐上升飲者如初
三耦卒飲賓主人大夫不勝則不執弓執爵者取解降洗升實之以授于席前受解
以適西階上北面立飲卒解授執爵者反就席大夫飲則耦不升若大夫之耦不勝
則亦執弛弓特升飲衆賓繼飲射爵者辯乃徹豐與解司馬洗爵升實之以降獻獲
者于侯薦脯醢設折俎俎與薦皆三祭獲者負俟北面拜受爵司馬西面拜送爵獲
者執爵使人執其薦與俎從之適右个設薦俎獲者南而坐左執爵祭脯醢執爵與
取肺坐祭遂祭酒與適左个中皆如之左个之西北三步東面設薦俎獲者薦右東
面立飲不拜既爵司馬受爵奠于篚復位獲者執其薦使人執俎從之辟設于乏南
獲者負俟而俟司射適階西釋弓矢去扑說決拾襲適洗洗爵升實之以降獻釋獲
者于其位少南薦脯醢折俎有祭釋獲者薦右東面拜受爵司射北面拜送爵釋獲
者就其薦坐左執爵祭脯醢與取肺坐祭遂祭酒與司射之西北面立飲不拜既爵

司射受爵奠于篚釋獲者少西辟廡反位司射適堂西袒決遂取弓于階而挾一个
搯扑以反位司射去扑倚于階西升請射于賓如初賓許前射降搯扑由司馬之南
適堂西命三耦及衆賓皆袒決遂執弓就位司射先反位三耦及衆賓皆袒決遂執
弓各以其耦進反于射位司射作拾取矢三耦拾取矢如初反位賓主人大夫降揖
如初主人堂東賓堂西皆袒決遂執弓皆進階前揖及楅揖拾取矢如三耦卒北面
搯三挾一个揖退賓堂西主人堂東皆釋弓矢襲及階揖升堂揖就席大夫袒決遂
執弓就其耦揖皆進如三耦耦東面大夫西面大夫進坐說矢束與反位而后耦揖
進坐兼取乘矢順羽而興反位揖大夫進坐亦兼取乘矢如其耦北面搯三挾一个
揖退耦反位大夫遂適序西釋弓矢襲升即席衆賓繼拾取矢皆如三耦以反位司
射猶挾一个以進作上射如初一耦揖升如初司馬升命去侯獲者許諾司馬降釋
弓反位司射與司馬交于階前去扑襲升請以樂樂于賓賓許諾司射降搯扑東面
命樂正曰請以樂樂于賓賓許司射遂適階閒堂下北面命曰不鼓不釋上射揖司
射退反位樂正東面命大師曰奏騶虞閒若一大師不興許諾樂正退反位乃奏騶

虞以射三耦卒射賓主人大夫衆賓繼射釋獲如初卒射降釋獲者執餘獲升告左右卒射如初司馬升命取矢獲者許諾司馬降釋弓反位弟子委矢司馬乘之皆如初司射釋弓視筭如初釋獲者以賢獲與鈞告如初降復位司射命設豐設豐實解如初遂命勝者執張弓不勝者執弛弓升飲如初司射遂袒決遂左執弓右執一个兼諸弦面鐵適堂西以命拾取矢如初司射反位三耦及賓主人大夫衆賓皆袒決遂拾取矢如初矢不挾兼諸弦附以退不反位遂授有司于堂西辯拾取矢揖皆升就席司射乃適堂西釋弓去扑說決拾襲反位司馬命弟子說侯之左下綱而釋之命獲者以旄退命弟子退福司射命釋獲者退中與筭面俟司馬反爲司正退復解南而立樂正命弟子贊工卽位弟子相工如其降也升自西階反坐賓北面坐取俎西之解興阼階上北面酬主人主人降席立于賓東賓坐奠解拜執解興主人荅拜賓不祭卒解不拜不洗實之進東南面主人阼階上北面拜賓少退主人進受解賓主人之西北面拜送賓揖就席主人以解適西階上酬大夫大夫降席立于主人之西如賓酬主人之禮主人揖就席若無大夫則長受酬亦如之司正升自西階相旅

作受酬者曰某酬某子受酬者降席司正退立于面序東面衆受酬者拜興飲皆如賓酬主人之禮辯遂酬在下者皆升受酬于西階上卒受者以解降奠于籠

司正降復位使二人舉觶于賓與大夫舉觶者皆洗觶升實之西階上北面皆坐奠解拜執觶興賓與大夫皆席末蒼拜舉觶者皆坐祭遂飲卒解興坐奠解拜執觶興賓與大夫皆蒼拜舉觶者逆降洗升實觶皆立于西階上北面東上賓與大夫拜舉觶者皆進坐奠于薦右賓與大夫辭坐受解以興舉觶者退反位皆拜送乃降賓與大夫坐反奠于其所興若無大夫則唯賓司正升自西階阼階上受命于主人適西階上北面請坐于賓賓辭以俎反命于主人主人曰請徹俎賓許司正降自西階階前命弟子俟徹俎司正升立于序端賓降席北面主人降席自南方阼階上北面大夫降席東南面賓取俎還授司正司正以降自西階賓從之降遂立于階西東面司正以俎出授從者主人取俎還授弟子弟子受俎降自西階以東主人降自阼階西面立大夫取俎還授弟子弟子以降自面階遂出授從者大夫從之降立于賓南衆賓皆降立于大夫之南少退北上主人以賓揖讓說屨乃升大夫及衆賓皆說屨

升坐乃羞無筭爵使二人舉觶賓與大夫不興取奠觶飲卒觶不拜執觶者受觶遂實之賓解以之主人大夫之觶長受而錯皆不拜辯卒受者興以旅在下者于西階上長受酬者不拜乃飲卒解以實之受酬者不拜受辯旅皆不拜執觶者皆與旅卒受者以虛解降奠于篚執觶者洗升實解反奠于賓與大夫無筭樂賓興樂正命奏陔賓降及階陔作賓出衆賓皆出主人送于門外再拜明日賓朝服以拜賜于門外主人不見如賓服遂從之拜辱于門外乃退主人釋服乃息司正無介不殺使人速迎于門外不拜入升不拜至不拜洗薦脯醢無俎賓酢主人主人不崇酒不拜衆賓既獻衆賓一人舉觶遂無筭爵無司正賓不與徵唯所欲以告於鄉先生君子可也羞唯所有鄉樂唯欲記大夫與則公士爲賓使能不宿戒其牲狗也亨于堂東北尊給羃賓至徹之蒲筵緇布純西序之席北上獻用爵其他用解以爵拜者不徒作薦脯用籩五臠祭半臠橫于上醢以豆出自東房臠長尺二寸俎由東壁自西階升賓俎脊脅肩肺主人俎脊脅臂肺皆離皆右體也進腍凡舉爵三作而不徒爵凡奠者於左將舉者於右衆賓之長一人辭洗如賓禮若有諸公則如賓禮大夫如介

禮無諸公則大夫如賓禮樂作大夫不入樂正與立者齒三笙一和而西成聲獻工與笙取爵于上篋既獻奠于下篋其笙則獻諸西階上立者東而北上司正既舉解而薦諸其位三耦者使弟子司射前戒之司射之弓矢與扑倚于西階之西司射既袒決遂而升司馬階前命張侯遂命倚旌凡侯天子熊侯白質諸侯麋侯赤質大夫布侯畫以虎豹士布侯畫以鹿豕凡畫者丹質射自檀閒物長如筈其閒容弓距隨長武序則物當棟堂則物當楣命負侯者由其位凡適堂西皆出入于司馬之南唯賓與大夫降階遂西取弓矢旌各以其物無物則以白羽與朱羽糝杠長三仞以鴻脰韜上二尋凡挾夫於二指之閒橫之司射在司馬之北司馬無事不執弓始射獲而未釋獲復釋獲復用樂行之上射於右楅長如筈博三寸厚寸有半龍首其中鈿交韋當楅檠橫而拳之南面坐而奠之南北當洗射者有過則撻之衆賓不與射者不降取誘射之矢者既拾取矢而后兼誘射之乘矢而取之賓主人射則司射擯升降卒射卽席而反位卒事鹿中髮前足跪鑿背容八筭釋獲者奉之先首大夫降立于堂西以俟射大夫與士射袒薰禴耦少退于物司射釋弓矢視筭與獻釋獲者釋弓

矢禮射不主皮主皮之射者勝者又射不勝者降主人亦飲于西階上獲者之俎折脊脅肺臠東方謂之右个釋獲者之俎折脊脅肺皆有祭大夫說矢東坐說之歌騶虞若采蘋皆五終射無筭古者於旌也語凡旅不洗不洗者不祭旣旅士不入大夫後出主人送于門外再拜鄉侯上个五尋中十尺侯道五十弓弓二寸以爲侯中倍中以爲躬倍躬以爲左右舌下舌半上舌箭籌八十長尺有握握素楚扑長如箠刊本尺君射則爲下射上射退于物一筴旣發則荅君而侯君樂作面后就物君袒朱襦以射小臣以巾執矢以授若飲君如燕則夾爵君國中射則皮樹中以翻旌獲白羽與朱羽糝於郊則闔中以旌獲於竟則虎中龍旌大夫兕中各以其物獲士鹿中翻旌以獲唯君有射于國中其餘否君在大夫射則肉袒

燕禮

燕禮小臣戒與者膳宰具官饌于寢東樂人縣設洗篚于阼階東南當東霽疊水在東篚在洗西南肆設膳篚在其北西面司宮尊于東楹之西兩方壺左玄酒南上公尊瓦大兩有豐冪用綌若錫在尊南南上尊士旅食于門西兩圓壺司宮筵賓于戶

西東上無加席也射人告具小臣設公席于阼階上西鄉設加席公升卽位于席西鄉小臣納卿大夫卿大夫皆人門右北面東上士立于西方東面北上祝史立于門東北面東上小臣師一人在東堂下南面士旅食者立于門西東上公降立于阼階之東南南鄉爾卿卿西面北上爾大夫大夫皆少進射人請賓公曰命某爲賓射人命賓賓少進禮辭反命又命之賓再拜稽首許諾射人反命賓出立于門外東面公揖卿大夫乃升就席小臣自阼階下北面請執事者與羞膳者乃命執事者執事者升自西階立於尊南北面東上膳宰請羞于諸公卿者射人納賓賓入及庭公降一等揖之公升就席賓升自西階主人亦升自西階賓右北面至再拜賓荅再拜主人降洗洗南西北面賓降階西東面主人辭降賓對主人北面盥坐取觚洗賓少進辭洗主人坐奠觚于篚與對賓反位主人卒洗賓揖乃升主人升賓拜洗主人賓右奠觚荅拜降盥賓降主人辭賓對卒盥賓揖升主人升坐取觚執事者舉罍主人酌脯執事者反罍主人筵前獻賓賓西階上拜筵前受爵反位主人賓右拜送爵膳宰薦脯醢賓升筵膳宰設折俎賓坐左執爵右祭脯醢奠爵于薦右與取肺坐絕祭臍之

興加于俎坐拱手執爵遂祭酒興席末坐啐酒降席坐奠爵拜告言執爵興主人荅拜賓西階上北面坐卒爵興坐奠爵遂拜主人荅拜賓以虛爵降主人降賓洗南坐奠觚少進辭降主人東面對賓坐取觚奠于篚下盥洗主人辭洗賓坐奠觚于篚與對卒洗及階揖升主人升拜洗如賓禮賓降盥主人降賓辭降卒盥揖升酌膳執罍如初以酢主人于西階上主人北面拜受爵賓主人之左拜送爵主人坐祭不啐酒不拜酒不告言遂卒爵興坐奠爵拜執爵興荅拜主人不崇酒以虛爵降奠于篚賓降立于西階西射人升賓賓升立于序內東面主人盥洗象觚升實之東北面獻于公公拜受爵主人降自西階降階下北面拜送爵士薦脯醢膳宰設折俎升自西階公祭如賓禮膳宰贊授肺不拜酒立卒爵坐奠爵拜執爵興主人荅拜升受爵以降奠于膳篚更爵洗升酌膳酒以降酢于降階下北面坐奠爵再拜稽首公荅再拜主人坐祭遂卒爵再拜稽首公荅再拜主人奠爵于篚主人盥洗升媵觚于賓酌散西階上坐奠爵拜賓賓降筵北面荅拜主人坐祭遂飲賓辭卒爵拜賓荅拜主人降洗賓降主人辭降賓辭洗卒洗揖升不拜洗主人酌膳賓西階上拜受爵于筵前反

位主人拜送爵賓升席坐祭酒遂奠于薦東主人降復位賓降筵西東南面立小臣
自阼階下請媵爵者公命長小臣作下大夫二人媵爵媵爵者阼階下皆北面再拜
稽首公荅再拜媵爵者立于洗南西面北上序進盥洗角觶升自西階序進酌散交
于楹北降阼階下皆奠觶再拜稽首執觶興公荅再拜媵爵者皆坐祭遂卒觶興坐
奠觶再拜稽首執觶興公荅再拜媵爵者執觶待于洗南小臣請致者若君命皆致
則序進奠觶于饌阼階下皆再拜稽首公荅再拜媵爵者洗象觶升實之序進坐奠
于薦南北上降阼階下皆再拜稽首送觶公荅再拜公坐取大夫所媵觶興以酬賓
賓降西階下再拜稽首公命小臣辭賓升成拜公坐奠觶荅再拜執觶興立卒觶賓
下拜小臣辭賓升再拜稽首公坐奠觶荅再拜執觶興賓進受虛爵降奠于饌易觶
洗公有命則不易不洗反升酌膳觶下拜小臣辭賓升再拜稽首公荅再拜賓以旅
酬於西階上射人作大夫長升受旅賓大夫之右坐奠觶拜執觶興大夫荅拜賓坐
祭立飲卒觶不拜若膳觶也則降更觶洗升實散大夫拜受賓拜送大夫辯受酬如
受賓酬之禮不祭卒受者以虛觶降奠于饌主人洗升實散獻觶于西階上

司宮兼卷重席設于賓左東上卿升拜受觚主人拜送觚卿辭重席司宮徹之乃薦脯醢卿升席坐左執爵右祭脯醢遂祭酒不啐酒降席西階上北面坐卒爵興坐奠爵拜執爵興主人荅拜受爵卿降復位辯獻卿主人以虛爵降奠于篚射人乃升卿卿皆升就席若有諸公則先卿獻之如獻卿之禮席于阼階西北面東上無加席小臣又請媵爵者二大夫媵爵如初請致者若命長致則媵爵者奠解于篚一人待于洗南長致致者阼階下再拜稽首公荅再拜洗象解升實之坐奠于薦南降與立于洗南者二人皆再拜稽首送解公荅再拜公又行一爵若賓若長唯公所酬以旅于西階上如初大夫卒受者以虛解降奠于篚主人洗升獻大夫于西階上大夫升拜受觚主人拜送觚大夫坐祭立卒爵不拜既爵主人受爵大夫降復位胥薦主人于洗北西面脯醢無胥辯獻大夫遂薦之繼賓以西東上卒射人乃升大夫大夫皆升就席席工于四階上少東樂正先升北面立于其四小臣納工工四人二瑟小臣左何瑟面鼓執越內弦右手相入升自西階北面東上坐小臣坐授瑟乃降工歌鹿鳴四牡皇皇者華卒歌主人洗升獻工工不興左瑟一人拜受爵主人西階上拜送爵

薦脯醢使人相祭卒受不拜主人受爵衆工不拜受爵坐祭遂卒爵辯有脯醢不祭主人受爵降奠于篚公又舉奠觶唯公所賜以旅于西階上如初卒笙入立于縣中奏南陔白華華黍主人洗升獻笙于西階上一人拜盡階不升堂受爵降主人拜送爵階前坐祭立卒爵不拜既爵升授主人衆笙不拜受爵降坐祭立卒爵辯有脯醢不祭乃閒歌魚麗笙由庚歌南有嘉魚笙崇丘歌南山有臺笙由儀遂歌鄉樂周南關雎葛覃卷耳召南鵲巢采芣采蘋大師告于樂正曰正歌備樂正由楹內東楹之東告于公乃降復位射人自阼階下請立司正公許射人遂爲司正司正洗角觶南面坐奠于中庭升東楹之東受命西階上北面命卿大夫君曰以我安卿大夫皆對曰諾敢不安司正降自西階南面坐取觶升酌散降南面坐奠觶右還北面少立坐取觶興坐不祭卒觶奠之興再拜稽首左還南面坐取觶洗南面反奠于其所升自西階東楹之東請徹俎降公許告于賓賓北面取俎以出膳宰徹公俎降自阼階以東卿大夫皆降東面北上賓反入及卿大夫皆說屣升就席公以賓及卿大夫皆坐乃安羞庶羞大夫祭薦司正升受命皆命君曰無不醉賓及卿大夫皆興對曰諾敢

不醉皆反坐主人洗升獻士于西階上士長升拜受解主人拜送解士坐祭立飲不拜既爵其他不拜坐祭立飲乃薦司正與射人一人司士一人執羸二人立于解南東上辯獻士士既獻者立于東方西面北上乃薦士祝史小臣師亦就其位而薦之主人就旅食之尊而獻之旅食不拜受爵坐祭立飲若射則大射正爲司射如鄉射之禮賓降洗升媵觚于公酌散下拜公降一等小臣辭賓升再拜稽首公荅再拜賓坐祭卒爵再拜稽首公荅再拜賓降洗象解升酌膳坐奠于薦南降拜小臣辭賓升成拜公荅再拜賓反位公坐取賓所媵觶與唯公所賜受者如初受酬之禮降更爵洗升酌膳下拜小臣辭升成拜公荅拜乃就席坐行之有執爵者唯受子公者拜司正命執爵者爵辯卒受者興以酬士大夫卒受者以爵興西階上酬士士升大夫奠爵拜士荅拜大夫立卒爵不拜實之士拜受大夫拜送士旅于西階上辯士旅酌卒主人洗升自西階獻庶子于阼階上如獻士之禮辯降洗遂獻左右正與內小臣皆於阼階上如獻庶子之禮無筭爵士也有執膳爵者有執散爵者執膳爵者酌以進公公不拜受執散爵者酌以之公命所賜所賜者興受爵降席下奠爵再拜稽首公

荅拜受賜爵者以爵就席坐公卒爵然後飲執膳爵者受公爵酌反奠之受賜爵者興授執散爵執散爵者乃酌行之唯受爵於公者拜卒受爵者興以酬士于西階上士升大夫不拜乃飲實爵士不拜受爵大夫就席士旅酌亦如之公有命徹饗則卿大夫皆降西階下北面東上再拜稽首公命小臣辭公荅再拜大夫皆辟遂升反坐士終旅於上如初無筭樂宵則庶于執燭於阼階上司宮執燭於西階上甸人執大燭於庭閭人爲大燭於門外賓醉北面坐取其薦脯以降奏陔賓所執脯以賜鍾人于門內霽遂出卿大夫皆出公不送公與客燕曰寡君有不腆之酒以請吾子之與寡君須臾焉使某也以請對曰寡君君之私也君無所辱賜于使臣臣敢辭寡君固曰不腆使某固以請寡君君之私也君無所辱賜于使臣臣敢固辭寡君固曰不腆使某固以請某固辭不得命敢不從致命曰寡君使某有不腆之酒以請吾子之與寡君須臾焉君貺寡君多矣又辱賜于使臣臣敢拜賜命記燕朝服於寢其牲狗也亨于門外東方若與四方之賓燕則公迎之于大門內揖讓升賓爲苟敬席于阼階之西北面有齊不嘑肺不啐酒其介爲賓無膳尊無膳爵與卿燕則大夫爲賓與大

夫燕亦大夫爲賓羞膳者與執罍者皆士也羞卿者小膳宰也若以樂納賓則賓及庭奏肆夏賓拜酒主人各拜而樂闋公拜受爵而奏肆夏公卒爵主人升受爵以下而樂闋升歌鹿鳴下管新宮笙入三成遂合鄉樂若舞則勺唯公與賓有俎獻公曰臣敢奏爵以聽命凡公所辭皆栗階凡栗階不過二等凡公所酬既拜請旅侍臣凡薦與羞者小膳宰也有內羞君與射則爲下射袒朱襦樂作而后就物小臣以巾授矢稍屬不以樂志既發則小臣受弓以授弓人上射退于物一筈既發則荅君而俟若飲君燕則夾爵君在大夫射則肉袒若與四方之賓燕媵爵曰臣受賜矣臣請贊執爵者相者對曰吾子無自辱焉有房中之樂

大射

大射之儀君有命戒射宰戒百官有事于射者射人戒諸公卿大夫射司士戒士射與贊者前射三日宰夫戒宰及司馬射人宿視滌司馬命量人量侯道與所設乏以狸步大侯九十參七十干五十設乏各去其侯西十北十遂命量人巾車張三侯大侯之崇見鵠於參參見鵠於干干不及地武不繫左下綱設乏西十北十凡乏用革

樂人宿縣于阼階東笙磬西面其南笙鍾其南鐻皆南陳建鼓在阼階面南鼓應磬
在其東南鼓西階之西頌磬東面其南鍾其南鐻皆南陳一建鼓在其南東鼓朔磬
在其北一建鼓在西階之東南面蕩在建鼓之閒鼗倚于頌磬西絃厥明司宮尊于
東楹之西兩方壺膳尊兩甒在南有豐罍用錫若絺綌諸箭蓋罍如勺又反之皆玄
尊酒在北尊士旅食于西鐻之南北面兩圓壺又尊于大侯之乏東北兩壺獻酒設
洗于阼階東南盥水在東鐻在洗西南陳設膳鐻在其北西面又設洗于獲者之尊
西北水在洗北鐻在南東陳小臣設公席于阼階上西鄉司宮設賓席于戶西南面
有加席卿席賓東東上小卿賓西東上大夫繼而東上若有東面者則北上席工于
西階之東東上諸公阼階西北面東上官饌羹定射人告具于公公升卽位于席西
鄉小臣師納諸公卿大夫諸公卿大夫皆入門右北面東上士西方東面北上大史
在干侯之東北北面東上士旅食者在士南北面東上小臣師從者在東堂下南面
西上公降立于阼階之東南南鄉小臣師詔揖諸公卿大夫諸公卿大夫西面北上
揖大夫大夫皆少進大射正擯擯者請賓公曰命某爲賓擯者命賓賓少進禮辭反

命又命之賓再拜稽首受命擯者反命賓出立于門外北面公揖卿大夫升就席小臣自阼階下北面請執罍者與羞膳者乃命執罍者執罍者升自面階立于尊南北面東上膳宰請羞于諸公卿者擯者納賓賓及庭公降一等揖賓賓辟公升卽席奏肆夏賓升自西階主人從之賓右北面至再拜賓荅再拜主人降洗洗南西北面賓降階西東面主人辭降賓對主人北面盥坐取觚洗賓少進辭洗主人坐奠觚于篚興對賓反位主人卒洗賓揖升主人升賓拜洗主人賓右奠觚荅拜降盥賓降主人辭降賓對卒盥賓揖升主人升坐取觚執罍者舉罍主人酌膳執罍者蓋罍酌者加勺又反之筵前獻賓賓西階上拜受爵于筵前反位主人賓右拜送爵宰胥薦脯醢賓升筵庶子設折俎賓坐左執觚右祭脯醢奠爵子薦右興取肺坐絕祭臍之興加于俎坐投手執爵逢祭酒興席末坐啐酒降席坐奠爵拜告旨執爵興主人荅拜樂闋賓西階上北面坐卒爵興坐奠爵拜執爵興主人荅拜

賓以虛爵降主人降賓洗南西北面坐奠觚少進辭降主人西階西東面少進對賓坐取觚奠于篚下盥洗主人辭洗賓坐奠觚于篚興對卒洗及階揖升主人升拜洗

如賓禮賓降盥主人降賓辭降卒盥揖升酌膳執罍如初以酢主人于西階上主人北面拜受爵賓主人之左拜送爵主人坐祭不啐酒不拜酒遂卒爵興坐奠爵拜執爵興賓荅拜主人不崇酒以虛爵降奠于篚賓降立于西階西東面擯者以命升賓賓升立于西序東面主人盥洗象觚升酌膳東北面獻于公公拜受爵乃奏肆夏主人降自西階阼階下北面拜送爵宰胥薦脯醢由左房庶子設折俎升自西階公祭如賓禮庶子贊授肺不拜酒立卒爵坐奠爵拜執爵興主人荅拜樂闋升受爵降奠于篚更爵洗升酌散以降酢于阼階下北面坐奠爵再拜稽首公荅拜主人坐祭遂卒爵興坐奠爵再拜稽首公荅拜主人奠爵于篚主人盥洗升媵觚于賓酌散西階上坐奠爵拜賓西階上北面荅拜主人坐祭遂飲賓辭卒爵興坐奠爵拜執爵興賓荅拜主人降洗賓降主人辭降賓辭洗卒洗賓揖升不拜洗主人酌膳賓西階上拜受爵于筵前反位主人拜送爵賓升席坐祭酒遂奠于薦東主人降復位賓降筵西東南面立小臣自阼階下請媵爵者公命長小臣作下大夫二人媵爵媵爵者阼階下皆北面再拜稽首公荅拜媵爵者立于洗南西面北上序進盥洗角觶升自西階

序進酌散交于楹北降適阼階下皆奠解再拜稽首執解與公荅拜媵爵者皆坐祭
遂卒解興坐奠解再拜稽首執解與公荅再拜媵爵者執解待于洗南小臣請致者
若命皆致則序進奠解于篚阼階下皆北面再拜稽首公荅拜媵爵者洗象解升實
之序進坐奠于薦南北上降適阼階下皆再拜稽首送解公荅拜媵爵者皆退反位
公坐取大夫所媵解與以酬賓賓降西階下再拜稽首小臣正辭賓升成拜公坐奠
解荅拜執解與公卒解賓下拜小臣正辭賓升再拜稽首公坐奠解荅拜執解與賓
進受虛解降奠于篚易解與洗公有命則不易不洗反升酌膳下拜小臣正辭賓升
再拜稽首公荅拜賓告于擯者請旅諸臣擯者告于公公許賓以旅大夫于西階上
擯者作大夫長升受旅賓大夫之右坐奠解拜執解與大夫荅拜賓坐祭立卒解不
拜若膳解也則降更解洗升實散大夫拜受賓拜送遂就席大夫辯受酬如受賓酬
之禮不祭酒卒受者以虛解降奠于篚復位主人洗觚升實散獻卿于西階上司宮
兼卷重席設于賓左東上卿升拜受觚主人拜送觚卿辭重席司宮徹之乃薦脯醢
卿升席庶子設折俎卿坐左執爵右祭脯醢奠爵于薦右興取肺坐絕祭不啐肺興

加于俎坐授手取爵遂祭酒執爵興降席西階上北面坐卒爵興坐奠爵拜執爵興主人荅拜受爵卿降復位辯獻卿主人以虛爵降奠于篚擯者升卿卿皆升就席若有諸公則先卿獻之如獻卿之禮席于阼階西北面東上無加席小臣又請媵爵者二大夫媵爵如初請致者若命長致則媵爵者奠觶于篚一人待于洗南長致者阼階下再拜稽首公荅拜洗象解升實之坐奠于薦南降與立于洗南者二人皆再拜稽首送觶公荅拜公又行一爵若賓若長唯公所賜以旅于西階上如初大夫卒受者以虛解降奠于篚主人洗觶升獻大夫于西階上大夫升拜受觶主人拜送觶大夫坐祭立卒爵不拜既爵主人受爵大夫降復位胥薦主人于洗北西面脯醢無胥辯獻大夫遂薦之繼賓以西東上若有東面者則北上卒擯者升大夫大夫皆升就席乃席工于西階上少東小臣納工工六人四瑟僕人正徒相大師僕人師相少師僕人士相上工相者皆左何瑟後首內弦掩越右手相後者徒相入小樂正從之升自西階北面東上坐授瑟乃降小樂正立于西階東乃歌鹿鳴三終主人洗升實爵獻工工不興左瑟一人拜受爵主人西階上拜送爵薦脯醢使人相祭卒爵不拜主

人受虛爵衆工不拜受爵坐祭遂卒爵辯有脯醢不祭主人受爵降奠于篚復位大師及少師上工皆降立于鼓北羣工陪于後乃管新宮三終卒管大師及少師上工皆東坵之東南西面北上坐擯者自阼階下請立司正公許擯者遂爲司正司正適洗洗角解南面坐奠于中庭升東楹之東受命于公面階上北面命賓諸公卿大夫公曰以我安賓諸公卿大夫皆對曰諾敢不安司正降自面階南面坐取解升酌散降南面坐奠解興右還北面少立坐取解興坐不祭卒解奠之興再拜稽首左還南面坐取解洗南面反奠于其所北面立司射適次袒決遂執弓挾乘矢於弓外見鏃於射右巨指鉤弦自阼階前曰爲政請射遂告曰大夫與大夫士御於大夫遂適西階前東面右顧命有司納射器射器皆入君之弓矢適東堂賓之弓矢與中籌豐皆止于西堂下衆弓矢不挾摠衆弓矢幅皆適次而俟工人士與梓人升自北階兩楹之間疏數容弓若丹若墨度尺而午射止蒞之卒畫自北階下司宮埽所畫物自北階下大史俟于所設中之西東面以聽政司射西面誓之曰公射大侯大夫射參士射于射者非其侯中之不獲卑者與尊者爲耦不異侯大史許諾遂比三耦三耦俟

于次北西面北上司射命上射曰某御於子命下射曰子與某子射卒遂命三耦取
弓矢于次司射入于次擗三挾一个出于次西面揖當階北面揖及階揖升堂揖當
物北面揖及物揖由下物少退誘射射三侯將乘矢始射干又射參大侯再發卒射
北面揖及階揖降如升射之儀遂適堂西改取一个挾之遂取扑擗之以立于所設
中之西南東面司馬師命負侯者執旌以負侯負侯者皆適侯執旌負侯而侯司射
適次作上耦射司射反位上耦出次面面揖進上射在左並行當階北面揖及階揖
上射先升三等下射從之中等上射升堂少左下射升上射揖並行皆當其物北面
揖及物揖皆左足履物還視侯中合足而侯司馬正適次袒決遂執弓右挾之出升
自西階適下物立于物閒左執肘右執簫南揚弓命去侯負侯皆許諾以宮趨直西
及乏南又諾以商至乏聲止授獲者退立于西方獲者興共而侯司馬正出于下射
之南還其後降自西階遂適次釋弓說決拾襲反位司射進與司馬正交于階前相
左由堂下西階之東北面視上射命曰毋射獲毋獵獲上射揖司射退反位乃射上
射既發挾矢面后下射射拾發以將乘矢獲者坐而獲舉旌以宮偃旌以商獲而未

釋獲卒射右挾之北面揖揖如升射上射降三等下射少右從之中等並行上射于左與升射者相左交于階前相揖適次釋弓說決拾襲反位三耦卒射亦如之司射去扑倚于階西適階下北面告于公曰三耦卒射反摺扑反位司馬正袒決遂執弓右挾之出與司射交于階前相左升自西階自右物之後立于物間西南面揖弓命取矢負俟許諾如初去俟皆執旌以負其俟面俟司馬正降自西階北面命設楛小臣師設楛司馬正東面以弓爲畢旣設楛司馬正適次釋弓說決拾襲反位小臣坐委矢于楛北括司馬師坐乘之卒若矢不備則司馬正又袒執弓升命取矢如初曰取矢不索乃復求矢加于楛卒司馬正進坐左右撫之興反位司射適西階西倚扑升自西階東面請射于公公許遂適西階上命賓御于公諸公卿則以耦告于上大夫則降卽位而后告司射自西階上北面告于大夫曰請降司射先降摺扑反位大夫從之降適次立于三耦之南西面北上司射東面于大夫之西比耦大夫與大夫命上射曰某御于子命下射曰子與某子射卒遂比衆耦衆耦立于大夫之南西面北上若有士與大夫爲耦則以大夫之耦爲上命大夫之耦曰子與某子射告於

大夫曰某御於子命衆耦如命三耦之辭諸公卿皆未降遂命三耦各與其耦拾取矢皆袒決遂執弓右挾之一耦出西面揖當楅北而揖及楅揖上射東面下射面面
上射揖進坐橫弓卻手自弓下取一個兼諸射與順羽且左還毋周反面揖下射進
坐橫弓覆手自弓上取一個兼諸射與順羽且左還毋周反面揖既拾取矢楅之兼
挾乘矢皆內還南面揖適楅南皆左還北面揖搯三挾一個揖以耦左還上射於左
退者與進者相左相揖退釋弓矢于次說決拾襲反位二耦拾取矢亦如之後者遂
取誘射之矢兼乘矢而取之以授有司于次中皆襲反位司射作射如初一耦揖升
如初司馬命去侯負侯許諾如初司馬降釋弓反位司射猶挾一個去扑與司馬交
于階前適阼階下北面請釋獲于公公許反搯扑遂命釋獲者設中以弓爲畢北面
大史釋獲小臣師執中先首坐設之東面退大史實八筭于中橫委其餘于中西與
共而俟司射西面命曰中離維綱揚觸楅復公則釋獲衆則不與唯公所中中三俟
皆獲釋獲者命小史小史命獲者司射遂進由堂下北面視上射命曰不貫不釋上
射揖司射退反位釋獲者坐取中之八筭改實八筭與執而俟乃射若中則釋獲者

每一個釋一筭上射於右下射於左若有餘筭則反委之又取中之八筭改實八筭于中與執而俟

三耦卒射賓降取弓矢于堂西諸公卿則適次繼三耦以南公將射則司馬師命負侯皆執其旌以負其侯而俟司馬師反位隸僕人壻侯道司射去扑適阼階下告射于公公許適西階東告于賓遂搯扑反位小射正一人取公之決拾于東坫上一小射正授弓拂弓皆以俟于東堂公將射則賓降適堂西袒決遂執弓搯三挾一个升自西階先待于物北一筭東面立司馬升命去侯如初還右乃降釋弓反位公就物小射正奉決拾以筭大射正執弓皆以從於物小射正坐奠筭于物南遂拂以巾取決與贊設決朱極三小臣正贊袒公袒朱襦卒袒小臣正退俟于東堂小射正又坐取拾與贊設拾以筭退奠于坫上復位大射正執弓以袂順左右隄上再下壹左執射右執簫以授公公親揉之小臣師以巾內拂矢而授矢于公稍屬大射正立于公後以矢行告于公下曰畱上曰揚左右曰方公既發大射正受弓而俟拾發以將乘矢公卒射小臣師以巾退反位大射正受弓小射正以筭受決拾退奠于坫上復位

大射正退反司正之位小臣正贊襲公還而后賓降釋弓于堂西反位于階西東面公卽席司正以命升賓賓升復筵而后卿大夫繼射諸公卿取弓矢于次中袒決遂執弓搯三挾一个出西面揖揖如三耦升射卒射降如三耦適次釋弓說決拾襲反位衆皆繼射釋獲皆如初卒射釋獲者遂以所執餘獲適阼階下北面告于公曰左右卒射反位坐委餘獲于中西興共而俟司馬袒執弓升命取矢如初負侯許諾以旌負侯如初司馬降釋弓如初小臣委矢于楅如初賓諸公卿大夫之矢皆異束之以茅卒正坐左右撫之進束反位賓之矢則以授矢人于西堂下司馬釋弓反位而后卿大夫升就席司射適階西釋弓去扑襲進由中東立于中南北面視筭釋獲者東面于中西坐先數右獲二筭爲純一純以取實于左手十純則縮而委之每委異之有餘純則橫諸下一筭爲奇奇則又縮諸純下與自前適左東面坐坐筭斂筭實于左手一純以委十則異之其餘如右獲司射復位釋獲者遂進取賢獲執之由阼階下北面告於公若右勝則曰右賢於左若左勝則曰左賢於右以純數告若有奇者亦曰奇若左右鈞則左右各執一筭以告曰左右鈞還復位坐兼斂筭實八筭于

中委其餘于中西與共面俟司射命設豐司宮士奉豐由西階升北面坐設于西楹西降復位勝者之弟子洗觶升酌散南面坐奠于豐上降反位司射遂袒執弓挾一个搯扑東面于三耦之西命三耦及衆射者勝者皆袒決遂執張弓不勝者皆襲說決拾卻左手右加弛弓于其上遂以執射司射先反位三耦及衆射者皆升飲射爵于西階上小射正作升飲射爵者如作射一耦出揖如升射及階勝者先升升堂少右不勝者進北面坐取豐上之觶與少退立卒觶進坐奠于豐下與揖不勝者先降與升飲者相左交于階前相揖適次釋弓襲反位僕人師繼酌射爵取觶實之反奠于豐上退俟于序端升飲者如初三耦卒飲若賓諸公卿大夫不勝則不降不執弓耦不升僕人師洗升實觶以授賓諸公卿大夫受觶于席以降適西階上北面立飲卒觶授執爵者反就席若飲公則侍射者降洗角觶升酌散降拜公降一等小臣正辭賓升再拜稽首公荅再拜賓坐祭卒爵再拜稽首公荅再拜賓降洗象觶升酌膳以致下拜小臣正辭升再拜稽首公荅再拜公卒觶賓進受觶降洗散觶升實散下拜小臣正辭升再拜稽首公荅再拜賓坐不祭卒觶降奠于籩階西東面立擯者以

命升賓賓升就席若諸公卿大夫之耦不勝則亦執弛弓特升飲衆皆繼飲射爵如三耦射爵辯乃徹豐與解司宮尊侯于服不之東北兩獻酒東面南上皆加勺設洗于尊西北篚在南東肆實一散于篚司馬正洗散遂實爵獻服不服不侯西北三步北面拜受爵司馬正西而拜送爵反位宰夫有司薦庶子設折俎卒錯獲者適右个薦俎從之獲者右執爵右祭薦俎二手祭酒適左个祭如右个中亦如之卒祭左个之西北三步東而設薦俎立卒爵司馬師受虛爵洗獻隸僕人與巾車獲者皆如大侯之禮卒司馬師受虛爵奠于篚獲者皆執其薦庶子執俎從之設于乏少南服不復負侯而侯司射適階西去扑適堂西釋弓說決拾襲適洗洗觚升賓之降獻釋獲者于其位少南薦脯醢折俎皆有祭釋獲者薦右東面拜受爵司射北面拜送爵釋獲者就其薦坐左執爵右祭脯醢興取肺坐祭遂祭酒興司射之西北而立卒爵不拜既爵司射受虛爵奠于篚釋獲者少西辟薦反位司射適堂西袒決遂取弓挾一个適階西搯扑以反位司射倚扑于階西適阼階下北面請射于公如初反搯扑適次命三耦皆袒決遂執弓序出取矢司射先反位三耦拾取矢如初小射正作取矢

如初三耦既拾取矢諸公卿大夫皆降如初位與耦入於次皆袒決遂執弓皆進當
楅進坐說矢東上射東面下射西面拾取矢如三耦若士與大夫爲耦士東面大夫
西面大夫進坐說矢東退反位耦揖進坐兼取乘矢與順羽且左適毋周反面揖大
夫進坐亦兼取乘矢如其耦北面搯三挾一个揖進大夫與其耦皆適次釋弓說決
拾襲反位諸公卿升就席衆射者繼拾取矢皆如三耦遂入于次釋弓矢說決拾襲
反位司射猶挾一个以作射如初一耦揖升如初司馬升命去俟負侯許諾司馬降
釋弓反位司射與司馬交于階前倚扑于階面適阼階下北面請以樂于公公許司
射反搯扑東面命樂正曰命用樂樂正曰諾司射遂適堂下北面視上射命曰不鼓
不釋上射揖司射退反位樂正命大師曰奏鯉首閒若一大師不興許諾樂正反位
奏鯉首以射三耦卒射賓待于物如初公樂作面后就物稍屬不以樂志其他如初
儀卒射如初賓就席諸公卿大夫衆射者皆繼射釋獲如初卒射降反位釋獲者執
餘獲進告左右卒射如初司馬升命取矢負侯許諾司馬降釋弓反位小臣委矢司
馬師乘之皆如初司射釋弓視筭如初釋獲者以賢獲與鈞告如初復位司射命設

豐實解如初遂命勝者執張弓不勝者執弛弓升飲如初卒退豐與解如初司射猶袒決遂左執弓右執一个兼諸弦面鏃適次命拾取矢如初司射反位三耦及諸公卿大夫衆射者皆袒決遂以拾取矢如初矢不挾兼諸弦面鏃退適次皆授有司弓矢襲反位卿大夫升就席司射適次釋弓說決拾去扑襲反位司馬正命退褊解綱小臣師退褊巾車量人解左下綱司馬師命獲者以旌與薦俎退司射命釋獲者退中與筭而俟公又舉奠解唯公所賜若賓若長以旅于西階上如初大夫卒受者以虛解降奠于饗反位司馬正升自西階東楹之東北面告于公請徹俎公許遂適西階上北面告于賓賓北面取俎以出諸公卿取俎如賓禮遂出授從者于門外大夫降復位庶子正徹公俎降自阼階以東賓諸公卿皆入門東面北上司正升賓賓諸公卿大夫皆說屨升就席公以賓及卿大夫皆坐乃安羞庶羞大夫祭薦司正升受命皆命公曰衆無不醉賓及諸公卿大夫皆興對曰諾敢不醉皆反位坐主人洗酌獻士于西階上士長升拜受解主人拜送士坐祭立飲不拜既爵其他不拜坐祭立飲乃薦司正與射人于解南北而東上司正爲上辯獻士士既獻者立于東方西面

北上乃薦士祝史小臣師亦就其位而薦之主人就士旅食之尊而獻之旅食不拜受爵坐祭立飲主人執虛爵奠于篚復位賓降洗升媵解于公酌散下拜公降一等小臣正辭賓升再拜稽首公荅再拜賓坐祭卒爵再拜稽首公荅再拜賓降洗象觚升酌膳坐奠于薦南降拜小臣正辭賓升成拜公荅拜賓反位公坐取賓所媵解與唯公所賜受者如初受酬之禮降更爵洗升酌膳下再拜稽首小臣正辭升成拜公荅拜乃就席坐行之有執爵者唯受于公者拜司正命執爵者爵辯卒受者興以酬士大夫卒受者以爵興西階上酬士士升大夫奠爵拜受荅拜大夫立卒爵不拜實之士拜受大夫拜送士旅于西階上辯士旅酌若命曰復射則不獻庶子司射命射唯欲卿大夫皆降再拜稽首公荅拜壹發中三侯皆獲主人洗升自西階獻庶子于阼階上如獻士之禮辯獻降洗遂獻左右正與內小臣皆於阼階上如獻庶子之禮無算爵士也有執膳爵者有執散爵者執膳爵者酌以進公公不拜受執散爵者酌以之公命所賜所賜者興受爵降席下奠爵再拜稽首公荅再拜受賜爵者以爵就席坐公卒爵然後飲執膳爵者受公爵酌反奠之受賜者興授執散爵者執散爵者

乃酌行之唯受子公者拜卒爵者興以酬士于西階上士升大夫不拜乃飲實爵士不拜受爵大夫就席士旅酌亦如之公有命徹饗則賓及諸公卿大夫皆降面階下北面東上再拜稽首公命小臣正辭公荅拜大夫皆辟升反位士終旅於上如初無筭樂宵則庶子執燭於阼階上司宮執燭於西階上甸人執大燭於庭闈人爲燭於門外賓醉北面坐取其薦脯以降奏陔賓所執脯以賜鍾人于門內霑遂出卿大夫皆出公不送公入寤

聘禮

聘禮君與卿圖事遂舍使者使者再拜稽首辭君不許乃退既圖事戒上介亦如之宰命司馬戒衆介衆介皆逆命不辭宰書幣命宰夫官具及期夕幣使者朝服帥衆介夕管人布幕于寢門外官脯幣皮北首西上加其奉於左皮上馬則北面奠幣于其前使者北面衆介立于其左東上卿大夫在幕東西面北上宰入告具于君君朝服出門左南鄉史讀書展幣宰執書告備具子君授使者使者受書授上介公揖入官載其幣舍于朝上介視載者所受書以行厥明賓朝服釋幣于廟有司筵几于室

中祝先入主人從入主人在右再拜祝告又再拜釋幣制玄纁束奠于几下出主人立于戶東祝立于牖西又入取幣降卷幣實于筭埋于西階東又釋幣于行遂受命上介釋幣亦如之上介及衆介俟于使者之門外使者載旛帥以受命于朝君朝服南鄉卿大夫西面北上君使卿進使者使者入及衆介隨人北面東上君揖使者進之上介立于其左接聞命買人西面坐啟櫝取圭垂纁不起而授宰宰執圭屈纁自公左授使者使者受圭同面垂纁以受命既述命同面授上介上介受圭屈纁出授買人衆介不從受享束帛加璧受夫人之聘璋享玄纁束帛加琮皆如初遂行舍于郊斂旛若過邦至于竟使次介假道束帛將命于朝曰請帥奠幣下大夫取以人舍出許遂受幣餼之以其禮上賓大牢積唯芻禾介皆有餼士帥沒其竟誓于其竟賓南面上介西面衆介北面東上史讀書司馬執策立于其後未入竟壹肆爲遺壇畫階帷其北無宮朝服無主無執也介皆與北面西上習享士執庭實習夫人之聘享亦如之習公事不習私事及竟張旛誓乃謁關人關人問從者幾人以介對君使士請事遂以入竟人竟斂旛乃展布幕賓朝服立于幕東西面介皆北面東上買人北

面坐拭圭遂執展之上介北面視之退復位退圭陳皮北首西上又拭璧展之會諸其幣加于左皮上上介視之退馬則幕南北面奠幣于其前展夫人之聘享亦如之賈人告于上介上介告于賓有司展羣幣以告及郊又展如初及館展幣於賈人之館如初賓至于近郊張旛君使下大夫請行反君使卿朝服用束帛勞上介出請入告賓禮辭迎于舍門之外再拜勞者不荅拜賓揖先入受于舍門內勞者奉幣入東面致命賓北面聽命還少退再拜稽首受幣勞者出授老幣出迎勞者勞者禮辭賓揖先入勞者從之乘皮設賓用束錦儻勞者勞者再拜稽首受賓再拜稽首送幣勞者揖皮出乃退賓送再拜

夫人使下大夫勞以二竹篋方玄被纒裏有蓋其實棗蒸栗擇兼執之以進賓受棗大夫二手授栗賓之受如初禮儻之如初下大夫勞者遂以賓入至于朝主人曰不腆先君之祧既拚以俟矣賓曰俟閒大夫帥至于館卿致館賓迎再拜卿致命賓再拜稽首卿退賓送再拜宰夫朝服設餼飪一牢在西鼎九羞鼎三脍一牢在東鼎七堂上之饌八西夾六門外米禾皆二十車薪芻倍禾上介飪一牢在西鼎七羞鼎三

堂上之饌六門外米禾皆十車薪芻倍禾衆介皆少牢厥明訝賓于館賓皮弁聘至于朝賓入于次乃陳幣卿爲上擯大夫爲承擯士爲紹擯擯者出請事公皮弁迎賓于大門內大夫納賓賓入門左公再拜賓辟不荅拜公揖入每門每曲揖及廟門公揖入立于中庭賓立接西塾几筵旣設擯者出請命賈入東面坐取積取圭垂纁不起而授上介上介不襲執圭屈纁授賓襲執圭擯者入告出辭玉納賓賓入門左介皆入門左北面西上三揖至于階三讓公升二等賓升西楹西東面擯者退中庭賓致命公左還北鄉擯者進公當楣再拜賓三退負序公側襲受玉于中堂與束楹之間擯者退負束塾而立賓降介逆出賓出公側授宰玉祿降立

擯者出請賓裼奉束帛加璧享擯者入告出許庭實皮則攝之毛在內內攝之入設也賓入門左揖讓如初升致命張皮公再拜受幣士受皮者自後右客賓出當之坐攝之公側授宰幣皮如入右首而東聘于夫人用璋享用琮如初禮若有言則以束帛如享禮擯者出請事賓告事畢賓奉束錦以請覲擯者入告出辭請禮賓賓禮辭聽命擯者入告宰夫徹几改筵公出迎賓以入揖讓如初公升側受几于序端宰夫

內拂几三奉兩端以進公東南鄉外拂几三卒振袂中攝之進西鄉擯者告賓進訝受几于筵前東面俟公壹拜送賓以几辟北面設几不降階上蒼再拜稽首宰夫實解以醴加柶于解面枋公側受醴賓不降壹拜進筵前受醴復位公拜送醴宰夫薦籩豆脯醢賓升筵擯者退負東塾賓祭脯醢以柶祭醴三庭實設降筵北面以柶兼諸解尚攝坐啐醴公用東帛建柶北面奠子薦東擯者進相幣賓降辭幣公降一等辭粟階升聽命降拜公辭升再拜稽首受幣當東楹北面退東面俟公壹拜賓降也公再拜賓執左馬以出上介受賓幣從者訝受馬賓覲奉束錦總乘馬二人贊入門右北面奠幣再拜稽首擯者辭賓出擯者坐取幣出有司二人牽馬以從出門西面于東塾南擯者請受賓禮辭聽命牽馬右之入設賓奉幣入門左介皆入門左西上公揖讓如初升公北面再拜賓三退反還負序振幣進授當東楹北面士受馬者自前還牽者後適其右受牽馬者自前西乃出賓降階東拜送君辭拜也君降一等辭擯者曰寡君從子雖將拜起也粟階升公西鄉賓階上再拜稽首公少退賓降出公側授宰幣馬出公降立擯者出請上介奉束錦士介四人皆奉玉錦束請覲擯者入

告出許上介奉幣餽皮二人贊皆入門右東上奠幣皆再拜稽首擯者辭介逆出擯者執上幣士執衆幣有司二人舉皮從其幣出請受委皮南面執幣者西面北上擯者請受介禮辭聽命皆進訝受其幣上介奉幣皮先入門左奠皮公再拜介振幣自皮西進北面授幣退復位再拜稽首送幣介出宰自公左受幣有司二人坐舉皮以東擯者又納士介士介入門右奠幣再拜稽首擯者辭介逆出擯者執上幣以出禮請受賓固辭公荅再拜擯者出立于門中以相拜士介皆辟士三人東上坐取幣立擯者進宰夫受幣于中庭以東執幣者序從之擯者出請賓告事畢擯者入告公出送賓及大門內公問君賓對公再拜公問大夫賓對公勞賓賓再拜稽首公荅拜公勞介介皆再拜稽首公荅拜賓出公再拜送賓不顧賓請有事於大夫公禮辭許賓卽館卿大夫勞賓賓不見大夫奠鴈再拜上介受勞上介亦如之君使卿韋介歸饗餽五牢上介請事賓朝服禮辭有司入陳饗餼一牢鼎九設于西階前陪鼎當內廡東面北上上當碑南陳牛羊豕魚腊腸胃同鼎膚鮮魚鮮腊設焉燕臠臠臠臠蓋陪牛羊豕腥二牢鼎二七無鮮魚鮮腊設于阼階前面面南陳如飪鼎二列堂上八豆設

于戶西西陳皆二以並東上韭菹其南醯醢屈八簋繼之黍其南稷錯六銅繼之牛以西羊豕豕南牛以東羊豕兩簋繼之粱在北八壺設于西序北上二以並南陳西夾六豆設于西墉下北上韭菹其東醢醢屈六簋繼之黍其東稷錯四銅繼之牛以南羊豕東豕豕以北牛兩簋繼之粱在西皆二以並南陳六壺西上二以並東陳饌于東方亦如之西北上壺東上西陳醢醢百饗夾碑十以爲列醢在東餼二牢陳于門西北面東上牛以西羊豕豕西牛羊豕米百筥筥半斛設于中庭十以爲列北上黍粱稻皆二行稷四行門外米三十車車乘有五數設于門車爲三列東陳禾三十車車三秬設于門西西陳薪芻倍禾賓皮弁迎大夫于外門外再拜大夫不荅拜揖入及廟門賓揖入大夫奉束帛入三揖皆行至于階讓大夫先升一等賓從升堂北面聽命大夫車面致命賓降階西再拜稽首拜餼亦如之大夫辭升成拜受幣堂中西北面大夫降出賓降授老幣出迎大夫大夫禮辭許入揖讓如初賓升一等大夫從升堂庭實設馬乘賓降堂受老束錦大夫止賓奉幣西面大夫東面賓致幣大夫對北面當楣再拜稽首受幣于楹閒南面退東面俟賓再拜稽首送幣大夫降執

左馬以出賓送于外門外再拜明日賓拜于朝拜饗與餼皆再拜稽首上介饗餼三牢任一牢在西鼎七羞鼎三腥一牢在東鼎七堂上之饌六西夾亦如之筥及籩如上賓餼一牢門外米禾視死牢牢十車薪芻倍禾凡其實與陳如上賓下大夫韋弁用束帛致之上介韋弁以受如賓禮儀之兩馬束錦士介四人皆餼大牢米百筥設于門外宰夫朝服牽牛以致之士介朝服北面再拜稽首受無擯賓朝服問卿卿受于祖廟下大夫擯擯者出請事大夫朝服迎于外門外再拜賓不荅拜揖大夫先入每門每曲揖及廟門大夫揖入擯者請命庭實設四皮賓奉束帛入三揖皆行至于階讓賓升一等大夫從升堂北面聽命賓東面致命大夫降階西再拜稽首賓辭升成拜受幣堂中西北面賓降出大夫降授老幣無擯擯者出請事賓面如覲幣賓奉幣庭實從入門右大夫辭賓遂左庭實設揖讓如初大夫升一等賓從之大夫西面賓稱面大夫對北面當楣再拜受幣于楹間南面退西面立賓當楣再拜送幣降出大夫降授老幣擯者出請事上介特面幣如覲介奉幣皮二人贊入門右奠幣再拜大夫辭擯者反幣庭實設介奉幣入大夫揖讓如初介升大夫再拜受介降拜大夫

降辭介升再拜送幣擯者出請衆介面如覲幣入門右奠幣皆再拜大夫辭介逆出
擯者執上幣出禮請受賓辭大夫荅再拜擯者執上幣立于門中以相拜士介皆辟
老受擯者幣于中庭士三人坐取羣幣以從之擯者出請事賓出大夫送于外門外
再拜賓不願擯者退大夫拜辱下大夫嘗使至者幣及之上介朝服三介問下大夫
下大夫如卿受幣之禮其面如賓面于卿之禮大夫若不見君使大夫各以其爵爲
之受如主人受幣禮不拜夕夫人使下大夫韋弁歸禮堂上籩豆六設于戶東西上
二以並東陳壺設于東序北上二以並南陳醲黍清皆兩壺大夫以束帛致之賓如
受饗之禮饋之乘馬束錦上介四豆四籩四壺受之如賓禮饋之兩馬束錦明日賓
拜禮於朝大夫饋賓大牢米八筐賓迎再拜老牽牛以致之賓再拜稽首受老退賓
再拜送上介亦如之衆介皆少牢米六筐皆士牽羊以致之公於賓壹食再饗燕與
羞俶獻無常數賓介皆明日拜于朝上介壹食壹饗若不親食使大夫各以其爵朝
服致之以侑幣如致饗無饋致饗以酬幣亦如之大夫於賓壹饗壹食上介若食若
饗若不親饗則公作大夫致之以酬幣致食以侑幣

君使卿皮弁還玉于賄賓皮弁襲迎于外門外不拜帥大夫以入大夫升自西階鉤楹賓自碑內聽命升自西階自左南面受圭退負右房而立大夫降中庭賓降自碑內東面授上介于阼階東上介出請賓迎大夫還璋如初入賓裼迎大夫賄用束紡禮玉束帛乘皮皆如還玉禮大夫出賓送不拜公館賓賓辟上介聽命聘享夫人之聘享問大夫送賓公皆再拜公退賓從請命于朝公辭賓退賓三拜乘禽於朝訝聽之遂行舍于郊公使卿贈如覲幣受于舍門外如受勞禮無僮使下大夫贈上介亦如之使士贈衆介如其覲幣大夫親贈如其面幣無僮贈上介亦如之使入贈衆介如其面幣士送至于竟使者歸及郊請反命朝服載旛乃入乃入陳幣于朝西上上賓之公幣私幣皆陳上介公幣陳他介皆否束帛各加其庭實皮左公南鄉卿進使者使者執圭垂纁北面上介執璋屈纁立于其左反命曰以君命聘于某君某君受幣于某宮某君再拜以享某君某君再拜宰自公左受玉受上介璋致命亦如之執賄幣以告曰某君使某于賄授宰禮玉亦如之執禮幣以盡言賜禮公曰然面不善乎授上介幣再拜稽首公荅再拜私幣不告君勞之再拜稽首君荅再拜若有獻

則曰某君之賜也君其以賜乎上介徒以公賜告如上賓之禮君勞之再拜稽首君
荅拜勞士介亦如之君使宰賜使者幣使者再拜稽首賜介介皆再拜稽首乃退介
皆送至于使者之門乃退揖使者拜其辱釋幣于門乃至于禰筵几于室薦脯醢觴
酒陳席于阼薦脯醢三獻一人舉爵獻從者行酬乃出上介亦如之聘遭喪入竟
則遂也不郊勞不筵几不禮賓主人畢歸禮賓唯饗餼之受不賄不禮玉不贈遭夫
人世子之喪君不受使大夫受于廟其他如遭君喪遭喪將命于大夫主人長衣練
冠以受聘君若薨于後入竟則遂赴者未至則哭于巷衰于館受禮不受饗食赴者
至則衰而出唯稍受之歸執圭復命于殯升自西階不升堂子卽位不哭辯復命如
聘子臣皆哭與介入北鄉哭出袒括髮人門右卽位踊若有私喪則哭于館衰而居
不饗食歸使衆介先衰而從之

賓入竟而死遂也主人爲之具而殯介攝其命君弔介爲主人主人歸禮幣必以用
介受賓禮無辭也不饗食歸介復命柩止于門外介卒復命出奉柩送之君弔卒殯
若大夫介卒亦如之士介死爲之棺斂之君不弔焉若賓死未將命則旣斂于棺造

于朝介將命若介死歸復命唯上介造于朝若介死雖士介賓既復命往卒殯乃歸小聘曰問不享有獻不及夫人主人不筵几不禮面不升不郊勞其禮如爲介三介記久無事則聘焉若有故則卒聘束帛加書將命百名以上書於策不及百名書於方主人使人與客讀諸門外客將歸使大夫以其束帛反命于館明日君館之既受行出遂見宰問幾月之資使者既受行日朝同位出祖釋軼祭酒脯乃飲酒于其側所以朝天子圭與纁皆九寸剡上寸半厚半寸博三寸纁三采六等朱白倉問諸侯朱纁纁八寸皆玄纁繫長尺絢組問大夫之幣俟于郊爲肆又齋皮馬辭無常孫而說辭多則史少則不達辭苟足以達義之至也辭曰非禮也敢對曰非禮也敢辭卿館於大夫大夫館於士士館於工商管人爲客三日具沐五日具浴飧不致賓不拜沐浴而食之卿大夫訝大夫士訝士皆有訝賓卽館訝將公命又見之以其摯賓既將公事復見之以其摯凡四器者唯其所寶以聘可也宗人授次次以帷少退于君之次上介執圭如重授賓賓入門皇升堂讓將授志趨授如爭承下如送君還而后退下階發氣怡焉再三舉足又趨及門正焉執圭入門鞠躬焉如恐失之及享發氣

焉盈容衆介北面踰焉私覲愉焉出如舒鴈皇且行入門主敬升堂主慎凡庭賓隨入左先皮馬相閒可也賓之幣唯馬出其餘皆束多貨則傷于德幣美則沒禮賄在聘于賄凡執玉無藉者襲禮不拜至醴尊于東箱瓦大一有豐薦脯五臠祭半臠橫之祭醴再扱始扱一祭卒再祭主人之庭實則主人遂以出賓之士訝受之既覲賓若私獻奉獻將命擯者入告出禮辭賓東面坐奠獻再拜稽首擯者東面坐取獻舉以入告出禮請受賓固辭公荅再拜擯者立于闕外以相拜賓辟擯者授宰夫于中庭若兄弟之國則問夫人若君不見使大夫受自下聽命自西階升受負右房面立賓降亦降不禮幣之所及皆勞不釋服賜饗唯羹飪篋一尸若昭若穆僕爲祝祝曰孝孫某孝子某薦嘉禮于皇祖某甫皇考某子如饋食之禮假器於大夫盼肉及庖車聘日致饗明日問大夫夕夫人歸禮既致饗旬而稍宰夫始歸乘禽日如其饗餼之數士中日則二雙凡獻執一雙委其餘于面禽羞俶獻比歸大禮之日既受饗餼請觀訝帥之自下門入各以其爵朝服士無饗無饗者無擯大夫不敢辭君初爲之辭矣凡致禮皆用其饗之加籩豆無饗者無饗禮凡餼大夫黍梁稷筐五斛既將

公事賓請歸凡賓拜于朝訝聽之燕則上介爲賓賓爲苟敬宰夫獻無行則重賄反幣曰子以君命在寡君寡君拜君命之辱君以社稷故在寡小君拜君貺寡君延及二三老拜又拜送賓於館堂楹閒釋四皮束帛賓不致主人不拜大夫來使無罪饗之過則餽之其介爲介有大客後至則先客不饗食致之唯大聘有几筵十斗曰斛十六斗曰簋十簋曰秉二百四十斗西秉曰筥十筥曰稷十稷曰秬西百秉爲一秬

公食大夫禮

公食大夫之禮使大夫戒各以其爵上介出請入告三辭賓出拜辱大夫不荅拜將命賓再拜稽首大夫還賓不拜送遂從之賓朝服卽位子大門外如聘卽位具羹定甸入陳鼎七當門南面西上設扇甬鼎若東若編設洗如饗小臣具槃匱在東堂下宰夫設筵加席几無尊飲酒漿飲俟于東房凡宰夫之具饌于東房公如賓服迎賓于大門內大夫納賓公入門左公再拜賓辟再拜稽首公揖入賓從及廟門公揖入賓入三揖至于階三讓公升二等賓升大夫立于東夾南西面北上士立于門東北面西上小臣東堂下南面西上宰東夾北西面南上內官之士在宰東北西面南上

介門西北面西上公當楣北鄉至再拜賓降也公再拜賓西階東北面荅拜擯者辭拜也公降一等辭曰寡君從子雖將拜興也賓栗階升不拜命之成拜階上北面再拜稽首士舉鼎去幕于外次入陳鼎于碑南面西上右人抽扇坐奠于鼎西南順出自鼎西左人待載雍人以俎入陳于鼎南旅人南面加匕于鼎退大夫長盥洗東南西面北上序進盥退者與進者交于前卒盥序進南面匕載者西面魚腊餼載體進奏魚七縮俎寢右腸胃七同俎倫膚七腸胃膚皆橫諸俎垂之大夫既匕奠于鼎逆退復位公降盥賓降公辭卒盥公壹揖壹讓公升賓升宰夫自東房授醯醬公設之賓辭北面坐遷而東遷所公立于序內西鄉賓立于階西疑立宰夫自東房薦豆六設于醬東西上韭菹以東醯醢昌本昌本南麋醬以西菁菹鹿麇士設俎于豆南西上牛羊豕魚在牛西腊腸胃亞之膚以爲特旅人取匕甸人舉鼎順出奠于其所宰夫設黍稷六簋于俎西二以並東北上黍當牛俎其西稷錯以終南陳大羹湑不和實于鐙宰右執鐙左執蓋由門入升自阼階盡階不升堂授公以蓋降出入反位公設之于醬西賓辭坐遷之宰夫設鉶四于豆西東上牛以西羊羊南豕豕以東牛

飲酒賓于解加于豐宰夫右執解左執豐進設于豆東宰夫東面坐啟蓋會各卻于其西贊者負東房南面告具于公公再拜揖食賓降拜公辭賓升再拜稽首賓升席坐取韭菹以辯擗于醢上豆之閒祭贊者東面坐取黍實于左手辯又取稷辯反于右手輿以授賓賓祭之三牲之肺不離贊者辯取之壹以授賓賓興受坐祭挽手扱上鉶以柶辯擗之上鉶之閒祭祭飲酒於上豆之閒魚腊醬醢不祭宰夫授公飯梁公設之于涪西賓北面辭坐遷之公與賓皆復初位宰夫膳稻于梁四土羞庶羞皆有大蓋執豆如宰先者反之由門入升自西階先者一人升設于稻南蓋西閒容人旁四列西北上臠以東臠臠牛炙炙南醢以西牛臠醢牛鮪鮪南羊炙以東羊臠醢豕炙炙南醢以西豕臠芥醬魚膾衆人騰羞者盡階不升堂授以蓋降出贊者負東房告備于公贊升賓賓坐席末取梁卽稻祭于醬涪閒贊者北面坐奠取庶羞之大輿一以授賓賓受兼豈祭之賓降拜公辭賓升再拜稽首公荅再拜賓北面自閒坐左擁簠梁右執涪以降公辭賓面面坐奠于階西東面對西面坐取之栗階升北面反奠于其所降辭公公許賓升公揖退于箱擯者退負東塾面立賓坐遂卷加席公

不辭賓三飯以涪醬宰夫執觶漿飲與其豐以進賓挽手興受宰夫設其豐于稻西庭實設賓坐祭遂飲奠於豐上公受宰夫東帛以侑西鄉立賓降筵北面摺者進相幣賓降辭幣升聽命降拜公辭賓升再拜稽首受幣當東楹北面退西楹西東面立公壹拜賓降也公再拜介逆出賓北面揖執庭實以出公降立上介受賓幣從者訝受皮賓入門左沒霑北面再拜稽首公辭揖讓如初升賓再拜稽首公荅再拜賓降辭公如初賓升公揖退于箱賓卒食會飯三飲不以醬涪挽手興北面坐取梁與醬以降西面坐奠于階西東面再拜稽首公降再拜介逆出賓出公逆于大門內再拜賓不顧有司卷三牲之俎歸于賓館魚腊不與

明日賓朝服拜賜于朝拜食與侑幣皆再拜稽首訝聽之上大夫八豆八簋六饈九俎魚腊皆二俎魚腸胃倫膚若九若十有一下大夫則若七若九庶羞西東毋過四列上大夫庶羞二十加於下大夫以雉兔鷄鵝若不親食使大夫各以其爵朝服以侑幣致之豆實實于饗陳于楹外二以並北陳簋實實于筐陳于楹內兩楹面二以並南陳庶羞陳于碑內庭實陳于碑外牛羊豕陳于門內西方東上賓朝服以受如

受饗禮無摺明日賓朝服以拜賜于朝訝聽命大夫相食親戒速迎賓于門外拜至皆如饗拜降盥受醬滫侑幣束錦也皆自阼階降堂受授者升一等賓止也賓執梁與滫之西序端主人辭賓反之卷加席主人辭賓反之辭幣降一等主人從受侑幣再拜稽首主人送幣亦然辭於主人降一等主人從卒食徹于西序端東面再拜降出其他皆如公食大夫之禮若不親食則公作大夫朝服以侑幣致之賓受于堂無摺記不宿戒戒不速不授几無阼席亨于門外東方司宮具几與蒲筵常繙布純加萑席尋玄帛純皆卷自末宰夫筵出自束房賓之乘車在大門外西方北面立劓菴牛養羊苦豕薇皆有滑贊者盥從俎升簠有蓋罍凡炙無醬上大夫蒲筵加萑席其純皆如下大夫純卿摺由下上贊下大夫也上大夫庶羞酒飲漿飲庶羞可也拜食與侑幣皆再拜稽首

覲禮

覲禮至于郊王使人皮弁用璧勞侯氏亦皮弁迎于帷門之外再拜使者不荅拜遂執玉三揖至于階使者不讓先升侯氏升聽命降再拜稽首遂升受玉使者左還面

立侯氏還璧使者受侯氏降再拜稽首使者乃出侯氏乃止使者使者乃入侯氏與之讓升侯氏先升授几侯氏拜送几使者設几荅拜侯氏用束帛乘馬僎使者使者再拜受侯氏再拜送幣使者降以左驂出侯氏送于門外再拜侯氏遂從之天子賜舍曰伯父女順命于王所賜伯父舍侯氏再拜稽首僎之束帛乘馬天子使大夫戒曰某日伯父帥乃初事侯氏再拜稽首諸侯前朝皆受舍于朝同姓西面上異姓東面北上侯氏神冕釋幣于禰乘墨車載龍旂弧韜乃朝以瑞玉有纁天子設斧依於戶牖之間左右几天子袞冕負斧依齋夫承命告于天子天子曰非他伯父實來予一人嘉之伯父其入予一人將受之侯氏入門右坐奠圭再拜稽首僎者謁侯氏坐取圭升致命王受之玉侯氏降階東北面再拜稽首僎者延之曰升升成拜乃出四享皆束帛加璧庭實唯國所有奉束帛匹馬卓上九馬隨之中庭西上奠幣再拜稽首僎者曰予一人將受之侯氏升致命王撫玉侯氏降自西階東面授宰幣西階前再拜稽首以馬出授人九馬隨之事畢乃右肉袒于廡門之東乃入門右北面立告聽事僎者謁諸天子天子辭於侯氏曰伯父無事歸寧乃邦侯氏再拜稽首出自

屏南適門西遂入門左北面立王勞之再拜稽首擯者延之曰升升成拜降出天子賜侯氏以車服迎于外門外再拜路先設西上路下四亞之重賜無數在車南諸公奉篋服加命書于其上升自西階東面大史是右侯氏升西面立大史述命侯氏降兩階之閒北面再拜稽首升成拜大史加書于服上侯氏受使者出侯氏送再拜僮使者諸公賜服者束帛四馬僮大史亦如之同姓大國則曰伯父其異姓則曰伯舅同姓小邦則曰叔父其異姓小邦則曰叔舅饗禮乃歸諸侯覲于天子爲宮方三百步四門壇十有二尋深四尺加方明于其上方明者木也方四尺設六色東方青南方赤西方白北方黑上玄下黃設六玉上圭下璧南方璋西方琥北方璜東方圭上介皆奉其君之旂置于宮尙左公侯伯子男皆就其旂而立四傳擯天子乘龍載大旆象日月升龍降龍出拜日於東門之外反祀方明禮日於南門外禮月與四瀆於北門外禮山川丘陵於西門外祭天燔柴祭山川丘陵升祭川沈祭地瘞記几侯于東箱偏駕不入王門奠圭于纁上

喪服 子夏傳

喪服斬衰裳直經杖絞帶冠繩纓菅屨者傳曰斬者何不緝也直經者麻之有黃者也直經大搗左本在下去五分一以爲帶齊衰之經斬衰之帶也去五分一以爲帶大功之經齊衰之帶也去五分一以爲帶小功之經大功之帶也去五分一以爲帶總麻之經小功之帶也去五分一以爲帶直杖竹也削杖桐也杖各齊其心皆下本杖者何爵也無爵而杖者何擔主也非主而杖者何輔病也童子何以不杖不能病也婦人何以不杖亦不能病也絞帶者繩帶也冠繩纓條屬右縫冠六升外畢鍛而勿灰衰三升菅屨者菅菲也外納居倚廬寢苦枕塊哭晝夜無時歎粥朝一溢米夕一溢米寢不說經帶既虞菑屏柱楣寢有席食蔬食水飲朝一哭夕一哭而已既練舍外寢始食菜果飯素食哭無時

父傳曰爲父何以斬衰也父至尊也諸侯爲天子傳曰天子至尊也君傳曰君至尊也父爲長子傳曰何以三年也正體於上又乃將所傳重也庶子不得爲長子三年不繼祖也爲人後者傳曰何以三年也受重者必以尊服服之何如而可爲之後同宗則可爲之後何如而可以爲人後支子可也爲所後者之祖父母妻妻之父母昆

弟昆弟之子若子妻爲夫傳曰夫至尊也妾爲君傳曰君至尊也女子子在室爲父布總箭筓鬢衰三年傳曰總六升長六寸箭筓長尺吉筓尺二寸子嫁反在父之室爲父三年公士大夫之衆臣爲其君布帶繩屨傳曰公卿大夫室老士貴臣其餘皆衆臣也君謂有地者也衆臣杖不以卽位近臣君服斯服矣繩屨者繩菲也

疏衰裳齊牡麻經冠布纓削杖布帶疏屨三年者傳曰齊者何緝也牡麻者臬麻也牡麻經右本在上冠者沽功也疏屨者薶刺之非也父卒則爲母繼母如母傳曰繼母何以如母繼母之配父與因母同故孝子不敢殊也慈母如母傳曰慈母者何也傳曰妾之無子者妾子之無母者父命妾曰女以爲子命子曰女以爲母若是則生養之終其身如母死則喪之三年如母貴父之命也母爲長子傳曰何以三年也父之所不降母亦不敢降也疏衰裳齊牡麻經冠布纓削杖布帶疏屨期者傳曰問者曰何冠也曰齊衰大功冠其受也總麻小功冠其衰也帶緣各視其冠父在爲母傳曰何以期也屈也至尊在不敢伸其私尊也父必三年然後娶達子之志也妻傳曰爲妻何以期也妻至親也出妻之子爲母傳曰出妻之子爲母期則爲外祖父母無

服傳曰絕族無施服親者屬出妻之子爲父後者則爲出母無服傳曰與尊者爲一體不敢服其私親也父卒繼母嫁從爲之服報傳曰何以期也貴終也不杖麻屨者祖父母傳曰何以期也至尊也世父母叔父母傳曰世父叔父何以期也與尊者一體也然則昆弟之子何以亦期也旁尊也不足以加尊焉故報之也父子一體也夫妻一體也昆弟一體也故父子首足也夫妻胙合也昆弟四體也故昆弟之義無分然而有分者則辟子之私也子不私其父則不成爲子故有東宮有西宮有南宮有北宮異居而同財有餘則歸之宗不足則資之宗世母叔母何以亦期也以名服也大夫之適子爲妻傳曰何以期也父之所不降子亦不敢降也何以不杖也父在則爲妻不杖昆弟爲衆子昆弟之子傳曰何以期也報之也大夫之庶子爲適昆弟傳曰何以期也父之所不降子亦不敢降也適孫傳曰何以期也不敢降其適也有適子者無適孫孫婦亦如之爲人後者爲其父母報傳曰何以期也不貳斬也何以不貳斬也持重於大宗者降其小宗也爲人後者孰後後大宗也曷爲後大宗大宗者尊之統也禽獸知母而不知父野人曰父母何筭焉都邑之士則知尊禰矣大夫及

學士則知尊祖矣諸侯及其大祖天子及其始祖之所自出尊者尊統上卑者尊統下大宗者尊之統也大宗者收族者也不可以絕故族人以支子後大宗也適子不得後大宗女子子適人者爲其父母昆弟之爲父後者傳曰爲父何以期也婦人不貳斬也婦人不貳斬者何也婦人有三從之義無專用之道故未嫁從父既嫁從夫夫死從子故父者子之天也夫者妻之天也婦人不貳斬者猶曰不貳天也婦人不能貳尊也爲昆弟之爲父後者何以亦期也婦人雖在外必有歸宗曰小宗故服期也

繼父同居者傳曰何以期也傳曰夫死妻穉子幼子無大功之親與之適人而所適者亦無大功之親所適者以其貨財爲之築宮廟歲時使之祀焉妻不敢與焉若是則繼父之道也同居則服齊衰期異居則服齊衰三月必嘗同居然後爲異居未嘗同居則不爲異居爲夫之君傳曰何以期也從服也姑姊妹女子子適人無主者姑姊妹報傳曰無主者謂其無祭主者也何以期也爲其無祭主故也爲君之父母妻長子祖父母傳曰何以期也從服也父母長子君服斬妻則小君也父卒然後爲祖

後者服斬妾爲女君傳曰何以期也妾之事女君與婦之事舅姑等婦爲舅姑傳曰何以期也從服也夫之昆弟之子傳曰何以期也報之也公妾大夫之妾爲其子傳曰何以期也妾不得體君爲其子得遂也女子子爲祖父母傳曰何以期也不敢降其祖也大夫之子爲世父母叔父母子昆弟昆弟之子姑姊妹女子子無主者爲大夫命婦者唯子不報傳曰大夫者其男子之爲大夫者也命婦者其婦人之爲大夫妻者也無主者命婦之無祭主者也何以言唯子不報也女子子適人者爲其父母期故言不報也言其餘皆報也何以期也父之所不降子亦不敢降也大夫曷爲不降命婦也夫尊於朝妻貴於室矣大夫爲祖父母適孫爲士者傳曰何以期也大夫不敢降其祖與適也公妾以及士妾爲其父母傳曰何以期也妾不得體君得爲其父母遂也疏衰裳齊牡麻經無受者寄公爲所寓傳曰寄公者何也失地之君也何以爲所寓服齊衰三月也言與民同也丈夫婦人爲宗子宗子之母妻傳曰何以服齊衰三月也尊祖也尊祖故敬宗敬宗者尊祖之義也宗子之母在則不爲宗子之妻服也爲舊君君之母妻傳曰爲舊君者孰謂也仕焉而已者也何以服齊衰三月

也言與民同也君之母妻則小君也庶人爲國君大夫在外其妻長子爲舊國君傳曰何以服齊衰三月也妻言與民同也長子言未去也繼父不同居者曾祖父母傳曰何以齊衰三月也小功者兄弟之服也不敢以兄弟之服服至尊也大夫爲宗子傳曰何以服齊衰三月也大夫不敢降其宗也舊君傳曰大夫爲舊君何以服齊衰三月也大夫去君埽其宗廟故服齊衰三月也言與民同也何大夫之謂乎言其以道去君而猶未絕也會祖父母爲士者如衆人傳曰何以齊衰三月也大夫不敢降其祖也女子子嫁者未嫁者爲曾祖父母傳曰嫁者其嫁於大夫者也未嫁者其成人而未嫁者也何以服齊衰三月不敢降其祖也大功布衰裳牡麻經無受者子女子子之長殤中殤傳曰何以大功也未成人也何以無受也喪成人者其文緝喪未成人者其文不緝故殤之經不繆垂蓋未成人也年十九至十六爲長殤十五至十二爲中殤十一至八歲爲下殤不滿八歲以下皆爲無服之殤無服之殤以日易月以日易月之殤殤而無服故子生三月則父名之死則哭之未名則不哭也叔父之長殤中殤姑姊妹之長殤中殤昆弟之長殤中殤夫之昆弟之子女子子之長殤中

殤適孫之長殤中殤大夫之庶子爲適昆弟之長殤中殤公爲適子之長殤中殤大夫爲適子之長殤中殤其長殤皆九月纓經其中殤七月不纓經大功布衰裳牡麻經纓布帶三月受以小功衰卽葛九月者傳曰大功布九升小功布十一升姑姊妹女子子適人者傳曰何以大功也出也從父昆弟爲人後者爲其昆弟傳曰何以大功也爲人後者降其昆弟也庶子

適婦傳曰何以大功也不降其適也女子子適人者爲衆昆弟姪丈夫婦人報傳曰姪者何也謂吾姑者吾謂之姪夫之祖父母世父母叔父母傳曰何以大功也從服也夫之昆弟何以無服也其夫屬乎父道者妻皆母道也其夫屬乎子道者妻皆婦道也謂弟之妻婦者是嫂亦可謂之母乎故名者人治之大者也可無愼乎大夫爲世父母叔父母子昆弟昆弟之子爲士者傳曰何以大功也尊不同也尊同則得服其親服公之庶昆弟大夫之庶子爲母妻昆弟傳曰何以大功也先君餘尊之所厭不得過大功也大夫之庶子則從乎大夫而降也父之所不降子亦不敢降也皆爲其從父昆弟之爲大夫者爲夫之昆弟之婦人子適人者大夫之妾爲君之庶子女

子子嫁者未嫁者爲世父母叔父母姑姊姊傳曰嫁者其嫁於大夫者也未嫁者成人而未嫁者也何以大功也妾爲君之黨服得與女君同下言爲世父母叔父母姑姊妹者謂妾自服其私親也大夫大夫之妻大夫之子公之昆弟爲姑姊妹女子子嫁於大夫者君爲姑姊妹女子子嫁於國君者傳曰何以大功也尊同也尊同則得服其親服諸侯之子稱公子公子不得稱先君公子之子稱公孫公孫不得稱諸侯此自卑別於尊者也若公子之子孫有封爲國君者則世世祖是人也不祖公子此自尊別於卑者也是故始封之君不臣諸父昆弟封君之子不臣諸父而臣昆弟封君之孫盡臣諸父昆弟故君之所爲服子亦不敢不服也君之所不服子亦不敢服也總衰裳牡麻經旣葬除之者傳曰總衰者何以小功之總也諸侯之大夫爲天子傳曰何以總衰也諸侯之大夫以時接昆乎天子小功布衰裳澡麻帶經五月者叔父之下殤適孫之下殤昆弟之下殤大夫庶子爲適昆弟之下殤爲姑姊妹女子子之下殤爲人後者爲其昆弟從父昆弟之是殤傳曰問者曰中殤何以不昆也大功之殤中從上小功之殤中從下爲夫之叔父之長殤昆弟之子女子子夫之昆弟之

子女子子之下殤爲姪庶孫丈夫婦人之長殤大夫公之昆弟大夫之子爲其昆弟庶子姑姊妹女子子之長殤大夫之妾爲庶子之長殤

小功布衰裳牡麻經卽葛五月者從祖祖父母從祖父母報從祖昆弟從父姊妹孫適人者爲人後者爲其姊妹適人者爲外祖父母傳曰何以小功也以尊加也從母丈夫婦人報傳曰何以小功也以名加也外親之服皆總也夫之姑姊妹娣姒婦報傳曰娣姒婦者弟長也何以小功也以爲相與居室中則生小功之親焉大夫大夫之子公之昆弟爲從父昆弟庶孫姑姊妹女子子適士者大夫之妾爲庶子適人者庶婦君母之父母從母傳曰何以小功也君母在則不敢不從服君母不在則不服君子子爲庶母慈己者傳曰君子子者貴人之子也爲庶母何以小功也以慈己加也總麻三月者傳曰總者十五升抽其半有事其縷無事其布曰總族曾祖父母族祖父母族父母族昆弟庶孫之婦庶孫之中殤從祖姑姊妹適人者報從祖父母從祖昆弟之長殤外孫從父昆弟姪之下殤夫之叔父之中殤下殤從母之長殤報庶子爲父後者爲其母傳曰何以總也傳曰與尊者爲一體不敢服其私親也然則何以

服總也有死於宮中者則爲之三月不舉祭因是以服總也士爲庶母傳曰何以總也以名服也大夫以上爲庶母無服貴臣貴妾傳曰何以總也以其貴也乳母傳曰何以總也以名服也從祖昆弟之子曾孫父之姑從母昆弟傳曰何以總也以名服也甥傳曰甥者何也謂吾舅者吾謂之甥何以總也報之也壻傳曰何以總報之也妻之父母傳曰何以總從服也姑之子傳曰何以總報之也舅傳曰何以總從服也舅之子傳曰何以總從服也夫之姑姊妹之長壻夫之諸祖父母報君母之昆弟傳曰何以總從服也從父昆弟之子之長壻昆弟之孫之長壻爲夫之從父昆弟之妻傳曰何以總也以爲相與同室則生總之親焉長壻中壻降一等下壻降二等齊衰之壻中從上大功之壻中從下記公子爲其母練冠麻衣繚緣爲其妻繚冠葛絰帶麻衣繚緣皆既葬除之傳曰何以不在五服之中也君之所不服子亦不敢服也君之所爲服子亦不敢不服也大夫公之昆弟大夫之子於兄弟降一等爲人後者於兄弟降一等報於所爲後之兄弟之子若子兄弟皆在他邦加一等不及知父母與兄弟居加一等傳曰何如則可謂之兄弟傳曰小功以下爲兄弟

朋友皆在他邦祖免歸則已屬友麻君之所爲兄弟服室老降一等夫之所爲兄弟服妻降一等庶子爲後者爲其外祖父母從母舅無屬不爲後如邦人宗子孤爲殤大功衰小功衰皆三月親則月筭如邦人改葬總童子唯當室總傳曰不當室則無總服也凡妾爲私兄弟如邦人大夫弔於命婦錫衰命婦弔於大夫亦錫衰傳曰錫者何也麻之有錫者也錫者十五升抽其半無事其縷有事其布曰錫女子子適人者爲其父母婦爲舅姑惡筭有首以髮卒哭子折筭首以筭布總傳曰筭有首者惡筭之有首也惡筭者櫛筭也折筭首者折吉筭之首也吉筭者象筭也何以言子折筭首而不言婦終之也妾爲女君君之長子惡筭有首布總凡衰外削幅裳內削幅幅三柙若齊裳內衰外負廣出於適寸適博四寸出於衰衰長六寸博四寸衣帶下尺衽二尺有五寸袂屬幅衣二尺有二寸袂尺二寸衰三升三升有半其冠六升以其冠爲受受冠七升齊衰四升其冠七升以其冠爲受受冠八升總衰四升有半其冠八升大功八升若九升小功十升若十一升

士喪禮

士喪禮死于適室幘用斂衾復者一人以爵弁服簪裳于衣左何之扱領于帶升自前東榮中屋北面招以衣曰臯某復三降衣于前受用篋升自阼階以衣尸復者降自後西榮楔齒用角柶綴足用燕几奠脯醢醴酒升自阼階奠于尸東帷堂乃赴于君主人西階東南面命赴者拜送有賓則拜之入坐于牀東衆主人在其後西面婦人俠牀東面親者在室衆婦人戶外北面衆兄弟堂下北面君使人弔徹帷主人迎于寢門外見賓不哭先入門右北面弔者入升自面階東面主人進中庭弔者致命主人哭拜稽顙成踊賓出主人拜送于外門外君使人襚徹帷主人如初襚者左執領右執要入升致命主人拜如初襚者入衣尸出主人拜送如初唯君命出升降自西階遂拜賓有大夫則特拜之卽位于西階下東面不踊大夫雖不辭入也親者襚不將命以卽陳庶兄弟襚使人以將命于室主人拜于位委衣于尸東牀上朋友襚親以進主人拜委衣如初退哭不踊徹衣者執衣如襚以適房爲銘各以其物亡則以緇長半幅經末長終幅廣三寸書銘于末曰某氏某之柩竹杠長三尺置于宇面階上甸人掘坎于階閒少面爲塋于西墻下東鄉新盆槃瓶斂教重鬲皆濯造于西

階下陳襲事于房中面領南上不精明衣裳用布髻筭用桑長四寸緩中布巾環幅不繫掩練帛廣終幅長五尺析其末瑱用白纁幘目用緇方尺二寸經裏著組繫握手用玄纁裏長尺二寸廣五寸半中旁寸著組繫決用正王棘若擇棘組繫纁極二冒緇質長與手齊經殺掩足爵弁服純衣皮弁服椽衣緇帶韎韐竹笏夏葛屨冬白屨皆纁緇純組綦繫于踵庶襪繼陳不用貝三實于筭稻米一豆實於筐沐巾一浴巾二皆用綌於筭櫛於篋浴衣於篋皆饌于西序下南上

管人汲不說緇屈之祝漸米于堂南面用盆管人盡階不升堂受潘煑于釜用重鬲祝盛米于敦奠于貝北士有沐用夷槃可也外御受沐入主人皆出戶外北面乃沐櫛拒用巾浴用巾拒用浴衣溲濯棄于坎蚤揃如他日誓用組乃筭設明衣裳主人入卽位商祝襲祭服椽衣次主人出南面左袒扱諸面之右盥于盆上洗貝執以入宰洗柶建于米執以從商祝執巾從入當屨北面徹枕設巾徹楔受貝奠于尸面主人由足西牀上坐東面祝又受米奠于貝北宰從立于牀西在右主人左扱米實于右三實一貝左中亦如之又實米唯盈主人襲反位商祝掩瑱設幘目乃屨綦結于

附連絢乃襲三稱明衣不在筭設給帶摺笏設決麗于擊自飯持之設握乃連擊設
冒纛之撫用衾巾柶蟻蚤埋于坎重木刊鑿之甸人置重于中庭參分庭一在南夏
祝饗餘飯用二鬲于西牆下簣用疏布久之繫用幹縣于重簣用葦席北面左衽帶
用幹賀之結于後祝取銘置于重厥明陳衣于房南領西上綺絞橫三縮一廣終幅
析其末緇裘頰裏無統祭服次散衣次凡十有九稱陳衣繼之不必盡用饌于東堂
下脯醢醴酒冪奠用功布實于簞在饌東設盆盥于饌東有巾直絰大鬲下本在左
要絰小焉散帶垂長三尺牡麻絰右本在上亦散帶垂皆饌于東方婦人之帶牡麻
結本在房牀第夷裘饌于西牀南西方盥如東方陳一鼎于寢門外當東塾少南西
面其實特豚面鬻去蹄兩胎脊肺設局簠簋西末素俎在鼎西西順覆匕東柄士盥
二人以並東面立于西階下布席于戶內下莞上簟商祝布絞衾散衣祭服祭服不
倒美者在中士舉遷尸反位設牀第于兩楹之間衽如初有枕卒斂徹帷主人西面
馮尸踊無筭主婦東面馮亦如之主人髻髮袒衆主人免于房婦人髻于室士舉男
女奉尸俛于堂帷用夷裘男女如室位踊無筭主人出于足降自西階衆主人東卽

位婦人阼階上西面主人拜賓大夫特拜士旅之卽位踊襲經于序東復位乃奠舉者盥右執匕卻之左執俎橫攝之入阼階前西面錯俎北面右人左執匕抽扇于左手兼執之取糝委于鼎北加扇不坐乃杙載載兩髀于兩端兩肩亞兩腋亞脊肺在於中皆覆進祗執而俟夏祝及執事盥執醴先酒脯醢醢從升自阼階丈夫踊句人徹鼎巾待于阼階下奠于尸東執醴酒北面西上豆錯俎錯于豆東立于俎北西上醴酒錯于豆南祝受巾巾之由足降自西階婦人踊奠者由重南東丈夫踊賓出主人拜送于門外乃代哭不以官有禭者則將命擯者出請入告主人待于位擯者出告須以賓入賓入中庭北面致命主人拜稽顙賓升自西階出于足西面委衣如於室禮降出主人出拜送朋友親禭如初儀西階東北面哭踊三降主人不踊禭者以褶則必有裳執衣如初徹衣者亦如之升降自西階以東宵爲燎于中庭厥明滅燎陳衣于房南領西上緒絞紵二君禭祭服散衣庶禭凡三十稱紵不在筭不必盡用東方之饌兩瓦甒其實醴酒角觶木柶豕豆兩其實葵菹芋蕕醢兩饌無膝布巾其實栗不擇脯四脰奠席在饌北斂席在其東掘肆見衽棺入主人不哭

升棺用軸蓋在下熬黍稷各二筐有魚腊饌于西牀南陳三鼎于門外北上豚合升魚鱠鮓九腊左胖脾不升其他皆如初燭俟于饌東祝徹盥于門外入升自阼階丈夫踊祝徹巾授執事者以待徹饌先取醴酒北面其餘取先設者出于足降自西階婦人踊設于序西南當西榮如設于堂醴酒位如初執事豆北南面東上乃適饌帷堂婦人尸西東面主人及親者升自西階出于足西面袒士盥位如初布廣如初商祝布絞紵衾衣美者在外君襪不倒有大夫則告士舉遷尸復位主人踊無筭卒斂徹帷主人馮如初主婦亦如之主人奉尸斂于棺踊如初乃蓋主人降拜大夫之後至者北面視肆衆主人復位婦人東復位設熬旁一筐乃塗踊無筭卒塗祝取銘置于肆主人復位踊襲乃奠燭升自阼階祝執巾席從設于奧東面祝反降及執事執饌士盥舉鼎入西面北上如初載魚左首進鬻三列腊進祗祝執醴如初酒豆籩俎從升自阼階丈夫踊甸人徹鼎奠由楹內入于室醴酒北面設豆右菹菹南栗栗東脯豚當豆魚次腊特于俎北醴酒在籩南巾如初既錯者出立于戶西西上祝後闔戶先由楹西降自西階婦人踊奠者由重南東丈夫踊賓出婦人踊主人拜送于門

外入及兄弟北面哭殯兄弟出主人拜送于門外衆主人出門哭止皆西面于東方
闔門主人揖就次君若有賜焉則視斂旣布衣君至主人出迎于外門外見馬首不
哭還入門右北面及衆主人袒巫止于廟門外祝代之小臣二人執戈先二人後君
釋采入門主人辟君升自阼階西鄉祝負墉南面主人中庭君哭主人哭拜稽顙成
踊出君命反行事主人復位君升主人入西楹東北面升公卿大夫繼主人東上
乃斂卒公卿大夫逆降復位主人降出君反主人主人中庭君坐撫當心主人拜稽
顙成踊出君反之復初位衆主人辟于東壁南面君降西鄉命主人馮尸主人升自
西階由足西面馮尸不當君所踊主婦東面馮亦如之奉尸斂于棺乃蓋主人降出
君反之入門左視塗君升卽位衆主人復位卒塗主人出君命之反奠入門右乃奠
升自西階君要節面踊主人從踊卒奠主人出哭者止君出門席中哭主人不哭辟
君式之貳車畢乘主人哭拜送襲入卽位衆主人襲拜大夫之後至者成踊賓出主
人拜送三日成服杖拜君命及衆賓不拜棺中之賜朝夕哭不辟子卯婦人卽位于
堂南上哭丈夫卽位于門外西面北上外兄弟在其南南上賓繼之北上門東北面

西上門西北面東上西方東面北上主人卽位辟門婦人拊心不哭主人拜賓旁三右還入門哭婦人踊主人堂下直東序西面兄弟皆卽位如外位卿大夫在主人之南諸公門東少進他國之異爵者門西少進敵則先拜他國之賓凡異爵者拜諸其位徹者盥于門外燭先入升自阼階丈夫踊祝取醴北面取酒立于其東取豆籩俎南面西上祝先出酒豆籩俎序從降自西階婦人踊設于序西南直西榮醴酒北面西上豆西面錯立于豆北南面籩俎既錯立于執豆之西東上酒錯復位醴錯于西遂先由主人之北適饌乃奠醴酒脯醢升丈夫踊入如初設不巾錯者出立于戶西西上滅燭出祝闔戶先降自西階婦人踊奠者由重南東丈夫踊賓出婦人踊主人拜送衆主人出婦人踊出門哭止皆復位闔門主人卒拜送賓揖衆主人乃就次朔月奠用特豚魚腊陳三鼎如初東方之饌亦如之無籩有黍稷用瓦敦有蓋當籩位主人拜賓如朝夕哭卒徹舉鼎入升皆如初奠之儀卒柅釋匕于鼎俎行柅者逆出甸人徹鼎其序醴酒菹醢黍稷俎其設于室豆錯俎錯腊特黍稷當籩位敦啓會卻諸其南醴酒位如初祝與執豆者巾乃出主人要節面踊皆如朝夕哭之儀月半不

殷奠有薦新如朔奠徹朔奠先取醴酒其餘取先設者敦啓會面足序出如入其設于外如於室筮宅家人營之掘四隅外其壞掘中南其壞既朝哭主人皆往兆南北面免經命筮者在主人之右筮者東面抽上韉兼執之南面受命命曰哀子某爲其父某甫筮宅度茲幽宅兆基無有後艱筮人許諾不述命右還北面指中封而筮卦者在左卒筮執卦以示命筮者命筮者受視反之東西旅占卒進告于命筮者與主人占之曰從主人經哭不踊若不從筮擇如初儀歸殯前北面哭不踊既井椁主人西西拜工左還椁反位哭不踊婦人哭于堂獻材于殯門外西面北上繡主人徧視之如哭椁獻素獻成亦如之卜日既朝哭皆復外位卜人先奠龜于西塾上南首有席楚焯置于爇在龜東族長洧卜及宗人吉服立于門西東面南上占者三人在其南北上下人及執爇席者在塾西闔東扉主婦立于其內席于闔西闔外宗人告事具主人北面免經左擁之洧卜卽位于門東西面卜人抱龜爇先奠龜西首爇在北宗人受卜人龜示高洧卜受視反之宗人還少退受命命曰哀子某來日某卜葬其父某甫考降無有近悔許諾不述命還卽席西面坐命龜興授卜人龜負東扉卜人

坐作龜與宗人受龜示泣卜泣卜受視反之宗人退東面乃族占卒不釋龜告于泣卜與主人占曰某日從授卜人龜告于主婦主婦哭告于異爵者使人告于衆賓卜人徹龜宗人告事畢主人經入哭如筮宅賓出拜送若不從卜宅如初儀

既夕禮

既夕哭請啓期告于賓夙興設盥于祖席門外陳鼎皆如殯東方之饌亦如之夷牀饌于階閒二燭俟于殯門外丈夫髻散帶垂卽位如初婦人不哭主人拜賓入卽位袒商祝免袒執功布入升自西階盡階不升堂聲三啓三命哭燭入祝降與夏祝交于階下取銘置于重踊無筭商祝拂柩用功布幘用夷衾遷于祖用軸重先奠從燭從柩從燭從主人從升自西階奠俟于下東面北上主人從升婦人升東面衆人東卽位正柩于兩楹閒用夷牀主人柩東西面置重如初席升設于柩西奠設如初巾之升降自西階主人踊無筭降拜賓卽位踊襲主婦及親者由足西西薦車直東策北朝質明滅燭徹者升自阼階降自西階乃奠如初升降自西階主人要節面踊薦馬纓三就入門北面交轡圜人夾牽之御者執策立于馬後哭成踊右還出賓出主

人送于門外有司請祖期曰日側主人入祖乃載踊無筭卒束龔降奠當前束商祝飾柩一池紐前經後緇齊三采無貝設披屬引陳明器於乘車之西折橫覆之抗木橫三縮二加抗席三加茵用疏布緇藁有幅亦縮二橫三器西南上緇茵苞二簪二黍稷麥蕪二醢醢屑幕用疏布甗二醴酒幕用功布皆木柎久之用器弓矢耒耜兩敦兩杼槩匝匱實于槃中南流無祭器有燕樂器可也役器甲冑干竿燕器杖笠屨微奠巾席俟于西方主人要節而踊袒商祝御柩乃祖踊龔少南當前束婦人降卽位于階間祖還車不還器祝取銘置于茵二人還重左還布席乃奠如初主人要節而踊薦馬如初賓出主人送有司請葬期入復位

公贈玄纁束馬兩擯者出請入告主人釋杖迎于廂門外不哭先入門右北面及衆主人袒馬入設賓奉幣由馬西當前轆北面致命主人哭拜稽顙成踊賓奠幣于棧左服出宰由主人之北舉幣以東士受馬以出主人送于外門外拜龔入復位杖賓賙者將命擯者出請入告出告須馬入設賓奉幣擯者先入賓從致命如初主人拜于位不踊寶奠幣如初舉幣受馬如初擯者出請若奠入告出以賓入將命如初士

受羊如受馬又請若賻入告主人出門左西面賓東面將命主人拜賓坐委之宰由主人之北東面舉之反位若無器則梧受之又請賓告事舉拜送入贈者將命擯者出請納賓如初賓奠幣如初若就器則坐奠于陳凡將禮必請而后拜送兄弟贈奠可也所知則贈面不奠知死者贈知生者賻書贈於方若九若七若五書遺於策乃代哭如初宵爲燎于門內之右厥明肺鼎五于門外如初其實羊左胖脾不升腸五胃五雞肺豕亦如之豚解無腸胃魚腊鮮獸皆如初東方之饌四豆脾析蟬醢葵菹羸醢四籩棗糗栗脯醴酒肺器滅燎執燭俠輅北面賓入者拜之徹者入丈夫踊設于西北婦人踊徹者東鼎入乃奠豆西上精籩羸醢南北上精俎二以成南上不精特鮮獸醴酒在籩西北上奠者出主人要節而踊甸人抗重出自道道左倚之薦馬馬出自道車各從其馬駕于門外西面而俟南上徹者入踊如初徹巾苞牲取下體不以魚腊行器茵苞器序從車從徹者出踊如初主人之史請讀贈執筭從柩東當前東西面不命毋哭哭者相止也唯主人主婦哭燭在右南面讀書釋筭則坐卒命哭滅燭書與筭執之以逆出公史自西方東面命毋哭主人主婦皆不哭讀遺卒命

哭滅燭出商祝執功布以御柩執披主人袒乃行踊無算出宮踊襲至于邦門公使宰夫贈玄纁束主人去杖不哭由左聽命賓由右致命主人哭拜稽顙賓升寶幣于蓋降主人拜送復位杖乃行

至于壙陳器于道東西北上茵先入屬引主人袒衆主人西面北上婦人東面皆不哭乃窆主人哭踊無算襲贈用制幣玄纁束拜稽顙踊如初卒袒拜賓主婦亦拜賓卽位拾踊三襲賓出則拜送藏器於旁加見藏苞簪於旁加折卻之加抗席覆之加抗木實土三主人拜鄉人卽位踊襲如初乃反哭入升自西階東面衆主人堂下東面北上婦人入丈夫踊升自阼階主婦入于室踊出卽位及丈夫拾踊三賓弔者升自西階曰如之何主人拜稽顙賓降出主人送于門外拜稽顙遂適殯宮皆如啓位拾踊三兄弟出主人拜送衆主人出門哭止闔門主人揖衆主人乃就次猶朝夕哭不奠三虞卒哭明日以其班祔記士虞適寢寢東首于北墉下有疾疾者齊養者皆齊徹琴瑟疾病外內皆埽徹褻衣加新衣御者四人皆坐持體屬纊以俟絕氣男子不絕於婦人之手婦人不絕於男子之手乃行禱于五祀乃卒主人啼兄弟哭設牀

第當牖衽下莞上簟設枕遷尸復者朝服左執領右執要招而左楔貌如輓上兩末綴足用燕几校在南御者坐持之卽牀而奠當牖用吉器若體若酒無巾櫨赴曰君之臣某死赴母妻長子則曰君之臣某之某死室中唯主人主婦坐兄弟有命夫命婦在焉亦坐尸在室有君命衆主人不出襪者委衣于牀不坐其襪于室戶西北面致命夏祝浙米差盛之御者西人抗衾而浴禮第其母之喪則內御者浴畚無筭設明衣婦人則設中帶卒洗貝反于筭寶貝柱右巔左巔夏祝徹餘飯瑱塞耳掘坎南順廣尺輪二尺深三尺南其壤塋用塊明衣裳用幕布袂屬幅長下膝有前後裳不辟長及穀縵縹緜緇純設握裏親膚繫鉤中指結于擊甸人築垠坎隸人溼廁旣襲皆爲燎于中庭厥明滅燎陳衣凡絞紵用布倫如朝服

設於東堂下南順齊于坵饌于其上兩甕醴酒在南篚在東南順實角解四木柶二素勺二豆在甗北二以並籩亦如之凡籩豆實具設皆巾之解俟時而酌柶覆加之面枋及錯建之小斂辟奠不出室無踊節旣馮尸主人袒髻髮絞帶衆主人布帶大斂于阼大夫升自西階階東北面東上旣馮尸大夫逆降復位巾奠執燭者滅

燭出降自阼階由主人之北東既殯主人說髻三日絞垂冠六升外繹纓條屬厭衰
三升屨外納杖下本竹桐一也居倚廬寢苦枕塊不說經帶哭晝夜無時非喪事不
言歡粥朝一溢米夕一溢米不食菜果主人乘惡車白狗臂蒲蔽御以蒲葢大服木
館約絞約轡木鑣馬不齊髦主婦之車亦如之疏布褙貳車白狗攝服其他皆如乘
車朔月童子執帶卻之左手奉之從徹者而入比奠舉席埽室聚諸交布席如初卒
奠埽者執帶垂末內鬣從執燭者而東燕養饋羞湯沐之饌如他日朔月若薦新則
不饋于下室筮宅家人物土卜日吉告從于主婦主婦哭婦人皆哭主婦升堂哭者
皆止啓之阼外內不哭夷牀軼軸饌于西階東其二席則饌于禰廟如小斂奠乃啓
朝于禰廟重止于門外之西東面柩入升自西階正柩于兩楹閒奠止于西階之下
東面北上主人升柩東西面衆主人東卽位婦人從升東面奠升設于柩西升降自
西階主人要節而踊燭先入者升堂東楹之南西面後入者西階東北面在下主人
降卽位徹乃奠升降自西階主人踊如初祝及執事舉奠巾席從而降柩從序從如
初適祖薦乘車鹿淺轆子革鞮載壇載皮弁服纓轡貝勒縣于衡道車載朝服橐

車載養笠將載祝及執事舉奠戶四南而東上卒束前而降奠席于柩西巾奠乃牆抗木刊茵著用茶寶綏澤焉葦苞長三尺一驅菅簪三其實皆淪祖還車不易位執披者旁四人凡贈幣無常几糗不煎唯君命止柩于垣其餘則否車至道左北面立東上柩至于壙斂服載之卒窆而歸不驅君視斂若不待奠加蓋而出不視斂則加蓋而至卒事既正柩賓出遂匠納車于階閒祝饌祖奠于主人之南當前轅北上巾之弓矢之新沽功有弭飾焉亦張可也有秘設依撻焉有鞮猴矢一乘骨鏃短衛志矢一乘軒輶中亦短衛

士虞禮

士虞禮特豕饋食側亨于席門外之右東面魚腊饔亞之北上饔饔在東壁四而設洗于西階西南水在洗四篚在東尊于堂中北墉下當戶兩甌醴酒酒在東無禁冪用絺布加勺南枋素几葦席在西序下苴荊茅長五寸束之實于篚饌于西坵上饌兩豆菹醢于西楹之東醢在西一鉶亞之從獻豆兩亞之四籩亞之北上饌黍稷二敦于階閒西上藉用葦席風水錯于槃中南流在西階之南篋巾在其東陳三鼎于

門外之右北面北上設扁冪七俎在西塾之西羞燔俎在內西塾上南順主人及兄弟如葬服賓執事者如弔服皆卽位于門外如朝夕臨位婦人及內兄弟服卽位于堂亦如之祝免澡葛經帶布席于室中東面右几降出及宗人卽位于門西東面南上宗人告有司具遂請拜賓如臨入門哭婦人哭主人卽位于堂衆主人及兄弟賓卽位于西方如反哭位祝入門左北面宗人西階前北面祝盥升取苴降洗之升入設于几東席上東縮降洗解升止哭主人倚杖入祝從在左西面贊薦菹醢醢在北佐食及執事盥出舉長在左鼎入設于西階前東面北上七俎從設左人抽扁冪七佐食及右人載卒柩者逆退復位俎入設于豆東魚亞之腊特贊設二敦于俎南黍其東稷設一錡于豆南佐食出立于戶西贊者徹鼎祝酌醴命佐食啓會佐食許諾啓會卻于敦南復位祝奠饌于錡南復位主人再拜稽首祝饗命佐食祭佐食許諾鉤袒取黍稷祭于苴三取膚祭祭如初祝取奠解祭亦如之不盡益反奠之主人再拜稽首祝祝卒主人拜如初哭出復位祝迎尸一人衰經奉篋哭從尸尸入門丈夫踊婦人踊淳尸盥宗人授巾尸及階祝延尸尸升宗人詔踊如初尸入戶踊如初哭

止婦人入于房主人及祝拜安尸尸拜遂坐從者錯篚于尸左席上立于其北尸取奠左執之取菹擗于醢祭于豆間祝命佐食墮祭佐食取黍稷肺祭授尸尸祭之祭奠祝祝主人拜如初尸嘗醴奠之佐食舉肺脊授尸尸受振祭嚌之左手執之祝命佐食邇敦佐食舉黍錯于席上尸祭鉶嘗鉶黍羹渚自門入設于鉶南載四豆設于左尸飯播餘于篚三飯佐食舉幹尸受振祭嚌之實于篚又三飯舉脰祭如初佐食舉魚腊實于篚又三飯舉肩祭如初舉魚腊俎俎釋三个尸卒食佐食受肺脊實于篚反黍如初設主人洗廢爵酌酒醑尸尸拜受爵主人北面荅拜尸祭酒嘗之賓長以肝從實于俎縮右鹽尸左執爵右取肝擗鹽振祭嚌之加于俎賓降反俎于西塾復位尸卒爵祝受不相爵主人拜尸荅拜祝酌授尸尸以醋主人主人拜受爵尸荅拜主人坐祭卒爵拜尸荅拜筵祝南面主人獻祝祝拜坐受爵主人荅拜薦菹醢設俎祝左執爵祭薦奠爵興取肺坐祭嚌之興加于俎祭酒嘗之肝從祝取肝擗鹽振祭嚌之加于俎卒爵拜主人荅拜祝坐受主人主人酌獻佐食佐食北面拜坐受爵主人荅拜佐食祭酒卒爵拜主人荅拜受爵出實于篚升堂復位主婦洗足爵于房

中酌亞獻尸如主人儀自反兩籩棗栗設于會南棗在西尸祭籩祭酒如初賓以燔從如初尸祭燔卒爵如初酌獻祝籩燔從獻佐食皆如初以虛爵入于房賓長洗纒爵三獻燔從如初儀婦人復位祝出戶西面告利成主人哭皆哭祝入尸謾從者奉饌哭如初祝前尸出戶踊如初降堂踊如初出門亦如之祝反入徹設于西北隅如其設也凡在南扉用席祝薦席徹入于房祝自執其俎出贊闔牖戶主人降賓出主人出門哭止皆復位宗人告事畢賓出主人送拜稽顙記虞沐浴不櫛陳牲于席門外北首西上寢右日中而行事殺于席門西主人不視豚解羹飪升左肩臂臠脰脰脊脅離肺膚祭三取諸左臚上肺祭一實于上鼎升魚鱠鮓九實于中鼎升腊左胙脾不升實于下鼎皆設局簞陳之載猶進柅魚進鬻祝俎脾脰脊脅離肺陳于階間敦東淳尸盥執槃西面執匱東面執巾在其北東面宗人授巾南面主人在室則宗人升戶外北面佐食無事則出戶負依南而鋤芻用苦若薇有滑夏用葵冬用葇有柶豆實葵菹菹以西羸醢籩棗栗擇尸入祝從尸尸坐不說屨

尸謾祝前鄉尸還出戶又鄉尸還過主人又鄉尸還降階又鄉尸降階還及門如出

戶尸出祝反人門左北面復位然後宗人詔降尸服卒者之上服男男尸女女尸必使異姓不使賤者無尸則禮及薦饌皆如初既饗祭于其祝祝卒不綏祭無黍羹湆載從獻主人哭出復位祝闔牖戶降復位于門西男女拾踊三如食閒祝升止哭聲三啓戶主人入祝從啓牖鄉如初主人哭出復位卒徹祝佐食降復位宗人詔降如初始處用柔日曰哀子某哀顯相夙興夜處不寧敢用絜牲剛鬣香合嘉薦普淖明齊洩酒哀薦禘事適爾皇祖某甫饗再虞皆如初日哀薦虞事三虞卒哭他用剛日亦如初曰哀薦成事獻畢未徹乃饒尊兩甒于廟門外之右少南水尊在酒西勺北枋洗在尊東南水在洗東篋在西饌簋豆脯四脰有乾肉折俎二尹縮祭半尹在西塾尸出執几從席從尸出門右南面席設于尊西北東面几在南賓出復位主人出卽位于門東少南婦人出卽位于主人之北皆西面哭不止尸卽席坐唯主人不哭洗廢爵酌獻尸尸拜受主人拜送哭復位薦脯醢設俎于薦東胸在南尸左執爵取脯搗醢祭之佐食授膾尸受振祭膾反之祭酒卒爵奠于南方主人及兄弟踊婦人亦如之主婦洗足爵亞獻如主人儀婦人踊如初賓長洗總爵三獻如亞獻踊如初

佐食取俎實于篚尸謾從者奉篚哭從之祝前哭者皆從及大門內踊如初尸出門哭者止賓出主人送拜稽顙主婦亦拜賓丈夫說經帶于廟門外入徹主人不與婦人說首經不說帶無尸則不饋猶出几席設如初拾踊三哭止告事畢賓出死三日而殯三月而葬遂卒哭將且而祔則薦卒辭曰哀子某來日某濟祔爾于爾皇祖某甫尙饗女子曰皇祖妣某氏婦曰孫婦于皇祖姑某氏其他辭一也饗辭曰哀子某主爲而哀薦之饗明日以其班祔沐浴搔翦用專膚爲折俎取諸脰臄其他如饋食用嗣尸曰孝子某孝顯相夙興夜處小心畏忌不惰其身不寧用尹祭嘉薦普淖普薦洩酒適爾皇祖某甫以濟祔爾孫某甫尙饗毋而小祥曰薦此常事又朞而大祥曰薦此祥事月中月而禫是月也吉祭猶未配

特牲饋食禮

特牲饋食之禮不諷口及筮日主人冠端玄卽位于門外西面子姓兄弟如主人之服立于主人之南西面北上有司羣執事如兄弟服東面北上席于門中闈西闈外筮人取筮于西塾執之東面受命于主人宰自主人之左贊命命曰孝孫某筮來日

某諷此某事適其皇祖某子尙饗筮者許諾還卽席西面坐卦者在左卒筮寫卦筮者執以示主人主人受視反之筮者還東面長占卒告于主人占曰吉若不吉則筮遠日如初儀宗人告事畢前期三日之朝筮尸如求日之儀命筮曰孝孫某諷此某事適其皇祖某子筮某之某爲尸尙饗乃宿尸主人立于尸外門外子姓兄弟立于主人之後北面東上尸如主人服出門左西面主人辟皆東面北上主人再拜尸荅拜宗人擯辭如初卒曰筮子爲某尸占曰吉敢宿祝許諾致命尸許諾主人再拜稽首尸入主人退宿賓賓如主人服出門左西面再拜主人東面荅再拜宗人擯曰某薦歲事吾子將涖之敢宿賓曰某敢不敬從主人再拜賓荅拜主人退賓拜送厥明夕陳鼎于門外北面北上有竊楸在其南南順實獸子其上東首牲在其面北首東足設洗于阼階東南壺禁在西序豆籩劍在東房南上几席兩敦在西堂主人及子姓兄弟卽位于門東如初賓及衆賓卽位于門西東面北上宗人祝立子賓西北東面南上主人再拜賓荅再拜三拜衆賓衆賓荅再拜主人揖入兄弟從賓及衆賓從卽位于堂下如外位宗人升自西階覲壺濯及豆籩反降東北面告濯具賓出主人

出皆復外位宗人視牲告充雍正作豕宗人舉獸尾告備舉鼎鼐告絜請期曰羹飪告事畢賓出主人拜送夙興主人服如初立于門外東方南面視側殺主婦視饋饗于西堂下亭于門外東方西面北上羹飪實鼎陳于門外如初尊于戶東玄酒在面實豆籩饔陳于房中如初執事之俎陳于階間二列北上盛兩敦陳于西堂藉用萑几席陳于西堂如初尸盥匱水實于槃中簞巾在門內之右祝筵几于室中東面主婦纚笄宵衣立于房中南面主人及賓兄弟羣執事卽位于門外如初宗人告有司具主人拜賓如初揖入卽位如初佐食北面立于中庭

主人及祝升祝先入主人從西面于戶內主婦盥于房中薦兩豆葵菹蝸醢醢在北宗人遣佐食及執事盥出主人降及賓盥出主人在右及佐食舉牲鼎賓長在右及執事舉魚腊鼎除鼐宗人執畢先入當阼階南面鼎西面錯右人抽扃委于鼎北贊者錯俎加匕乃柀佐食升肝俎鼐之設于阼階西卒載加匕于鼎主人升入復位俎入設于豆東魚次腊特于俎北主婦設兩敦黍稷于俎南西上及兩錡芼設于豆南南陳祝洗酌奠奠于錡南遂命佐食啓會佐食啓會卻于敦南出立于戶西南面主

人再拜稽首祝在左卒祝主人再拜稽首祝迎尸于門外主人降立于阼階東尸入門左北面盥宗人授巾尸至于階祝延尸尸升人祝先主人從尸卽席坐主人拜安尸尸荅拜執奠祝饗主人拜如初祝命振祭尸左執爓右取菹擗于醢祭于豆間佐食取黍稷肺祭授尸尸祭之祭酒啐酒告旨主人拜尸奠爓荅拜祭鏹骨之告旨主人拜尸荅拜祝命爾敦佐食爾黍稷于席上設大羹滫于醢北舉肺脊以授尸尸受振祭嗜之左執之乃食食舉主人羞胙俎于牀北尸三飯告飽祝侑主人拜佐食舉幹尸受振祭嗜之佐食受加于胙俎舉獸幹魚一亦如之尸實舉于菹豆佐食羞庶羞四豆設于左南上有醢尸又三飯告飽祝侑之如初舉醢及獸魚如初尸又三飯告飽祝侑之如初舉肩及獸魚如初佐食盛胙俎俎釋三个舉肺脊加于胙俎反黍稷于其所主人洗角升酌醢尸尸拜受主人拜送尸祭酒啐酒賓長以肝從尸左執角右取肝擗于醢振祭嗜之加于菹豆卒角祝受尸角曰送爵皇尸卒爵主人拜尸荅拜祝酌授尸尸以醋主人主人拜受角尸拜送主人退佐食授授祭主人坐左執角受祭祭之祭酒啐酒進聽嘏佐食擗黍授祝祝授尸尸受以菹豆執以親嘏主人

主人左執角再拜稽首受復位詩懷之實于左袂挂于季指卒角拜尸荅拜主人出
寫齋于房祝以籩受筵祝南面主人酌獻祝拜受角主人拜送設菹醢俎祝左執
角祭豆興取肺坐祭臠之興加于俎坐祭酒啐酒以肝從祝左執角右取肝揆于鹽
振祭臠之加于俎卒角拜主人荅拜受角酌獻佐食佐食北面拜受角主人拜送佐
食坐祭卒角拜主人荅拜受角降反于篚升入復位主婦洗爵于房酌亞獻尸尸拜
受主婦北面拜送宗婦執兩籩戶外坐主婦受設于敦南祝贊籩祭尸受祭之祭酒
啐酒兄弟長以燔從尸受振祭臠之反之羞燔者受加于胙出尸卒爵祝受爵命送
如初酢如主人儀主婦適房南面佐食按祭主婦左執爵右撫祭祭酒啐酒入卒爵
如主人儀獻祝籩燔從如初儀及佐食如初卒以爵入于房賓三獻如初燔從如初
爵止席于戶內主婦洗爵酌致爵于主人主人拜受爵主婦拜送爵宗婦贊豆如初
主婦受設兩豆兩籩俎入設主人左執爵祭薦宗人贊祭奠爵興取肺坐絕祭臠之
興加于俎坐挽手祭酒啐酒肝從左執爵取肝揆于鹽坐振祭臠之宗人受加于俎
燔亦如之興席末坐卒爵拜主婦荅拜受爵酌醋左執爵拜主人荅拜坐祭立飲卒

爵拜主人荅拜主婦出反于房主人降洗酌致爵于主婦席于房中南面主婦拜受爵主人西面荅拜宗婦薦豆俎從獻皆如主人主人更爵酌醋卒爵降實爵于簠入復位三獻作止爵尸卒爵酢酌獻洗及佐食洗爵酌致于主人主婦燔從皆如初更爵酢于主人卒復位主人降阼階西面拜賓如初洗賓辭洗卒洗揖讓升酌西階上獻賓賓北面拜受爵主人在右荅拜薦脯醢設折俎賓左執爵祭豆奠爵興取肺坐絕祭嗜之興加于俎坐挽手祭酒卒爵拜主人荅拜受爵酌酢奠爵拜賓荅拜主人坐祭卒爵拜賓荅拜揖執祭以降西面奠于其位位如初薦俎從設衆賓升拜受爵坐祭立飲薦俎設于其位辨主人備荅拜焉降實爵于簠尊兩壺于阼階東加勺南枋西方亦如之主人洗解酌于西方之尊西階前北面酬賓賓在左主人奠解拜賓荅拜主人坐祭卒解拜賓荅拜主人洗解賓辭主人對卒洗酌西面賓北面拜主人奠解于薦北賓坐取解還東面拜主人荅拜賓奠解于薦南揖復位主人洗爵獻長兄弟于阼階上如賓儀洗獻衆兄弟如衆賓儀洗獻內兄弟于房中如獻衆兄弟之儀主人西面荅拜更爵酢卒爵降實爵于簠入復位長兄弟洗觚爲加爵如初儀不

及佐食洗致如初無從衆賓長爲加爵如初爵止

嗣舉奠盥入北面再拜稽首尸執奠進受復位祭酒啐酒尸舉肝舉奠左執解再拜稽首進受肝復位坐食肝卒解拜尸備荅拜焉舉奠洗爵入尸拜受舉奠荅拜尸祭酒啐酒奠之舉奠出復位兄弟弟子洗酌于東方之尊阼階前北面舉解于長兄弟如主人酬賓儀宗人告祭齊乃羞賓坐取解阼階前北面酬長兄弟長兄弟在右賓奠解拜長兄弟荅拜賓立卒解酌于其尊東面立長兄弟拜受解賓北面荅拜揖復位長兄弟西階前北面衆賓長自左受旅如初長兄弟卒解酌于其尊西面立受旅者拜受長兄弟北面荅拜揖復位衆賓及衆兄弟交錯以辯皆如初儀爲加爵者作止爵如長兄弟之儀長兄弟酬賓如賓酬兄弟之儀以辯卒受者實解于饌賓弟子及兄弟弟子洗各酌于其尊中庭北面西上舉解於其長奠解拜長皆荅拜舉解者祭卒解拜長皆荅拜舉解者洗各酌于其尊復初位長皆拜舉解者皆奠解于薦右長皆執以興舉解者皆復位荅拜長皆奠解于其所皆揖其弟子弟子皆復其位爵皆無筭利洗散獻于尸酢及祝如初儀降實散于饌主人出立于戶外西南祝東面

告利成尸謾祝前主人降祝反及主人入復位命佐食徹尸俎俎出于廟門徹庶羞設于西序下筵對席佐食分簋餼宗人遣舉奠及長兄弟盥立于西階下東面北上祝命嘗食養者舉奠許諾升入東面長兄弟對之皆坐佐食授舉各一膚主人西西再拜祝曰養有以也兩養奠舉于俎許諾皆荅拜若是者三皆取舉祭食祭舉乃食祭餼食舉卒食主人降洗爵宰贊一爵主人升酌醕上養上養拜受爵主人荅拜酌下養亦如之主人拜祝曰醕有與也如初儀兩養執爵拜祭酒卒爵拜主人荅拜兩養皆降實爵于籩上養洗爵升酌酢主人主人拜受爵上養卽位坐荅拜主人坐祭卒爵拜上養荅拜受爵降實于籩主人出立于戶外西面祝命徹俎豆籩設于東序下祝執其俎以出東面于戶西宗婦徹祝豆籩入于房徹主婦薦俎佐食徹尸薦俎敦設于西北隅儿在南扉用筵納一尊佐食闔牖戶降祝告利成降出主人降卽位宗人告事畢賓出主人送于門外再拜佐食徹俎俎堂下俎畢出記特牲饋食其服皆朝服玄冠緇帶緇鞶唯尸祝佐食玄端玄裳黃裳雜裳可也皆爵鞞設洗南北以堂深東西當東榮水在洗東籩在洗西南順實二爵二觚四解一角一散壺椽禁

饌于東序南順覆兩壺焉蓋在南明日卒奠罷用綌卽位而徹之加勺籩巾以綌也
纒裏棗蒸栗擇劔芼用苦若薇皆有滑夏葵冬菘棘心匕刻牲饔在廟門外東南魚
腊饔在其南皆西面饔饔在面壁胙俎心舌皆去本末午割之實于牲鼎載心立舌
縮俎賓與長兄弟之薦自東房其餘在東堂沃尸盥者一人奉槃者東面執匱者西
面淳沃執巾者在匱北宗人東面取巾振之三南面授尸卒執巾者受尸入主人及
賓皆避位出亦如之嗣舉奠佐食設豆鹽佐食當事則戶外南面無事則中庭北面
凡祝呼佐食許諾宗人獻與旅齒於衆賓佐食於旅齒於兄弟尊兩壺于房中西墉
下南上內賓立于其北東面西上宗婦北堂東面北上主婦及內賓宗婦亦旅西面
宗婦贊薦者執以坐于戶外授主婦尸卒食而祭饔饔雍饔賓從尸俎出廟門乃反
位尸俎右肩臂臑肫胙正脊二骨橫脊長脅二骨短脅膚三離肺一剝肺三魚十有
五腊如牲骨祝俎髀脰脊二骨脅二骨膚一離肺一陣俎臂正脊二骨橫脊長脅二
骨短脅膚一離肺一主婦俎穀折其餘如陣俎佐食俎穀折脊脅膚一離肺一賓酌
長兄弟及宗人折其餘如佐食俎衆賓及衆兄弟內賓宗婦若有公有司私臣皆穀

喬膚一離肺一公有司門西北面東上獻次衆賓私臣門東北面西上獻次兄弟升受降飲

少牢饋食禮

少牢饋食之禮日用丁巳筮旬有一日筮於廟門之外主人朝服西面于門東史朝服左執筮右抽上韉兼與筮執之東面受命于主人主人曰孝孫某來日丁亥用薦歲事于皇祖伯某以某妃配某氏尙饗史曰諾西面于門西抽下韉左執筮右兼執韉以擊筮遂述命曰假爾大筮有常孝孫某來日丁亥用薦歲事于皇祖伯某以某妃配某氏尙饗乃釋韉立筮卦者在左坐卦以木卒筮乃書卦于木示主人乃退占吉則史韉筮史兼執筮與卦以告于主人占曰從乃官戒宗人命滌宰命爲酒乃退若不吉則及遠日又筮如初宿前宿一日宿戒尸明日朝筮尸如筮日之禮命曰孝孫某來日丁亥用薦歲事于皇祖伯某以某妃配某氏以某之某爲尸尙饗筮卦占如初吉則乃遂宿尸祝擯主人再拜稽首祝告曰孝孫某來日丁亥用薦歲事于皇祖伯某以某妃配某氏敢宿尸拜許諾主人又再拜稽首主人退尸送揖不拜若

不吉則遂改筮尸既宿尸反爲期于席門之外主人門東南面宗人朝服北面曰請
祭期主人曰比於子宗人曰旦明行事主人曰諾乃退明日主人朝服卽位于席門
之外東方南面宰宗人西面北上牲北首東上司馬刲羊司士擊豕宗人告備乃退
雍人概鼎匕俎于雍饔雍饔在門東南北上廩人概甑甑匕與敦于廩饔廩饔在雍
饔之北司宮概豆籩勺爵觚解几洗篚于東堂下勺爵觚解實于篚卒概饌豆籩與
篚于房中放于西方設洗于阼階東南當東榮奠定雍人陳鼎五三鼎在羊鑊之西
二鼎在豕鑊之西司馬升羊右胖髀不升肩髀膊脰正脊一脰脊一橫脊一短脊
一正脅一代脅一皆二骨以並腸三胃三舉肺一祭肺三實于一鼎司士升豕右胖
髀不升肩髀膊脰正脊一脰脊一橫脊一短脊一正脅一代脅一皆二骨以並舉
肺一祭肺三實于一鼎雍人倫膚九實于一鼎司士又升魚腊魚十有五而鼎腊一
純而鼎腊用麋卒齊皆設扁鼈乃舉陳鼎于席門之外東方北面北上司宮尊兩甒
于房戶之閒同於皆有箒甒有玄酒司宮設盥水于洗東有枓設篚于洗西南肆改
饌豆籩于房中南面如饋之設實豆籩之實小祝設槃匱與箒巾于西階東主人朝

服卽位于阼階東西面司宮筵于奧祝設几于筵上右之主人出迎鼎除甯士盥舉鼎主人先入司宮取二勺于篚洗之兼執以升乃啓二尊之蓋霽奠于楹上加二勺于二尊覆之南柄鼎序入雍正執一匕以從雍府執四匕以從司士合執二俎以從司士贊者二人皆合執二俎以相從入陳鼎于東方當序南于洗西皆西面北上膚爲下匕皆加于鼎東枋俎皆設于鼎西西肆胙俎在羊俎之北亦西肆宗人遺賓就主人皆盥于洗長杙佐食上利升牢心舌載于胙俎心皆安下切上午割勿沒其載于胙俎末在上舌皆切本末亦午割勿沒其載于胙橫之皆如初爲之于饗也佐食遷胙俎于阼階西西縮乃反佐食二人上利升羊載右脾脾不升肩臂臑膊脰正脊一脰脊一橫脊一短脅一正脅一代脅一皆二骨以並腸三胃三長皆及俎拒舉肺一長終肺祭肺三皆切肩臂臑膊脰在兩端脊脅肺肩在上下利升豕其載如羊無腸胃體其載于俎皆進下司士三人升魚腊膚魚用鮓十有五而俎縮載右首進腴腊一純而俎亦進下肩在上膚九而俎亦橫載革順

卒齊祝盥于洗升自西階主人盥升自阼階祝先入南面主人從戶內西面主婦被

錫衣移袂薦自東房非菹醢醢坐奠于筵前主婦贊者一人亦被錫衣移袂執葵菹
羸醢以授主婦主婦不興遂受陪設于東韭菹在南葵菹在北主婦興入于房佐食
上利執羊俎下利執豕俎司士三人執魚腊膚俎序升自西階相從入設俎羊在豆
東豕亞其北魚在羊東腊在豕東特膚當俎北端主婦自東房執一金敦黍有蓋坐
設于羊俎之南婦贊者執敦稷以授主婦主婦興受坐設于魚俎南又興受贊者敦
黍坐設于稷南又興受贊者敦稷坐設于黍南敦皆南首主婦興入于房祝酌奠遂
命佐食啓會佐食啓會蓋二以重設于敦南主人西面祝在左主人再拜稽首祝祝
曰孝孫某敢用柔毛剛鬣嘉薦普淖用薦歲事于皇祖伯某以某妃配某氏尙饗主
人又再拜稽首祝出迎尸于廡門之外主人降立于阼階東西面祝先入門右尸入
門左宗人奉槃東面于庭南一宗人奉匱水西面于槃東一宗人奉簞巾南面于槃
北乃沃尸盥于槃上卒盥坐奠簞取巾興振之三以授尸坐取簞興以受尸巾祝延
尸尸升自西階入祝從主人升自阼階祝先入主人從尸升筵祝主人西面立于戶
內祝在左祝主人皆拜安尸尸不言尸荅拜遂坐祝反南面尸取韭菹辯擗于三豆

祭于豆間上佐食取黍稷于四敦下佐食取牢一切肺于俎以授上佐食上佐食兼與黍以授尸尸受同祭于豆祭上佐食舉尸牢肺正脊以授尸上佐食爾上敦黍于筵上右之主人羞所俎升自阼階置于膚北上佐食羞兩鴈取一羊鴈于房中坐設于韭菹之南下佐食又取一豕鴈于房中以從上佐食受坐設于羊鴈之南皆芼皆有糶尸扱以糶祭羊鴈遂以祭豕鴈嘗羊鴈食舉三飯上佐食舉尸牢幹尸受振祭臠之佐食受加于所上佐食羞載兩瓦豆有醢亦用瓦豆設于薦豆之北尸又食食載上佐食舉尸一魚尸受振祭臠之佐食受加于所橫之又食上佐食舉尸膾肩尸受振祭臠之上佐食受加于所又食上佐食舉尸牢骼如初又食尸告飽祝西面于主人之南獨侑不拜侑曰皇尸未實侑尸又食上佐食舉尸牢肩尸受振祭臠之佐食受加于所尸不飯告飽祝西面于主人之南主人不言拜侑尸又三飯上佐食受尸牢肺正脊加于所主人降洗爵升北面酌酒乃酌尸尸拜受主人拜送尸祭酒啐酒賓長羞牢肝用俎縮執俎肝亦縮進末鹽在右尸左執爵右兼取肝揆于俎鹽振祭臠之加于菹豆卒爵主人拜受尸爵尸荅拜祝酌受尸尸醋主人主人拜受爵尸

荅拜主人西面奠爵又拜上佐食取四敦黍稷下佐食取牢一切肺以授上佐食上佐食以綏祭主人佐執爵右受佐食坐祭之又祭酒不興遂啐酒祝與二佐食皆出盥于洗入二佐食各取黍于一敦上佐食兼受擗之以授尸尸執以命祝卒命祝祝受以東北面于戶西以嘏于主人曰皇尸命工祝承致多福無疆于女孝孫來女孝孫使女受祿于天宜稼于田眉壽萬年勿替引之主人坐奠爵興再拜稽首興受黍坐振祭噉之詩懷之實于左袂挂于季指執爵以興坐卒爵執爵以興坐奠爵拜尸荅拜執爵以興出宰夫以籩受醬黍主人嘗之納諸內主人獻祝設席南面祝拜于席上坐受主人西面荅拜薦兩豆菹醢佐食設俎半髀橫脊一短脅一腸一胃一膚三魚一橫之腊兩髀屬于尻祝取菹揆于醢祭于豆閒祝祭俎祭酒啐酒肝牢從祝取肝揆于鹽振祭噉之不興加于俎卒爵興主人酌獻上佐食上佐食戶內牖東北面拜坐受爵主人西面荅拜佐食祭酒卒爵拜坐授爵興俎設于兩階之間其俎折一膚主人又獻下佐食亦如之其齊亦設于階閒西上亦折一膚有司贊者取爵于篚以升授主婦贊者于房戶婦贊者受以授主婦主婦洗于房中出酌入戶西面拜

獻尸尸拜受主婦主人之北西面拜送爵尸祭酒卒爵主婦拜祝受尸爵尸荅拜易爵洗酌授尸主婦拜受爵尸荅拜上佐食綏祭主婦西面于主人之北受祭祭之其綏祭如主人之禮不緦卒爵拜尸荅拜主婦以爵出贊者受易爵于篚以授主婦于房中主婦洗酌獻祝拜坐受爵主婦荅拜于主人之北卒爵不興坐授主婦主婦受酌獻上佐食于戶內佐食北面拜坐受爵主婦西面荅拜祭酒卒爵坐授主婦主婦獻下佐食亦如之主婦受爵以入于房賓長洗爵獻于尸尸拜受爵賓戶西北面拜送爵尸祭酒卒爵賓拜祝受尸爵尸荅拜祝酌授尸賓拜受爵尸拜送爵賓坐奠爵遂拜執爵以興坐祭遂飲卒爵執爵以興坐奠爵拜尸荅拜賓酌獻祝祝拜坐受爵賓北面荅拜祝祭酒啐酒奠爵于其筵前主人出立于阼階上西面祝出立于西階上東面祝告曰利成祝入尸謾主人降立于阼階東西面祝先尸從遂出于廂門祝反復位于室中主人亦入于室復位祝命佐食徹所俎降設于堂下阼階南司宮設對席乃四人養上佐食盥升下佐食對之賓長二人備司士進一敦黍于上佐食又進一敦黍于下佐食皆右之于席上資黍于羊俎兩端兩下是餽司士乃辯舉養

者皆祭黍祭舉主人西面三拜養者養者奠舉于俎皆荅拜皆反取舉司士進一鬴于上養又進一鬴于次養又進二豆滫于兩下乃皆食食舉卒食主人洗一爵升酌以授上養贊者洗三爵酌主人受于戶內以授次養若是以辯皆不拜受爵主人西面三拜養者養者奠爵皆荅拜皆祭酒卒爵奠爵皆拜主人荅壹拜養者三人興出上養止主人受上養爵酌以酢于戶內西面坐奠爵拜上養荅拜坐祭酒啐酒上養親嘏曰主人受祭之福胡壽保建家室主人興坐奠爵拜執爵以興坐卒爵拜上養荅拜上養興出主人送乃退

有司徹

有司徹埽堂司宮攝酒乃爇尸俎卒爇乃升羊豕魚三鼎無腊與膚乃設扃甗陳鼎于門外如初乃議侑于賓以異姓宗人戒侑侑出俟于席門之外司宮筵于戶西南面又筵于西序東面尸與侑北面于席門之外西上主人出迎尸宗人擯主人拜尸荅拜主人又拜侑侑荅拜主人揖先入門右尸入門左侑從亦左揖乃讓主人先升自阼階尸侑升自西階西楹西北面東上主人東楹東北面拜至尸荅拜主人又拜

侑侑蒼拜乃舉司馬舉羊鼎司士舉豕鼎舉魚鼎以入陳鼎如初雍正執一匕以從
雍府執二匕以從司士合執二俎以從司士贊者亦合執二俎以從匕皆加于鼎東
枋二俎設于羊鼎西西縮二俎皆設于二鼎西亦西縮雍人合執二俎陳于羊俎西
並皆西縮覆二疏匕于其上皆縮俎西枋主人降受宰几尸侑降主人辭尸對宰授
几主人受二手橫執几揖尸主人升尸侑升復位主人西面左手執几縮之以右袂
推拂几三二手橫執几進授尸于筵前尸進二手受于手閒主人退尸還几縮之右
手執外廉北面奠于筵上左之南縮不坐主人東楹東北面拜尸復位尸與侑皆北
面蒼拜主人降洗尸侑降尸辭洗主人對卒洗揖主人升尸侑升尸西楹西北面拜
洗主人東楹東北面奠爵蒼拜降盥尸侑降主人辭尸對卒盥主人揖升尸侑升主
人坐取爵酌獻尸尸北面拜受爵主人東楹東北面拜送爵主婦自東房薦韭菹醢
坐奠于筵前菹在西方婦贊者執昌菹醢以授主婦主婦不興受陪設于南昌在東
方興取籩于房饗黃坐設于豆西當外列饗在東方婦贊者執白黑以授主婦主婦
不興受設于初籩之南白在西方興退乃升司馬柅羊亦司馬載載右體肩胛肱

臠正脊一脰脊一橫脊一短脅一正脅一代脅一腸一胃一祭肺一載于一俎羊肉
涪臠折正脊一正脅一腸一胃一臍肺一載于南俎司士牝豕亦司士載亦右體肩
臂臠臠臠正脊一脰脊一橫脊一短脅一正脅一代脅一膚五臍肺一載于一俎侑
俎羊左肩左肱正脊一脅一腸一胃一切肺一載于一俎侑俎豕左肩折正脊一脅
一膚三切肺一載于一俎阼俎羊肺一祭肺一載于一俎羊肉涪臂一脊一脅一腸
一胃一臍肺一載于一俎豕齊臂一脊一脅一膚三臍肺一載于一俎主婦俎羊左
臠脊一脅一腸一胃一膚一臍羊肺一載于一俎司士牝魚亦司士載尸俎五魚橫
載之侑主人皆一魚亦橫載之皆加臠祭于其上卒升賓長設羊俎于豆南賓降尸
升筵自西方坐左執爵右取韭菹擗于三豆祭于豆閒尸取饗贊宰夫贊者取白黑
以授尸尸受兼祭于豆祭雍人授次賓疏匕與俎受于鼎西左手執俎左廉縮之卻
右手執匕枋縮于俎上以東面受于羊鼎之西司馬在羊鼎之東二手執桃匕枋以
挹澹注于疏匕若是者三尸興左執爵右取肺坐祭之祭酒興左執爵次賓縮執匕
俎以升若是以授尸尸卻手授匕枋坐祭臍之興覆手以授賓賓亦覆手以受縮匕

于俎上以降尸席末坐啐酒興坐奠爵拜告言執爵以興主人北面于東楹東荅拜司馬羞羊肉湑縮執俎尸坐奠爵興取肺坐絕祭嘑之興反加于俎司馬縮奠俎于羊湑俎南乃載于羊俎卒載俎縮執俎以降尸坐執爵以興次賓羞羊燔縮執俎縮一燔于俎上鹽在右尸左執爵受燔揆于鹽坐振祭嘑之興加于羊俎賓縮執俎以降尸降筵北面于西楹西坐卒爵執爵以興坐奠爵拜執爵以興主人北面于東楹東荅拜主人受爵尸升筵立于筵末主人酌獻侑侑西楹西北面拜受爵主人在其右北面荅拜主婦薦韭菹醢坐奠于筵前醢在南方婦贊者執二籩饗以授主婦主婦不興受之奠饗于醢南蕢在饗東主婦入于房侑升筵自北方司馬橫執羊俎以升設于豆東侑坐左執爵右取菹揆于醢祭于豆閒又取饗蕢同祭于豆祭興左執爵右取肺坐祭之祭酒興左執爵次賓羞羊燔如尸禮侑降筵自北方北面于西楹西坐卒爵執爵以興坐奠爵拜主人荅拜尸受侑爵降洗侑降立于西階西東面主人降自阼階辭洗尸坐奠爵于篋興對卒洗主人升尸升自西階主人拜洗尸北面于西楹西坐奠爵荅拜降盥主人降尸辭主人對卒盥主人升尸升坐取爵酌司

宮設席于東序西面主人東楹東北面拜受爵尸西楹西北面荅拜主婦薦韭菹醢坐奠于筵前菹在北方婦贊者執二籩饗主婦不興受設饗于菹西北贊在饗西主人升筵自北方主婦入于房長賓設羊俎于豆西主人坐左執爵祭豆籩如侑之祭興左執爵右取肺坐祭之祭酒興次賓羞匕湑如尸禮席末坐啐酒執爵以興司馬羞羊肉湑縮執俎主人坐奠爵于左興受肺坐絕祭噴之興反加于湑俎司馬縮奠湑俎于羊俎西乃載之卒載縮執虛俎以降主人坐取爵以興次賓羞燔主人受如尸禮主人降筵自北方北面于阼階上坐卒爵執爵以興坐奠爵拜執爵以興尸西楹西荅拜主人坐奠爵于東序南侑升尸侑皆北面于西楹西主人北西于東楹東再拜崇酒尸侑皆荅再拜主人及尸侑皆升就筵司宮取爵于篚以授婦贊者于房東以授主婦主婦洗于房中出實爵尊南西面拜獻尸尸拜于筵上受主婦西面于主人之席北拜送爵入于房取一羊羹坐奠于韭菹西主婦贊者執豕羹以從主婦不興受設于羊羹之西興入于房取糗與服脩執以出坐設之糗在贊西脩在白西興立于主人席北西面尸坐左執爵祭糗脩同祭于豆祭以羊羹之柶挹羊羹遂

以挹豕鬮祭于豆祭祭酒次賓羞豕匕涪如羊匕涪之禮尸坐啐酒左執爵嘗上鬮執爵以興坐奠爵拜主婦蒼拜執爵以興司士羞豕鬮尸坐奠爵興受如羊肉涪之禮坐取爵興次賓羞豕燔尸左執爵受燔如羊燔之禮坐卒爵拜主婦蒼拜受爵酌獻侑侑拜受爵主婦主人之北西面蒼拜主婦羞糗脩坐奠糗于鸞南脩在贊南侑坐左執爵取糗脩兼祭于豆祭司士縮執豕鬮以升侑興取肺坐祭之司士縮奠豕鬮于羊俎之東載于羊俎卒乃縮執俎以降侑興次賓羞豕燔侑受如尸禮坐卒爵拜主婦蒼拜受爵酌以致于主人主人筵上拜受爵主婦北面于阼階上蒼拜主婦設二鬮與糗脩如尸禮主人其祭糗脩祭鬮祭酒受豕匕涪拜啐酒皆如尸禮嘗鬮不拜其受豕鬮受豕燔亦如尸禮坐卒爵拜主婦北面蒼拜受爵尸降筵受主婦爵以降主人降侑降主婦入于房主人立于洗東北面面侑東面于面階西南尸易爵于篚盥洗爵主人揖尸侑主人升尸升自西階侑從主人北面立于東楹東侑西楹西北面立尸酌主婦出于房西面拜受爵尸北西于侑東蒼拜主婦入于房司宮設席于房中南面主婦立于西席婦贊者薦韭菹醢坐奠于筵前菹在西方婦人贊者

執鸞質以授婦贊者婦贊者不興受設鸞于菹西贊在鸞南主婦升筵司馬設羊俎于豆南主婦坐左執爵右取菹揆于醢祭于豆閒又取鸞質兼祭于豆祭主婦奠爵興取肺坐絕祭嘑之興加于俎坐扱手祭酒啐酒次賓羞羊燔主婦興受燔如主人之禮主婦執爵以出于房西面于主人席北立卒爵執爵拜尸西楹西北面荅拜主婦入立于房尸主人及侑皆就筵上賓洗爵以升酌獻尸尸拜受爵賓西楹西北面拜送爵尸奠爵于薦左賓降主人降洗解尸侑降主人奠爵于篚辭尸對卒洗揖尸升侑不升主人實解酬尸東楹東北面坐奠爵拜尸西楹西北面荅拜坐祭遂飲卒爵拜尸荅拜降洗尸降辭主人奠爵于篚對卒洗主人升尸升主人實解尸拜受爵主人反位荅拜尸北面坐奠爵于薦左尸侑主人皆升筵乃羞宰夫羞房中之羞于尸侑主人主婦皆右之司士羞庶羞于尸侑主人主婦皆左之

主人降南面拜衆賓于門東三拜衆賓門東北面皆荅壹拜主人洗爵長賓辭主人奠爵于篚興對卒洗升酌獻賓于西階上長賓升拜受爵主人在其右北面荅拜宰夫自東房薦脯醢醢在西司士設俎于豆北羊骼一腸一胃一膚一賓坐左

執爵右取肺揆于醢祭之執爵興取肺坐祭之祭酒遂飲卒爵執以興坐奠爵拜執爵以興主人荅拜受爵賓坐取祭以降西面坐委于西階西南宰夫執薦以從設于祭東司士執俎以從設于薦東衆賓長升拜受爵主人荅拜坐祭立飲卒爵不拜既爵宰夫贊主人酌若是以辯辯受爵其薦肺醢與齊設于其位其位繼上賓面南皆東面其香體儀也乃升長賓主人酌酢于長賓西階上北面賓在左主人坐奠爵拜執爵以興賓荅拜坐祭遂飲卒爵執爵以興坐奠爵拜賓荅拜賓降宰夫洗解以升主人受酌降酬長賓于西階南北面賓在左主人坐奠爵拜賓荅拜坐祭遂飲卒爵拜賓荅拜主人洗賓辭主人坐奠爵于篚對卒洗升酌降復位賓拜受爵主人拜送爵賓西面坐奠爵于薦左主人洗升酌獻兄弟于阼階上兄弟之長升拜受爵主人在其右荅拜坐祭立飲不拜既爵皆若是以辯辯受爵其位在洗東西面北上升受爵其薦齊設于其位其先生之齊折脅一膚一其衆儀也主人洗獻內賓于房中南面拜受爵主人南面于其右荅拜坐祭立飲不拜既爵若是以辯亦有薦齊主人降洗升獻私人于阼階上拜于下升受主人荅其長拜乃降坐祭立飲不拜既爵若是

以辯宰夫贊主人酌主人於其羣私人不荅拜其位繼兄弟之南亦北上亦有薦胥
主人就筵尸作三獻之爵司士羞涪魚縮執俎以升尸取膾祭祭之祭酒卒爵司士
縮奠俎于羊俎南橫載于羊俎卒乃縮執俎以降尸奠爵拜三獻北面荅拜受爵酌
獻侑侑拜受三獻北面荅拜司馬羞涪魚一如尸禮卒爵拜三獻荅拜受爵酌致主
人主人拜受爵三獻東楹東北面荅拜司士羞一涪魚如尸禮卒爵拜三獻荅拜受
爵尸降筵受三獻爵酌以酢之三獻西楹西北面拜受爵尸在其右以授之尸升筵
南面荅拜坐祭遂飲卒爵拜尸荅拜執爵以降實于篚二人洗解升實爵西楹西北
面東上坐奠爵拜執爵以興尸侑荅拜坐祭遂飲卒爵執爵以興坐奠爵拜尸侑荅
拜皆降洗升酌反位尸侑皆拜受爵舉解者皆拜送侑奠解于右尸遂執解以興北
面于阼階上酬主人主人在右坐奠爵拜主人荅拜不祭立飲卒爵不拜既爵酬就
于阼階上酬主人主人拜受爵尸拜送尸就筵主人以酬侑于西楹西侑在左坐奠
爵拜執爵興侑荅拜不祭立飲卒爵不拜既爵酌復位侑拜受主人拜送主人復筵
乃升長賓侑酬之如主人之禮至于衆賓遂及兄弟亦如之皆飲于上遂及私人拜

受者升受下飲卒爵升酌以之其位相酬辯卒飲者實爵于篚乃羞庶羞于賓兄弟
內賓及私人兄弟之後生者舉觶于其長洗升酌降北面立于阼階南長在左坐奠
爵拜執爵以興長荅拜坐祭遂飲卒爵執爵以興坐奠爵拜執爵以興長荅拜洗升
酌降長拜受于其位舉爵者東面荅拜爵止賓長獻于尸如初無涪爵不止賓一人
舉爵于尸如初亦遂之於下賓及兄弟交錯其酬皆遂及私人爵無筭尸出侑從主
人送于廂門之外拜尸不願拜侑與長賓亦如之衆賓從司士歸尸侑之俎主人退
有司徹若不賓尸則祝侑亦如之尸食乃盛俎臠臂肫臠脊橫脊短脅代脅皆牢魚
七腊辯無髀卒盛乃舉牢肩尸受振祭嚼之佐食受加于胙佐食取一俎于堂下以
入奠于羊俎東乃撫于魚腊俎俎釋三个其餘皆取之實于一俎以出祝主人之魚
腊取于是尸不飯告飽主人拜侑不言尸又三飯佐食受牢舉如饋主人洗酌醕尸
賓羞肝皆如饋禮卒爵主人拜祝受尸爵尸荅拜祝酌授尸尸以醋主人亦如饋其
綏祭其蝦亦如饋其獻祝與二佐食其位其薦齊皆如饋主婦其洗獻于尸亦如饋
主婦反取籩于房中執棗糗坐設之棗在稷南糗在棗南婦贊者執栗脯主婦不興

受設之栗在糗東脯在棗東主婦興反位尸左執爵取棗糗祝取栗脯以授尸尸兼祭于豆祭祭酒啐酒次賓羞半燔用俎鹽在右尸兼取燔揆于鹽振祭嘑之祝受加于斝卒爵主婦拜祝受尸爵尸荅拜祝易爵洗酌授尸尸以醋主婦主婦主人之北拜受爵尸荅拜主婦反位又拜上佐食綏祭如儻卒爵拜尸荅拜主婦獻祝其酌如儻拜坐受爵主婦主人之北荅拜宰夫薦棗糗坐設棗于菹西糗在棗南祝左執爵取棗糗祭于豆祭祭酒啐酒次賓羞燔如尸禮卒爵主人受爵酌獻二佐食亦如儻主婦受爵以入于房賓長洗爵獻于尸尸拜受賓尸北面荅拜爵止主婦洗于房中酌致于主人主人拜受主婦尸西北面拜送爵司宮設席主婦薦韭菹醢坐設于席前菹在北方婦贊者執棗糗以從主婦不興受設棗于菹北糗在棗西佐食設俎臂脊脅肺皆牢膚三魚一腊臂主人左執爵右取菹揆于醢祭于豆閒遂祭籩奠爵興取牢肺坐絕祭嘑之興加于俎坐授手祭酒執爵以興坐卒爵拜主婦荅拜受爵酌以醋尸內北面拜主人荅拜卒爵拜主人荅拜主婦以爵入于房尸作止爵祭酒卒爵賓拜祝受爵尸荅拜祝酌授尸賓拜受爵尸拜送坐祭遂飲卒爵拜尸荅拜獻

祝及二佐食洗致爵于主人主人席上拜受爵賓北面荅拜坐祭遂飲卒爵拜賓荅拜受爵酌致爵于主婦主婦北堂司宮設席東面主婦席北東面拜受爵賓西面荅拜婦贊者薦韭菹醢菹在南方婦人贊者執棗糗授婦贊者婦贊者不興受設棗于菹南糗在棗東佐食設俎于豆東羊臠豕折羊脊脅祭肺一膚一魚一腊臠主婦升筵坐左執爵右取菹擗于醢祭之祭籩奠爵興取肺坐絕祭臠之興加于俎坐挽手祭酒執爵興筵北東面立卒爵拜賓荅拜賓受爵易爵于筵洗酌醋于主人戶西北面拜主人荅拜卒爵拜主人荅拜賓以爵降奠于筵乃羞宰夫羞房中之羞司士羞庶羞于尸祝主人主婦內羞在右庶羞在左主人降拜衆賓洗獻衆賓其薦齊皆如饋禮其醢醢皆如饋禮主人洗獻兄弟與內賓與私人皆如饋禮其位其薦齊皆如饋禮卒乃羞于賓兄弟內賓及私人辯賓長獻于尸尸醢獻祝祝受祭酒啐酒奠之主人出立于阼階上西面祝出立于西階上東面祝告于主人曰利成祝入主人降立于阼階東西面尸設祝前尸從遂出于廟門祝反復位于室中祝命佐食徹尸俎佐食乃出尸

俎于席門外有司受歸之徹阼薦俎乃饗如儻卒饗有司官徹饋饌于室中西北隅南面如饋之設有几扉用席納一尊于室中司宮埽祭主人出立于阼階上西面祝執其俎以出立于西階上東面司宮闔牖戶祝告利成乃執俎以出于席門外有司受歸之衆賓出主人拜送于席門外乃反婦人乃徹徹室中之饌

儀禮終

禮記

曲禮上

曲禮曰毋不敬儼若思安定辭安民哉○敖不可長欲不可從志不可滿樂不可極
○賢者狎而敬之畏而愛之愛而知其惡憎而知其善積而能敖安安而能遷臨財
毋苟得臨難毋苟免很毋求勝分毋求多疑事毋質直而勿有○若夫坐如尸立如
齊禮從宜使從俗○夫禮者所以定親疏決嫌疑別同異明是非也禮不妄說人不
辭費禮不踰節不侵侮不好狎脩身踐言謂之善行行脩言道禮之質也禮聞取於
人不聞取人禮聞來學不聞往教○道德仁義非禮不成教訓正俗非禮不備分爭
辨訟非禮不決君臣上下父子兄弟非禮不定宦學事師非禮不親班朝治軍准官
行法非禮威嚴不行禱祠祭祀供給鬼神非禮不誠不莊是以君子恭敬撝節退讓
以明禮鸚鵡能言不離飛鳥猩猩能言不離禽獸今人而無禮離能言不亦禽獸之
心乎夫唯禽獸無禮故父子聚麀是故聖人作爲禮以教人使人以有禮知自別於
禽獸○太上貴德其次務施報禮尙往來往而不來非禮也來而不往亦非禮也人

有禮則安無禮則危故曰禮者不可不學也夫禮者自卑而尊人雖負販者必有尊也而况富貴乎富貴而知好禮則不驕不淫貧賤而知好禮則志不懣○人生十年曰幼學二十曰弱冠三十曰壯有室四十曰強而仕五十曰艾服官政六十曰耆指使七十曰老而傳八十九十曰耄七年曰悼悼與遽雖有罪不加刑焉百年曰期頤大夫七十而致事若不得謝則必賜之几杖行役以婦人適四方乘安車自稱曰老夫於其國則稱名越國而問焉必告之以其制○謀於長者必操几杖以從之長者問不辭讓而對非禮也○凡爲人子之禮冬溫而夏清昏定而晨省在醜夷不爭○夫爲人子者三賜不及車馬故州閭鄉黨稱其孝也兄弟親戚稱其慈也僚友稱其弟也執友稱其仁也交遊稱其信也見父之執不謂之進不敢進不謂之退不敢退不問不敢對此孝子之行也○夫爲人子者出必告反必面所遊必有常所習必有業恆言不稱老年長以倍則父事之十年以長則兄事之五年以長則肩隨之羣居五人則長者必異席○爲人子者居不主奧坐不中席行不中道立不中門食饗不爲槃祭祀不爲尸聽於無聲視於無形不登高不臨深不苟訾不苟笑孝子不服闇

不登危懼辱親也父母存不許友以死不有私財○爲人子者父母存冠衣不純素
孤子當室冠衣不純采○幼子常視毋誑童子不衣裳裳立必正方不傾聽長者與
之提攜則兩手奉長者之手負劍辟咻詔之則掩口而對

從於先生不越路而與人言遭先生於道趨而進正立拱手先生與之言則對不與
之言則趨而退從長者而上丘陵則必鄉長者所視登城不指城上不呼將適舍求
毋固將上堂聲必揚戶外有二屨言聞則入言不聞則不入將人戶視必下入戶奉
扁視瞻毋回戶開亦開戶闔亦闔有後入者闔而勿遂毋踐屨毋踏席擺衣趨隅必
慎唯諾大夫士出入君門由闈右不踐闈○凡與客入者每門讓於客客至於寢門
則主人請入爲席然後出迎客客固辭主人肅客而入主人入門而右客入門而左
主人就東階客就西階客若降等則就主人之階主人固辭然後客復就而階主人
與客讓登主人先登客從之拾級聚足連步以上上於東階則先右足上於西階則
先左足○帷薄之外不趨堂上不趨執玉不趨堂上接武堂下布武室中不翔並坐
不橫肱授立不跪授坐不立○凡爲長者冀之禮必加帶於箕上以袂拘而退其塵

不及長者以箕自鄉而扱之奉席如橋衡請席何鄉請衽何趾席南鄉北鄉以西方爲上東鄉西鄉以南方爲上若非飲宴之客則布席席問函丈主人跪正席客跪撫席而辭客徹重席主人固辭客踐席乃坐主人不問客不先舉將卽席容毋怍兩手握衣去齊尺衣毋撥足毋蹶先生書策琴瑟在前坐而遷之戒勿越虛坐盡後食坐盡前坐必安執爾顏長者不及毋僂言正爾容聽必恭毋勦說毋雷同必則古昔稱先王侍坐於先生先生問焉終則對請業則起請益則起父召無諾先生召無諾唯而起侍坐於所尊敬毋餘席見同等不起燭至起食至起上客起燭不見跋尊客之前不叱狗讓食不唾○侍坐於君子君子欠伸撰杖履視日蚤莫侍坐者請出矣侍坐於君子君子問更端則起而對侍坐於君子若有告者曰少間願有復也則左右屏而待○毋側聽毋噉應毋淫視毋怠荒遊毋倨立毋跛坐毋箕寢毋伏斂髮毋髻冠毋免勞毋袒暑毋褰裳○侍坐於長者屨不上於堂解屨不敢當階就屨跪而舉之屏於側鄉長者而屨跪而遷屨俯而納屨○離坐離立毋往參焉離立者不出中間○男女不雜坐不同櫨櫺不同巾櫛不親授嫂叔不通問諸母不漱裳外言不入

於柵內言不出於柵女子許嫁纓非有大故不入其門姑姊妹女子子已嫁而反兄弟弗與同席而坐弗與同器而食父子不同席男女非有行媒不相知名非受幣不交不親故日月以告君齊戒以告鬼神爲酒食以召鄉黨僚友以厚其別也取妻不取同姓故買妾不知其姓則卜之寡婦之子非有見焉弗與爲友○賀取妻者曰某子使某聞子有客使某羞○貧者不以貨財爲禮老者不以筋力爲禮○名子者不以國不以日月不以隱疾不以山川○男女異長男子二十冠而字父前子名君前臣名女子許嫁笄而字○凡進食之禮左穀右馘食居人之左羹居人之右膾炙處外醢醬處內葱涑處末酒漿處右以脯脩置者左胸右末客若降等執食興辭主人興辭於客然後客坐主人延客祭祭食祭所先進穀之序徧祭之三飯主人延客食馘然後辯馘主人未辯客不虛口侍食於長者主人親饋則拜而食主人不親饋則不拜而食共食不飽共飯不澤手毋搏飯毋放飯毋流歡毋咤食毋醬骨毋反魚肉毋投與狗骨毋固獲毋揚飯飯黍毋以箸毋嚶羹毋絮羹毋刺齒毋歃醢客絮羹主人辭不能亨客歃醢主人辭以糞濡肉齒決乾肉不齒決毋嘍炙卒食客自前跪徹

飯齊以授相者主人興辭於客然後客坐侍飲於長者酒進則起拜受於尊所長者辭少者反席而飲長者舉未酬少者不敢飲長者賜少者賤者不敢辭賜果於君前其有核者懷其核御食於君君賜餘器之漑者不寫其餘皆寫餞餘不祭父不祭子夫不祭妻御同於長者雖貳不辭偶坐不辭羹之有菜者用挾其無菜者不用挾爲天子削瓜者副之巾以絺爲國君者華之巾以綌爲大夫累之士蹇之庶人黻之父母有疾冠者不櫛行不翔言不惰琴瑟不御食肉不至變味飲酒不至變貌笑不至矧怒不至冒疾止復故有憂者側席而坐有喪者專席而坐○水潦降不獻魚鼈獻鳥者佛其首畜鳥者則勿佛也獻車馬者執策綏獻甲者執冑獻杖者執末獻民虜者操右袂獻粟者執右契獻米者操量鼓獻熟食者操醬齊獻田宅者操書致凡遣人弓者張弓尙筋弛弓尙角右手執籥左手承弣尊卑垂帨若主人拜則客還辟辟拜主人自受由客之左接下承弣鄉與客並然後受進劍者左首進戈者前其鐔後其刃進矛戟者前其鏃進几杖者拂之效馬效羊者右牽之效犬者左牽之執禽者左首飾羔鴈者以纁受珠玉者以掬受弓劍者以袂飲玉爵者弗揮凡以弓劍苞苴

簞笥問人者操以受命如使之容

凡爲君使者已受命君言不宿於家君言至則主人出拜君言之辱使者歸則必拜送于門外若使人於君所則必朝服而命之使者反則必下堂而受命○博聞強識而讓敦善行而不怠謂之君子君子不盡人之歡不竭人之忠以全交也禮曰君子抱孫不抱子此言孫可以爲王父尸子不可以爲父尸爲君尸者大夫士見之則下之君知所以爲尸者則自下之尸必式乘必以几齊者不樂不弔○居喪之禮毀瘠不形視聽不衰升降不由阼階出入不當門墜○居喪之禮頭有創則沐身有瘍則浴有疾則飲酒食肉疾止復初不勝喪乃比於不慈不孝五十不致毀六十不毀七十唯衰麻在身飲酒食肉處於內生與來日死與往日知生者弔知死者傷知生而不知死弔而不傷知死而不知生傷而不弔弔喪弗能賻不問其所費問疾弗能遺不問其所欲見人弗能館不問其所舍賜人者不曰來取與人者不問其所欲○適墓不登壘助葬必執紼臨喪不笑揖人必達其位望柩不歌入臨不翔當食不歡鄰有喪春不相里有殯不巷歌適墓不歌哭日不歌送喪不由徑送葬不辟塗潦臨喪

則必有哀色執紼不笑臨樂不歎介冑則有不可犯之色故君子戒慎不失色於人國君撫式大夫下之大夫撫式士下之禮不下庶人刑不上大夫刑人不在君側○兵車不式武車綏旌德車結旌○史載筆士載言前有水則載青旌前有塵埃則載鳴鳶前有車騎則載飛鴻前有士師則載虎皮前有擊獸則載貔貅行前朱鳥而後玄武左青龍而右白虎招搖在上急繕其怒進退有度左右有局各司其局○父之讎弗與共戴天兄弟之讎不反兵交遊之讎不同國○四郊多壘此卿大夫之辱也地廣大荒而不治此亦士之辱也○臨祭不惰祭服敝則焚之祭器敝則埋之龜莢敝則埋之牲死則埋之凡祭於公者必自徹其俎○卒哭乃諱禮不諱嫌名二名不偏諱逮事父母則諱王父母不逮事父母則不諱王父母君所無私諱大夫之所有公諱詩書不諱臨文不諱廟中不諱夫入之諱雖質君之前臣不諱也婦諱不出門大功小功不諱入竟而問禁入國而問俗入門而問諱○外事以剛日內事以柔日凡卜筮日旬之外曰遠某日旬之內曰近某日喪事先遠日吉事先近日曰爲日假爾泰龜有常假爾泰筮有常卜筮不過三卜筮不相襲龜爲卜筮爲筮卜筮者先聖

王之所以使民信時日敬鬼神畏法令也所以使民決嫌疑定猶與也故曰疑而筮之則弗非也日而行事則必賤之○君車將駕則僕執策立於馬前已駕僕展輪效駕奮衣由右上取貳綏跪乘執策分轡驅之五步而立君出就車則僕并轡授綏左右攘辟車驅而騶至于大門君撫僕之手而顧命車右就車門閭溝渠必步凡僕人之禮必授人綏若僕者降等則受不然則否若僕者降等則撫僕之手不然則自下拘之客車不入大門婦人不立乘犬馬不上於堂故君子式黃髮下鄉位入國不馳入里必式君命召雖賤人大夫士必自御之介者不拜爲其拜而菱拜祥車曠左乘君之乘車不敢曠左左必式僕御婦人則進左手後右平御國君則進右手後左手而俯國君不乘奇車車上不廣欵不妄指立視五嶷式視馬尾顧不過轂國中以策彗卹勿驅塵不出軌國君下齊牛式宗廟大夫士下公門式路馬乘路馬必朝服載鞭策不敢授綏左必式步路馬必中道以足蹙路馬芻有誅齒路馬有誅

曲禮下

凡奉者當心提者當帶執天子之器則上衡國君則平衡大夫則綏之士則提之凡

執主器執輕如不克執主器操幣圭璧則尙左手行不舉足車輪曳踵立則磬折垂佩主佩倚則臣佩垂主佩垂則臣佩委執玉其有藉者則裼無藉者則襲○國君不名卿老世婦大夫不名世臣姪婦士不名家相長妾君大夫之子不敢自稱曰余小子大夫士之子不敢自稱曰嗣子某不敢與世子同名○君使士射不能則辭以疾言曰某有負薪之憂侍於君子不願望而對非禮也○君子行禮不求變俗祭祀之禮居喪之服哭泣之位皆如其國之故謹脩其法而審行之去國三世爵祿有列於朝出入有詔於國若兄弟宗族猶存則反告於宗後去國三世爵祿無列於朝出入無詔於國唯興之日從新國之法○君子已孤不更名已孤暴貴不爲父作諡居喪未葬讀喪禮既葬讀祭禮喪復常讀樂章居喪不言樂祭事不言凶公庭不言婦女○振書端書於君前有誅倒筴側龜於君前有誅龜筴凡杖席蓋重素殯絺綌不入公門苞屨扱衽厭冠不入公門書方衰凶器不以告不入公門公事不私議○君子將營宮室宗廟爲先廡庫爲次居室爲後○凡家造祭器爲先織賦爲次養器爲後無田祿者不設祭器有田祿者先爲祭服君子雖貧不粥祭器雖寒不衣祭服爲官

室不斬於丘木大夫士去國祭器不踰竟大夫寓祭器於大夫士寓祭器於士大夫士去國踰竟爲壇位鄉國而哭素衣素裳素冠徹緣鞮屨素箠乘髦馬不蚤髻不祭食不說人以無罪婦人不當御三月而復服大夫士見於國君君若勞之則還辟再拜稽首君若迎拜則還辟不敢答拜大夫士相見雖貴賤不敵主人敬客則先拜客客敬主人則先拜主人凡非弔喪非見國君無不答拜者大夫見於國君國君拜其辱士見於大夫大夫拜其辱同國始相見主人拜其辱君於士不荅拜也非其臣則荅拜之大夫於其臣雖賤必荅拜之男女相荅拜也○國君春田不圍澤大夫不掩羣士不取麇卵○歲凶年穀不登君膳不祭肺馬不食穀馳道不除祭事不縣大夫不食梁士飲酒不樂君無故玉不去身大夫無故不徹縣士無故不徹琴瑟士有獻於國君他日君問之曰安取彼再拜稽首而后對大夫私行出疆必請反必有獻士私行出疆必請反必告君勞之則拜問其行拜而后對○國君去其國止之曰奈何去社稷也大夫曰奈何去宗廟也士曰奈何去墳墓也國君死社稷大夫死衆士死制○君天下曰天子朝諸侯分職授政任功曰予一人踐阼臨祭祀內事曰孝王某

外事曰嗣王某臨諸侯於鬼神曰有天王某甫崩曰天王崩復曰天子復矣告喪曰天王登假措之廟立之主曰帝天子未除喪曰予小子生名之死亦名之○天子有后有夫人有世婦有嬪有妻有妾天子建天官先六大曰大宰大宗大史大祝大士大卜典司六典天子之五官曰司徒司馬司空司士司寇典司五衆天子之六府曰司土司木司水司草司器司貨典司六職天子之六工曰土工金工石工木工獸工草工典制六材五官致貢曰享

五官之長曰伯是職方其擯於天子也曰天子之吏天子同姓謂之伯父異姓謂之伯舅自稱於諸侯曰天子之老於外曰公於其國曰君九州之長入天子之國曰牧天子同姓謂之叔父異姓謂之叔舅於外曰侯於其國曰君其在東夷北狄西戎南蠻雖大曰子於內自稱曰不穀於外自稱曰王老庶方小侯入天子之國曰某人於外曰子自稱曰孤天子當依而立諸侯北面而見天子曰覲天子當寧而立諸公東面諸侯西面曰朝○諸侯未及期相見曰遇相見於卻地曰會諸侯使大夫問於諸侯曰聘約信曰誓澁牲曰盟○諸侯見天子曰臣某侯某其與民言自稱曰寡人其

在凶服曰適子孤臨祭祀內事曰孝子某侯某外事曰曾孫某侯某死曰薨復曰某甫復矣既葬見天子曰類見言諡曰類諸侯使人使於諸侯使者自稱曰寡君之老天子穆穆諸侯皇皇大夫濟濟士跄跄庶人儻儻天子之妃曰后諸侯曰夫人大夫曰孺人士曰婦人庶人曰妻公侯有夫人有世婦有妻有妾夫人自稱於天子曰老婦自稱於諸侯曰寡小君自稱於其君曰小童自世婦以下自稱曰婢子子於父母則自名也列國之大夫入天子之國曰某士自稱曰陪臣某於外曰子於其國曰寡君之老使者自稱曰某○天子不言出諸侯不生名君子不親惡諸侯失地名滅同姓名爲人臣之禮不顯諫三諫而不聽則逃之子之事親也三諫而不聽則號泣而隨之○君有疾飲藥臣先嘗之親有疾飲藥子先嘗之醫不三世不服其藥僇人必於其倫○問天子之年對曰聞之始服衣若子尺矣問國君之年長曰能從宗廟社稷之事矣幼曰未能從宗廟社稷之事也問大夫之子長曰能御矣幼曰未能問士之子長曰能典謁矣幼曰未能典謁也問庶人之子長曰能負薪矣幼曰未能負薪也○問國君之富數地以對山澤之所出問大夫之富曰有宰食力祭器衣服

不假問士之富以車數對問庶人之富數畜以對○天子祭天地祭四方祭山川祭五祀歲徧諸侯方祀祭山川祭五祀歲徧大夫祭五祀歲徧士祭其先○凡祭有其廢之莫敢舉也有其舉之莫敢廢也非其所祭而祭之名曰淫祀淫祀無福○天子以犧牛諸侯以肥牛大夫以索牛士以羊豕支子不祭祭必告于宗子○凡祭宗廟之禮牛曰一元大武豕曰剛鬣豚曰臄肥羊曰柔毛雞曰翰音犬曰羹獻雉曰疏趾兔曰明視脯曰尹祭彘魚曰商祭鮮魚曰臙祭水曰清滌酒曰清酌黍曰薌合粱曰薌其稷曰明粢稻曰嘉蔬韭曰豐本鹽曰鹹醢玉曰嘉玉幣曰量幣○天子死曰崩諸侯曰薨大夫曰卒士曰不祿庶人曰死在牀曰尸在棺曰柩羽鳥曰降四足曰潰死寇曰兵祭王父曰皇祖考王母曰皇祖妣父曰皇考母曰皇妣夫曰皇辟生曰父曰母曰妻死曰考曰妣曰嬪壽考曰卒短折曰不祿○天子視不上於衿不下於帶國君綏視大夫衡視士視五步凡視上於面則敖下於帶則憂傾則姦○君命大夫與士肄在官言官在府言府在庫言庫在朝言朝朝言不及犬馬輟朝而顧不有異事必有異慮故輟朝而顧君子謂之固在朝言禮問禮對以禮大饗不問卜不饗富

○凡擊天子鬯諸侯圭卿羔大夫鴈士雉庶人之擊匹童子委擊而退野外軍中無擊以纓拾矢可也婦人之擊棋棗脯脩棗栗○納女於天子曰備百姓於國君曰備酒漿於大夫曰備埽灑

檀弓上

公儀仲子之喪檀弓免焉仲子舍其孫而立其子檀弓曰何居我未之前聞也趨而就子服伯子於門右曰仲子舍其孫而立其子何也伯子曰仲子亦猶行古之道也昔者文王舍伯邑考而立武王微子舍其孫臚而立衍也夫仲子亦猶行古之道也子游問諸孔子孔子曰否立孫○事親有隱而無犯左右就養無方服勤至死致喪三年事君有犯而無隱左右就養有方服勤至死方喪三年事師無犯無隱左右就養無方服勤至死心喪三年○季武子成寢杜氏之葬在西階之下請合葬焉許之入宮而不敢哭武子曰合葬非古也自周公以來未之有改也吾許其大而不許其細何居命之哭○子上之母死而不喪門人問諸子思曰昔者子之先君子喪出母乎曰然子之不使白也喪之何也子思曰昔者吾先君子無所失道道隆則從而隆

道汚則從而汚，伋則安能爲伋也。妻者是爲白也，母不爲伋也，妻者是不爲白也。母故孔氏之不喪，出母自子思始也。○孔子曰：拜而后稽顙，顙乎其順也；稽顙而后拜，順乎其至也。三年之喪，吾從其至者。○孔子既得合葬於防，曰：吾聞之古也，墓而不墳，今丘也東西南北之人，也不可以弗識也。於是封之，崇四尺。孔子先反，門人後。雨，甚至孔子問焉，曰：爾來何遲也？曰：防墓崩，孔子不應。三孔子泫然流涕，曰：吾聞之古不脩墓。○孔子哭子路於中庭，有人弔者而夫子拜之，既哭，進使者而問，故使者曰：醴之矣，遂命覆醴。○曾子曰：朋友之墓，有宿草而不哭焉。○子思曰：喪三日而殯，凡附於身者，必誠必信，勿之有悔焉耳矣。三月而葬，凡附於棺者，必誠必信，勿之有悔焉耳矣。喪三年以爲極，亡則弗之忘矣。故君子有終身之憂，而無一朝之患，故忌日不樂。○孔子少孤，不知其墓，殯於五父之衢，人之見之者，皆以爲葬也，其慎也。蓋殯也，問於聊曼父之母，然後得合葬於防。○鄰有喪，春不相，里有殯，不巷歌，喪冠不綏。○有虞氏瓦棺，夏后氏槨，周人棺，椁，周人牆，置，娶，周人以殷人之棺，椁，葬，長，殯，以夏后氏之槨，周葬中，殯，下，殯，以有虞氏之瓦棺，葬，無服之殯。○夏后氏尙黑，大事斂。

用昏戎事乘驪牲用玄股人尙白大事斂用日中戎事乘輪牲用白周人尙赤大事斂用日出戎事乘駟牲用駢○穆公之母卒使人問於曾子曰如之何對曰申也聞諸申之父曰哭泣之哀齊斬之情餽粥之食自天于達布幕衛也繆幕魯也○晉獻公將殺其世子申生公子重耳謂之曰子蓋言于之志於公乎世子曰不可君安驪姬是我傷公之心也曰然則善行乎世子曰不可君謂我欲弑君也天下豈有無父之國哉吾何行如之使人辭於狐突曰申生有罪不念伯氏之言也以至于死申生不敢愛其死雖然吾君老矣子少國家多難伯氏不出而圖吾君伯氏苟出而圖吾君申生受賜而死再拜稽首乃卒是以爲恭世子也○魯人有朝祥而莫歌者子路笑之夫子曰由爾責於人終無已夫三年之喪亦已久矣夫子路出夫子曰又多乎哉踰月則其善也○魯莊公及宋人戰于乘丘縣賁父御卜國爲右馬驚敗績公隊佐車授綏公曰末之卜也縣賁父曰他日不敗績而今敗績是無勇也遂死之圍人浴馬有流矢在白肉公曰非其罪也遂誅之士之有誅自此始也○曾子寢疾病樂正子春坐於牀下曾元曾申坐於足重于隅坐而執燭重子曰華而腕大夫之簣與

子春曰止曾子聞之瞿然曰呼曰華而睨大夫之簀與曾子曰然斯季孫之賜也我未之能易也元起易簀曾元曰夫子之病革矣不可以變幸而至於且請敬易之曾子曰爾之愛我也不如彼君子之愛人也以德細人之愛人也以姑息吾何求哉吾得正而斃焉斯已矣舉扶而易之反席未安而沒○始死充充如有窮既殯瞿瞿如有求而弗得既葬皇皇如有望而弗至練而慨然祥而廓然○邾婁復之以矢蓋自戰於升陘始也魯婦人之髻而弔也自敗於臺始也○南宮縚之妻之姑之喪夫子誨之髻曰爾毋從從爾爾毋扈爾蓋榛以爲笄長尺而總八寸○孟獻子禫縣而不樂比御而不入夫子曰獻子加於人一等矣○孔子既祥五日彈琴而不成聲十日而成笙歌○有子蓋既祥而絲屨組纓○死而不弔者三畏厭溺子路有姊之喪可以除之矣而弗除也孔子曰何弗除也子路曰吾寡兄弟而弗忍也孔子曰先王制禮行道之人皆弗忍也子路聞之遂除之

大公封於營丘比及五世皆反葬於周君子曰樂樂其所自生禮不忘其本古之人有言曰狐死正丘首仁也○伯魚之母死期而猶哭夫子聞之曰誰與哭者門人曰

鯉也夫子曰嘻其甚也伯魚聞之遂除之○舜葬於蒼梧之野蓋三妃未之從也季武子曰周公蓋祔曾子之喪浴於霽室○大功廢業或曰大功誦可也○子張病召申祥而語之曰君子曰終小人曰死吾今日其庶幾乎○曾子曰始死之奠其餘闕也與曾子曰小功不爲位也者是委巷之禮也子思之哭嫂也爲位婦人倡誦申祥之哭言思也亦然○古者冠縮縫今也衡縫故喪冠之反吉非古也會子謂子思曰偪吾執親之喪也水漿不入於口者七日子思曰先王之制禮也過之者俯而就之不至焉者跂而及之故君子之執親之喪也水漿不入於口者三日杖而后能起○曾子曰小功不稅則是遠兄弟終無服也而可乎○伯高之喪孔氏之使者未至冉子攝束帛乘馬而將之孔子曰異哉徒使我不誠於伯高伯高死於衛赴於孔子孔子曰吾惡乎哭諸兄弟吾哭諸廟父之友吾哭諸廟門之外師吾哭諸寢朋友吾哭諸寢門之外所知吾哭諸野於野則已疏於寢則已重夫由賜也見我吾哭諸賜氏遂命子貢爲之主曰爲爾哭也來者拜之知伯高而來者勿拜也○曾子曰喪有疾食肉飲酒必有草木之滋焉以爲薑桂之謂也○子夏喪其子而喪其明曾子弔之

曰吾聞之也朋友喪明則哭之曾子哭子夏亦哭曰天乎予之無罪也會子怒曰商女何無罪也吾與女事夫子於洙泗之間退而老於西河之上使而河之民疑女於夫子爾罪一也喪爾親使民未有聞焉爾罪二也喪爾子喪爾明爾罪三也而曰女何無罪與子夏投其杖而拜曰吾過矣吾過矣吾離羣而索居亦已久矣○夫晝居於內問其疾可也夜居於外弔之可也是故君子非有大故不宿於外非致齊也非疾也不晝夜居於內○高子臯之執親之喪也泣血三年未嘗見齒君子以爲難○衰與其不當物也寧無衰齊衰不以邊坐大功不以服勤○孔子之衛遇舊館人之喪入而哭之哀出使子貢說驂而賻之子貢曰於門人之喪未有所說驂說驂於舊館無乃已重乎夫子曰予鄉者入而哭之遇於一哀而出涕予惡夫涕之無從也小子行之○孔子在衛有送葬者而夫子觀之曰善哉爲喪乎足以爲法矣小子識之子貢曰夫子何善爾也曰其往也如慕其反也如疑子貢曰豈若速反而虞乎子曰小子識之我未之能行也○顏淵之喪饋祥肉孔子出受之入彈琴西后食之○孔子與門人立拱而尙右二三子亦皆尙右孔子曰二三子之嗜學也我則有姊之喪

故也二三子皆尙左○孔子蚤作負手曳杖消搖於門歌曰泰山其頽乎梁木其壞乎哲人其萎乎既歌而入當戶而坐子貢聞之曰泰山其頽則吾將安仰梁木其壞哲人其萎則吾將安放夫子殆將病也遂趨而入夫子曰賜爾來何遲也夏后氏殯於東階之上則猶在阼也殷人殯於兩楹之間則與賓主夾之也周人殯於西階之上則猶賓之也而丘也殷人也予疇昔之夜夢坐奠於兩楹之間夫明王不興而天下其孰能宗予予殆將死也蓋寢疾七日而沒孔子之喪門人疑所服子貢曰昔者夫子之喪顏淵若喪子而無服喪子路亦然請喪夫子若喪父而無服○孔子之喪公西赤爲志焉褚幕丹質蟻結于四隅殷士也○子夏問於孔子曰居父母之仇如之何夫子曰寢苦枕干不仕弗與共天下也遇諸市朝不反兵而鬪曰請問居昆弟之仇如之何曰仕弗與共國銜君命而使雖遇之不鬪曰請問居從父昆弟之仇如之何曰不爲魁主人能則執兵而陪其後○孔子之喪二三子皆絰而出羣居則絰出則否○易墓非古也○子路曰吾聞諸夫子喪禮與其哀不足而禮有餘也不若禮不

足而哀有餘也祭禮與其敬不足而禮有餘也不若禮不足而敬有餘也○曾子弔於負夏主人既祖塋池推柩而反之降婦人而后行禮從者曰禮與曾子曰夫祖者且也且胡爲其不可以反宿也從者又問諸子游曰禮與子游曰飯於牖下小斂於戶內大斂於阼殯於客位祖於庭葬於墓所以卽遠也故喪事有進而無退曾子聞之曰多矣乎予出祖者○曾子襲裘而弔子游裼裘而弔曾子指子游而示人曰夫夫也爲習於禮者如之何其裼裘而弔也主人既小斂袒括髮子游趨而出襲裘帶經而入曾子曰我過矣我過矣夫夫是也○子夏旣除喪而見予之琴和之而不和彈之而成聲作而曰哀未忘也先王制禮而弗敢過也子張旣除喪而見予之琴和之而和彈之而成聲作而曰先王制禮不敢不至焉○司寇惠子之喪子游爲之麻衰牡麻經文子辭曰子辱與彌牟之弟游又辱爲之服敢辭子游曰禮也文子退反哭子游趨而就諸臣之位文子又辭曰子辱與彌牟之弟游又辱爲之服又辱臨其喪敢辭子游曰固以請文子退扶適子南面而立曰子辱與彌牟之弟游又辱爲之服又辱臨其喪虎也敢不復位子游趨而就客位○將軍文子之喪旣除喪而后

越人來弔主人深衣練冠待于廟垂涕洟子游觀之曰將軍文氏之子其庶幾乎亡於禮者之禮也其動也中○幼名冠字五十以伯仲死諡周道也絰也者實也掘中雷而浴毀窆以綴足及葬毀宗躐行出于大門殷道也學者行之

子柳之母死子碩請具子柳曰何以哉子碩曰請粥庶弟之母子柳曰如之何其粥人之母以葬其母也不可既葬子碩欲以賻布之餘具祭器子柳曰不可吾聞之也君子不家於喪請班諸兄弟之貧者○君子曰謀人之軍師敗則死之謀人之邦邑危則亡之○公叔文子升於瑕丘蘧伯玉從文子曰樂者斯丘也死則我欲葬焉蘧伯玉曰吾子樂之則瑗請前○弁人有其母死而孺子泣者孔子曰哀則哀矣而難爲繼也夫禮爲可傳也爲可繼也故哭踊有節○叔孫武叔之母死既小斂舉者出戶出戶袒且投其冠括髮子游曰知禮○扶君卜人師扶右射人師扶左君薨以是舉○從母之夫舅之妻二夫人相爲服君子未之言也或曰同纓總○喪事欲其縱縱爾吉事欲其折折爾故喪事雖遽不陵節吉事雖止不怠故騷騷爾則野鼎鼎爾則小人君子蓋猶猶爾○喪具君子恥具一日二日而可爲也者君子弗爲也○喪

服兄弟之子猶子也蓋引而進之也嫂叔之無服也蓋推而遠之也姑姊妹之薄也蓋有受我而厚之者也○食於有喪者之側未嘗飽也○曾子與客立於門側其徒趨而出曾子曰爾將何之曰吾父死將出哭於巷曰反哭於爾次曾子北而而弔焉○孔子曰之死而致死之不仁而不可爲也之死而致生之不知而不可爲也是故竹不成用瓦不成味木不成斲琴瑟張而不平筭筮備而不和有鐘磬而無簋虞其曰明器神明之也○有子問於曾子曰問喪於夫子乎曰聞之矣喪欲速貧死欲速朽有子曰是非君子之言也曾子曰參也聞諸夫子也有子又曰是非君子之言也曾子曰參也與子游聞之有子曰然然則夫子有爲言之也曾子以斯言告於子游子游曰甚哉有子之言似夫子也昔者夫子居於宋見桓司馬自爲石椁三年而不成夫子曰若是其靡也死不如速朽之愈也死之欲速朽爲桓司馬言之也南宮敬叔反必載寶而朝夫子曰若是其貨也喪不如速貧之愈也喪之欲速貧爲敬叔言之也曾子以子游之言告於有子有子曰然吾固曰非夫子之言也曾子曰子何以知之有子曰夫子制於中都四寸之棺五寸之槨以斯知不欲速朽也昔者夫子失

魯司寇將之荆蓋先之以子夏又申之以冉有以斯知不欲速貧也○陳莊子死赴於魯魯人欲勿哭繆公召縣子而問焉縣子曰古之大夫束脩之間不出竟雖欲哭之安得而哭之今之大夫交政於中國雖欲勿哭焉得而弗哭且臣聞之哭有二道有愛而哭之有畏而哭之公曰然則如之何而可縣子曰請哭諸異姓之廟於是與哭諸縣氏○仲憲言於曾子曰夏后氏用明器示民無知也殷人用祭器示民有知也周人兼用之示民疑也曾子曰其不然乎其不然乎夫明器鬼器也祭器人器也夫古之人胡爲而死其親乎○公叔木有同母異父之昆弟死問於子游子游曰其大功乎狄儀有同母異父之昆弟死問於子夏子夏曰我未之前聞也魯人則爲之齊衰狄儀行齊衰今之齊衰狄儀之間也○子思之母死於衛柳若謂子思曰子聖人之後也四方於子乎觀禮子蓋慎諸子思曰吾何慎哉吾聞之有其禮無其財君子弗行也有其禮有其財無其時君子弗行也吾何慎哉○縣子瑣曰吾聞之古者不降上下各以其親滕伯文爲孟虎齊衰其叔父也爲孟皮齊衰其叔父也○后木曰喪吾聞諸縣子曰夫喪不可不深長思也買棺外內易我死則亦然○曾子曰

尸未設飾故帷堂小斂而徹帷仲梁子曰夫婦方亂故帷堂小斂而徹帷○小斂之奠子游曰於東方曾子曰於西方斂斯席矣小斂之奠在西方魯禮之未失也○縣子曰綌衰繡裳非古也○子蒲卒哭者呼滅子臯曰若是野哉哭者改之○杜橋之母之喪宮中無相以爲沽也○夫子曰始死羔裘玄冠者易之而已羔裘玄冠夫子不以弔○子游問喪具夫子曰稱家之有亡子游曰有無惡乎齊夫子曰有毋過禮苟亡矣斂首足形還葬縣棺而封人豈有非之者哉○司士賁告於子游曰請襲於牀子游曰諾縣子聞之曰汰哉叔氏專以禮許人○宋襄公葬其夫人醴醢百甕曾子曰既曰明器矣而又實之○孟獻子之喪司徒旅歸四布夫子曰可也○讀贈曾子曰非古也是再告也○成子高寢疾慶還人請曰子之病革矣如至乎大病則如之何子高曰吾聞之也生有益於人死不害於人吾縱生無益於人吾可以死害於人乎哉我死則擇不食之地而葬我焉○子夏問諸夫子曰居君之母與妻之喪居處言語飲食衎爾○賓客至無所館夫子曰生於我乎館死於我乎殯○國子高曰葬也者藏也藏也者欲人之弗得見也是故衣足以飾身棺周於衣槨周於棺土周

於椁反壤樹之哉○孔子之喪有自燕來觀者舍於子夏氏子夏曰聖人之葬人與人之葬聖人也子何觀焉昔者夫子言之曰吾見封之若堂者矣見若坊者矣見若覆夏屋者矣見若斧者矣從若斧者焉馬鬣封之謂也今一日而三斬板而已封尙行夫子之志乎哉○婦人不葛帶○有薦新如朔奠○既葬各以其服除○池視重雷○君卽位而爲裨歲壹漆之藏焉○復楔齒綴足飯設飾帷堂並作父兄命赴者○君復於小寢大寢小祖大祖庫門四郊○喪不剝奠也與祭肉也與既殯旬而布材與明器朝奠日出夕奠逮日父母之喪哭無時使必知其反也○練練衣黃裏縣緣葛要經繩屨無絢角瑣鹿裘衡長祛祛裼之可也○有殯聞遠兄弟之喪雖總必往非兄弟雖鄰不往所識其兄弟不同居者皆弔○天子之棺四重水兕革棺被之其厚三寸棨棺一梓棺二四者皆周棺束縮二衡三衽每束一柏棨以端長六尺○天子之哭諸侯也爵弁經紵衣或曰使有司哭之爲之不以樂食○天子之殯也韋塗龍輅以椁加斧于椁上畢塗屋天子之禮也○唯天子之喪有別姓而哭○魯哀公誅孔丘曰天不遺耆老莫相予位焉嗚呼哀哉尼父○國亡大縣邑公卿大夫士

皆厭冠哭於大廟三日君不舉或曰君舉而哭於后土○孔子惡野哭者○未仕者不敢稅人如稅人則以父兄之命○士備入而后朝夕踊○祥而縞是月禫徙月樂○君於士有賜幣

檀弓下

君之適長殯車三乘公之庶長殯事一乘大夫之適長殯車一乘○公之喪諸達官之長杖○君於大夫將葬弔於宮及出命引之三步則止如是者三君退朝亦如之哀次亦如之○五十無車者不越疆而弔人○季武子寢疾嬌固不說齊衰而人見曰斯道也將亡矣士唯公門說齊衰武子曰不亦善乎君子表微及其喪也會點倚其門而歌○大夫弔當事而至則辭焉弔於是日不樂婦人不越疆而弔人行弔之日不飲酒食肉焉弔於葬者必執引若從柩及壙皆執紼○喪公弔之必有拜者雖朋友州里舍人可也弔曰寡君承事主人曰臨君遇柩於路必使人弔之大夫之喪庶子不受弔○妻之昆弟爲父後者死哭之適室子爲主祖免哭踊夫入門右使人立于門外告來者狎則入哭父在哭於妻之室非爲父後者哭諸異室○有殯聞

遠兄弟之喪哭于側室無側室哭于門內之右同國則往哭之○子張死曾子有母之喪齊衰而往哭之或曰齊衰不以弔曾子曰我弔也與哉○有若之喪悼公弔焉子游播由左○齊穀王姬之喪魯莊公爲之大功或曰由魯嫁故爲之服姊妹之服或曰外祖母也故爲之服○晉獻公之喪秦穆公使人弔公子重耳且曰寡人聞之亡國恆於斯得國恆於斯雖吾子儼然在憂服之中喪亦不可久也時亦不可失也孺子其圖之以告舅犯舅犯曰孺子其辭焉喪人無寶仁親以爲寶父死之謂何又因以爲利而天下其孰能說之孺子其辭焉公子重耳對客曰君惠弔亡臣重耳身喪父死不得與於哭泣之哀以爲君憂父死之謂何或敢有他志以辱君義稽顙而不拜哭而起起而不私子顯以致命於穆公穆公曰仁夫公子重耳夫稽顙而不拜則未爲後也故不成拜哭而起則愛父也起而不私則遠利也○帷殯非古也自敬姜之哭穆伯始也○喪禮哀戚之至也節哀顯變也君子念始之者也復盡愛之道也有禱祠之心焉望反諸幽求諸鬼神之道也北面求諸幽之義也拜稽顙哀戚之至隱也稽顙隱之甚也飯用米貝弗忍虛也不以食道用美焉爾銘明旌也以死者

爲不可別已故以其旗識之愛之斯錄之矣敬之斯盡其道焉耳重主道也殷主綴重焉周主重徹焉奠以素器以生者有哀素之心也唯祭祀之禮主人自盡焉爾豈知神之所饗亦以主人有齊敬之心也辟踊哀之至也有筭爲之節文也袒括髮變也慍哀之變也去飾去美也袒括髮去飾之甚也有所袒有所襲哀之茹也弁經葛而葬與神交之道也有敬心焉周人弁而葬殷人尋而葬主人主婦室老爲其病也君命食之也反哭升堂反諸其所作也主婦入于室反諸其所養也反哭之弔也哀之至也反而亡焉失之矣於是爲甚殷既封而弔周反哭而弔孔子曰殷已慍吾從周葬於北方北首三代之達禮也之幽之故也既封主人贈而祝宿虞尸既反哭主人與有司視虞牲有司以几筵舍奠於墓左反日中而虞葬日虞弗忍一日離也是月也以虞易奠卒哭曰成事是日也以吉祭易喪祭明日祔于祖父其變而之吉祭也比至於祔必於是日也接不忍一日末有所婦也殷練而祔周卒哭而祔孔子善殷○君臨臣喪以巫祝桃茢執戈惡之也所以異於生也○喪有死之道焉先王之所難言也○喪之朝也順死者之孝心也其哀離其室也故至於祖考之廟而后

行殷朝而殯於祖周朝而遂葬○孔子謂爲明器者知喪道矣備物而不可用也哀哉死者而用生者之器也不殆於用歟乎哉其曰明器神明之也塗車芻靈自古有之明器之道也孔子謂爲芻靈者善謂爲俑者不仁殆於用人乎哉○穆公問於子思曰爲舊君反服古與子思曰古之君子進人以禮退人以禮故有舊君反服之禮也今之君子進人若將加諸膝退人若將隊諸淵毋爲戎首不亦善乎又何反服之禮之有○悼公之喪季昭子問於孟敬子曰爲君何食敬子曰食粥天下之達禮也吾三臣者之不能居公室也四方莫不聞矣勉而爲瘠則吾能毋乃使人疑夫不以情居瘠者乎哉我則食食○衛司徒敬子死子夏弔焉主人未小斂絰而往子游弔焉主人旣小斂子游出絰反哭子夏曰聞之也與曰聞諸夫子主人未改服則不絰○曾子曰晏子可謂知禮也已恭敬之有焉有若曰晏子一狐裘三十年遺車一乘及墓而反國君七個遺車七乘大夫五个遺車五乘晏子焉知禮曾子曰國無道君子恥盈禮焉國奢則示之以儉國儉則示之以禮○國昭子之母死問於子張曰葬及墓男子婦人安位子張曰司徒敬子之喪夫子相男子西鄉婦人東鄉曰噫毋曰

我喪也斯沾爾專之賓爲賓焉主爲主焉婦人從男子皆西鄉○穆伯之喪敬姜晝
哭文伯之喪晝夜哭孔子曰知禮矣文伯之喪敬姜據其牀而不哭曰昔者吾有斯
子也吾以將爲賢人也吾未嘗以就公室今及其死也朋友諸臣未有出涕者而內
人皆行哭失聲斯子也必多曠於禮矣夫○季康子之母死陳襲衣敬姜曰婦人不
飾不敢見舅姑將有四方之賓來襲衣何爲陳於斯命徹之○有子與子游立見孺
子慕者有子謂子游曰予豈不知夫喪之踊也予欲去之久矣情在於斯其是也夫
子游曰禮有微情者有以故興物者有直情而徑行者戎狄之道也禮道則不然人
喜則斯陶陶斯咏咏斯猶斯舞舞斯愜愜斯歎歎斯辟辟斯踊矣品節斯
斯之謂禮人死斯惡之矣無能也斯倍之矣是故制絞衾設襲襲爲使人勿惡也始
死脯醢之奠將行遣而行之旣葬而食之未有見其饗之者也自上世以來未之有
舍也爲使人勿倍也故子之所刺於禮者亦非禮之譬也○吳侵陳斬祀殺厲師還
出竟陳大宰嚭使於師夫差謂行人儀曰是夫也多言盍嘗問焉師必有名人之稱
斯師也者則謂之何大宰嚭曰古之侵伐者不斬祀不殺厲不獲二毛今斯師也殺

厲與其不謂之殺厲之師與曰反爾地歸爾子則謂之何曰君王討敵邑之罪又矜而赦之師與有無名乎○顏丁善居喪始死皇皇焉如有求而弗得及殯望望焉如有從而弗及既葬慨焉如不及其反而息○子張問曰書云高宗三年不言言乃讙有諸仲尼曰胡爲其不然也古者天子崩王世子聽於冢宰三年○知悼子卒未葬平公飲酒師曠李調侍鼓鐘杜賁自外來聞鐘聲曰安在曰在寢杜賁入寢歷階而升酌曰曠飲斯又酌曰調飲斯又酌堂上北面坐飲之降趨而出平公呼而進之曰賁曩者爾心或開予是以不與爾言爾飲曠何也曰子卯不樂知悼子在堂斯其爲子卯也大矣曠也大師也不以詔是以飲之也爾飲調何也曰調也君之養臣也爲一飲一食亡君之疾是以飲之也爾飲何也曰賁也宰夫也非刀匕是共又敢與知防是以飲之也平公曰寡人亦有過焉酌而飲寡人杜賁洗而揚觶公謂侍者曰如我死則必無廢斯爵也至于今既畢獻斯揚觶謂之杜舉

公叔文子卒其子成請諡於君曰日月有時將葬矣請所以易其名者君曰昔者衛國凶饑夫子爲粥與國之餓者是不亦惠乎昔者衛國有難夫子以其死衛寡人不

亦貞乎夫子聽衛國之政脩其班制以與四鄰交衛國之社稷不辱不亦文乎故謂夫子貞惠文子○石駘仲卒無適子有庶子六人卜所以爲後者曰沐浴佩玉則兆五人者皆沐浴佩玉石祁子曰孰有執親之喪而沐浴佩玉者乎不沐浴佩玉石祁子兆衛人以龜爲有知也○陳子車死於衛其妻與其家大夫謀以殉葬定而后陳子亢至以告曰夫子疾莫養於下請以殉葬子亢曰以殉葬非禮也雖然則彼疾當養者孰若妻與宰得已則吾欲已不得已則吾欲以二子者之爲之也於是弗果用○子路曰傷哉貧也生無以爲養死無以爲禮也孔子曰啜菽飲水盡其歡斯之謂孝斂手足形還葬而無槨稱其財斯之謂禮○衛獻公出奔反於衛及郊將班邑於從者而后入柳莊曰如皆守社稷則孰執羈勒而從如皆從則孰守社稷君反其國而有私也毋乃不可乎弗果班○衛有大史曰柳莊寢疾公曰若疾革雖當祭必告公再拜稽首請於尸曰有臣柳莊也者非寡人之臣社稷之臣也聞之死請往不釋服而往遂以禭之與之邑裘氏與縣潘氏書而納諸棺曰世世萬子孫無變也○陳乾昔寢疾屬其兄弟而命其子尊己曰如我死則必大爲我棺使吾二婢子夾我陳

乾昔死其子曰以殉葬非禮也況又同棺乎弗果殺○仲遂卒于垂壬午猶繹萬入去籥仲尼曰非禮也卿卒不繹○季康子之母死公輸若方小斂般請以機封將從之公肩假曰不可夫魯有初公室視豐碑三家視桓楹般爾以人之母當巧則豈不得以其母以嘗巧者乎則病者乎噫弗果從○戰于郟公叔禺人遇負杖入保者息曰使之雖病也任之雖重也君子不能爲謀也士弗能死也不可我則旣言矣與其鄰重汪錡往皆死焉魯人欲勿殤重汪錡問於仲尼仲尼曰能執干戈以衛社稷雖欲勿殤也不亦可乎○子路去魯謂顏淵曰何以贈我曰吾聞之也去國則哭于墓而后行反其國不哭展墓而入謂子路曰何以處我子路曰吾聞之也過墓則式過祀則下○工尹商陽與陳弃疾追吳師及之陳弃疾謂工尹商陽曰王事也子手弓而可手弓子射諸射之斃一人張弓又及謂之又斃二人每斃一人揜其目止其御曰朝不坐燕不與殺三人亦足以反命矣孔子曰殺人之中又有禮焉○諸侯伐秦曹桓公卒于會諸侯請含使之襲○襄公朝子荆康王卒荆人曰必請襲魯人曰非禮也荆人強之巫先拂柩荆人悔之○滕成公之喪使子叔敬叔弔進書子服惠伯

爲介及郊爲懿伯之忌不入惠伯曰政也不可以叔父之私不將公事遂入○哀公使人弔賈尙遇諸道辟於路畫宮而受弔焉曾子曰賈尙不如杞梁之妻之知禮也齊莊公襲莒于奪杞梁死焉其妻迎其柩於路而哭之哀莊公使人弔之對曰君之臣不免於罪則將肆諸市朝而妻妾執君之臣免於罪則有先人之敝廬在君無所辱命○孺子贖之喪哀公欲設撥問於有若有若曰其可也君之三臣猶設之顏柳曰天子龍輻而椁轎諸侯輻而設轎爲榆沈故設撥三臣者廢輻而設撥竊禮之不中者也而君何學焉○悼公之母死哀公爲之齊衰有若曰爲妾齊衰禮與公曰吾得已乎哉魯人以妻我○季子臯葬其妻犯人之禾申祥以告曰請庚之子臯曰孟氏不以是罪予朋友不以是弃予以吾爲邑長於斯也買道而葬後難繼也○仕而未有祿者君有饋焉曰獻使焉曰寡君違而君薨弗爲服也○虞而立尸有几筵卒哭而諱生事畢而鬼事始已既卒哭宰夫執木鐸以命于宮曰舍故而諱新自寢門至于庫門○二名不偏諱夫子之母名徵在言在不稱徵言徵不稱在○軍有憂則素服哭於庫門之外赴車不載囊韞○有焚其先人之室則三日哭故曰新宮火亦

三日哭○孔子過泰山側有婦人哭於墓者而哀夫子式而聽之使子路問之曰子之哭也壹似重有憂者而曰然昔者吾舅死於虎吾夫又死焉今吾子又死焉夫子曰何爲不去也曰無苛政夫子曰小子識之苛政猛於虎也○魯人有周豐也者哀公執摯請見之而曰不可公曰我其已夫使人問焉曰有虞氏未施信於民而民信之夏后氏未施敬於民而民敬之何施而得斯於民也對曰墟墓之間未施哀於民而民哀社稷宗廟之中未施敬於民而民敬殷人作誓而民始畔周人作會而民始疑苟無禮義忠信誠懇之心以涖之雖固結之民其不解乎○喪不慮居毀不危身喪不慮居爲無廟也毀不危身爲無後也○延陵季子適齊於其反也其長子死葬於贏博之間孔子曰延陵季子吳之習於禮者也往而觀其葬焉其坎深不至於泉其斂以時服旣葬而封廣輪揜坎其高可隱也旣封左袒右還其封且號者三曰骨肉歸復于土命也若魂氣則無不之也無不之也而遂行孔子曰延陵季子之於禮也其合矣乎○邾婁考公之喪徐君使容居來弔舍曰寡君使容居坐舍進侯玉其使容居以含有司曰諸侯之來辱敝邑者易則易于則于易子雜者未之有也容居

對曰容居聞之事君不敢忘其君亦不敢遺其祖昔我先君駒王西討濟於河無所不用斯言也容居魯人也不敢忘其祖子思之母死於衛赴於子思子思哭於廟門人至曰庶氏之母死何爲哭於孔氏之廟乎子思曰吾過矣吾過矣遂哭於他室○天子崩三日祝先服五日官長服七日國中男女服三月天下服虞人敢百祀之木可以爲棺槨者斬之不至者廢其祀刎其人○齊大饑黔敖爲食於路以待餓者而食之有餓者蒙袂輯履貿貿然來黔敖左奉食右執飲曰嗟來食揚其目而視之曰予唯不食嗟來之食以至於斯也從而謝焉終不食而死曾子聞之曰微與其嗟也可去其謝也可食○邾婁定公之時有弑其父者有司以告公瞿然失席曰是寡人之罪也曰寡人嘗學斷斯獄矣臣弑君凡在官者殺無赦子弑父凡在宮者殺無赦殺其人壞其室洿其宮而豬焉蓋君踰月而后舉爵○晉獻文子成室晉大夫發焉張老曰美哉輪焉美哉奐焉歌於斯哭於斯聚國族於斯文子曰武也得歌於斯哭於斯聚國族於斯是全要領以從先大夫於九京也北面再拜稽首君子謂之善頌善禱○仲尼之畜狗死使子貢埋之曰吾聞之也敝帷不弃爲埋馬也敝蓋不弃爲

埋狗也。且也。賁無蓋於其封也。亦予之席。毋使其首陷焉。路馬死埋之以帷。○季孫之母死。哀公弔焉。曾子與子貢弔焉。闈人爲君在弗內也。曾子與子貢入於其廡而脩容焉。子貢先入。闈人曰。鄉者已告矣。曾子後入。闈人避之。涉內鬻卿大夫皆辟位。公降一等而揖之。君子言之曰。盡飾之道斯其行者遠矣。○陽門之介夫死。司城子罕入而哭之。哀晉人之覘宋者。反報於晉侯曰。陽門之介夫死。而子罕哭之。哀而民說。殆不可伐也。孔子聞之曰。善哉。覘國乎。詩云。凡民有喪。扶服救之。雖微晉而已。天下其孰能當之。○魯莊公之喪。旣葬而經不入庫門。士大夫旣卒。哭麻不入。○孔子之故人曰原壤。其母死。夫子助之沐椁。原壤登木曰。久矣。予之不托於晉也。歌曰。狸首之班然。執女手之卷然。夫子爲弗聞也者。而過之。從者曰。子未可以已乎。夫子曰。且聞之。親者毋失其爲親也。故者毋失其爲故也。○趙文子與叔譽觀乎九原。文子曰。死者如可作也。吾誰與歸。叔譽曰。其陽處父乎。文子曰。行并植於晉國。不沒其身。其知不足稱也。其舅犯乎。文子曰。見利不顧其君。其仁不足稱也。我則隨武子乎。利其君不忘其身。謀其身不遺其友。晉人謂文子知人。文子其中退然。如不勝衣。其言

訥訥然如不出其口所舉於晉國管庫之士七十有餘家生不交利死不屬其子焉
○叔仲皮學千柳叔仲皮死其妻魯人也衣衰而繆經叔仲衍以吉請總衰而環經
曰昔者吾喪姑姊妹亦如斯末吾禁也退使其妻總衰而環經○成人有其兄死而
不爲衰者聞子臯將爲成宰遂爲衰成人曰蠶則績而蟹有匡范則冠而蟬有綏兒
則死而子臯爲之衰○樂正子春之母死五日而不食曰吾悔之自吾母而不得吾
情吾惡乎用吾情○歲旱穆公召縣子而問然曰天久不雨吾欲暴尪而奚若曰天
久不雨而暴人之疾子虛毋乃不可與然則吾欲暴巫而奚若曰天則不雨而望之
愚婦人於以求之毋乃已疏乎徙市則奚若曰天子崩巷市七日諸侯薨巷市三日
爲之徙市不亦可乎○孔子曰衛人之祔也離之魯人之祔也合之善夫

王制

王者之制祿爵公侯伯子男凡五等諸侯之上大夫卿下大夫上士中士下士凡五
等天子之田方千里公侯田方百里伯七十里子男五十里不能五十里者不合於
天子附於諸侯曰附庸天子之三公之田視公侯天子之卿視伯天子之大夫視子

男天子之元士視附庸○制農田百畝百畝之分上農夫食九人其次食八人其次食七人其次食六人下農夫食五人庶人在官者其祿以是爲差也諸侯之下士視上農夫祿足以代其耕也中士倍下士上士倍中士下大夫倍上士卿四大夫祿君十卿祿次國之卿三大夫祿君十卿祿小國之卿倍大夫祿君十卿祿○次國之上卿位當大國之中中當其下下當其上大夫小國之上卿位當大國之下卿中當其上大夫下當其下大夫其有中士下士者數各居其上之三分○凡四海之內九州州方千里州建百里之國三十七十里之國六十五十里之國百有二十凡二百一十國名山大澤不以封其餘以爲附庸間田八州州二百一十國○天子之縣內方百里之國九七十里之國二十有一五十里之國六十有三凡九十三國名山大澤不以盼其餘以祿士以爲間田○凡九州千七百七十三國天子之元士諸侯之附庸不與○天子百里之內以共官千里之內以爲御○千里之外設方伯五國以爲屬屬有長十國以爲連連有帥三十國以爲卒卒有正二百一十國以爲州州有伯八州八伯五十六正百六十八帥三百三十六長八伯各以其屬屬於天子之老二

人分天下以爲左右曰二伯○千里之內曰甸千里之外曰采曰流○天子三公九卿二十七大夫八十一元士○大國三卿皆命於天子下大夫五人上士二十七人○次國三卿二卿命於天子一卿命於其君下大夫五人上士二十七人○小國二卿皆命於其君下大夫五人上士二十七人○天子使其大夫爲三監監於方伯之國國三人天子之縣內諸侯祿也○外諸侯嗣也○制三公一命卷若有加則廟也不過九命次國之君不過七命小國之君不過五命○大國之卿不過三命下卿再命小國之卿與下大夫一命○凡官民材必先論之論辨然後使之任事然後爵之位定然後祿之○爵人於朝與士共之刑人於市與衆棄之是故公家不畜刑人大夫弗養士遇之塗弗與言也屏之四方唯其所之不及以政承弗放生也○諸侯之於天子也比年一小聘三年一大聘五年一朝○天子五年一巡守○歲二月東巡守至于岱宗柴而望祀山川覲諸侯問百年者就見之命大師陳詩以觀民風命市納賈以觀民之所好惡志淫好辟命典禮考時月定日同律禮樂制度衣服正之山川神祇有不舉者爲不敬不敬者君削以地宗廟有不順者爲不孝不孝者君紕以

爵變禮易樂者爲不從不從者君流革制度衣服者爲畔畔者君討有功德於民者加地進律五月南巡守至于南嶽如東巡守之禮八月西巡守至于西嶽如南巡守之禮十有一月北巡守至于北嶽如西巡守之禮歸假于祖禰用特

天子將出類乎上帝宜乎社造乎禰諸侯將出宜乎社造乎禰○天子無事與諸侯相見曰朝考禮正刑一德以尊於天子天子賜諸侯樂則以祝將之賜伯子男樂則以鼗將之○諸侯賜弓矢然後征賜鈇鉞然後殺賜圭瓚然後爲鬯未賜圭瓚則資鬯於天子○天子命之教然後爲學小學在宮宮南之左大學在郊天子曰辟廱諸侯曰頤宮○天子將出征類乎上帝宜乎社造乎禰禱於所征之地受命於祖受成於學出征執有罪反釋奠于學以訊馘告○天子諸侯無事則歲三田一爲乾豆二爲賓客三爲充君之庖無事而不田曰不敬田不以禮曰暴天物天子不合圍諸侯不掩羣天子殺則下大綏諸侯殺則下小綏大夫殺則止佐車佐車止則百姓田獵獮祭魚然後虞人入澤梁豺祭獸然後田獵鳩化爲鷹然後設罝羅草木零落然後入山林見蟲未蟄不以火田不麝不卵不殺胎不斃天不覆巢○冢宰制國用必於

歲之杪五穀皆入然後制國用用地小大視年之豐耗以三十年之通制國用量入以爲出祭用數之仇喪三年不祭唯祭天地社稷爲越綿而行事喪用三年之仇喪祭用不足曰暴有餘曰浩祭豐年不奢凶年不儉國無九年之蓄曰不足無六年之蓄曰急無三年之蓄曰國非其國也三年耕必有一年之食九年耕必有三年之食以三十年之通雖有凶旱水溢民無菜色然後天子食日舉以樂天子七日而殯七月而葬諸侯五日而殯五月而葬大夫士庶人三日而殯三月而葬三年之喪自天子達庶人縣封葬不爲雨止不封不樹喪不貳事自天子達於庶人喪從死者祭從生者支子不祭○天子七廟三昭三穆與大祖之廟而七諸侯五廟二昭二穆與大祖之廟而五大夫三廟一昭一穆與大祖之廟而三士一廟庶人祭於寢○天子諸侯宗廟之祭春曰禘夏曰禘秋曰嘗冬曰烝天子祭天地諸侯祭社稷大夫祭五祀天子祭天下名山大川五嶽視三公四瀆視諸侯諸侯祭名山大川之在其地者○天子諸侯祭因國之在其地而無主後者○天子植酌禘禘禘嘗禘烝諸侯酌則不禘禘則不嘗嘗則不烝烝則不酌諸侯酌禘禘一植一嘗禘烝禘○天子社稷皆

大牢諸侯社稷皆少牢大夫士宗廟之祭有田則祭無田則薦庶人春薦韭夏薦麥秋薦黍冬薦稻韭以卵麥以魚黍以豚稻以腐祭天地之牛角繭栗宗廟之牛角握賓客之牛角尺諸侯無故不殺牛大夫無故不殺羊士無故不殺犬豕庶人無故不食珍○庶羞不踰牲燕衣不踰祭服寢不踰廟○古者公田藉而不稅市廛而不稅關譏而不征林麓川澤以時入而不禁夫圭田無征○用民之力歲不過三日○田里不粥墓地不請○司空執度度地居民山川沮澤時四時量地遠近興事任力凡使民任老者之事食壯者之食○凡居民材必因天地寒煖燥濕廣谷大川異制民生其間者異俗剛柔輕重遲速異齊五味異和器械異制衣服異宜脩其教不易其俗齊其政不易其宜中國戎夷五方之民皆有性也不可推移東方曰夷被髮文身有不火食者矣南方曰蠻雕題交趾有不火食者矣西方曰戎被髮衣皮有不粒食者矣北方曰狄衣羽毛穴居有不粒食者矣中國夷蠻戎狄皆有安居和味宜服利用備器五方之民言語不通嗜欲不同達其志通其欲東方曰寄南方曰象西方曰狄韃北方曰譯○凡居民量地以制邑度地以居民地邑民居必參相得也無曠土

無游民食節事時民咸安其居樂事勩功尊君親上然後興學

司徒脩六禮以節民性明七教以興民德齊八政以防淫一道德以同俗養耆老以致孝恤孤獨以逮不足上賢以崇德簡不肖以緇惡命鄉簡不帥教者以告耆老皆朝于庠元日習射上功習鄉上齒大司徒帥國之俊士與執事焉不變命國之右鄉簡不帥教者移之左命國之左鄉簡不帥教者移之右如初禮不變移之郊如初禮不變移之遂加初禮不變屏之遠方終身不齒命鄉論秀士升之司徒曰選士司徒論選士之秀者而升之學曰俊士升於司徒者不征於鄉升於學者不征於司徒曰造士樂正崇四術立四教順先王詩書禮樂以造士春秋教以禮樂冬夏教以詩書王大子王子羣后之天子卿大夫元士之適子國之俊選皆造焉凡入學以齒將出學小胥大胥小樂正簡不帥教者以告于大樂正大樂正以告于王王命三公九卿大夫元士皆入學不變王親視學不變王三日不學屏之遠方西方曰棘東方曰寄終身不齒大樂正論造士之秀者以告于王而升諸司馬曰進士司馬辨論官材論進士之賢者以告於王而定其論論定然後官之任官然後爵之位定然後祿之大

夫廢其事終身不仕死以士禮葬之有發則命大司徒教士以車甲凡執技論力適四方羸股肱決射御凡執技以事上者祝史射御醫卜及百工凡執技以事上者不貳事不移官出鄉不與士齒仕於家者出鄉不與士齒○司寇正刑明辟以聽獄訟必三刺有旨無簡不聽附從輕赦從重○凡制五刑必卽天論郵罰麗於事凡聽五刑之訟必原父子之親立君臣之義以權之意論輕重之序慎測淺深之量以別之悉其聰明致其忠愛以盡之疑獄汜與衆共之衆疑赦之必察小大之比以成之成獄辭史以獄成告於正正聽之正以獄成告于大司寇大司寇聽之棘木之下大司寇以獄之成告於王王命三公參聽之三公以獄之成告於王王三又然後制刑凡作刑罰輕無赦刑者例也例者成也一成而不可變故君子盡心焉析言破律亂名改作執左道以亂政殺作淫聲異服奇技奇器以疑衆殺行僞而堅言僞而辯學非而博順非而澤以疑衆殺假於鬼神時日卜筮以疑衆殺此四誅者不以聽凡執禁以齊衆不赦過有圭璧金璋不粥於市命服命車不粥於市宗廟之器不粥於市犧牲不粥於市戎器不粥於市用器不中度不粥於市兵車不中度不粥於市布帛精

蟲不中數幅廣狹不中量不粥於市姦色亂正色不粥於市錦文珠玉成器不粥於市衣服飲食不粥於市五穀不時果實未孰不粥於市木不中伐不粥於市禽獸魚鼈不中殺不粥於市關執禁以譏禁異服識異言○大史典禮執簡記奉諱惡○天子齊戒受諫司會以歲之成質於天子冢宰齊戒受質大樂正大司寇市三官以其成從質於天子大司徒大司馬大司空齊戒受質百官各以其成質於三官大司徒大司馬大司空以百官之成質於天子百官齊戒受質然後休老勞農成歲事制國用○凡養老有虞氏以燕禮夏后氏以饗禮殷人以食禮周人脩而兼用之五十養於鄉六十養於國七十養於學達於諸侯○八十拜君命一坐再至瞽亦如之九十使人受五十異糧六十宿肉七十貳膳八十常珍九十飲食不離寢膳飲從於遊可也六十歲制七十時制八十月制九十日脩唯絞給裘冒死而后制五十始衰六十非肉不飽七十非帛不煖八十非人不煖九十雖得人不煖矣五十杖於家六十杖於鄉七十杖於國八十杖於朝九十者天子欲有問焉則就其室以珍從七十不俟朝八十月告存九十日有秩五十不從力政六十不與服戎七十不與賓客之事八

十齋喪之事弗及也五十而爵六十不親學七十致政唯衰麻爲喪○有虞氏養國老於上庠養庶老於下庠夏后氏養國老於東序養庶老於西序殷人養國老於右學養庶老於左學周人養國老於東膠養庶老於虞庠虞庠在國之西郊有虞氏皇而祭深衣而養老夏后氏收而祭燕衣而養老殷人舛而祭縞衣而養老周人冕而祭玄衣而養老凡三王養老皆引年八十者一子不從政九十者其家不從政廢疾非人不養者一人不從政父母之喪三年不從政齊衰大功之喪三月不從政將徒於諸侯三月不從政自諸侯來徒家期不從政○少而無父者謂之孤老而無子者謂之獨老而無妻者謂之矜老而無夫者謂之寡此四者天民之窮而無告者也皆有常餼○瘖聾跛躄斷者侏儒百工各以其器食之○道路男子由右婦人由左車從中央父之齒隨行兄之齒厲行朋友不相踰輕任并重任分班白者不提挈君子者老不徒行庶人者老不徒食○大央祭器不假祭器未成不造燕器○方一里者爲田九百畝方十里者爲方一里者百爲田九萬畝方百里者爲方十里者百爲田九十億畝方千里者爲方百里者百爲田九萬億畝○自恆山至於南河千里而近

自南河至於江千里而近自江至於衡山千里而遙自東河至於東海千里而遙自東河至於西河千里而近自西河至於流沙千里而遙西不盡流沙南不盡衡山東不盡東海北不盡恆山凡四海之內斷長補短方三千里爲田八十萬億一萬億畝方百里者爲田九十億畝山陵林麓川澤溝瀆城郭宮室塗巷三分去一其餘六十億畝○古者以周尺八尺爲步今以周尺六尺四寸爲步古者百畝當今東田百四十六畝三十步古者百里當今百二十一里六十步四尺二寸二分○方千里者爲方百里者百封方百里者三十國其餘方百里者七十又封方七十里者六十爲方百里者二十九方十里者四十其餘方百里者四十方十里者六十又封方五十里者百二十爲方百里者三十其餘方百里者十方十里者六十名山大澤不以封其餘以爲附庸間田諸侯之有功者取於間田以祿之其有削地者歸之間田天子之縣內方千里者爲方百里者百封方百里者九其餘方百里者九十一又封方七十里者二十一爲方百里者十方十里者二十九其餘方百里者八十方十里者七十一又封方五十里者六十三爲方百里者十五方十里者七十五其餘方百里者六

十四方十里者九十六○諸侯之下士祿食九人中士食十八人上士食三十六人下大夫食七十二人卿食二百八十八人君食二千八百八十人次國之卿食二百一十六人君食二千一百六十人小國之卿食百四十四人君食千四百四十人次國之卿命於其君者如小國之卿天子之大夫爲三監監於諸侯之國者其祿視諸侯之卿其爵視次國之君其祿取之於方伯之地方伯爲朝天子皆有湯沐之邑於天子之縣內視元士諸侯世子世國大夫不世爵使以德爵以功未賜爵視天子之元士以君其國諸侯之大次不世爵祿○六禮冠昏喪祭鄉相見七教父子兄弟夫婦君臣長幼朋友賓客八政飲食衣服事爲異別度量數制

月令

孟春之月日在營室昏參中旦尾中其日甲乙其帝大暉其神句芒其蟲鱗其音角律中大蕤其數八其味酸其臭羶其祀戶祭先脾○東風解凍蟄蟲始振魚上冰獺祭魚鴻雁來○天子居青陽左个乘鸞路駕倉龍載青旂衣青衣服倉玉食麥與羊其器疏以蓬○是月也以立春先立春三日大史謁之天子曰某日立春盛德在木

天子乃齊立春之日天子親帥三公九卿諸侯大夫以迎春於東郊還反賞公卿諸侯大夫於朝○命相布德和令行慶施惠下及兆民慶賜遂行毋有不當○乃命大史守典奉法司天日月星辰之行宿離不貸毋失經紀以初爲常○是月也天子乃以元日祈穀于上帝乃擇元辰天子親載耒耜措之子參保介之御間帥三公九卿諸侯大夫躬耕帝藉天子三推三公五推卿諸侯九推反執爵于大寢三公九卿諸侯大夫皆御命曰勞酒○是月也天氣下降地氣上騰天地和同草木萌動王命布農事命田舍東郊皆脩封疆審端經術善相丘陵阪險原隰土地所宜五穀所殖以教道民必躬親之田事既飭先定準直農乃不惑○是月也命樂正入學習舞乃脩祭典命祀山林川澤犧牲毋用牝○禁止伐木毋覆巢毋殺孩蟲胎天飛鳥毋麇毋卵毋聚大衆毋置城郭掩骼埋胔○是月也不可以稱兵稱兵必天殃兵戎不起不可從我始毋變天之道毋絕地之理毋亂人之紀○孟春行夏令則雨水不時草木蚤落國時有恐行秋令則其民大疫彘風暴雨總至藜莠蓬蒿並興行冬令則水潦爲敗雪霜大摯首種不入

仲春之月日在奎昏弧中且建星中其日甲乙其帝大皞其神句芒其蟲鱗其音角
律中夾鍾其數八其昧酸其臭羶其祀戶祭先脾○始雨水桃始華倉庚鳴鷹化爲
鳩○天子居青陽大廟乘鸞路駕倉龍載青旂衣青衣服倉玉食麥與羊其器疏以
達是月也安萌芽養幼少存諸孤擇元日命民社命有司省圜圖去桎梏毋肆掠止
獄訟○是月也玄鳥至至之日以大牢祠于高禘天子親往后妃帥九嬪御乃禮天
子所御帶以弓韠授以弓矢于高禘之前○是月也日夜分雷乃發聲始電蟄蟲咸
動啓戶始出先雷三日奮木鐸以令兆民曰雷將發聲有不戒其容止者生子不備
必有凶災日夜分則同度量鈞衡石角斗甬正權概○是月也耕者少舍乃脩闢扇
寢廟畢備毋作大事以妨農之事是月也毋竭川澤毋漉陂池毋焚山林○天子乃
鮮羔開冰先薦寢廟○上丁命樂正習舞釋菜天子乃帥三公九卿諸侯大夫親往
視之仲丁又命樂正入學習舞○是月也祀不用犧牲用圭璧更皮幣○仲春行秋
令則其國大水寒氣摠至寇戎來征行冬令則陽氣不勝麥乃不熟民多相掠行夏
令則國乃大旱煖氣早來蟲螟爲害

季春之月日在胃昏七星中且牽牛中其日甲乙其帝大暉其神句芒其蟲鱗其音角律中姑洗其數八其味酸其臭羶其祀戶祭先脾○桐始華田鼠化爲鴛虹始見萍始生○天子居青陽右个乘鸞路駕倉龍載青旂衣青衣服倉玉食麥與羊其器疏以達○是月也天子乃薦鞠衣于先帝命舟牧覆舟五覆五反乃告舟備具于天子焉天子始乘舟薦鮪于寢廟乃爲麥祈實○是月也生氣方盛陽氣發泄句者畢出萌者盡達不可以內天子布德行惠命有司發倉廩賜貧窮振乏絕開府庫出幣帛周天下勉諸侯聘名士禮賢者○是月也命司空曰時雨將降下水上騰循行國邑周視原野修利隄防道達溝瀆開通道路毋有障塞田獵罝罾羅罔畢翳餒獸之藥毋出九門○是月也命野虞無伐桑柘鳴鳩拂其羽戴勝降于桑具曲植籩筐后妃齊戒親東鄉躬桑禁婦女毋觀省婦使以勸蠶事蠶事既登分繭稱絲效功以共郊廟之服無有敢惰是月也命工師令百工審五庫之量金鐵皮革筋角齒羽箭幹脂膠丹漆毋或不良○百工咸理監工日號毋悖于時毋或作爲淫巧以蕩上心○是月之末擇吉日大合樂天子乃率三公九卿諸侯大夫親往視之○是月也乃合

累牛騰馬遊牝于牧犧牧駒犢舉書其數○命國難九門磔攘以畢春氣○季春行冬令則寒氣時發草木皆肅國有大恐行夏令則民多疾疫時雨不降山林不收行秋令則天多沈陰淫雨蚤降兵革並起

孟夏之月日在畢昏翼中且婺女中其日丙丁其帝炎帝其神祝融其蟲羽其音徵律中中呂其數七其味苦其臭焦其祀竈祭先肺螻蟪鳴蚯蚓出王瓜生苦菜秀○天子居明堂左个乘朱路駕赤騶載赤旂衣朱衣服赤玉食菽與雞其器高以粗○是月也以立夏先立夏三日大史謁之天子曰某日立夏盛德在火天子乃齊立夏之日天子親帥三公九卿大夫以迎夏於南郊還反行賞封諸侯慶賜遂行無不欣說○乃命樂師習合禮樂命太尉贊桀俊遂賢良舉長大行爵出祿必當其位是月也繼長增高毋有壞墮毋起土功毋發大衆毋伐大樹是月也天子始緝命野虞出行田原爲天子勞農勸民毋或失時○命司徒巡行縣鄙命農勉作毋休子都是月也驅獸毋害五穀毋大田獵農乃登麥天子乃以彘嘗麥先薦寢廟是月也聚畜百藥靡草死麥秋至斷薄刑決小罪出輕繫蠶事畢后妃獻繭乃牧繭稅以桑爲均貴

賤長幼如一以給郊廟之服○是月也天子飲酎用禮樂○孟夏行秋令則苦雨數來五穀不滋四鄙入保行冬令則草木蚤枯後乃大水敗其城郭行春令則蝗蟲爲災暴風來格秀草不實

仲夏之月日在東井昏亢中且危中其日丙丁其帝炎帝其神祝融其蟲羽其音徵律中蕤賓其數七其味苦其臭焦其祀竈祭先肺○小暑至螳螂生鶉始鳴反舌無聲○天子居明堂太廟乘朱路駕赤駟載赤旂衣朱衣服赤玉食菽與雞其器高以粗養壯佼○是月也命樂師脩鞀鞀鼓均琴瑟管籥執子戚戈羽調笙笙篳篥飭鍾磬祝敎○命有司爲民祈祀山川百源大雩帝用盛樂乃命百縣雩祀百辟卿士有益於民者以祈穀實○農乃登黍是月也天子乃以雛嘗黍羞以含桃先薦寢廟○令民毋艾藍以染毋燒灰毋暴布門閭毋閉關市毋索挺重囚益其食○游牝別羣則繫騰駒班馬政○是月也日長至陰陽爭死生分君子齊戒處必掩身毋躁止聲色毋或進薄滋味毋致和節者欲定心氣百官靜事毋刑以定晏陰之所成○鹿角解蟬始鳴半夏生木莖榮○是月也毋用火南方可以居高明可以遠眺望可以升

山陵可以處臺榭○仲夏行冬令則雹凍傷穀道路不通暴兵來至行春令則五穀晚熟百勝時起其國乃饑行秋令則草木零落果實早成民殃於疫

季夏之月日在柳昏火中且奎中其日丙丁其帝炎帝其神祝融其蟲羽其音徵律中林鍾其數七其味苦其臭焦其祀竈祭先肺溫風始至蟋蟀居壁鷹乃學習腐草爲螢○天子居明堂右个乘朱路駕赤駟載赤旂衣朱衣服赤玉食菽與雞其器高以粗○命漁師伐蛟取鼉登龜取鼈命澤人納材葦○是月也命四監大合百縣之秩芻以養犧牲令民無不咸出其力以共皇上帝名山大川四方之神以祠宗廟社稷之靈以爲民祈福○是月也命婦官染采黼黻文章必以法故無或差貸黑黃倉赤莫不質良毋敢詐僞以給郊廟祭祀之服以爲旗章以別貴賤等給之度○是月也樹木方盛乃命虞人入山行木毋有斬伐不可以興土功不可以合諸侯不可以起兵動衆毋舉大事以搖養氣毋發令而待以妨神農之事也水潦盛昌神農將持功舉大事則有天殃○是月也土潤溽暑大雨時行燒薙行水利以穀草如以熟湯可以糞田疇可以美土疆○季夏行春令則穀實鮮落國多風欸民乃遷徙行秋

令則上隰水潦禾稼不熟乃多女災行冬令則風寒不時鷹隼蚤鷩四鄙入保

中央土其日戊己其帝黃帝其神后土其蟲倮其音宮律中黃鍾之宮其數五其味甘其臭香其祀中霤祭先心天子居大廟大室乘大路駕黃駟載黃旂衣黃衣服黃玉食稷與牛其器圓以閏

孟秋之月日在翼昏建星中口畢中其日庚辛其帝少皞其神蓐收其蟲毛其音商律中夷則其數九其味辛其臭腥其祀門祭先肝○涼風至白露降寒蟬鳴鷹乃祭鳥用始行戮○天子居總章左个乘戎路駕白駱載白旂衣白衣服白玉食麻與犬其器廉以深○是月也以立秋先立秋三日大史謁之天子曰某日立秋盛德在金天子乃齊立秋之日天子親帥三公九卿諸侯大夫以迎秋於西郊還反賞軍帥武人於朝天子乃命將帥選士厲兵簡練桀俊專任有功以征不義詰誅暴慢以明好惡順彼遠方是月也命有司脩法制繕囹圄具桎梏禁止姦慎罪邪務搏執命理瞻傷察創視折審斷決獄訟必端平戮有罪嚴斷刑天地始肅不可以羸是月也農乃登穀天子嘗新先薦寢廟命百官始收斂完隄坊謹壅塞以備水潦脩宮室坏墻垣

補城郭是月也毋以封諸侯立大官毋以割地行大使出大幣○孟秋行冬令則陰氣大勝介蟲敗穀戎兵乃來行春令則其國乃旱陽氣復還五穀無實行夏令則國多火災寒熱不節民多瘧疾

仲秋之月日在角昏牽牛中旦觜觶中其日庚辛其帝少皞其神蓐收其蟲毛其音商律中南呂其數九其味辛其臭腥其祀門祭先肝○盲風至鴻雁來玄鳥歸羣鳥養羞○天子居總章大廟乘戎路駕白駱載白旂衣白衣服白玉食麻與犬其器廉以深○是月也養衰老授几杖行樂粥飲食○乃命司服具飭衣裳文繡有恆制有小大度有長短衣服有量必循其故冠帶有常○乃命有司申嚴百刑斬殺必當毋或枉撓枉撓不當反受其殃○是月也乃命宰祝循行犧牲視全具案芻豢瞻肥瘠察物色必比類量小大視長短皆中度五者備當上帝其饗○天子乃難以達秋氣○以犬嘗麻先薦寢廟○是月也可以築城郭建都邑穿窬窰脩囷倉○乃命有司趣民收斂務畜菜多積聚乃勸種麥毋或失時其有失時行罪無疑○是月也日夜分雷始收聲蟄蟲坏戶殺氣浸盛陽氣日衰水始涸○日夜分則同度量平權衡正

鈞石角斗甬是月也易關市來商旅納貨賄以便民事四方來集遠鄉皆至則財不
匱上無乏用百事乃遂○凡舉大事毋逆天數必順其時慎因其類○仲秋行春令
則秋雨不降草木生榮國乃有恐行夏令則其國乃旱蟄蟲不藏五穀復生行冬令
則風災數起收雷先行草木蚤死

季秋之月日在房昏虛中日柳中其日庚辛其帝少皞其神蓐收其蟲毛其音商律
中無射其數九其味辛其臭腥其祀門祭先肝○鴻雁來賓爵入大水爲蛤鞠有黃
華豺乃祭獸戮禽○天子居總章右个乘戎路駕白駱載白旂衣白衣服白玉食麻
與犬其器廉以深○是月也中嚴號令命百官貴賤無不務內以會天地之藏無有
宣出○乃命冢宰農事備收舉五穀之要藏帝藉之收於神倉祇敬必飭是月也霜
始降則百工休○乃命有司曰寒氣總至民力不堪其皆入室○上丁命樂正入學
習吹○是月也大饗帝嘗犧牲告備于天子○合諸侯制百縣爲來歲受朔日與諸
侯所稅於民輕重之法貢職之數以遠近土地所宜爲度以給郊廟之事無有所私
○是月也天子乃教於田獵以習五戎班馬政命僕及七騶咸駕載旌旒授車以級

整設于屏外司徒摺扑北面誓之天子乃厲飾執弓挾矢以獵命主祠祭禽于四方
○是月也草木黃落乃伐薪爲炭○蟄蟲咸俯在內皆墜其戶乃趣獄刑毋留有罪
收祿秩之不當供養之不宜者○是月也天子乃以犬嘗稻先薦寢廟○季秋行夏
令則其國大水冬藏殃敗民多飢噎行冬令則國多盜賊邊竟不寧土地分裂行春
令則煖風來至民氣解情師輿不居

孟冬之月日在尾昏危中且七星中其日壬癸其帝顓頊其神玄冥其蟲介其音羽
律中應鍾其數六其味鹹其臭朽其祀行祭先腎○水始冰地始凍雉入大水爲蜃
虹藏不見○天子居玄堂左个乘玄路駕鐵驪載玄旂衣黑衣服玄玉食黍與麋其
器鬲以奄○是月也以立冬先立冬三日太史謁之天子曰某日立冬盛德在水天
子乃齊立冬之日天子親帥三公九卿大夫以迎冬於北郊還反賞死事恤孤寡○
是月也命大史贊龜筮占兆審卦吉凶是察阿黨則罪無有掩蔽○是月也天子始
裘○命有司曰天氣上騰地氣下降天地不通閉塞而成冬命百官謹蓋藏命司徒
循行積聚無有不數坏城郭戒門閭脩鍵閉慎管籥固封疆備通竟完要塞謹關梁

寒徭徑○飭喪紀辨衣裳審棺槨之薄厚塋之大小高卑厚薄之度貴賤之等級○是月也命工師效功陳祭器按度程毋或作爲淫巧以蕩上心必功致爲上物勒工名以考其誠功有不當必行其罪以窮其情○是月也大飲烝○天子乃祈來年于天宗大割祠于公社及門閭臘先祖五祀勞農以休息之○天子乃命將帥講武習射御角力○是月也乃命水虞漁師收水泉池澤之賦毋或敢侵削衆庶兆民以爲天子取怨于下其有若此者行罪無赦○孟冬行春令則凍閉不密地氣上泄民多流亡行夏令則國多暴風方冬不寒蟄蟲復出行秋令則雪霜不時小兵時起土地侵削

仲冬之月日在斗昏東壁中且軫中其日壬癸其帝顓頊其神玄冥其蟲介其音羽律中黃鍾其數六其味鹹其臭朽其祀行祭先腎○冰益壯地始坼鶡旦不鳴虎始交○天子居玄堂大廟乘玄路駕鐵驪載玄旂衣黑衣服玄玉食黍與彘其器闔以奄○飭死事命有司曰土事毋作慎毋發蓋毋發室屋及起大眾以固而閉地氣沮泄是謂發天地之房諸蟄則死民必疾疫又隨以喪命之曰暢月○是月也命奄尹

申宮令審門閭謹房室必重閉省婦事毋得淫雖有貴戚近習毋有不禁○乃命大
酋秬稻必齊麴蘖必時泔熾必絜水泉必香陶器必良火齊必得兼用六物大酋監
之毋有差貸○天子命有司祈祀四海大川名源淵澤井泉○是月也農有不收藏
積聚者馬牛畜獸有放佚者取之不詰山林藪澤有能取蔬食田獵禽獸者野虞教
道之其有相侵奪者罪之不赦是月也日短至陰陽爭諸生蕩君子齊戒處必掩身
身欲寧去聲色禁者慾安形性事欲靜以待陰陽之所定○芸始生荔挺出蚯蚓結
麋角解水泉動○日短至則伐木取竹箭是月也可以罷官之無事去器之無用者
○塗闕廷門閭築圍園此以助天地之閉藏也○仲冬行夏令則其國乃旱氣霧冥
冥雷乃發聲行秋令則天時雨汁瓜瓠不成國有大兵行春令則蝗蟲爲敗水泉咸
竭民多疥癩

季冬之月日在婺女昏婁中且氐中其日壬癸其帝顓頊其神玄冥其蟲介其音羽
律中大呂其數六其味鹹其臭朽其祀行祭先腎○鴈北鄉鵠始巢雉雊雞乳○天
子居玄堂右个乘玄路駕鐵驪載玄旂衣黑衣服玄玉食黍與彘其器閔以奄○命

有司大難旁磔出土牛以送寒氣○征鳥厲疾乃畢山川之祀及帝之大臣天之神祇○是月也命漁師始漁天子親往乃嘗魚先薦寢廟○冰方盛水澤腹堅命取冰冰以入令告民出五種命農計耦耕事脩耒耜具田器○命樂師大合吹而罷○乃命四監收秩薪柴以共郊廟及百祀之薪燎是月也日窮于次月窮于紀星回于天數將幾終歲且更始專而農民毋有所使○天子乃與公卿大夫共飭國典論時命以待來歲之宜○乃命太史次諸侯之列賦之犧牲以共皇天上帝社稷之饗乃命同姓之邦共寢廟之芻豢命宰歷卿大夫至于庶民土田之數而賦犧牲以共山林名川之祀凡在天下九州之民者無不咸獻其力以共皇天上帝社稷寢廟山林名川之祀○季冬行秋令則白露蚤降介蟲爲妖四鄙人保行春令則胎夭多傷國多固疾命之曰逆行夏令則水潦敗國時雪不降冰凍消釋

曾子問

曾子問曰君薨而世子生如之何孔子曰卿大夫士從攝主北面於西階南大祝裨冕執束帛升自西階盡等不升堂命毋哭祝聲三告曰某之子生敢告升奠幣于殯

東几上哭降衆主人卿大夫士房中皆哭不踊盡一哀反位遂朝奠小宰升舉幣三日衆主人卿大夫士如初位北面大宰大宗大祝皆裨冕少師奉子以衰祝先子從宰宗人從入門哭者止子升自西階殯前北面祝立于殯東南隅祝聲三曰某之子某從執事敢見子拜稽顙哭祝宰宗人衆主人卿大夫士哭踊三者三降東反位皆袒子踊房中亦踊三者三襲衰杖奠出大宰命祝史以名徧告于五祀山川○曾子問曰如已葬而世子生則如之何孔子曰大宰大宗從大祝而告于禩三月乃名于禩以名徧告及社稷宗廟山川○孔子曰諸侯適天子必告于祖奠于禩而出視朝命祝史告于社稷宗廟山川乃命國家五官而後行道而出告者五日而徧過是非禮也凡告用牲幣反亦如之諸侯相見必告于禩朝服而出視朝命祝史告于五廟所過山川亦命國家五官道而出反必親告于祖禩乃命祝史告至于前所告者而后聽朝而入○曾子問曰並有喪如之何何先後孔子曰葬先輕而後重其奠也先重而後輕禮也自啓及葬不奠行葬不哀次反葬奠而後辭於殯遂脩葬事其虞也先重而後輕禮也○孔子曰宗子雖七十無無主婦非宗子雖無主婦可也○

曾子問曰將冠子冠者至揖讓而入聞齊衰大功之喪如之何孔子曰內喪則廢外喪則冠而不醴徹饌而埽卽位而哭如冠者未至則廢如將冠子而未及期日而有齊衰大功小功之喪則因喪服而冠除喪不改冠乎孔子曰天子賜諸侯大夫冕弁服於大廟歸設奠服賜服於斯乎有冠醮無冠醮父沒而冠則己冠埽地而祭於廟已祭而見伯父叔父而后饗冠者○曾子問曰祭如之何則不行旅酬之事矣孔子曰聞之小祥者主人練祭而不旅奠酬於賓賓弗舉禮也昔者魯昭公練而舉酬行旅非禮也孝公大祥奠酬弗舉亦非禮也○曾子問曰大功之喪可以與於饋奠之事乎孔子曰豈大功耳自斬衰以下皆可禮也曾子曰不以輕服而重相爲乎孔子曰非此之謂也天子諸侯之喪斬衰者奠大夫齊衰者奠士則朋友奠不足則取於大功以下者不足則反之曾子問曰小功可以與於祭乎孔子曰何必小功耳自斬衰以下與祭禮也曾子曰不以輕喪而重祭乎孔子曰天子諸侯之喪祭也不斬衰者不與祭大夫齊衰者與祭士祭不足則取於兄弟大功以下者○曾子問曰相識有喪服可以與於祭乎孔子曰總不祭又何助於人○曾子問曰廢喪服可以與於

饋奠之事乎孔子曰說衰與奠非禮也以擯相可也○曾子問曰昏禮既納幣有吉日女之父母死則如之何孔子曰壻使人弔如壻之父母死則女之家亦使人弔父喪稱父母喪稱母父母不在則稱伯父世母壻已葬壻之伯父致命女氏曰某之子有父母之喪不得嗣爲兄弟使某致命女氏許諾而弗敢嫁禮也壻免喪女之父母使人請壻弗取而后嫁之禮也女之父母死壻亦如之○曾子問曰親迎女在塗而壻之父母死如之何孔子曰女改服布深衣縞總以趨喪女在塗而女之父母死則女反如壻親迎女未至有齊衰大功之喪則如之何孔子曰男不入改服於外次女入改服於內次然後卽位而哭曾子問曰除喪則不復昏禮乎孔子曰祭過時不祭禮也又何反於初○孔子曰嫁女之家三夜不息燭思相離也取婦之家三日不舉樂思嗣親也三月而廟見稱來婦也擇日而祭於禰成婦之義也○曾子問曰女未廟見而死則如之何孔子曰不遷於祖不祔於皇姑壻不杖不菲不次歸葬于女氏之黨示未成婦也○曾子問曰取女有吉日而女死如之何孔子曰壻齊衰而弔既葬而除之夫死亦如之曾子問曰喪有二孤廟有二主禮與孔子曰天無二日土無

二王嘗禘郊社尊無二上未知其爲禮也昔者齊桓公亟舉兵作僞主以行及反藏諸祖廟廟有二主自桓公始也喪之二孤則昔者衛靈公適魯遭季桓子之喪衛君請弔哀公辭不得命公爲主客入弔康子立於門右北面公揖讓升自東階西鄉客升自西階弔公拜興哭康子拜稽顙於位有司弗辯也今之二孤自季康子之過也○曾子問曰古者師行必以遷廟主行乎孔子曰天子巡守以遷廟主行載于齊車言必有尊也今也取七廟之主以行則失之矣當七廟五廟無虛主虛主者唯天子崩諸侯薨與去其國與禘祭於祖爲無主耳吾聞諸老聃曰天子崩國君薨則祝取羣廟之主而藏諸祖廟禮也卒哭成事而后主各反其廟君去其國大宰取羣廟之主以從禮也禘祭於祖則祝迎四廟之主主出廟入廟必蹕老聃云○曾子問曰古者師行無遷主則何主孔子曰主命問曰何謂也孔子曰天子諸侯將出必以幣帛皮圭告于祖禰遂奉以出載于齊車以行每舍奠焉而后就舍反必告設奠卒斂幣玉藏諸兩階之間乃出蓋貴命也○子游問曰喪慈母如母禮與孔子曰非禮也古者男子外有傅內有慈母君命所使教子也何服之有昔者魯昭公少喪其母有慈

母良及其死也公弗忍也欲喪之有司以聞曰古之禮慈母無服今也君爲之服是
逆古之禮而亂國法也若終行之則有司將書之以遺後世無乃不可乎公曰古者
天子練冠以燕居公弗忍也遂練冠以喪慈母喪慈母自魯昭公始也○曾子問曰
諸侯旅見天子入門不得終禫廢者幾孔子曰四請問之曰大廟火日食后之喪兩
霑服失容則廢如諸侯皆在而日食則從天子救日各以其方色與其兵大廟火則
從天子救火不以方色與兵○曾子問曰諸侯相見揖讓入門不得終禮廢者幾孔
子曰六請問之曰天子崩大廟火日食后夫人之喪兩霑服失容則廢○曾子問曰
天子嘗禘郊社五祀之祭簠簋既陳天子崩后之喪如之何孔子曰廢○曾子問曰
當祭而日食大廟火其祭也如之何孔子曰接祭而已矣如牲至未殺則廢
天子崩未殯五祀之祭不行既殯而祭其祭也尸入三飯不侑醕不酢而已矣自啓
至于反哭五祀之祭不行已葬而祭祀畢獻而已○曾子問曰諸侯之祭社稷俎豆
既陳聞天子崩后之喪君薨夫人之喪如之何孔子曰廢自薨比至于殯自啓至于
反哭奉帥天子○曾子問曰大夫之祭鼎俎既陳籩豆既設不得成禮廢者幾孔子

曰九請問之曰天子崩后之喪君薨夫人之喪君之大廟火日食三年之喪齊衰大功皆廢外喪自齊衰以下行也其齊衰之祭也尸入三飯不侑醕不酢而已矣大功酢而已矣小功緦室中之事而已矣士之所以異者緦不祭所祭於死者無服則祭曾子問曰三年之喪弔乎孔子曰三年之喪練不羣立不旅行君子禮以飾情三年之喪而弔哭不亦虛乎曾子問曰大夫士有私喪可以除之矣而有君服焉其除之也如之何孔子曰有君喪服於身不敢私服又何除焉於是乎有過時而弗除也君之喪服除而后殷祭禮也○曾子曰父母之喪弗除可乎孔子曰先王制禮過時弗舉禮也非弗能勿除也愚其過於制也故君子過時不祭禮也○曾子問曰君薨既殯而臣有父母之喪則如之何孔子曰歸居于家有殷事則之君所朝夕否曰君既啓而臣有父母之喪則如之何孔子曰歸哭而反送君曰君未殯而臣有父母之喪則如之何孔子曰歸殯反子君所有殷事則歸朝夕否大夫室老行事士則子孫行事大夫內子有殷事亦之君所朝夕否○賤不誄貴幼不誄長禮也唯天子稱天以誄之諸侯相誄非禮也○曾子問曰君出疆以三年之戒以禭從君薨其入如之何

孔子曰共殯服則子麻弁經疏衰菲杖入自闕升自西階如小斂則子免而從柩入自門升自阼階君大夫士一節也曾子問曰君之喪既引聞父母之喪如之何孔子曰遂既封而歸不俟子曾子問曰父母之喪既引及塗聞君薨如之何孔子曰遂既封改服而往○曾子問曰宗子爲士庶子爲大夫其祭也如之何孔子曰以上牲祭於宗子之家祝曰孝子某爲介子某薦其常事若宗子有罪居于他國庶子爲大夫其祭也祝曰孝子某使介子某執其常事攝主不厭祭不旅不假不綏祭不配布奠於賓賓奠而不舉不歸肉其辭於賓曰宗兄宗弟宗子在他國使某辭○曾子問曰宗子去在他國庶子無爵而居者可以祭乎孔子曰祭哉請問其祭如之何孔子曰望墓而爲壇以時祭若宗子死告於墓而后祭於家宗子死稱名不言孝身沒而已子游之徒有庶子祭者以此若義也今之祭者不首其義故誣於祭也○曾子問曰祭必有尸乎若厭祭亦可乎孔子曰祭成喪者必有尸尸必以孫孫幼則使人抱之無孫則取於同姓可也祭殤必厭蓋弗成也祭成喪而無尸是殤之也孔子曰有陰厭有陽厭曾子問曰殤不祔祭何謂陰厭陽厭孔子曰宗子爲殤而死庶子弗爲後

也其吉祭特性祭殤不舉無胙俎無玄酒不告利成是謂陰厭凡殤與無後者祭於宗子之家當室之白尊于東房是謂陽厭○曾子問曰葬引至于壙日有食之則有變乎且不乎孔子曰昔者吾從老聃助葬於巷黨及壙日有食之老聃曰止柩就道右止哭以聽變既明反而后行曰禮也反葬而丘問之曰夫柩不可以反者也日有食之不知其已之遲數則豈如行哉老聃曰諸侯朝天子見日而行逮日而舍奠大夫使見日而行逮日而舍夫柩不蚤出不莫宿見星而行者唯罪人與奔父母之喪者乎日有食之安知其不見星也且君子行禮不以人之親戚患吾聞諸老聃云○曾子問曰爲君使而卒於舍禮曰公館復私館不復凡所使之國有司所授舍則公館已何謂私館不復也孔子曰善乎問之也自卿大夫之家曰私館公館與公所爲曰公館公館復此之謂也○曾子問曰下殤土周葬于園逢輿機而往塗邇故也今墓遠則其葬也如之何孔子曰吾聞諸老聃曰昔者史佚有子而死下殤也墓遠召公謂之曰何以不棺斂於宮中史佚曰吾敢乎哉召公言於周公周公曰豈不可史佚行之下殤用棺衣棺自史佚始也○曾子問曰卿大夫將爲尸於公受宿矣而

有齊衰內喪則如之何孔子曰出舍於公館以待事禮也孔子曰尸弁冕而出鄉大夫士皆下之尸必式必有前驅○子夏問曰三年之喪卒哭金革之事無辟也者禮與初有司與孔子曰夏后氏三年之喪既殯而致事殷人既葬而致事記曰君子不奪人之親亦不可奪親也此之謂乎子夏曰金革之事無辟也者非與孔子曰吾聞諸老聃曰昔者魯公伯禽有爲爲之也今以三年之喪從其利者吾弗知也

文王世子

文王之爲世子朝於王季日三雞初鳴而衣服至於寢門外問內豎之御者曰今日安否何如內豎曰安文王乃喜及日中又至亦如之及莫又至亦如之其有不安節則內豎以告文王文王色憂行不能正履王季復膳然後亦復初食上必在視寒煖之節食下問所膳命膳宰曰未有原應曰諾然後退武王帥而行之不敢有加焉文王有疾武王不說冠帶而養文王一飯亦一飯文王再飯亦再飯旬有二日乃間文王謂武王曰女何夢矣武王對曰夢帝與我九齡文王曰女以爲何也武王曰西方有九國焉君王其終撫諸文王曰非也古者謂年齡齒亦齡也我百爾九十吾與爾

三焉文王九十七乃終武王九十三而終成王幼不能涖阼周公相踐阼而治抗世子法於伯禽欲令成王之知父子君臣長幼之道也成王有過則撻伯禽所以示成王世子之道也文王之爲世子也○凡學世子及學士必時春夏學干戈秋冬學羽籥皆於東序小樂正學干大胥贊之籥師學戈籥師丞贊之胥敝南春誦夏弦大師詔之瞽宗秋學禮執禮者詔之冬讀書典書者詔之禮在瞽宗書在上庠○凡祭與養老乞言合語之禮皆小樂正詔之於東序大樂正學舞干戚語說命乞言皆大樂正授數大司成論說在東序○凡侍坐於大司成者遠近間三席可以問終則負牆列事未盡不問○凡學春官釋奠于其先師秋冬亦如之凡始立學者必釋奠于先聖先師及行事必以幣凡釋奠者必有合也有國故則否○凡大合樂必遂養老凡語于郊者必取賢斂才焉或以德進或以事舉或以言揚曲藝皆誓之以待又語三而一有焉乃進其等以其序謂之郊人遠之於成均以及取爵於上尊也○始立學者旣興器用幣然後釋菜不舞不授器乃退饋于東序一獻無介語可也教世子○凡三王教世子必以禮樂樂所以脩內也禮所以脩外也禮樂交錯於中發形於外

是故其成也懌恭敬而溫文立大傅少傅以養之欲其知父子君臣之道也大傅審父子君臣之道以示之少傅奉世子以觀大傅之德行而審諭之大傅在前少傅在後入則有保出則有師是以教諭而德成也師也者教之以事而諭諸德者也保也者慎其身以輔翼之而歸諸道者也記曰虞夏商周有師保有疑丞設四輔及三公不必備唯其人語使能也君子曰德德成而教尊教尊而官正官正而國治君之謂也仲尼曰昔者周公攝政踐阼而治抗世子法於伯禽所以善成王也聞之曰爲人臣者殺其身有益於君則爲之況于其身以善其君乎周公優爲之是故知爲人子然後可以爲人父知爲人臣然後可以爲人君知事人然後能使人成王幼不能澄阼以爲世子則無爲也是故抗世子法於伯禽使之與成王居欲令成王之知父子君臣長幼之義也君之於世子也親則父也尊則君也有父之親有君之尊然後兼天下而有之是故養世子不可不慎也行一物而三善皆得者唯世子而已其齒於學之謂也故世子齒於學國人觀之曰將君我而與我齒讓何也曰有父在則禮然然而衆知父子之道矣其二曰將君我而與我齒讓何也曰有君在則禮然然而衆

著於君臣之義也其三曰將君我而與我齒讓何也曰長長也然而衆知長幼之節矣故父在斯爲子君在斯謂之臣居于與臣之節所以尊君親親也故學之爲父子焉學之爲君臣焉學之爲長幼焉父子君臣長幼之道得而國治語曰樂正司業父師司成一有元良萬國以貞世子之謂也周公踐阼庶子之正於公族者教之以孝弟睦友子愛明父于之義長幼之序其朝于公內朝則東而北上臣有貴者以齒其在外朝則以官司士爲之其在宗廟之中則如外朝之位宗人授事以爵以官其登饌獻受爵則以上嗣庶子治之雖有三命不踰父兄其公大事則以其喪服之精蟲爲序雖於公族之喪亦如之以次主人若公與族燕則異姓爲賓膳宰爲主人公與父兄齒族食世降一等○其在軍則守於公禰公若有出疆之政庶子以公族之無事者守於公宮正室守大廟諸父守貴宮貴室諸子諸孫守下宮下室○五廟之孫祖廟未毀雖爲庶人冠取妻必告死必赴練祥則告族之相爲也宜弔不弔宜免不免有司罰之至于贈賻承含皆有正焉公族其有死罪則磬于甸人其刑罪則纖剝亦告于甸人公族無宮刑獄成有司讞于公其死罪則曰某之罪在大辟其刑罪則

曰某之罪在小辟公曰宥之有司又曰在辟公又曰宥之有司又曰在辟及三宥不對走出致刑于甸人公又使人追之曰雖然必赦之有司對曰無及也反命于公公素服不舉爲之變如其倫之喪無服親哭之○公族朝于內朝內親也雖有貴者以齒明父子也外朝以官體異姓也宗廟之中以爵爲位崇德也宗人授事以官尊賢也登餼受爵以上嗣尊祖之道也喪紀以服之輕重爲序不奪人親也公與族燕則以齒而孝弟之道達矣其族食世降一等親親之殺也戰則守於公禰孝愛之深也正室守大廟尊宗室而君臣之道著矣諸父諸兄守貴室子弟守下室而讓道達矣○五廟之孫祖廟未毀雖及庶人冠取妻必告死必赴不忘親也親未絕而列於庶人賤無能也敬弔臨賻贈睦友之道也古者庶子之官治而邦國有倫邦國有倫而衆鄉方矣公族之罪雖親不以犯有司正術也所以體百姓也刑于隱者不與國人慮兄弟也弗弔弗爲服哭于異姓之廟爲忝祖遠之也素服居外不聽樂私喪之也骨肉之親無絕也公族無官刑不翦其類也○天子視學大昕鼓徵所以警衆也衆至然後天子至乃命有司行事興秩節祭先師先聖焉有司卒事反命始之養也適

東序釋奠於先老遂設三老五更羣老之席位焉適饌省醴養老之珍具遂發咏焉退脩之以孝養也反登歌清廟既歌而語以成之也言父子君臣長幼之道合德音之致禮之大者也下管象舞大武大合衆以事達有神興有德也正君臣之位貴賤之等焉而上下之義行矣有司告以樂闋王乃命公侯伯子男及羣吏曰反養老幼于東序終之以仁也○是故聖人之記事也慮之以大愛之以敬行之以禮脩之以孝養紀之以義終之以仁○是故古之人一舉事而衆皆知其德之備也古之君子舉大事必慎其終始而衆安得不喻焉兌命曰念終始典于學世子之記曰朝夕至于大寢之門外問於內豎曰今日安否何如內豎曰今日安世子乃有喜色其有不安節則內豎以告世子世子色憂不滿意內豎言復初然後亦復初朝夕之食上世子必在視寒煖之節食下問所膳羞必知所進以命膳宰然後退若內豎言疾則世子親齊玄而養膳宰之饌必敬視之疾之藥必親嘗之嘗饌善則世子亦能食嘗饌寡世子亦不能飽以至于復初然後亦復初

禮運

昔者仲尼與於蜡賓事畢出遊於觀之上喟然而嘆仲尼之嘆蓋嘆魯也言偃在側曰君子何嘆孔子曰大道之行也與三代之英丘未之逮也而有志焉大道之行也天下爲公選賢與能講信脩睦故人不獨親其親不獨子其子使老有所終壯有所用幼有所長矜寡孤獨廢疾者皆有所養男有分女有歸貨惡其棄於地也不必藏於己力惡其不出於身也不必爲己是故謀閉而不興盜竊亂賊而不作故外戶而不閉是謂大同今大道既隱天下爲家各親其親各子其子貨力爲己大人世及以爲禮城郭溝池以爲固禮義以爲紀以正君臣以篤父子以睦兄弟以和夫婦以設制度以立田里以賢勇知以功爲己故謀用是作而兵由此起禹湯文武成王周公由此其選也此六君子者未有不謹於禮者也以著其義以考其信著有過刑仁講讓示民有常如有不由此者在執者去衆以爲殃是謂小康○言偃復問曰如此乎禮之急也孔子曰夫禮先王以承天之道以治人之情故失之者死得之者生詩曰相鼠有體人而無禮人而無禮胡不遘死是故夫禮必本於天殺於地列於鬼神達於喪祭射御冠昏朝聘故聖人以禮示之故天下國家可得而正也○言偃復問曰

夫子之極言禮也可得而聞與孔子曰我欲觀夏道是故之杞而不足徵也吾得夏時焉我欲觀殷道是故之宋而不足徵也吾得坤乾焉坤乾之義夏時之等吾以是觀之○夫禮之初始諸飲食其燔黍捭豚汙尊而抔飲蕢桴而土鼓猶若可以致其敬於鬼神及其死也升屋而號告曰臯某復然後飯腥而苴孰故天望而地藏也體魄則降知氣在上故死者北首生者南鄉皆從其初○昔者先王未有宮室冬則居營窟夏則居橧巢未有火化食草木之實鳥獸之肉飲其血茹其毛未有麻絲衣其羽皮○後聖有作然後脩火之利范金合土以爲臺榭宮室牖戶以炮以燔以亨以炙以爲醴酪治其麻絲以爲布帛以養生送死以事鬼神上帝皆從其朔○故玄酒在室醴醢在戶粢醴在堂澄酒在下陳其犧牲備其鼎俎列其琴瑟管磬鍾鼓脩其祝嘏以降上神與其先祖以正君臣以篤父子以睦兄弟以齊上下夫婦有所謂承天之祜○作其祝號玄酒以祭薦其血毛腥其俎孰其穀與其越席疏布以褻衣其澣帛醴醢以獻薦其燔炙君與夫人交獻以嘉魂魄是謂合莫○然後退而合亨體其犬豕牛羊實其簠簋籩豆饗奠祝以孝告嘏以慈告是謂大祥此禮之大成也

○孔子曰於呼哀哉我觀周道幽厲傷之吾舍魯何適矣魯之郊禘非禮也周公其衰矣杞之郊也禹也宋之郊也契也是天子之事守也故天子祭天地諸侯祭社稷○祝嘏莫敢易其常古是謂大假○祝嘏辭說藏於宗祝巫史非禮也是謂幽國醜學及尸君非禮也是謂僭君○冕弁兵革藏於私家非禮也是謂魯君○大夫具官祭器不假聲樂皆具非禮也是謂亂國○故仕於公曰臣仕於家曰僕三年之喪與新有昏者期不使以衰裳入朝與家僕雜居齋齒非禮也是謂君與臣同國故天子有田以處其子孫諸侯有國以處其子孫大夫有采以處其子孫是謂制度故天子適諸侯必舍其祖廟而不以禮籍入是謂天子壞法亂紀諸侯非問疾弔喪而入諸臣之家是謂君臣爲讎○是故禮者君之大柄也所以別嫌明微儆鬼神考制度別仁義所以治政安君也故政不正則君位危君位危則大臣倍小臣竊刑肅而俗敝則法無常法無常而禮無列禮無列則士不事也刑肅而俗敝則民弗歸也是謂疵國○故政者君之所以藏身也是故夫政必本於天殺以降命命降于社之謂殺地降于祖廟之謂仁義降於山川之謂興作降於五祀之謂制度此聖人所以藏身之

固也

故聖人參於天地並於鬼神以治政也處其所存禮之序也玩其所樂民之治也故天生時而地生財人其父生而師教之四者君以正用之故君者立於無過之地也○故君者所明也非明人者也君者所養也非養人者也君者所事也非事人者也故君明人則有過養人則不足事人則失位故百姓則君以自治也養君以自安也事君以自顯也故禮達而分定故人皆愛其死而患其生○故用人之知去其詐用人之勇去其怒用人之仁去其貪○故國有患君死社稷謂之義大夫死宗廟謂之變○故聖人耐以天下爲一家以中國爲一人者非意之也必知其情辟於其義明於其利達於其患然後能爲之○何謂人情喜怒哀懼愛惡欲七者弗學而能何謂人義父慈子孝兄良弟弟夫義婦聽長惠幼順君仁臣忠十者謂之人義講信脩睦謂之人利爭奪相殺謂之人患故聖人之所以治人七情脩十義講信脩睦尙辭讓去爭奪舍禮何以治之飲食男女人之大欲存焉死亡貧苦人之大惡存焉故欲惡者心之大端也人藏其心不可測度也美惡皆在其心不見其色也欲一以窮之舍

禮何以哉○故人者其天地之德陰陽之交鬼神之會五行之秀氣也○故天乘陽垂日星地乘陰竅於山川播五行於四時和而后月生也是以三五而盈三五而闕五行之動迭相竭也五行四時十二月還相爲本也五聲六律十二管還相爲宮也五味六和十二食還相爲質也五色六章十二衣還相爲質也○故人者天地之心也五行之端也食味別聲被色而生者也故聖人作則必以天地爲本以陰陽爲端以四時爲柄以日星爲紀月以爲量鬼神以爲徒五行以爲質禮義以爲器人情以爲田四靈以爲畜以天地爲本故物可舉也以陰陽爲端故情可睹也以四時爲柄故事可勸也以日星爲紀故事可列也月以爲量故功有藝也鬼神以爲徒故事有守也五行以爲質故事可復也禮義以爲器故事行有考也人情以爲田故人以爲與也四靈以爲畜故飲食有由也何謂四靈麟鳳龜龍謂之四靈故龍以爲畜故魚鮪不滄鳳以爲畜故鳥不獮麟以爲畜故獸不狘龜以爲畜故人情不失○故先王乘著龜列祭祀瘞繒宣祝嘏辭說設制度故國有禮官有御事有職禮有序○故先王患禮之不達於下也○故祭帝於郊所以定天位也祀社於國所以列地利也祖

廟所以本仁也山川所以備鬼神也五祀所以本事也故宗祝在廟三公在朝三老在學王前巫而後史卜筮瞽侑皆在左右王中心無爲也以守至正○故禮行於郊而百神受職焉禮行於社而百貨可極焉禮行於祖廟而孝慈服焉禮行於五祀而正法則焉故自郊社祖廟山川五祀義之脩而禮之藏也○是故夫禮必本於大一分而爲天地轉而爲陰陽變而爲四時列而爲鬼神其降曰命其官於天也○夫禮必本於天動而之地列而之事變而從時協於分藝其居人也曰養其行之以貨力辭讓飲食冠昏喪祭射御朝聘○故禮義也者人之大端也所以講信脩睦而固人之肌膚之會筋骸之束也所以養生送死事鬼神之大端也所以達天道順人情之大寶也○故唯聖人爲知禮之不可以已也故壞國喪家亡人必先去其禮故禮之於人也猶酒之有藜也君子以厚小人以薄○故聖王脩義之柄禮之序以治人情故人情者聖王之田也脩禮以耕之陳義以種之講學以耨之本仁以聚之播樂以安之故禮也者義之寶也協諸義而協則禮雖先王未之有可以義起也義者藝之分仁之節也協於藝講於仁得之者強仁者義之本也順之體也得之者尊故治國

不以禮猶無耜而耕也爲禮不本於義猶耕而弗種也爲義而不講之以學猶穫而弗耨也講之於學而不合之以仁猶耨而弗穫也合之以仁而不安之以樂猶穫而弗食也安之以樂而不達於順猶食而弗肥也四體旣正膚革充盈人之肥也父子篤兄弟睦夫婦和家之肥也大臣法小臣廉官職相序君臣相正國之肥也天子以德爲車以樂爲御諸侯以禮相與大夫以法相序士以信相考百姓以睦相守天下之肥也是謂大順大順者所以養生送死事鬼神之常也故事大積焉而不苑並行而不繆細行而不失深而通茂而有間連而不相及也動而不相害也此順之至也故明於順然後能守危也○故禮之不同也不豐也不殺也所以持情而合危也故聖王所以順山者不使居川不使渚者居中原而弗敵也用水火金木飲食必時合男女頒爵位必當年德用民必順故無水旱昆蟲之災民無凶饑妖孽之疾故天不愛其道地不愛其寶人不愛其情故天降膏露地出醴泉山出器車河出馬圖鳳泉麒麟皆在郊極龜龍在宮沼其餘鳥獸之卵胎皆可俯而闕也則是無故先王能脩禮以達義體信以達順故此順之實也

禮器

禮器是故大備大備盛德也禮釋回增美質措則正施則行其在人也如竹箭之有筠也如松柏之有心也二者居天下之大端矣故貫四時而不改柯易葉故君子有禮則外諧而內無怨故物無不懷仁鬼神饗德○先王之立禮也有本有文忠信禮之本也義理禮之文也無本不立無文不行○禮也者合於天時設於地財順於鬼神合於人心理萬物者也是故天時有生也地理有宜也人官有能也物曲有利也故天不生地不養君子不以爲禮鬼神弗饗也居山以魚鼈爲禮居澤以鹿豕爲禮君子謂之不知禮故必舉其定國之數以爲禮之大經禮之大倫以地廣狹禮之薄厚與年之上下是故年雖大殺衆不匡懼則上之制禮也節矣○禮時爲大順次之體次之宜次之稱次之竟授舜舜授禹湯放桀武王伐紂時也詩云匪革其猶聿追來孝○天地之祭宗廟之事父子之道君臣之義倫也○社稷山川之事鬼神之祭體也○喪祭之用賓客之交義也○羔豚而祭百官皆是太牢而祭不必有餘此之謂稱也諸侯以龜爲寶以圭爲瑞家不寶龜不藏圭不臺門言有稱也○禮有以多

爲貴者天子七廟諸侯五大夫三士一天子之豆二十有六諸公十有六諸侯十有二上大夫八下大夫六諸侯七介七牢大夫五介五牢天子之席五重諸侯之席三重大夫再重天子崩七月而葬五重八襲諸侯五月而葬三重六襲大夫三月而葬再重四襲此以多爲貴也○有以少爲貴者天子無介祭天特牲天子適諸侯諸侯膳以犢諸侯相朝灌用鬱鬯無籩豆之薦大夫聘禮以脯臚天子一食諸侯再大夫士三食力無數大路繁纓一就次路繁纓七就圭璋特琥璜爵鬼神之祭單席諸侯視朝大夫特士旅之此以少爲貴也○有以大爲貴者宮室之量器皿之度棺槨之厚丘封之大此以大爲貴也○有以小爲貴者宗廟之祭貴者獻以爵賤者獻以散尊者舉蠲卑者舉角五獻之尊門外缶門內壺君尊瓦甒此以小爲貴也○有以高爲貴者天子之堂九尺諸侯七尺大夫五尺士三尺天子諸侯臺門此以高爲貴也○有以下爲貴者至敬不增埽地而祭天子諸侯之尊廢禁大夫士楸禁此以下爲貴也○禮有以文爲貴者天子龍袞諸侯黼大夫黻士玄衣纁裳天子之冕朱綠藻十有二旒諸侯九上大夫七下大夫五士三此以文爲貴也○有以素爲貴者至敬

無文父黨無容大圭不琢大羹不和大路素而越席纘尊疏布甗稗杓此以素爲貴也孔子曰禮不可不省也禮不同不豐不殺此之謂也蓋言稱也○禮之以多爲貴者以其外心者也德發揚詡萬物大博物博如此則得不以多爲貴乎故君子樂其發也禮之以少爲貴者以其內心者也德產之致也精微觀天下之物無可以稱其德者如此則得不以少爲貴乎是故君子慎其獨也○古之聖人內之爲尊外之爲樂少之爲貴多之爲美是故先王之制禮也不可多也不可寡也唯其稱也○是故君子大牢而祭謂之禮匹士大牢而祭謂之饗管仲饋蓋朱紘山節藻梲君子以爲濫矣晏平仲祀其先人豚肩不揜豆澣衣濯冠以朝君子以爲隘矣○是故君子之行禮也不可不慎也衆之紀也紀散而衆亂孔子曰我戰則克祭則受福蓋得其道矣君子曰祭祀不祈不麇蚤不樂葆大不善嘉事牲不及肥大薦不美多品○孔子曰臧文仲安知禮夏父弗綦逆祀而弗止也燔柴於奧夫奧者老婦之祭也盛於盆尊於瓶○禮也者猶體也體不備君子謂之不成人設之不當猶不備也禮有大有小有顯有微大者不可損小者不可益顯者不可揜微者不可大也故經禮三百曲

禮三千其致一也未有入室而不由戶者君子之於禮也有所竭情盡慎致其敬而誠若有美而文而誠若君子之於禮也有直而行也有曲而殺也有經而等也有順而討也有擗而播也有推而進也有放而文也有放而不致也有順而據也三代之禮一也民共由之或素或青夏造殷因

周坐尸詔侑武方其禮亦然其道一也夏立尸而卒祭殷坐尸周旅酬六尸曾子曰周禮其猶禴與○君子曰禮之近人情者非其至者也郊血大饗腥三獻爛一獻孰是故君子之於禮也非作而致其情也此有由始也是故七介以相見也不然則已愬三辭三讓而至不然則已蹙故魯人將有事於上帝必先有事於頽宮晉人將有事於河必先有事於黑池齊人將有事於泰山必先有事於配林三月繫七日戒三日宿慎之至也○故禮有擯詔樂有相步溫之至也禮也者反本脩古不忘其初者也故凶事不詔朝事以樂醴酒之用玄酒之尙割刀之用鸞刀之貴莞簞之安而藁鞞之設是故先王之制禮也必有主也故可述而多學也○君子曰無節於內者觀物弗之察矣欲察物而不由禮弗之得矣故作事不以禮弗之敬矣出言不以禮弗

之信矣故曰禮也者物之致也○是故昔先王之制禮也因其財物而致其義焉爾故作大事必順天時爲朝夕必放於日月爲高必因丘陵爲下必因川澤是故天時雨澤君子達疊疊焉○是故昔先王尙有德尊有道任有能舉賢而置之聚衆而誓之是故因天事天因地事地因名山升中于天因吉土以饗帝于郊升中于天而鳳凰降龜龍假饗帝於郊而風雨節寒暑時是故聖人南面而立而天下大治○天道至教聖人至德廟堂之上疊尊在阼犧尊在西廟堂之下縣鼓在西應鼓在東君在阼夫人在房大明生於東月生於西此陰陽之分夫婦之位也○君西酌犧象夫人東酌罍尊禮交動乎上樂交應乎下和之至也○禮也者反其所自生樂也者樂其所自成是故先王之制禮也以節事脩樂以道志故觀其禮樂而治亂可知也蘧伯玉曰君子之人達故觀其器而知其工之巧觀其發而知其人之知故曰君子慎其所以與人者○太廟之內敬矣君親牽牲大夫贊幣而從君親制祭夫人薦盞君親割牲夫人薦酒卿大夫從君命婦從夫人洞洞乎其敬也屬屬乎其忠也勿勿乎其欲其饗之也納牲詔於庭血毛詔於室羹定詔於堂三詔皆不同位蓋道求而未之

得也設祭於堂爲勗乎外故曰於彼乎於此乎○一獻質三獻文五獻祭七獻神○大饗其王事與三牲魚腊四海九州之美味也籩豆之薦四時之和氣也內金示和也束帛加璧尊德也龜爲前列先知也金次之見情也丹漆絲纁竹箭與衆共財也其餘無常貨各以其國之所有則致遠物也其出也肆夏而送之蓋重禮也○祀帝於郊敬之至也宗廟之祭仁之至也喪禮忠之至也備服器仁之至也賓客之用幣義之至也故君子欲觀仁義之道禮其本也君子曰甘受和白受采忠信之人可以學禮苟無忠信之人則禮不虛道是以得其人之爲貴也○孔子曰誦詩三百不足以一獻一獻之禮不足以大饗大饗之禮不足以大旅大旅具矣不足以饗帝毋輕議禮○子路爲季氏宰季氏祭逮闇而祭日不足繼之以燭雖有強力之容肅敬之心皆倦怠矣有司跛倚以臨祭其爲不敬大矣他日祭子路與室事交乎戶堂事交乎階質明而始行事晏朝而退孔子聞之曰誰謂由也而不知禮乎

郊特牲

郊特牲而社稷大牢天子適諸侯諸侯膳用犢諸侯適天子天子賜之禮大牢貴誠

之義也故天子牲孕弗食也祭帝弗用也大路繁纒一就先路三就次路五就郊血大饗腥三獻爛一獻孰至敬不饗味而貴氣臭也諸侯爲賓瀼用鬱鬯瀼用臭也大饗尚賤脩而已矣○大饗君三重席而酢焉三獻之介君專席而酢焉此降尊以就卑也○饗禘有樂而食嘗無樂陰陽之義也凡飲養陽氣也凡食養陰氣也飲春禘而秋嘗春饗孤子秋食耆老其義一也而食嘗無樂飲養陽氣也故有樂食養陰氣也故無聲凡聲陽也○鼎俎奇而籩豆偶陰陽之義也籩豆之實水土之品也不敢用麩味而貴多品所以交於日明之義也○賓入大門而奏肆夏示易以敬也卒爵而樂闋孔子屢歎之奠酬而工升歌發德也歌者在上匏竹在下貴人聲也樂由陽來者也禮由陰作者也陰陽和而萬物得○旅幣無方所以別土地之宜而節遠邇之期也龜爲前列先知也以鐘次之以和居參之也虎豹之皮示服猛也束帛加璧往德也○庭燎之百由齊桓公始也大夫之奏肆夏也由趙文子始也○朝覲大夫之私覲非禮也大夫執圭而使所以申信也不敢私覲所以致敬也而庭實私覲何爲乎諸侯之庭爲人臣者無外交不敢貳君也○大夫而饗君非禮也大夫強而君

殺之義也由三桓始也天子無客禮莫敢爲主焉君適其臣升自阼階不敢有其室也親禮天子不下堂而見諸侯下堂而見諸侯天子之失禮也由夷王以下○諸侯之宮縣而祭以白牡擊玉磬朱子設錫冕而舞大武乘大路諸侯之僭禮也臺門而旅樹反坫繡黼丹朱中衣大夫之僭禮也故天子徵諸侯僭大夫強諸侯脅於此相貴以等相覲以貨相賂以利而天下之禮亂矣諸侯不敢祖天子大夫不敢祖諸侯而公廟之設於私家非禮也由三桓始也○天子存二代之後猶尊賢也尊賢不過二代諸侯不臣寓公故古者寓公不繼世○君之南鄉蒼陽之義也臣之北而蒼君也○大夫之臣不稽首非尊家臣以辟君也大夫有獻弗親君有賂而不拜爲君之吝已也○鄉人禴孔子朝服立于阼存室神也○孔子曰射之以樂也何以聽何以射孔子曰士使之射不能則辭以疾縣弧之義也孔子曰三日齊一日用之猶恐不敬二日伐鼓何居○孔子曰繹之於庫門內飭之於東方朝市之於西方失之矣○社祭土而主陰氣也君南鄉於北墉下蒼陰之義也日用甲用日之始也天子大社必受霜露風雨以達天地之氣也是故喪國之社屋之不受天陽也薄社北牖使陰

明也社所以神地之道也地載萬物天垂象取財於地取法於天是以尊天而親地也故教民美報焉家主中霤而國主社示本也唯爲社事單出里唯爲社田國人畢作唯社丘乘共粢盛所以報本反始也○季春出火爲焚也然後簡其車賦而歷其卒伍而君親誓社以習軍旅左之右之坐之起之以觀其習變也而流示之禽而鹽諸利以觀其不犯命也求服其志不貪其得故以戰則克以祭則受福○天子適四方先柴

郊之祭也迎長日之至也大報天而主日也兆於南郊就陽位也掃地而祭於其質也器用陶匏以象天地之性也於郊故謂之郊牲用騂尙赤也用犢貴誠也郊之用辛也周之始郊日以至卜郊受命于祖廟作龜于禰宮尊祖親考之義也卜之日王立于澤親聽誓命受教諫之義也獻命庫門之內戒百官也大廟之命戒百姓也祭之日王皮弁以聽祭報示民嚴上也喪者不哭不敢凶服汜埽反道鄉爲田燭弗命而民聽上祭之日王被袞以象天戴冕璪十有二旒則天數也乘素車貴其質也旂十有二旒龍章而設日月以象天也天垂象聖人則之郊所以明天道也帝牛不吉

以爲稷牛帝牛必在滌三月稷牛唯具所以別事天神與人鬼也萬物本乎天人本乎祖此所以配上帝也郊之祭也大報本反始也○天子大蜡八伊耆氏始爲蜡蜡也者索也歲十二月合聚萬物而索饗之也蜡之祭也主先嗇而祭司嗇也祭百種以報嗇也饗農及郵表囓禽獸仁之至義之盡也古之君子使之必報之迎貓爲其食田鼠也迎虎爲其食田豕也迎而祭之也祭坊與水庸事也曰土反其宅水歸其壑昆蟲毋作草木歸其澤皮弁素服而祭素服以送終也葛帶榛杖喪殺也蜡之祭仁之至義之盡也黃衣黃冠而祭息田夫也野夫黃冠黃冠草服也○大羅氏天子之掌鳥獸者也諸侯貢屬焉草笠而至尊野服也羅氏致鹿與女而詔客告也以戒諸侯曰好田好女者亡其國天子樹瓜華不斂藏之種也八蜡以記四方四方年不順成八蜡不通以謹民財也順成之方其蜡乃通以移民也既蜡而收民息已故既蜡君子不興功○恆豆之菹水草之和氣也其醢陸產之物也加豆陸產也其醢水物也籩豆之薦水土之品也不敢用常褻味而貴多品所以交於神明之義也非食味之道也先王之薦可食也而不可者也卷冕路車可陳也而不可好也武壯而不

可樂也宗廟之威而不可安也宗廟之器可用也而不可便其利也所以交於神明者不可以同於所安樂之義也酒醴之美玄酒明水之尚貴五味之本也黼黻文織之美疏布之尚反女功之始也莞簟之安而蒲越棄鞞之尚明之也大羹不和貴其質也大圭不琢美其質也丹漆雕幾之美素車之乘尊其樸也貴其質而已矣所以交於神明者不可同於所安樂之甚也如是而后宜鼎俎奇而籩豆偶陰陽之義也黃目鬱氣之上尊也黃者中也目者氣之清明者也言酌於中而清明於外也祭天掃地而祭焉於其質而已矣醯醢之美而煎鹽之尚貴天產也割刀之用而鸞刀之貴貴其義也聲和而后斷也○冠義始冠之緇布之冠也大古冠布齊則緇之其緌也孔子曰吾未之聞也冠而敝之可也適子冠於阼以著代也醯於客位加有成也三加彌尊喻其志也冠而字之敬其名也委貌周道也章甫殷道也毋追夏后氏之道也周弁殷冔夏收三王共皮弁素積無大夫冠禮而有其昏禮古者五十而后爵何大夫冠禮之有諸侯之有冠禮夏之未造也天子之元子士也天下無生而貴者也繼世以立諸侯象賢也以官爵人德之殺也死而諡今也古者生無爵死無諡禮

之所尊尊其義也失其義陳其數祝史之事也故其數可陳也其義難知也知其義而敬守之天子之所以治天下也○天地合而后萬物興焉夫昏禮萬世之始也取於異姓所以附遠厚別也幣必誠辭無不腆告之以直信信事人也信婦德也壹與之齊終身不改故夫死不嫁男子親迎男先於女剛柔之義也天先乎地君先乎臣其義一也執摯以相見敬章別也男女有別然後父子親父子親然後義生義生然後禮作禮作然後萬物安無別無義禽獸之道也壻親御授綏親之也親之也者親之也敬而親之先王之所以得天下也出乎大門而先男帥女女從男夫婦之義由此始也婦人從人者也幼從父兄嫁從夫夫死從子夫也者夫也夫也者以知帥人者也玄冕齊戒鬼神陰陽也將以爲社稷主爲先祖後而可以不致敬乎共牢而食同尊卑也故婦人無爵從夫之爵坐以夫之齒器用陶匏尙禮然也三王作牢用陶匏厥明婦盥饋舅姑卒食婦餽餘私之也舅姑降自西階婦降自阼階授之室也昏禮不用樂幽陰之義也樂陽氣也昏禮不賀人之序也○有虞氏之祭也尙用氣血腥爛祭用氣也○殷人尙聲臭味未成滌蕩其聲樂三闋然後出迎牲聲音之號所

以詔告於天地之間也周人尙臭灌用鬯臭鬱合鬯臭陰達於淵泉灌以圭璋用玉氣也既灌然後迎牲致陰氣也蕭合黍稷臭陽達於牆屋故既奠然後燔蕭合羶薌凡祭慎諸此魂氣歸于天形魄歸于地故祭求諸陰陽之義也殷人先求諸陽周人先求諸陰詔祝於室坐尸於堂用牲於庭升首於室直祭祝于主索祭祝于祊不知神之所在於彼乎於此乎或諸遠人乎祭于祊尙曰求諸遠者與祊之爲言倥也肝之爲言敬也富也者福也首也者直也相饗之也楫長也大也尸陳也毛血告幽全之物也告幽全之物者貴純之道也血祭盛氣也祭肺肝心貴氣主也祭黍稷加肺祭齊加明水報陰也取脾膋燔燎升首報陽也明水浼齊貴新也凡浼新之也其謂之明水也由主人之絜著此水也君再拜稽首肉袒親割敬之至也敬之至也服也拜服也稽首服之甚也肉袒服之盡也祭稱孝孫孝子以其義稱也稱曾孫某謂國家也祭祀之相主人自致其敬盡其嘉而無與讓也腥肆爛臠祭豈知神之所饗也主人自盡其敬而已矣舉犂角詔妥尸古者尸無事則立有事而后坐也尸神象也祝將命也縮酌用茅明酌也醑酒浼于清汁獻浼于醑酒猶明清與醑酒于舊澤之

酒也祭有所焉有報焉有由辟焉齊之玄也以陰幽思也故君子三日齋必見其所祭者

內則

后王命冢宰降德于衆兆民○子事父母雞初鳴咸盥櫛縱笄總拂髦冠綏纓端韞紳搢笏左右佩用左佩紛帨刀礪小觶金燧右佩玦捍管籥大觶木燧偃履著綦○婦事舅姑如事父母雞初鳴咸盥櫛縱笄總衣紳左佩紛帨刀礪小觶金燧右佩箴管線纒施繁褻大觶木燧衿纓綦屨以適父母舅姑之所及所下氣怡聲問衣煖寒疾痛苛癢而敬抑搔之出入則或先或後而敬扶持之進盥少者奉槃長者奉水請沃盥盥卒授巾問所欲而敬進之柔色以溫之饘醢酒醴芼羹菽麥蕡稻黍粱稊唯所欲棗栗飴蜜以甘之葦苴粉榆兔蕪滫瀡以滑之脂膏以膏之父母舅姑必嘗之而后退○男女未冠笄者鷄初鳴咸盥櫛縱拂髦總角衿纓皆佩容臭味爽而朝問何食飲矣若已食則退若未食則佐長者視具○凡內外鷄初鳴咸盥櫛衣服斂枕簟灑掃室堂及庭布席各從其事○孺子蚤寢晏起唯所欲食無時○由命

士以上父子皆異宮味爽而朝慈以旨甘日出而退各從其事日入而夕慈以旨甘
○父母舅姑將坐奉席請何鄉將衽長者奉席請何趾少者執牀與坐御者舉几斂
席與簾縣衾篋枕斂篋而獨之○父母舅姑之衣衾篋席枕几不傳杖屨祇敬之勿
敢近敦牟卮匱非餽莫敢用與恆食飲非餽莫之敢飲食○父母在朝夕恆食子婦
佐餽既食恆餽父沒母存冢子御食羣子婦佐餽如初旨甘柔滑孺子餽○在父母
舅姑之所有命之應唯敬對進退周旋慎齊升降出入揖遊不敢噓噫咳欠伸跛
倚睇視不敢唾洩寒不敢襲癢不敢搔不有敬事不敢袒裼不涉不擗褻衣衾不見
裏父母唾洩不見冠帶垢和灰請漱衣裳垢和灰請澣衣裳綻裂紐箴請補綴五日
則燂湯請浴三日具沐其間面垢燂潘請澣足垢燂湯請洗少事長賤事貴共帥時
○男不言內女不言外非祭非喪不相授器其相授則女受以篋其無篋則皆坐奠
之而后取之外內不共井不共瀉浴不通寢席不通乞假男女不通衣裳內言不出
外言不入男子入內不嘯不指夜行以燭無燭則止女子出門必擁蔽其面夜行以
燭無燭則止道路男子由右女子由左子婦孝者敬者父母舅姑之命勿逆勿怠若

飲食之雖不嘗必嘗而待加之衣服雖不欲必服而待加之事人代之已雖弗欲姑與之而姑使之而後復之子婦有勤勞之事雖甚愛之姑縱之而寧數休之子婦未孝未敬勿庸疾怨姑教之若不可教而後怒之不可怒子放婦出而不表禮焉父母有過下氣怡色柔聲以諫諫若不入起敬起孝說則復諫不說與其得罪於鄉黨州閭寧執諫父母怒不說而撻之流血不敢疾怨起敬起孝父母有婢子若庶子庶孫甚愛之雖父母沒沒身敬之不衰子有二妾父母愛一人焉子愛一人焉由衣服飲食由執事毋敢視父母所愛雖父母沒不衰子甚宜其妻父母不說出子不宜其妻父母曰是善事我子行夫婦之禮焉沒身不衰父母雖沒將爲善思貽父母名必果將爲不善思貽父母羞辱必不果○舅沒則姑老冢婦所祭祀賓客每事必請於姑介婦請於冢婦舅姑使冢婦毋息不友無禮於介婦舅姑若使介婦毋敢敵耦於冢婦不敢並行不敢並命不敢並坐凡婦不命適私室不敢退婦將有事大小必請於舅姑子婦無私貨無私畜無私器不敢私假不敢私與婦或賜之飲食衣服布帛佩帨茵蘭則受而獻諸舅姑舅姑受之則喜如新受賜若反賜之則辭不得命如更

受賜藏以待乏婦若有私親兄弟將與之則必復請其故賜而后與之○適子庶子祇事宗子宗婦○雖貴富不敢以貴富入宗子之家雖衆車徒舍于外以寡約入子弟猶歸器衣服裘衾車馬則必獻其上而后敢服用其次也若非所獻則不敢以入於宗子之門不敢以貴富加於父兄宗族若富則具二牲獻其賢者於宗子夫婦皆齊而宗敬焉終事而后敢私祭○飯黍稷稻粱白黍黃粱稻稊膳臠臠醢醢牛炙醢牛載醢牛膾羊炙羊載醢豕炙醢豕載芥醬魚脯雉兔鷄○飲重醴稻醴清糟黍醴清糟粱醴清糟或以醢爲醴黍醢漿水醢濫○酒清白○羞糗餌粉醢○食蝸醢而苽食雉羹麥食脯羹雞羹析稌犬羹兔羹和糝不蓼濡豚包苦實蓼濡雞醢醬實蓼濡魚卵醬實蓼濡醢醢醬實蓼股脩蚺醢脯羹兔醢麋膚魚醢魚膾芥醬麋醢醬桃諸梅諸卵鹽○凡食齊視春時羹齊視夏時醬齊視秋時飲齊視冬時○凡和春多酸夏多苦秋多辛冬多鹹調以滑甘○牛宜稌羊宜黍豕宜稷犬宜粱厲宜麥魚宜苽○春宜羔豚膳膏臠夏宜牝鱸膳膏臊秋宜犢豕膳膏腥冬宜鮮羽脯膏膾○牛脩鹿脯田豕脯麋脯鸕脯麋鹿田豕醬皆有軒雉兔皆有芼爵鷄蝸范芝栭菹

棋棗栗榛柿瓜桃李梅杏楂梨薑桂○大夫燕食有膾無脯有脯無膾士不貳蔬哉庶人者老不徒食

膾春用葱秋用芥豚春用韭秋用蓼脂用葱膏用蕪三牲用藪和用醢獸用梅鶩羹雞羹鴛醜之蓼魴鱖烝雞燒雉薺無蓼○不食醢鼈狼去腸狗去腎狸去正腎兔去尻狐去首豚去腦魚去乙鼈去醜○肉曰脫之魚曰作之棗曰新之栗曰撰之桃曰膽之相梨曰攢之○牛夜鳴則廋羊冷毛而彘羶狗赤股而躁躁烏醜色而沙鳴鬱豕望視而交睫腥馬黑脊而般臂漏雞尾不盈握弗食舒鴈翠鴝鴉肝舒兔翠雞肝鴈腎鴝奧鹿胃○肉腥細者爲膾大者爲軒或曰麋鹿魚爲菹醬爲辟雞野豕爲軒兔爲宛脾切葱若薤實諸醢以柔之○羹食自諸侯以下至於庶人無等大夫無秩膳大夫七十而有閣天子之閣左達五右達五公侯伯於房中五大夫於閣三士於坵一○凡養老有虞氏以燕禮夏后氏以饗禮殷人以食禮周人脩而兼用之凡五十養於鄉六十養於國七十養於學達於諸侯八十拜君命一坐再至髻亦如之九十者使人受五十異粳六十宿肉七十二膳八十常珍九十飲食不違寢膳飲從於

遊可也六十歲制七十時制八十月制九十日脩唯絞衿衾冒死而后制五十始衰六十非肉不飽七十非帛不煖八十非人不煖九十雖得人不煖矣五十杖於家六十杖於鄉七十杖於國八十杖於朝九十者天子欲有周焉則就其室以珍從七十不俟朝八十月告存九十日有秩五十不從力政六十不與服戎七十不與賓客之事八十齊喪之事弗及也五十而爵六十不親學七十致政凡自七十以上唯衰麻爲喪凡三王養老皆引年八十者一子不從政九十者其家不從政譬亦如之凡父母在子雖老不坐有虞氏養國老於上庠養庶老於下庠夏后氏養國老於東序養庶老於西序殷人養國老於右學養庶老於左學周人養國老於東膠養庶老於虞庠虞庠在國之西郊有虞氏皇而祭深衣而養老夏后氏收而祭燕衣而養老殷人尋而祭縞衣而養老周人冕而祭玄衣而養老○曾子曰孝子之養老也樂其心不違其志樂其耳目安其寢處以其飲食忠養之孝子之身終終身也者非終父母之身終其身也是故父母之所愛亦愛之父母之所敬亦敬之至於犬馬盡然而況於人乎凡養老五帝憲三王有乞言五帝憲養氣體而不乞言有善則記之爲惇史三

王亦憲既養老而后乞言亦微其禮皆有傳史○淳熬煎醢加于陸稻上沃之以膏曰淳熬淳母煎醢加于黍食上沃之以膏曰淳母炮取豚若將刳之刳之實棗於其腹中編萑以苴之塗之以謹塗炮之塗皆乾擘之濯手以摩之去其醜爲稻粉橙洩之以爲醢以付豚煎諸膏膏必滅之鉅鑊湯以小鼎薺脯於其中使其湯毋滅鼎三日三夜毋絕火而后調之以醢醢○擣珍取牛羊麋鹿麇之肉必豚每物與牛若一捶反側之去其餌孰出之去其醜柔其肉○漬取牛肉必新殺者薄切之必絕其理滿諸美酒期朝而食之以醢若醢醢○爲熬捶之去其醜編萑布牛肉焉屑桂與薑以酒諸上而鹽之乾而食之施羊亦如之施麋施鹿施麇皆如牛羊欲濡肉則釋而煎之以醢欲乾肉則捶而食之○糝取牛羊豕之肉三如一小切之與稻米稻米二肉一合以爲餌煎之○肝骨取狗肝一幪之以其骨濡炙之舉燠其骨不蓼取稻米舉糝洩之小切狼臠膏以與稻米爲醢○禮始於謹夫婦爲宮室辨外內男子居外女子居內深宮固門閤寺守之男不入女不出男女不同櫛櫛不敢縣於夫之揮櫛不敢藏於夫之篋笥不敢共湑浴夫不在斂枕篋簟席褥器而藏之少事長賤事貴

咸如之夫婦之禮唯及七十同藏無間故妾雖老年未滿五十必與五日之御將御者齊漱澣慎衣服櫛篦筭總角拂髮衿纓綦屨雖婢妾衣服飲食必後長者妻不在妾御莫敢當夕○妻將生子及月辰居側室夫使人日再問之作而自問之妻不敢見使姆衣服而對至于子生夫復使人日再問之夫齊則不入側室之門子生男子設弧於門左女子設輓於門右三日始負子男射女否○國君世子生告子君接以大牢宰掌具三日卜士負之吉者宿齊朝服寢門外詩負之射人以桑弧蓬矢六射天地四方保受乃負之宰醴負子賜之束帛卜士之妻大夫之妾使食子○凡接子擇日冢子則大牢庶人特豚士特豕大夫少牢國君世子大牢其非冢子則皆降一等○異爲孺子室於宮中擇於諸母與可者必求其寬裕慈惠溫良恭敬慎面寡言者使爲子師其次爲慈母其次爲保母皆居子室他人無事不往三月之末擇日翦髮爲髻男角女羈否則男左女右是日也妻以子見於父貴人則爲衣服由命士以下皆漱澣男女夙興沐浴衣服具視朔食夫入門升自阼階立于阼西鄉妻抱子出白房當楣立東面姆先相曰母某敢用時日祇見孺子夫對曰欽有帥父執子之右

手咳而名之妻對日記有成遂左還授師手師辯告諸婦諸母名妻遂適寢夫告宰
名宰辯告諸男名書曰某年某月某日某生而藏之宰告閭史閭史書爲二其一藏
諸閭府其一獻諸州史州史獻諸州伯州伯命藏諸州府夫人食如養禮○世子生
則君沐浴朝服夫人亦如之皆立于阼階而鄉世婦抱子升自西階君名之乃降適
子庶子見於外寢撫其首咳而名之禮帥初無辭○凡名子不以日月不以國不以
隱疾大夫士之子不敢與世子同名妾將生子及月辰夫使人日一問之子生三月
之末漱澣夙齊見於內寢禮之如始入室君已食徹焉使之特餼遂入御○公席子
生就側室三月之末其母沐浴朝服見於君擯者以其子見君所有賜君名之衆子
則使有司名之○庶人無側室者及月辰夫出居羣室其問之也與子見父之禮無
以異也凡父在孫見於祖祖亦名之禮如子見父無辭○食子者三年而出見於公
宮則劬大夫之子有食母士之妻自養其子○由命士以上及大夫之子旬而見冢
子未食而見必執其右手適子庶子已食而見必循其首○子能食食教以右手能
言男唯女僉男鞶革女鞶絲六年教之數與方名七年男女不同席不共食八年出

入門戶及卽席飲食必後長者始教之讓九年教之數日十年出就外傅居宿於外學書計衣不帛襦袴禮帥初朝夕學幼儀請肄簡諒十有三年學樂誦詩舞勺成童舞象學射御二十而冠始學禮可以衣裘帛舞大夏惇行孝弟博學不教內而不出三十而有室始理男事博學無方孫友視志四十始仕方物出謀發慮道合則服從不可則去五十命爲大夫服官政七十致事○凡男拜尙左手○女子十年不出姆教婉婉聽從執麻桌治絲繭織紵組紃學女事以共衣服觀於祭祀納酒漿籩豆菹醢禮相助奠十有五年而笄二十而嫁有故二十三年而嫁聘則爲妻奔則爲妾凡女拜尙右手

玉藻

天子玉藻十有二旒前後邃延龍卷以祭玄端而朝日於東門之外聽朔於南門之外閏月則闔門左扉立于其中皮弁以日視朝遂以食日中而餽奏而食日少牢朔月大半五飲上水漿酒醴醢卒食玄端而居動則左史書之言則右史書之御醫幾聲之上下年不順成則天子素服乘素車食無樂○諸侯玄端以祭裨冕以朝皮弁

以聽朔於大廟朝服以日視朝於內朝朝辨色始入君日出而視之退適路寢聽政使人視大夫大夫退然後適小寢釋服又朝服以食特性三俎祭肺夕深衣祭牛肉朔月少牢五俎四簋子卯稷食菜羹夫人與君同庖君無飲不殺牛大夫無故不殺羊士無故不殺犬豕君子遠庖廚凡有血氣之類弗身踐也至于八月不雨君不舉年不順成君衣布摺本關梁不租山澤列而不賦土功不興大夫不得造車馬○卜人定龜史定墨君定體○君羔幣虎犢大夫齊車鹿幣豹植朝車士齊車鹿幣豹植○君子之居恆當戶寢恆東首若有疾風迅雷甚雨則必變雖夜必興衣服冠而坐日五盥沐稷而饋梁櫛用櫛櫛髮晞用象櫛進襪進羞工乃升歌浴用二巾上絰下綌出杆履剗席連用湯履蒲席衣布晞身乃寢進飲將適公所宿齋戒居外寢沐浴史進象笏書思對命既服習容觀玉聲乃出揖私朝輝如也登車則有光矣天子摺筴方正於天下也諸侯茶前誦後直讓於天子也大夫前誦後誦無所不讓也○侍坐則必退席不退則必引而去君之黨登席不由前爲躐席徒坐不盡席尺讀書食則齊豆去席尺○若賜之食而君客之則命之祭然後祭先飯辯嘗羞飲而俟若有

嘗羞者則俟君之食然後食飯飲而俟君命之羞羞近者命之品嘗之然後唯所欲
凡嘗遠食必順近食君未覆手不敢煖君既食又飯煖飯煖者三飯也君既徹執飯
與醬乃出授從者○凡侑食不盡食食於人不飽唯水醬不祭若祭爲己俵卑○君
若賜之爵則越席再拜稽首受登席祭之飲卒爵而俟君卒爵然後授虛爵君子之
飲酒也受一爵而色洒如也二爵而言言斯禮已三爵而油油以退退則坐取履隱
辟而后屣坐左納右坐右納左○凡尊必上玄酒唯君而尊唯饗野人皆酒大夫側
尊用櫛士側尊用禁○始冠緇布冠自諸侯下達冠而敝之可也玄冠朱組纓天子
之冠也緇布冠纁綌諸侯之冠也玄冠丹組纓諸侯之齊冠也玄冠葦組纓士之齊
冠也縞冠玄武子姓之冠也縞冠素紕既祥之冠也垂綌五寸惰游之士也玄冠縞
武不齒之服也居冠屬武自天子下達有事然後綌五十不散送親沒不髻大帛不
綌玄冠紫綌自魯桓公始也○朝玄端夕深衣深衣三袪縫齊倍要衽當旁袂可以
回肘長中繼揜尺袷二寸袪尺二寸緣廣寸半以帛裏布非禮也士不衣織無君者
不貳采衣正色裳間色非列采不入公門振絺綌不入公門表裘不入公門襲裘不

入公門纓爲繭緼爲袍禪爲絢帛爲褶○朝服之以縞也自季康子始也孔子曰朝服而朝卒朔然後服之曰國家未道則不充其服焉唯君有黼裘以誓省大裘非古也

君衣狐白裘錦衣以裼之君之右虎裘厥左狼裘士不衣狐白君子狐青裘豹褰玄綃衣以裼之麋裘青紵褰絞衣以裼之羔裘豹飾緇衣以裼之狐裘黃衣以裼之錦衣狐裘諸侯之服也犬羊之裘不裼不文飾也不裼裘之裼也見美也弔則襲不盡飾也君在則裼盡飾也服之襲也充美也是故尸襲執玉龜襲無事則裼弗敢充也○笏天子以球玉諸侯以象大夫以魚須文竹士竹本象可也見於天子與射無說笏入大廟說笏非古也小功不說笏當事免則說之既摺必盥雖有執於朝弗有盥矣凡有指畫於君前用笏造受命於君前則書於笏笏舉用也因飾焉笏度二尺有六寸其中博三寸其殺六分而去一而素帶終辟大夫素帶辟垂士練帶率下辟居士錦帶弟子縞帶并紐約用組釋君朱大夫素士爵章圓殺直天子直公侯前後方大夫前方後挫角士前後正釋下廣二尺上廣一尺長三尺其頸五寸肩革帶博二

寸大夫大帶四寸雜帶君朱綠大夫玄華士緇辟二寸再繅四寸凡帶有率無箴功
一命緼韞幽衡再命赤韞幽衡三命赤韞蔥衡天子素帶朱裏終辟王后褱衣夫人
揄狄三寸長齊于帶紳長制士三尺有司二尺有五寸于游曰參分帶下紳居二焉
紳釋結三齊君命屈狄再命褱衣一命褱衣士祿衣唯世婦命於奠醑其他則皆從
男子凡侍於君紳垂足如履齊頤雷垂拱視下而聽上視帶以及袷聽鄉任左凡君
召以三節二節以走一節以趨在官不俟屨在外不俟車○士於大夫不敢拜迎而
拜送士於尊者先拜進面荅之拜則走士於君所言大夫沒矣則稱諡若字名士與
大夫言名士字大夫於大夫所有公諱無私諱凡祭不諱廟中不諱教學臨文不諱
○古之君子必佩玉右徵角左宮羽趨以采齊行以肆夏周還中規折還中矩進則
揖之退則揚之然後玉鏘鳴也故君子在車則聞鸞和之聲行則鳴佩玉是以非辟
之心無自入也○君在不佩玉左結佩右設佩居則設佩朝則結佩齊則精結佩而
爵釋凡帶必有佩玉唯喪否佩玉有衝牙君子無故玉不去身君子於玉比德焉天
子佩白玉而玄組綬公侯佩山玄玉而朱組綬大夫佩水蒼玉而純組綬世子佩瑜

玉而綦織綬士佩瑞玖而縕組綬孔子佩象環五寸而綦組綬○童子之節也縕布衣錦緣錦紳并紐錦束髮皆朱錦也肆束及帶勤者有事則收之走則擁之童子不裘不帛不履絢無總服聽事不麻無事則立主人之北南面見先生從人而入○侍食於先生異爵者後祭先飯客祭主人辭曰不足祭也客餼主人辭以疏主人自置其醬則客自徹之一室之人非賓客一人徹壹食之人一人徹凡燕食婦人不徹○食棗桃李弗致于核瓜祭上環食中弃所操凡食果實者後君子火孰者先君子有慶非君賜不賀有憂者勤者有事則收之走則擁之孔子食於季氏不辭不食肉而餼君賜車馬乘以拜賜衣服服以拜賜君未有命弗敢卽乘服也君賜稽首據掌致諸地酒肉之賜弗再拜凡賜君子與小人不同日○凡獻於君大夫使宰士親皆再拜稽首送之膳於君有鞶桃茹於大夫去茹於士去鞶皆造於膳宰大夫不親拜爲君之荅已也大夫拜賜而退士待諾而退又拜弗荅拜大夫親賜士士拜受又拜於其室衣服弗服以拜敵者不在拜於其室凡於尊者有獻而弗敢以聞士於大夫不承賀下大夫於上大夫承賀親在行禮於人稱父人或賜之則稱父拜之○禮不盛

服不充故大裘不楊乘路車不式○父命呼唯而不諾手執業則投之食在口則吐之走而不趨親老出不易方復不過時親癯色容不盛此孝子之疏節也父沒而不能讀父之書手澤存焉爾母沒而杯圈不能飲焉口澤之氣存焉爾○君人門介拂闈大夫中棖與闈之間士介拂棖○賓入不中門不履闈公事自闈西私事自闈東○君與尸行接武大夫繼武士中武徐趨皆用是疾趨則欲發而手足毋移圈豚行不舉足齊如流席上亦然端行頤雷如矢弁行剡剡起屣執龜玉舉前曳踵踏踏如也○凡行容惕惕○廟中齊齊朝廷濟濟翔翔○君子之容舒遲見所尊者齊遯足容重手容恭目容端口容止聲容靜頭容直氣容肅立容德色容莊坐如尸○燕居告溫溫○凡祭容貌顏色如見所祭者○喪容纍纍色容顛顛視容瞿瞿梅梅言容滿滿○戎容暨暨言容詬詬色容厲肅視容清明立容辨卑毋調頭頸必中山立時行盛氣顛實揚休玉色○凡自稱天子曰予一人伯曰天子之力臣諸侯之於天子曰某土之守臣某其在邊邑曰某屏之臣某其於敵以下曰寡人小國之君曰孤擯者亦曰孤上大夫曰下臣擯者曰寡君之老下大夫自名擯者曰寡大夫世子自名

擯者曰寡君之適公子曰臣孽士曰傳遽之臣於大夫曰外私大夫私事使私人擯則稱名公士擯則曰寡大夫寡君之老大夫有所往必與公士爲賓也

明堂位

昔者周公朝諸侯于明堂之位天子負斧依南鄉面立三公中階之前北面東上諸侯之位阼階之東西面北上諸伯之國西階之面東面北上諸子之國門東北面東上諸男之國門西北面東上九夷之國東門之外西面北上八蠻之國南門之外北面東上六戎之國西門之外東面南上五狄之國北面門之外南面東上九采之國應門之外北面東上四塞世告至此周公明堂之位也明堂也者明諸侯之尊卑也昔殷紂亂天下脯鬼侯以饗諸侯是以周公相武王以伐紂武王崩成王幼弱周公踐天子之位以治天下六年朝諸侯於明堂制禮作樂頒度量而天下大服七年致致於成王成王以周公爲有勳勞於天下是以封周公於曲阜地方七百里革車千乘命魯公世世祀周公以天子之禮樂是以魯君孟春乘大路載弧韜旂十有二旒日月之章祀帝于郊配以后稷天子之禮也○季夏六月以禘禮祀周公於大廟牲用

白牡尊用犧象山罍鬱尊用黃目灌用玉瓚大圭薦用玉豆雕篚爵用玉琖仍雕加以璧散璧角俎用椀巖升歌清廟下管象朱干玉戚冕而舞大武皮弁素積楊而舞大夏味東夷之樂也任南蠻之樂也納夷蠻之樂於大廟言廣魯於天下也○君卷冕立于阼夫人副褱立于房中君肉袒迎牲于門夫人薦豆籩酈大夫贊君命婦贊夫人各揚其職百官廢職服大刑而天下大服○是故夏禘秋嘗冬烝春社秋省而遂大蜡天子之祭也○大廟天子明堂庫門天子皋門雉門天子應門○振木鐸於朝天子之政也○山節藻梲復廟重檐刮楹達鄉反坫出尊崇坫康圭疏屏天干之廟飾也○駕車有虞氏之路也鈎車夏后氏之路也大路殷路也乘路周路也○有虞氏之旂夏后氏之綏殷之大白周之大赤○夏后氏路馬黑鬣殷人白馬黑首周人黃馬蕃鬣○夏后氏牲尚黑殷白牝周騂剛○秦有虞氏之尊也山罍夏后氏之尊也著殷尊也犧象周尊也○爵夏后氏以琖殷以斚周以爵○灌尊夏后氏以雞夷殷以斚周以黃目○其勺夏后氏以龍勺殷以疏勺周以蒲勺○土鼓黃桴鞀箛伊耆氏之樂也拊搏玉磬拊擊大琴大瑟中琴小瑟四代之樂器也○魯公之廟文

世室也武公之廟武世室也○米廩有虞氏之庠也序夏后氏之序也黜宗殷學也
類宮周學也○崇鼎貫鼎大璜封父龜天子之器也越棘大弓天子之戎器也○夏
后氏之鼓足殷楹鼓周縣鼓○垂之和鍾叔之離磬女媧之笙璜○夏后氏之龍箏
虞殷之崇牙周之璧鬻有虞氏之兩敦夏后氏之四連殷之六瑚周之八簋○俎有
虞氏以梲夏后氏以嶷殷以楨周以房俎○夏后氏以楛豆殷玉豆周獻豆○有虞
氏服韍夏后氏山殷火周龍章○有虞氏祭首夏后氏祭心殷祭肝周祭肺○夏后
氏尚明水殷尚醴周尚酒○有虞氏官五十夏后氏官百殷二百周三百有虞氏之
綏夏后氏之綢練殷之崇牙周之璧鬻凡四代之服器官魯兼用之是故魯王禮也
天下傳之久矣君臣未嘗相弑也禮樂刑法政俗未嘗相變也天下以爲有道之國
是故天下資禮樂焉

喪服小記

斬衰括髮以麻爲母括髮以麻免而以布齊衰惡筭以終喪男子冠而婦人笄男子
免而婦人髻其義爲男子則免爲婦人則髻○苴杖竹也削杖桐也○祖父卒而后

爲祖母後者三年○爲父母長子稽顙大夫弔之雖總必稽顙婦人爲夫與是子稽顙其餘則否○男主必使同姓婦主必使異姓○爲父後者爲出母無服○親親以三爲五以五爲九上殺下殺旁殺而親畢矣○王者禘其祖之所自出以其祖配之而立四廟庶子王亦如之○別子爲祖繼別爲宗繼禰者爲小宗有五世而遷之宗其繼高祖者也是故祖遷於上宗易於下尊祖故敬宗敬宗所以尊祖禰也庶子不祭祖者明其宗也庶子不爲是子斬不繼祖與禰故也庶子不祭殤與無後者殤與無後者從祖祔食○庶子不祭禰者明其宗也○親親尊尊長長男女之有別人道之大者也○從服者所從亡則已屬從者所從雖沒也服妾從女君而出則不爲女君之子服○禮不王不禘○世子不降妻之父母其爲妻也與大夫之適子同○父爲士子爲天子諸侯則祭以天子諸侯其尸服以士服父爲天子諸侯子爲士祭以士其尸服以士服○婦當喪而出則除之爲父母喪未練而出則三年既練而出則已未練而反則期既練而反則遂之○再期之喪三年也期之喪二年也九月七月之喪三時也五月之喪二時也三月之喪一時也故期而祭禮也期而除喪道也祭

不爲除喪也三年而后葬者必再祭其祭之間不同時而除喪大功者主人之喪有三年者則必爲之再祭朋友虞祔而已士妾有子而爲之總無子則已生不及祖父母諸父昆弟而父稅喪已則否爲君之父母妻長子君已除喪而后聞喪則不稅降而在總小功者則稅之近臣君服斯服矣其餘從而服不從而稅君雖未知喪臣服已

虞杖不入於室祔杖不升於堂○爲君母後者君母卒則不爲君母之黨服○經殺五分而去一杖大如絰○妾爲君之長子與女君同除喪者先重者易服者易輕者無事不辟廟門哭皆於其次○復與書銘自天子達於士其辭一也男子稱名婦人書姓與伯仲如不知姓則書氏○斬衰之葛與齊衰之麻同齊衰之葛與大功之麻同○報葬者報虞三月而後卒哭○父母之喪偕先葬者不虞祔待後事其葬服斬衰○大夫降其庶子其孫不降其父大夫不主士之喪○爲慈母之父母無服○夫爲人後者其妻爲舅姑大功○士祔於大夫則易牲○繼父不同居也者必嘗同居皆無主後同財而祭其祖禰爲同居有主後者爲異居○哭朋友者於門外之右南

面○祔葬者不篋宅○士大夫不得祔於諸侯祔於諸祖父之爲士大夫者其妻祔於諸祖姑妾祔於妾祖姑亡則中一以上而祔祔必以其昭穆諸侯不得祔於天子天子諸侯大夫可以祔於士○爲母之君母母卒則不服○宗子母在爲妻禫○爲慈母後者爲庶母可也爲祖庶母可也○爲父母妻長子禫○慈母與妾母不世祭也○丈夫冠而不爲孀婦人笄而不爲孀○爲孀後者以其服服之○久面不葬者唯主喪者不除其餘以麻終月數者除喪則已○箭笄終喪三年齊衰三月與大功同者繩屨○練篋日篋尸視濯皆要絰杖繩屨有司告具而后去杖篋日篋尸有司告事畢而后杖拜送賓大祥吉服而篋尸○庶子在父之室則爲其母不禫庶子不以杖卽位父不主庶子之喪則孫以杖卽位可也父在庶子爲妻以杖卽位可也○諸侯弔於異國之臣則其君爲主○諸侯弔必皮弁錫衰所弔雖已葬主人必免主人未喪服則君亦不錫衰○養有疾者不喪服遂以主其喪非養者入主人之喪則不易己之喪服養尊者必易服養卑者否○妾無妾祖姑者易牲而祔於女君可也○婦之喪虞卒哭其夫若子主之祔則舅主之士不攝大夫士攝大夫唯宗子主人

未除喪有兄弟自他國至則主人不免而爲主陳器之道多陳之而省納之可也省陳之而盡納之可也○奔兄弟之喪先之墓而後之家爲位而哭所知之喪則哭於宮而后之墓○父不爲衆子次於外與諸侯爲兄弟者服斬下殤小功帶澡麻不絕本誦而反以報之婦祔於祖姑祖姑有三人則祔於親者○其妻爲大夫而卒而后其夫不爲大夫而祔於其妻則不易牲妻卒而后夫爲大夫而祔於其妻則以大夫牲○爲父後者爲出母無服無服也者喪者不祭故也○婦人不爲主而杖者姑在爲夫杖母爲長子削杖女子子在室爲父母其主喪者不杖則于一人杖○總小功虞卒哭則免既葬而不報虞則雖主人皆冠及虞則皆免爲兄弟既除喪已及其葬也反服其服報虞卒哭則免如不報虞則除之遠葬者比反哭者皆冠及郊而后免反哭君弔雖不當免時也主人必免不散麻雖異國之君免也親者皆免除殤之喪者其祭也必玄○除成喪者其祭也朝服縞冠○奔父之喪括髮於堂上袒降踊襲經于東方奔母之喪不括髮袒於堂上降踊襲免于東方經卽位成踊出門哭止三日而五哭三袒○適婦不爲舅後者則姑爲之小功

大傳

禮不王不禘王者禘其祖之所自出以其祖配之諸侯及其大祖大夫士有大事省於其君干祿及其高祖牧之野武王之大事也既事而退柴於上帝祈於社設奠於牧室遂率天下諸侯執豆籩遠奔走追王大王亶父王季歷文王昌不以卑臨尊也○上治祖禰尊尊也下治子孫親親也旁治昆弟合族以食序以昭繆別之以禮親人道竭矣聖人南面而聽天下所且先者五民不與焉一曰治親二曰報功三曰舉賢四曰使能五曰存愛五者一得於天下民無不足無不贍者五者一物紕繆民莫得其死聖人南面而治天下必自人道始矣立權度量考文章改正朔易屬色殊徽號異器械別衣服此其所得與民變革者也其不可得變革者則有矣親親也尊尊也長長也男女有別此其不可得與民變革者也○同姓從宗合族屬與姓主名治際會名著而男女有別其夫屬乎父道者妻皆母道也其夫屬乎干道者妻皆婦道也謂弟之妻婦者是嫂亦可謂之母乎名者人治之大者也可無慎乎○四世面緦服之窮也五世袒免殺同姓也六世親屬竭矣其庶姓別於上面戚單於下昏姻可

以通乎繫之以姓而弗別綴之以食而弗殊雖百世而昏姻不通者周道然也○服術有六一曰親親二曰尊尊三曰名四曰出入五曰長幼六曰從服○從服有六有屬從有徒從有從有服而無服有從無服而有服有從重而輕有從輕而重○自仁率親等而上之至于祖名曰輕自義率祖順而下之至于禰名曰重一輕一重其義然也○君有合族之道族人不得以其戚戚君位也○庶子不祭明其宗也庶子不得爲長子三年不繼祖也別子爲祖繼別爲宗繼禰者爲小宗有百世不遷之宗有五世則遷之宗百世不遷者別子之後也宗其繼別子之所自出者百世不遷者也宗其繼高祖者五世則遷者也尊祖故敬宗敬宗尊祖之義也○有小宗而無大宗者有大宗而無小宗者有無宗亦莫之宗者公子是也公子有宗道公子之公爲其士大夫之庶者宗其士大夫之適者公子之宗道也○絕族無移服親者屬也○自仁率親等而上之至于祖自義率祖順而下之至於禰是故人道親親也親親故尊祖尊祖故敬宗敬宗故收族收族故宗廟嚴宗廟嚴故重社稷重社稷故愛百姓愛百姓故刑罰中刑罰中故庶民安庶民安故財用足財用足故百志成百志成故禮

俗刑禮俗刑然後樂詩云不願不承無斃於人斯此之謂也

少儀

聞始見君子者辭曰某固願聞名於將命者不得階主適者曰某固願見罕見曰聞名亟見曰朝夕譬曰聞名○適有喪者曰比童子曰聽事適公卿之喪則曰聽役於司徒○君將適他臣如致金玉貨貝於君則曰致馬資於有司敵者曰贈從者○臣致饗於君則曰致廢衣於賈人敵者曰饗親者兄弟不以饗進臣爲君喪納貨貝於君則曰納甸於有司贈馬入廟門賻馬與其幣大白兵車不入廟門○賻者旣致命坐委之擯者舉之主人無親受也○受立授立不坐性之直者則有之矣始人面辭曰辭矣卽席曰可矣排闥說屨於戶內者一人而已矣有尊長在則否○問品味曰子亟食於某乎問道藝曰子習於某乎子善於某乎不疑在躬不度民械不願於大家不訾重器汜埽曰埽埽席前曰拊拊席不以鬣執箕膺搗○不貳問問卜筮曰義與志與義則可問志則否○尊長於已踰等不敢問其年燕見不將命遇於道見則面不請所之喪俟事不植帛侍坐弗使不執琴瑟不畫地手無容不髮也寢則坐而

將命侍射則約矢侍投則擁矢勝則洗而以請客亦如之不角不擢馬○執君之乘車則坐僕者右帶劍負良綏申之面地諸幣以散綏升執轡然後步○請見不請退朝廷曰退燕遊曰歸師役曰罷○侍坐於君子君子欠伸運笏澤劍首還屨問日之蚤莫雖請退可也○事君者量而后入不入而后量凡乞假於人爲人從事者亦然然故上無怨而下遠罪也不窺密不旁狎不道舊故不戲色○爲人臣下者有諫而無訕有亡而無疾頌而無譏諫而無驕怠則張而相之廢則埽而更之謂之社稷之役○毋拔來毋報往毋瀆神毋循枉毋測未至士依於德游於藝工依於法游於說毋嘗衣服成器毋身質言語言語之美穆穆皇皇朝廷之美濟濟翔翔祭祀之美齊齊皇皇車馬之美匪匪翼翼鸞和之美肅肅雍雍○問國君之子長幼長則曰能從社稷之事矣幼則曰能御未能御問大夫之子長幼長則曰能從樂人之事矣幼則曰能正於樂人未能正於樂人問士之子長幼長則曰能耕矣幼則曰能負薪未能負薪○執玉執龜莢不趨堂上不趨城上不趨武車不式介者不拜婦人吉事雖有君賜肅拜爲尸坐則不手拜肅拜爲喪主則不手拜葛經面麻帶取俎進俎不坐○

執虛如執盈。入虛如有人。凡祭於室中堂上，無跣燕，則有之。未嘗不食新。○僕於君子，君子升下則授綏，始乘則式。君子下行，然後還立。○乘貳車，則式。佐車則否。貳車者，諸侯七乘，上大夫五乘，下大夫三乘。有貳車者，之乘馬服車不齒。觀君子之衣服，服劍乘馬，弗買其以乘。壺酒束脩一犬，賜人若獻人，則陳酒執脩。以將命，亦曰乘壺。酒束脩一犬，其以鼎肉，則執以將命。其禽加於一雙，則執一雙。以將命，委其餘。犬則執緹守犬。田犬則授擯者。既受，乃問犬名。牛則執紉，馬則執鞿，皆右之。臣則左之。車則說綏，執以將命。甲若有以前之，則執以將命。無以前之，則袒囊奉冑器。則執蓋弓。則以左手屈，執拊，劍則啓櫝，蓋鬘之加夫襖，與劍焉。笏書脩苞，苴弓茵席枕几，穎杖琴瑟戈有刃者，橫蒺藜，其執之皆尙左手。刀卻刃授穎，削授拊。凡有刺刃者，以授人。則辟刃乘兵車，出先刃入後刃。軍尙左，卒尙右。賓客主恭，祭祀主敬，喪事主哀。會同主詡，軍旅患險，隱情以虞。○燕侍食於君子，則先飯而後已。毋放飯，毋流歎。小飯而亟之，數噍毋爲口容。客自徹辭焉，則止。○客爵居左，其飲居右。介爵酢，爵僕爵皆居右。○羞濡魚者，進尾。冬右腴，夏右膾。祭臠。○凡齊，執之以右，居之以左。○贊幣自

左詔辭自右○酌尸之僕如君之僕其在車則左執轡右受爵祭左右軌范乃飲○凡羞有俎者則於俎內祭君子不食園腴小子走而不趨舉爵則坐祭立飲凡洗必盥牛羊之肺離而不提心凡羞有清者不以齊爲君子擇葱薤則絕其本末羞首者進喙祭耳尊者以酌者之左爲上尊尊壺者而其鼻飲酒者醜者醜者有折俎不坐未步爵不嘗羞○牛與羊魚之腥聶而切之爲膾麋鹿爲菹野豕爲軒皆聶而不切齋爲辟雞兔爲宛脾皆聶而切之切葱若薤實之醢以柔之○其有折俎者取祭肺反之不坐燔亦如之尸則坐○衣服在躬而不知其名爲罔○其未有燭而後至者則以在者告道譬亦然凡飲酒爲獻主者執燭抱燹客作而辭然後以授人執燭不讓不辭不歌洗盥執食飲者勿氣有問焉則辟呬而對○爲人祭曰致福爲己祭而致膳於君子曰膳祔練曰告凡膳告於君子主人展之以授使者于阼階之南南面再拜稽首送反命主人又再拜稽首其禮大牢則以牛左肩臂臠折九箇少牢則以羊左肩七箇植豕則以豕左肩五箇○國家靡敝則車不雕幾甲不組膳食器不刻鏤君子不履絲屨馬不常秣

學記

發慮憲求善良足以諛聞不足以動衆就賢體遠足以動衆未足以化民君子如欲化民成俗其必由學乎○玉不琢不成器人不學不知道是故古之王者建國君民教學爲先兌命曰念終始典于學其此之謂乎雖有嘉肴弗食不知其旨也雖有至道弗學不知其善也是故學然後知不足教然後知困知不足然後能自反也知困然後能自強也故曰教學相長也兌命曰學學半其此之謂乎古之教者家有塾黨有庠術有序國有學比年入學中年考校一年視離經辨志三年視敬業樂羣五年視博習親師七年視論學取友謂之小成九年知類通達強立而不反謂之大成夫然後足以化民易俗近者說服而遠者懷之此大學之道也記曰蛾于時術之其此之謂乎○大學始教皮弁祭菜示敬道也宵雅肄三官其始也入學鼓篋孫其業也夏楚二物收其威也未卜禘不視學游其志也時觀而弗語存其心也幼者聽而弗問學不躐等也此七者教之大倫也記曰凡學官先事士先志其此之謂乎大學之教也時教必有正業退息必有居學不學操縵不能安竝不學博依不能安詩不學

雜服不能安禮不興其藝不能樂學故君子之於學也藏焉脩焉息焉遊焉夫然故安其學而親其師樂其友而信其道是以雖離師輔而不反兌命曰敬孫務時敏厥脩乃來其此之謂乎○今之教者呻其佔畢多其訊言及于數進而不顧其安使人不由其誠教人不盡其材其施之也悖其求之也佛夫然故隱其學而疾其師苦其難而不知其益也雖終其業其去之必速教之不刑其此之由乎大學之法禁於未發之謂豫當其可之謂時不陵節而施之謂孫相觀而善之謂摩此四者教之所由興也○發然後禁則扞格而不勝時過然後學則勤苦而難成雜施而不孫則壞亂而不脩獨學而無友則孤陋而寡聞燕朋逆其師燕辟廢其學此六者教之所由廢也○君子既知教之所由興又知教之所由廢然後可以爲人師也故君子之教喻也道而弗牽強而弗抑開而弗達道而弗牽則和強而弗抑則易開而弗達則思和易以思可謂善喻矣○學者有四失教者必知之人之學也或失則多或失則寡或失則易或失則止此四者心之莫同也知其心然後能救其失也教也者長善而救其失者也善歌者使人繼其聲善教者使人繼其志其言也約而達微而臧罕譬而

喻可謂繼志矣○君子知至學之難易而知其美惡然後能博喻能博喻然後能爲師能爲師然後能爲長能爲長然後能爲君故師也者所以學爲君也是故擇師不可不慎也記曰三王四代唯其師此之謂乎○凡學之道嚴師爲難師嚴然後道尊道尊然後民知敬學是故君之所不臣於其臣者二當其爲尸則弗臣也當其爲師則弗臣也大學之禮雖詔於天子無北面所以尊師也善學者師逸而功倍又從而庸之不善學者師勤而功半又從而怨之善問者如攻堅木先其易者後其節目及其久也相說以解不善問者反此善待問者如撞鐘叩之以小者則小鳴叩之以大者則大鳴待其從容然後盡其聲不善荅問者反此此皆進學之道也○記問之學不足以爲人師必也其聽語乎力不能問然後語之語之而不知雖舍之可也良冶之子必學爲裘良弓之子必學爲箕始駕馬者反之車在馬前君子察於此三者可以有志於學矣○古之學者比物醜類鼓無當於五聲五聲弗得不和水無當於五色五色弗得不章學無當於五官五官弗得不治師無當於五服五服弗得不親○君子曰大德不官大道不器大信不約大時不齊察於此四者可以有志於學矣三

王之祭川也皆先河而後海或源也或委也此之謂務本

樂記

凡音之起由人心生也人心之動物使之然也感於物而動故形於聲聲相應故生變變成方謂之音比音而樂之及干戚羽旄謂之樂樂者音之所由生也其本在人心之感於物也是故其哀心感者其聲噍以殺其樂心感者其聲嘒以緩其喜心感者其聲發以散其怒心感者其聲粗以厲其敬心感者其聲直以廉其愛心感者其聲和以柔六者非性也感於物而后動是故先王慎所以感之者故禮以道其志樂以和其聲政以一其行刑以防其姦禮樂刑政其極一也所以同民心而出治道也凡音者生人心者也情動於中故形於聲聲成文謂之音是故治世之音安以樂其政和亂世之音怨以怒其政乖亡國之音哀以思其民困聲音之道與政通矣宮爲君商爲臣角爲民徵爲事羽爲物五者不亂則無怙懣之音矣宮亂則荒其君驕商亂則陂其官壞角亂則憂其民怨徵亂則哀其事勤羽亂則危其財匱五者皆亂迭相陵謂之慢如此則國之滅亡無日矣鄭衛之音亂世之音也比於慢矣桑間濮上

之音亡國之音也其政散其民流誣上行私而不可止也凡音者生於人心者也樂者通倫理者也是故知聲而不知音者禽獸是也知音而不知樂者衆庶是也唯君子爲能知樂是故審聲以知音審音以知樂審樂以知政而治道備矣是故不知聲者不可與言音不知音者不可與言樂知樂則幾於禮矣禮樂皆得謂之有德德者得也是故樂之隆非極音也食饗之禮非致味也清廟之瑟朱弦而疏越壹倡而三歎有遺音者矣大饗之禮尚玄酒而俎腥魚大羹不和有遺味者矣是故先王之制禮樂也非以極口腹耳目之欲也將以教民平好惡而反人道之正也人生而靜天之性也感於物而動性之欲也物至知知然後好惡形焉好惡無節於內知誘於外不能反躬天理滅矣夫物之感人無窮而人之好惡無節則是物至而人化物也人化物也者滅天理而窮人欲者也於是有悖逆詐僞之心有淫泆作亂之事是故強者脅弱衆者暴寡知者詐愚勇者苦怯疾病不養老幼孤獨不得其所此大亂之道也是故先王之制禮樂人爲之節衰麻哭泣所以節喪紀也鐘鼓干戚所以和安樂也昏姻冠笄所以別男女也射鄉食饗所以正交接也禮節民心樂和民聲政以行

之刑以防之禮樂刑政四達而不悖則王道備矣樂者爲同禮者爲異同則相親異則相敬樂勝則流禮勝則離合情飾貌者禮樂之事也禮義立則貴賤等矣樂文同則上下和矣好惡著則賢不肖別矣刑禁暴爵舉賢則政均矣仁以愛之義以正之如此則民治行矣樂由中出禮自外作樂由中出故靜禮自外作故文大樂必易大禮必簡樂至則無怨禮至則不爭揖讓而治天下者禮樂之謂也暴民不作諸侯賓服兵革不試五刑不用百姓無患天子不怒如此則樂達矣合父子之親明長幼之序以敬四海之內天子如此則禮行矣○大樂與天地同和大禮與天地同節和故百物不失節故祀天祭地明則有禮樂幽則有鬼神如此則四海之內合敬同愛矣禮者殊事合敬者也樂者異文合愛者也禮樂之情同故明王以相洽也故事與時並名與功偕○故鐘鼓管磬羽籥干戚樂之器也屈伸俯仰綴兆舒疾樂之文也簠簋俎豆制度文章禮之器也升降上下周還謁襲禮之文也故知禮樂之情者能作識禮樂之文者能述作者之謂聖述者之謂明明聖者述作之謂也○樂者天地之和也禮者天地之序也和故百物皆化序故羣物皆別樂由天作禮以地制過制則

亂過作則暴明於天地然後能興禮樂也論倫無患樂之情也欣喜歡愛樂之官也
中正無邪禮之質也莊敬恭順禮之制也若夫禮樂之施於金石越於聲音用於宗
廟社稷事乎山川鬼神則此所與民同也○王者功成作樂治定制禮其功大者其
樂備其治辯者其禮具干戚之舞非備樂也執亨而祀非達禮也五帝殊時不相沿
樂三王異世不相襲禮樂極則憂禮粗則偏矣及夫敦樂而無憂禮備而不偏者其
唯大聖乎○天高地下萬物散殊而禮制行矣流而不息合同而化而樂興焉春作
夏長仁也秋斂冬藏義也仁近於樂義近於禮樂者敦和率神而從天禮者別宜居
鬼而從地故聖人作樂以應天制禮以配地禮樂明備天地官矣天尊地卑君臣定
矣卑高已陳貴賤位矣動靜有常小大殊矣方以類聚物以羣分則性命不同矣在
天成象在地成形如此則禮者天地之別也地氣上齊天氣下降陰陽相摩天地相
蕩鼓之以雷霆奮之以風雨動之以四時煖之以日月而百化興焉如此則樂者天
地之和也化不時則不生男女無辨則亂升天地之情也及夫禮樂之極乎天而蟠
乎地行乎陰陽而通乎鬼神窮高極遠而測深厚樂著大始而禮居成物著不息者

天也著不動者地也一動一靜者天地之間也飲聖人曰禮樂云

昔者舜作五弦之琴以歌南風夔始制樂以賞諸侯○故天子之爲樂也以賞諸侯之有德者也德盛而教尊五穀時熟然後賞之以樂故其治民勞者其舞行綴遠其治民逸者其舞行綴短故觀其舞知其德聞其謚知其行也○大章章之也咸池備矣韶繼也夏大也殷周之樂盡矣天地之道寒暑不時則疾風雨不節則饑教者民之寒暑也教不時則傷世事者民之風雨也事不節則無功然則先王之爲樂也以法治也善則行象德矣○夫豢豕爲酒非以爲禍也而獄訟益繁則酒之流生禍也是故先王因爲酒禮壹獻之禮賓主百拜終日飲酒而不得醉焉此先王之所以備酒禍也故酒食者所以合歡也樂者所以象德也禮者所以綴淫也是故先王有大事必有禮以哀之有大福必有禮以樂之哀樂之分皆以禮終樂也者聖人之所樂也而可以善民心其感人深其移風易俗故先王著其教焉○夫民有血氣心知之性而無哀樂喜怒之常應感起物而動然後心術形焉是故志微噍殺之音作而民思憂嘽諧慢易繁文簡節之音作而民康樂粗厲猛起奮末廣賁之音作而民剛毅

廉直勁正莊誠之音作而民肅敬寬裕肉好順成和動之音作而民慈愛流辟邪敝
狄成滌濫之音作而民淫亂○是故先王本之情性稽之度數制之禮義合生氣之
和道五常之行使之陽而不散陰而不密剛氣不怒柔氣不懾四暢交於中而發作
於外皆安其位而不相奪也然後立之學等廣其節奏省其文采以繩德厚律小大
之稱比終始之序以象事行使親疏貴賤長幼男女之理皆形見於樂故曰樂觀其
深矣土敝則草木不長水煩則魚鼈不大氣衰則生物不遂世亂則禮慝而樂淫是
故其聲哀而不莊樂而不安慢易以犯節流湏以忘本廣則容姦狹則思欲感條暢
之氣而滅平和之德是以君子賤之也○凡姦聲感人而逆氣應之逆氣成象而淫
樂興焉正聲感人而順氣應之順氣成象而和樂興焉倡和有應回邪曲直各歸其
分而萬物之理各以類相動也是故君子反情以和其志比類以成其行姦聲亂色
不留聰明淫樂慝禮不接心術惰慢邪辟之氣不設於身體使耳目鼻口心知百體
皆由順正以行其義然後發以聲音而文以琴瑟動以干戚飾以羽旄從以蕭管奮
至德之光動四氣之和以著萬物之理是故清明象天廣大象地終始象四時周還

象風雨五色成文而不亂八風從律而不姦百度得數而有常小大相成終始相生
倡和清濁迭相爲經故樂行而倫清耳目聰明血氣和平移風易俗天下皆寧○故
曰樂者樂也君子樂得其道小人樂得其欲以道制欲則樂而不亂以欲忘道則惑
而不樂○是故君子反情以和其志廣樂以成其教樂行而民鄉方可以觀德矣德
者性之端也樂者德之華也金石絲竹樂之器也詩言其志也歌詠其聲也舞動其
容也三者本於心然後樂器從之是故情深而文明氣盛而化神和順積中而英華
發外唯樂不可以爲僞○樂者心之動也聲者樂之象也文采節奏聲之節也君子
動其本○樂其象然後治其節是故先鼓以警戒三步以見方再始以著往復亂以
飭歸奮疾而不拔極幽而不隱獨樂其志不厭其道備舉其道不私其欲是故情見
而義立樂終而德尊君子以好善小人以聽過故曰生民之道樂爲大焉○樂也者
施也禮也者報也樂樂其所自生而禮反其所自始樂章德禮報情反始也○所謂
大輅者天子之車也龍旂九旒天子之旌也青黑緣者天子之寶龜也從之以牛羊
之羣則所以贈諸侯也○樂也者情之不可變者也禮也者理之不可易者也樂統

同禮辨異禮樂之說管乎人情矣○窮本知變樂之情也著誠去僞禮之經也禮樂
俱天地之情達神明之德降興上下之神而凝是精粗之體領父子君臣之節○是
故大人舉禮樂則天地將爲昭焉天地訢合陰陽相得煦嫗覆育萬物然後草木茂
區萌達羽翼奮角觝生蟄蟲昭蘇羽者嫗伏毛者孕鬻胎生者不殞而卵生者不殖
則樂之道歸焉耳○樂者非謂黃鐘大呂弦歌干揚也樂之末節也故童者舞之鋪
筵席陳尊俎列籩豆以升降爲禮者禮之末節也故有司掌之樂師辨乎聲詩故北
面而竝宗祝辨乎宗廟之禮故後尸商祝辨乎喪禮故後主人是故德成而上藝成
而下行成而先事成而後是故先王有上有下有先有後然後可以有制於天下也
○魏文侯問於子夏曰吾端冕而聽古樂則唯恐臥聽鄭衛之音則不知倦敢問古
樂之如彼何也新樂之如此何也子夏對曰今夫古樂進旅退旅和正以廣弦匏笙
簧會守拊鼓始奏以文復亂以武治亂以相訊疾以雅君子於是語於是道古脩身
及家平均天下此古樂之發也

今夫新樂進俯退俯姦聲以濫溺而不止及優侏僂癡雜子女不知父子樂終不可

以語不可以道古此新樂之發也今君之所問者樂也所好者音也夫樂者與音相近而不同文侯曰敢問何如子夏對曰夫古者天地順而四時當民有德而五穀昌疾疢不作而無妖祥此之謂大當然後聖人作爲父子君臣以爲紀綱紀綱既正天下大定天下大定然後正六律和五聲弦歌詩頌此之謂德音德音之謂樂詩云莫其德音其德克明克明克類克長克君王此大邦克順克俾俾于文王其德靡悔既受帝祉施于孫子此之謂也今君之所好者其溺音乎文侯曰敢問溺音何從出也子夏對曰鄭音好濫淫志宋音燕女溺志衛音趨數煩志齊音敖辟喬志此四者皆淫於色而害於德是以祭祀弗用也詩云肅雍和鳴先祖是聽夫肅肅歌也雍雍和也夫敬以和何事不行爲人君者謹其所好惡而已矣君好之則臣爲之上行之則民從之詩云誘民孔易此之謂也然後聖人作爲鞀鼓控楊壎篪此六者德音之音也然後鍾磬竽瑟以和之干戚旄狄以舞之此所以祭先王之廟也所以獻酬醕酢也所以官序貴賤各得其宜也所以示後世有尊卑長幼之序也鍾聲鏗鏗以立號號以立橫橫以立武君子聽鍾聲則思武臣石聲磬磬以立辨辨以致死君子聽磬

聲則思死封疆之臣絲聲哀哀以立廉廉以立志君子聽琴瑟之聲則思志義之臣竹聲濫濫以立會會以聚衆君子聽竽笙簫管之聲則思畜衆之臣鼓擊之聲謹謹以立動動以進衆君子聽鼓擊之聲則思將帥之臣君子之聽音非聽其鏗鎗而已也彼亦有所合之也○賓牟賈侍坐於孔子孔子與之言及樂曰夫武之備戒之已久何也對曰病不得其衆也咏歎之淫液之何也對曰恐不逮事也發揚蹈厲之已蚤何也對曰及時事也武坐致右憲左何也對曰非武坐也聲淫及商何也對曰非武音也子曰若非武音則何音也對曰有司失其傳也若非有司失其傳則武王之志荒矣子曰唯丘之聞諸襄弘亦若吾子之言是也賓牟賈起免席而請曰夫武之備戒之已久則既聞命矣敢問遲之遲而又久何也子曰居吾語汝夫樂者象成者也摠干而山立武王之事也發揚蹈厲大公之志也武亂皆坐周召之治也且夫武始而北出再成而滅商三成而南四成而南國是疆五成而分周公左召公右六成復綴以崇天子夾振之而騶伐盛威於中國也分夾而進事蚤濟也久立於綴以待諸侯之至也且女獨未聞牧野之語乎武王克殷反商未及下車而封黃帝之後於

薊封帝堯之後於祝封帝舜之後於陳下車而封夏后氏之後於杞投殷之後於宋封王子比子之墓釋箕子之囚使之行商容而復其位庶民弛政庶士倍祿濟河而西馬散之華山之陽而弗復乘牛散之桃林之野而弗復服車甲屾而藏之府庫而弗復用倒載干戈包之以虎皮將帥之士使爲諸侯名之曰建纛然後天下知武王之不復用兵也散軍而郊射左射狸首右射鵠虞而貫革之射息也裨冕搢笏而虎賁之士說劍也祀乎明堂而民知孝朝覲然後諸侯知所以臣耕藉然後諸侯知所以敬五者天下之大教也食三老五更於大學天子袒而割牲執醬而饋執爵而醕冕而摠干所以教諸侯之弟也若此則周道四達禮樂交通則夫武之遲久不亦宜乎君子曰禮樂不可斯須去身致樂以治心則易直子諒之心油然而生矣易直子諒之心生則樂樂則安安則久久則天天則神天則不言而信神則不怒而威致樂以治心者也致禮以治躬則莊敬莊敬則嚴威心中斯須不和不樂而鄙詐之心入之矣外貌斯須不莊不敬而易慢之心入之矣故樂也者動於內者也禮也者動於外者也樂極和禮極順內和而外順則民瞻其顏色而弗與爭也望其容貌而民不生

易優焉故德輝動於內而民莫不承聽理發諸外而民莫不承順故曰致禮樂之道舉而錯之天下無難矣樂也者動於內者也禮也者動於外者也故禮主其減樂主其盈禮減而進以進爲文樂盈而反以反爲文禮減而不進則銷樂盈而不反則放故禮有報而樂有反禮得其報則樂樂得其反則安禮之報樂之反其義一也夫樂者樂也人情之所不能免也樂必發於聲音形於動靜人之道也聲音動靜性術之變盡於此矣故人不耐無樂樂不耐無形形而不爲退不耐無亂○先王恥其亂故制雅頌之聲以道之使其聲足樂而不流使其文足論而不息使其曲直繁瘠廉肉節奏足以感動人之善心而已矣不使放心邪氣得接焉是先王立樂之方也○是故樂在宗廟之中君臣上下同聽之則莫不和敬在族長鄉里之中長幼同聽之則莫不和順在閨門之內父子兄弟同聽之則莫不和親故樂者審一以定和比物以飾節節奏合以成文所以合和父子君臣附親萬民也是先王立樂之方也故聽其雅頌之聲志意得廣焉執其于戚習其俯仰詘伸容貌得莊焉行其綴兆要其節奏行列得正焉進退得齊焉故樂者天地之命中和之紀人情之所不能免也夫樂者

先王之所以飾喜也軍旅鈇鉞者先王之所以飾怒也故先王之喜怒皆得其儕焉
喜則天下和之怒則暴亂者畏之先王之道禮樂可謂盛矣○子贛見師乙而問焉
曰賜聞聲歌各有宜也如賜者宜何歌也師乙曰乙賤工也何足以問所宜請誦其
所聞而吾子自執焉愛者宜歌商溫良而能斷者宜歌齊夫歌者直己而陳德也動
已而天地應焉四時和焉星辰理焉萬物育焉故商者五帝之遺聲也寬而靜柔而
正者宜歌頌廣大而靜疏達而信者宜歌大雅恭儉而好禮者宜歌小雅正直而靜
廉而謙者宜歌風肆直而慈愛商之遺聲也商人識之故謂之商齊者三代之遺聲
也齊人識之故謂之齊明乎商之音者臨事而屢斷明乎齊之音者見利而讓臨事
而屢斷勇也見利而讓義也有勇有義非歌孰能保此故歌者上如抗下如隊曲如
折止如橐木倨中矩句中鉤纍纍乎端如貫珠故歌之爲言也長言之也說之故言
之言之不足故長言之長言之不足故嗟歎之嗟歎之不足故不知手之舞之足之
蹈之也子貢問樂

雜記上

諸侯行而死於館則其復如於其國如於道則升其乘車之左轂以其綏復其轎有
襜緇布裳帷素錦以爲屋而行至於廟門不毀牆遂入適所殯唯轎爲說於廟門外
○大夫士死於道則升其乘車之左轂以其綏復如於館死則其復如於家大夫以
布爲轎而行至於家而說轎載以轎車入自門至於阼階下而說車舉自阼階升適
所殯士轎葦席以爲屋蒲席以爲裳帷○凡訃於其君曰君之臣某死父母妻長子
曰君之臣某之某死君訃於他國之君曰寡君不祿敢告於執事夫人曰寡小君不
祿大子之喪曰寡君之適子某死大夫訃於同國適者曰某不祿訃於士亦曰某不
祿訃於他國之君曰君之外臣寡大夫某死訃於適者曰吾子之外私寡大夫某不
祿使某實訃於士亦曰吾子之外私寡大夫某不祿使某實士訃於同國大夫曰某
死訃於士亦曰某死訃於他國之君曰君之外臣某死訃於大夫曰吾子之外私某
死訃於士亦曰吾子之外私某死大夫次於公館以終喪士練而歸士次於公館大
夫居廬士居堊室大夫爲其父母兄弟之未爲大夫者之喪服如士服士爲其父母
兄弟之爲大夫者之喪服如士服大夫之適子服大夫之服○大夫之庶子爲大夫

則爲其父母服大夫服其位與未爲大夫者齒○士之子爲大夫則其父母弗能主也使其子主之無子則爲之置後大夫卜宅與葬日有司麻衣布衰布帶因喪屨緇布冠不髹占者皮弁如箴則史練冠長衣以箴占者朝服大夫之喪旣薦馬薦馬者哭踊出乃包奠而讀書大夫之喪大宗人相小宗人命龜卜人作龜內子以鞠衣褻衣素沙下大夫以禮衣其餘如士復諸侯以褻衣冕服爵弁服夫人稅衣揄狄狄稅素沙復西上大夫不揄絞屬於池下大夫附於士士不附於大夫附於大夫之昆弟無昆弟則從其昭穆雖王父母在亦然婦附於其夫之所附之妃無妃則亦從其昭穆之妃妾附於妾祖姑無妾祖姑則亦從其昭穆之妾男子附於王父則配女子附於王母則不配公子附於公子○君薨天子號稱子待猶君也

有三年之練冠則以大功之麻易之唯杖屨不易有父母之喪尙功衰而附兄弟之塲則練冠附於塲稱陽童某甫不名神也○凡異居始聞兄弟之喪唯以哭對可也其始麻散帶經未服麻而奔喪及主人之未成經也疏者與主人皆成之親者終其麻帶經之日數○主妾之喪則自禘至於練祥皆使其子主之其殯祭不於正室君

不撫僕妾○女君死則妾爲女君之黨服攝女君則不爲先女君之黨服聞兄弟之喪大功以上見喪者之鄉而哭適兄弟之送葬者弗及遇主人於道則逢之於墓凡主兄弟之喪雖疏亦虞之○凡哭服未畢有弔者則爲位而哭拜踊大夫之哭大夫弁經大夫與殯亦弁經大夫有私喪之葛則於其兄弟之輕喪則弁經○爲長子杖則其子不以杖卽位爲妻父母在不杖不稽顙母在不稽顙稽顙者其贈也拜違諸侯之大夫不反服違大夫之諸侯不反服喪冠條屬以別吉凶三年之練冠亦條屬右縫小功以下左總冠纁纁大功以上散帶朝服十五升去其半而總加灰錫也諸侯相襜以後路與冕服先路與襲衣不以襜遺車視牢具疏布轄四面有章置於四隅載輅有子曰非禮也喪奠脯醢而已祭稱孝子孝孫喪稻哀子哀孫端衰喪車皆無等大白冠緇布之冠皆不黻委武玄縞而后黻大夫冕而祭於公弁而祭於己士弁而祭於公冠而祭於己士弁而親迎然則士弁而祭於己可也暢曰以柩杵以楯枇以桑長三尺或曰五尺畢用桑長三尺刊其柄與末○率帶諸侯大夫皆五采士二采○醴者稻醴也甕甗箒衡實見間而后折入○重旣虞而埋之○凡婦人從其

夫之爵位小斂大斂啓皆辯拜○朝夕哭不帷無柩者不帷○君若載而后弔之則主人東面而拜門右北面而踊出待反而后奠○子羔之襲也繭衣裳與稅衣纁裙爲一素端一皮弁一爵弁一玄冕一曾子曰不襲婦服○爲君使而死公館復私館不復公館者公宮與公所爲也私館者自卿大夫以下之家也○公七踊大夫五踊婦人居間士三踊婦人皆居間公襲卷衣一玄端一朝服一素積一纁裳一爵弁二玄冕一襲衣一朱綠帶申加大帶於上小斂環經公大夫士一也公視大斂公升商祝鋪席乃斂魯人之贈也三玄二纁廣尺長終幅弔者卽位于門西東面其介在其東南北面西上西於門主孤西面相者受命曰孤某使某請事客曰寡君使某如何不淑相者入告出曰孤某須矣弔者入主人升堂西面弔者升自西階東面致命曰寡君聞君之喪寡君使某如何不淑子拜稽顙弔者降反位含者執璧將命曰寡君使某含相者入告出曰孤某須矣含者入升堂致命再拜稽顙含者坐委于殯東南有葦席旣葬蒲席降出反位宰夫朝服卽喪屨升自西階西而坐取璧降自西階以東襚者曰寡君使某襚相者入告出曰孤某須矣襚者執冕服左執領右執要入升

堂致命曰寡君使某禩子拜稽顙委衣于殯東禩者降受爵弁服於門內霑將命子拜稽顙如初受皮介服於中庭自西階受朝服自堂受玄端將命子拜稽顙皆如初禩者降出反位宰夫五人舉以東降自西階其舉亦西西上介贈執圭將命曰寡君使某贈相者入告反命曰孤某須矣陳乘黃大路於中庭北轡執圭將命客使自下由路西子拜稽顙坐委於殯東南隅宰舉以東凡將命鄉殯將命子拜稽顙西面而坐委之宰舉璧與圭宰夫舉禩升自西階西坐取之降自西階贈者出反位于門外上客臨曰寡君有宗廟之事不得承事使一介老某相執紼相者反命曰孤某須矣臨者入門右介者皆從之立于其左東上宗人納賓升受命于君降曰孤敢辭吾子之辱請吾子之復位客對曰寡君命某毋敢視賓客敢辭宗人反命曰孤敢固辭吾子之辱請吾子之復位客對曰寡君命某毋敢視賓客敢固辭宗人反命曰孤敢固辭吾子之辱請吾子之復位客對曰寡君命使臣某毋敢視賓客是以敢固辭固辭不獲命敢不敬從客立于門西介立于其左東上孤降自阼階拜之升哭與客拾踊三客出送于門外拜稽顙○其國有君喪不敢受弔○外宗房中南面小臣鋪席

商祝鋪絞紵衾士盥于盤北舉遷尸子斂上卒斂宰告子馮之踊夫人東面坐馮之與踊士喪有與天子同者三其終夜燎及乘人專道而行

雜記下

有父之喪如未沒喪而母死其除父之喪也服其除服卒事反喪服○雖諸父昆弟之喪如當父母之喪其除諸父昆弟之喪也皆服其除服之服卒事反喪服如三年之喪則既穎其練祥皆行王父死未練祥而孫又死猶是附於王父也○有殯聞外喪哭之他室人奠卒奠出改服卽位如始卽位之禮○大夫士將與祭於公既視濯而父母死則猶是與祭也次於異宮既祭釋服出公門外哭而歸其它如奔喪之禮如未視濯則使人告者反而后哭如諸父昆弟姊妹之喪則既宿則與祭卒事出公門釋服而后歸其它如奔喪之禮如同宮則次于異宮○曾子問曰卿大夫將爲尸於公受宿矣而有齊衰內喪則如之何孔子曰出舍乎公宮以待事禮也孔子曰尸弁冕而出卿大夫士皆下之尸必式必有前驅○父母之喪將祭而昆弟死既殯而祭如同宮則雖臣妾葬而后祭祭主人之升降散等執事者亦散等雖虞附亦

然○自諸侯達諸士小祥之祭主人之酢也疇之衆賓兄弟則皆啐之大祥主人啐之衆賓兄弟皆飲之可也○凡侍祭喪者告賓祭薦而不食子貢問喪子曰敬爲上哀次之瘠爲下顏色稱其情戚容稱其服請問兄弟之喪子曰兄弟之喪則存乎書策矣君子不奪人之喪亦不可奪喪也孔子曰少連大連善居喪三日不怠三月不解期悲哀三年憂東夷之子也○三年之喪言而不語對而不問廬聖室之中不與人坐焉在聖室之中非時見乎母也不入門疏衰皆居聖室不廬廬嚴者也○妻視叔父母姑姊妹視兄弟長中下殤視成人○親喪外除兄弟之喪內除○視君之母與妻比之兄弟發諸顏色者亦不飲食也○免喪之外行於道路見似目瞿聞名心瞿弔死而問疾顏色戚容必有以異於人也如此而后可以服三年之喪其餘則直道而行之是也○祥主人之除也於夕爲期朝服祥因其故服子游曰旣祥雖不當縞者必縞然後反服當袒大夫至雖當踊絕踊而拜之反改成踊乃襲於士旣事成踊襲而后拜之不改成踊上大夫之虞也少牢卒哭成事附皆大牢下大夫之虞也殯牲卒哭成事附皆少牢○祝稱卜葬虞子孫曰哀夫曰乃兄弟曰某卜葬其兄弟

曰伯子某○古者貴賤皆杖叔孫武叔朝見輪人以其杖關轂而輶輪者於是有爵而后杖也○饗巾以飯公羊買爲之也○冒者何也所以揜形也自饗以至小斂不設冒則形是以饗而后設冒也○或問於曾子曰夫既遺而包其餘猶既食而裹其餘與君子既食則裹其餘乎曾子曰吾子不見大饗乎夫大饗既饗卷三牲之俎歸于賓館父母而賓客之所以爲哀也子不見大饗乎○非爲人喪問與賜與○三年之喪以其喪拜非三年之喪以吉拜三年之喪如或遺之酒肉則受之必三辭主人衰經而受之如君命則不敢辭受而薦之喪者不遺人人遺之雖酒肉受也從父昆弟以下既卒哭遺人可也縣子曰三年之喪如斬期之喪如剝期之喪十一月而練十三月而祥十五月而禫三年之喪雖功衰不弔自諸侯達諸士如有服而將往哭之則服其服而往練則弔既葬大功弔哭而退不聽事焉期之喪未葬弔於鄉人哭而退不聽事焉功衰弔待事不執事小功總執事不與於禮○相趨也出宮而退相揖也衰次而退相問也既封而退相見也反哭而退朋友虞附而退○弔非從主人也四十者執紼鄉人五十者從反哭四十者待盈坎○喪食雖惡必充飢飢而廢事

非禮也飽而忘哀亦非禮也視不明聽不聰行不正不知哀君子病之飲有疾飲酒
食肉五十不致毀六十不毀七十飲酒食肉皆爲疑死○有服人召之食不往大功
以下既葬適人人食之其黨也食之非其黨弗食也功衰食菜果飲水漿無鹽酪不
能食食鹽酪可也孔子曰身有瘍則浴首有創則沐病則飲酒食肉毀瘠爲病君子
弗爲也毀而死君子謂之無子○非從柩與反哭無免於壙○凡喪小功以上非虞
附練祥無沐浴○疏衰之喪既葬人請見之則見不請見人小功請見人可也大功
不以執紼唯父母之喪不辟涕泣而見人○三年之喪祥而從政期之喪卒哭而從
政九月之喪既葬而從政小功總之喪既殯而從政曾申問於曾子曰哭父母有常
聲乎曰中路嬰兒失其母焉何常聲之有卒哭而諱王父母兄弟世父叔父姑姊妹
子與父同諱母之諱宮中諱妻之諱不舉諸其側與從祖昆弟同名則諱以喪冠者
雖三年之喪可也既冠於次入哭踊三者三乃出大功之末可以冠子可以嫁子父
小功之末可以冠子可以嫁子可以取婦已雖小功既卒哭可以冠取妻下殤之小
功則不可

凡弁經其衰侈袂父有服宮中子不與於樂母有服聲聞焉不舉樂妻有服不舉樂於其側大功將至辟琴瑟小功至不絕樂○姑姊妹其夫死而夫黨無兄弟使夫之族人主喪妻之黨雖親弗主夫若無族矣則前後家東西家無有則里尹主之或曰主之而附於夫之黨○麻者不紳執玉不麻麻不加於采○國禁哭則止朝夕之奠卽位自因也童子哭不偯不踊不杖不菲不廬孔子曰伯母叔母疏衰踊不絕地姑姊妹之大功踊絕於地如知此者由文矣哉由文矣哉○世柳之母死相者由左世柳死其徒由右相由右相世柳之徒爲之也○天子飯九貝諸侯七大夫五士三士三月而葬是月也卒哭大夫三月而葬五月而卒哭諸侯五月而葬七月而卒哭士三處大夫五諸侯七諸侯使人弔其次含禭贈臨皆同日而畢事者也其次如此也卿大夫疾君問之無筭士壹問之君於卿大夫比葬不食肉比卒哭不舉樂爲士比殯不舉樂○升正柩諸侯執紼五百人四綵皆銜枚司馬執鐸左八人右八人匠人執羽葆御柩大夫之喪其升正柩也執引者三百人執鐸者左右各四人御柩以茅○孔子曰管仲鏤簋而朱紘族樹而反坫山節而藻稅賢大夫也而難爲上也晏平

仲祀其先人豚肩不揜豆賢大夫也而難爲下也君子上不僭上下不偪下○婦人非三年之喪不踰封而弔如三年之喪則君夫人歸夫人其歸也以諸侯之弔禮其待之也若待諸侯然夫人至入自闈門升自側階君在阼其他如奔喪禮然○嫂不撫叔叔不撫嫂君子有三患未之聞患弗得聞也既聞之患弗得學也既學之患弗能行也君子有五恥居其位無其言君子恥之有其言無其行君子恥之既得之而又失之君子恥之地有餘而民不足君子恥之衆寡均而倍焉君子恥之○孔子曰凶年則乘駕馬祀以下牲○恤由之喪哀公使孺悲之孔子學士喪禮士喪禮於是乎書○子貢觀於蜡孔子曰賜也樂乎對曰一國之人皆若狂賜未知其樂也子曰百日之蜡一日之澤非爾所知也張而不弛文武弗能也弛而不張文武弗爲也一張一弛文武之道也○孟獻之曰正月至可以有事於上帝七月日至可以有事於祖七月而禘獻子爲之也○夫人之不命於天子自魯昭公始也○外宗爲君夫人猶內宗也○廡焚孔子拜鄉人爲火來者拜之士壹大夫再亦相弔之道也孔子曰管仲遇盜取二人焉上以爲公臣曰其所與遊辟也可人也管仲死桓公使爲之

服官於大夫者之爲之服也自管仲始也有君命焉爾也○過而舉君之諱則起與君之諱同則稱字○內亂不與焉外患弗辟也○贊大行曰圭公九寸侯伯七寸子男五寸博三寸厚半寸剡上左右各寸半玉也藻三采六等哀公問子羔曰子之食奚當對曰文公之下執事也○成廟則釐之其禮祝宗人宰夫雍人皆爵弁純衣雍人拭羊宗人祝之宰夫北面于碑南東上雍人舉羊升屋自中中屋南面割羊血流于前乃降門夾室皆用雞先門而後夾室其岬皆于屋下割雞門當門夾室中室有司皆鄉室而立門則有司當門北面既事宗人告事畢乃皆退反命于君曰釐某廟事畢反命于寢君南鄉于門內朝服既反命乃退路寢成則考之而不釐釐屋者交神明之道也凡宗廟之器其名者成則釐之以緦豚○諸侯出夫人夫人比至于其國以夫人之禮行至以夫人入使者將命曰寡君不敏不能從而事社稷宗廟使使臣某敢告於執事主人對曰寡君固前辭不教矣寡君敢不敬須以俟命有司官陳器皿主人有司亦官受之妻出夫使人致之曰某不敏不能從而共粢盛使某也敢告於侍者主人對曰某之子不肖不敢辟誅敢不敬須以俟命使者退主人拜送之

如舅在則稱舅舅沒則稱兄無兄則稱夫主人之辭曰某之子不肖如姑姊妹亦皆稱之孔子曰吾食於少施氏而飽少施氏食我以禮吾祭作而辭曰疏食不足祭也吾殮作而辭曰疏食也不敢以傷吾子納幣一東東五兩兩五尋婦見舅姑兄弟姑姊妹皆立于堂下西而北上是見已見諸父各就其寢女雖未許嫁年二十而笄禮之婦人執其禮燕則鬢首○禪長三尺下廣二尺上廣一尺會去上五寸紕以爵韋六寸不至下五寸純以素紕以五采

喪大記

疾病外內皆壅 君大夫徹縣士去琴瑟寢東首於北牖下廢牀徹褻衣加新衣體一人男女改服屬纊以俟絕氣男子不死於婦人之手婦人不死於男子之手 君夫人卒於路寢大夫世婦卒於適寢內子未命則死於下室遷尸于寢士之妻皆死于寢 復有林麓則虞人設階無林麓則狄人設階 小臣復復者朝服君以卷夫人以屈狄大夫以玄纁世婦以檀衣士以爵弁士妻以稅衣皆升自東榮中屋履危北面三號捲衣投于前司服受之降自西北榮其爲賓則公館復私館不復其在野

則升其乘車之左轂而復復衣不以衣尸不以斂婦人復不以衾凡復男子稱名婦人稱字唯哭先復復而後行死事始卒主人啼兄弟哭婦人哭踊既正尸子坐于東方卿大夫父兄子姓立于東方有司庶士哭于堂下北面夫人坐于西方內命婦姑姊妹子姓立于西方外命婦率外宗哭于堂上北面大夫之喪主人坐于東方主婦坐于西方其有命夫命婦則坐無則皆立士之喪主人父兄子姓皆坐于東方主婦姑姊妹子姓皆坐于西方凡哭尸于室者主人二手承衾而哭君子喪未小斂爲寄公國賓出大夫之喪未小斂爲君命出士之喪於大夫不當斂則出凡主人之出也徒跣扱衽拊心降自西階君拜寄公國賓于位大夫於君命迎于寢門外使者升堂致命主人拜于下士於大夫親弔則與之哭不逆於門外夫人爲寄公夫人出命婦爲夫人之命出士妻不當斂則爲命婦出小斂主人卽位于戶內主婦東面乃斂卒斂主人馮之踊主婦亦如之主人袒說髦括髮以麻婦人繫帶麻于房中徹帷男女奉尸夷于堂降拜君拜寄公國賓大夫士拜卿大夫於位於士旁三拜大夫亦拜寄公夫人於堂上大夫內子士妻特拜命婦汜拜衆賓於堂上主

人卽位襲帶經踊母之喪卽位而免乃奠弔者襲裘加武帶經與主人拾踊 君喪
虞人出木角狄人出壺雍人出鼎司馬縣之乃官代哭大夫官代哭不縣壺士代哭
不以官君堂上二燭下二燭大夫堂上一燭下二燭士堂上一燭下一燭 賓出徹
帷 哭尸于堂上主人在東方由外來者在而方諸婦南鄉 婦人迎客送客不下
堂下堂不哭男子出寢門見人不哭其無女主則男主拜女賓于寢門內其無男主
則女主拜男賓于阼階下子幼則以衰抱之人爲之拜爲後者不在則有爵者辭無
爵者人爲之拜在竟內則俟之在竟外則殯葬可也喪有無後無無主 君之喪三
日子夫人杖五日既殯授大夫世婦杖子大夫寢門之外杖寢門之內輯之夫人世
婦在其次則杖卽位則使人執之子有王命則去杖國君之命則輯杖聽卜有事於
尸則去杖大夫於君所則輯杖於大夫所則杖 大夫之喪三日之朝既殯主人主
婦室老皆杖大夫有君命則去杖大夫之命則輯杖內子爲夫人之命夫杖爲世婦
之命授人杖 士之喪二日而殯三日之朝主人杖婦人皆杖於君命夫人之命如
大夫於大夫世婦之命如大夫子皆杖不以卽位大夫士哭殯則杖哭柩則輯杖弃

杖者斷而弃之於隱者 君設大盤造冰焉大夫設夷盤造冰焉士併瓦盤無冰設
牀檀第有枕含一牀襲一牀遷尸于堂又一牀皆有枕席君大夫士一也 始死遷
尸于牀帷用斂衾去死衣小臣楔齒用角柶綴足用燕几君大夫士一也 管人汲
不說繻屈之盡階不升堂授御者御者人浴小臣四人抗衾御者二人浴浴水用盆
沃水用料浴用絺巾拒用浴衣如它日小臣爪足浴餘水弃于坎其母之喪則內御
者抗衾而浴 管人汲授御者御者差沐于堂上君沐梁大夫沐稷士沐梁甸人爲
篋于西牆下陶人出重鬲管人受沐乃賚之甸人取所徹廟之西北扉薪用爨之管
人授御者沐乃沐沐用瓦盤拒用巾如它日小臣爪手剪須濡濯弃于坎 君之喪
子大夫公子衆士皆三日不食子大夫公子食粥納財朝一溢米莫一溢米食之無
筭士疏食水飲食之無筭夫人世婦諸妻皆疏食水飲食之無筭 大夫之喪主人
室老子姓皆食粥衆士疏食水飲妻妾疏食水飲士亦如之 既葬主人疏食水飲
不食菜果婦人亦如之君大夫士一也練而食菜果祥而食肉 食粥於盛不盥食
於寡者盥食菜以醯醬始食肉者先食乾肉始飲酒者先飲醴酒 期之喪三不食

食疏食水飲不食菜果三月既葬食肉飲酒期終喪不食肉不飲酒父在爲母爲妻
九月之喪食飲猶期之喪也食肉飲酒不與人樂之 五月三月之喪壹不食再不
食可也比葬食肉飲酒不與人樂之叔母世母故主宗子食肉飲酒不能食粥羹之
以菜可也有疾食肉飲酒可也五十不成喪七十唯衰麻在身 既葬若君食之則
食之大夫父之友食之則食之矣不辟梁肉若有酒醴則辭 小斂於戶內大斂於
阼君以簞席大夫以蒲席士以葦席 小斂布絞縮者一橫者三君錦衾大夫縞衾
士緇衾皆一衣十有九稱君陳衣于序東大夫士陳衣于房中皆西領北上絞紵不
在列

喪服大記

大斂布絞縮者三橫者五布紵二衾君大夫士一也君陳衣于庭百稱北領西上大
夫陳衣于序東五十稱西領南士士陳衣于序東三十稱西領南上絞紵如朝服絞
一幅爲三不辟紵五幅無紵 小斂之衣祭服不倒君無襪大夫士畢主人之祭服
親戚之衣受之不以卽陳小斂君大夫士皆用複衣複衾大斂君大夫士祭服無筭

君褶衣褶衾大夫士猶小斂也 袍必有表不禪衣必有裳謂之一稱 凡陳衣者實之篋取衣者亦以篋升降者自西階凡陳衣不誦非列采不入 凡斂者袒遷尸者襲君之喪大胥是斂衆胥佐之大夫之喪大胥侍之衆胥是斂士之喪胥爲侍士是斂 小斂大斂祭服不倒皆左衽結絞不紐 斂者旣斂必哭士與其執事則斂斂爲則爲之壹不食凡斂者六人 君錦冒黼殺纒旁七大夫玄冒黼殺纒旁五士緇冒纁殺纒旁三凡冒質長與手齊殺三尺自小斂以往用夷衾夷衾質殺之裁猶冒也 君將大斂于弁經卽位于序端卿大夫卽位于堂廉楹西北面東上父兄堂下北面夫人命婦尸西東面外宗房中南面小臣鋪席商祝鋪絞給衾衣士盥于盤上士舉遷尸于斂上卒斂宰告于馮之踊夫人東面亦如之 大夫之喪將大斂旣鋪絞給衾衣君至主人迎先人門右巫止于門外君釋菜祝先入升堂君卽位于序端卿大夫卽位于堂廉楹西北面東上主人房外南面主婦尸西東面遷尸卒斂宰告主人降北面于堂下君撫之主人拜稽顙君降升主人馮之命主婦馮之 士之喪將大斂君不在其餘禮猶大夫也 鋪絞給踊鋪衾踊鋪衣踊遷尸

踊斂衣踊斂衾踊斂絞給踊 君撫大夫撫內命婦大夫撫室老撫姪娣君大夫馮
父母妻長子不馮庶子士馮父母妻長子庶子庶子有子則父母不馮其尸凡馮尸
者父母先妻子後君於臣撫之父母於子執之子於父母馮之婦於舅姑奉之舅姑
於婦撫之妻於夫拘之夫於妻於昆弟執之馮尸不當君所凡馮尸與必踊 父母
之喪居倚廬不塗寢苦枕由非喪事不言君爲廬宮之大夫士禮之 既葬柱楣塗
廬不於顯者君大夫士皆宮之 凡非適子者自未葬以於隱者爲廬 既葬與人
立君言王事不言國事大夫士言公事不言家事 君既葬王政入於國既卒哭而
服王事大夫士既葬公政入於家既卒哭弁絰帶金革之事無辟也 既練居堊室
不與人居君謀國政大夫士謀家事既祥勦聖祥而外無哭者禫而內無哭者樂作
矣故也 禫而從御吉祭而復寢期居廬終喪不御於內者父在爲母爲妻齊衰期
者大功布裘九月者皆三月不御於內歸人不居廬不寢苦喪父母既練而歸期九
月者既葬而歸 公之喪大夫俟練士卒哭而歸 大夫士父母之喪既練而歸朔
月忌日則歸哭于宗室諸父兄弟之喪既卒哭而歸 父不次於子兄不次於弟

君於大夫世婦大斂焉爲之賜則小斂焉 於外命婦既加蓋而君至於士既殯而往爲之賜大斂焉夫人於世婦大斂焉爲之賜小斂焉於諸妻爲之賜大斂焉於大夫外命婦既殯而往大夫士既殯而君往焉使人戒之主人具殷奠之禮俟于門外見馬首先入門右巫止于門外祝代之先君釋菜于門內祝先升自阼階負墉南面君卽位于阼小臣二人執戈立于前二人立于後擯者進主人拜稽顙君稱言祝而踊主人踊 大夫則奠可也士則出俟于門外命之反奠乃反奠卒奠主人先俟于門外君退主人送于門外拜稽顙君於大夫疾三問之在殯三往焉士疾壹問之在殯壹往焉 君弔則復殯服 夫人弔於大夫士主人出迎于門外見馬首先入門右夫人人升堂卽位主婦降自西階拜稽顙于下夫人視世子而踊奠如君至之禮夫人退主婦送于門內拜稽顙主人送于大門之外不拜 大夫君不迎于門外入卽位于堂下主人北而衆主人南而婦人卽位于房中若有君命命夫命婦之命四鄰賓客其君後主人而拜 君弔見尸柩而後踊 大夫士若君不戒而往不具殷奠君退必奠 君大棺八寸屬六寸棨四寸上大夫大棺八寸屬六寸下大夫大

棺六寸屬四寸士棺六寸 君裏棺用朱綠用雜金鍔大夫裏棺用玄綠用牛骨鍔
士不綠 君蓋用漆三衽三束大夫蓋用漆二衽二束士蓋不用漆二衽二束 君
大夫繫爪實于綠中土埋之 君殯用輜櫨至于上畢塗屋大夫殯以幬櫨置于西
序塗不斲於棺士殯見衽塗上帷之 熬君四種八筐大夫三種六筐士二種四筐
加魚腊焉 飾棺君龍帷三池振容黼荒火三列斂三列素錦褚加僞荒纁紐六齊
五采五貝黼髮二斂髮二畫髮二皆戴圭魚躍拂池君纁戴六纁披六大夫畫帷二
池不振容畫荒火三列斂三列素錦褚纁紐二玄紐二齊三采三貝斂髮二畫髮二
皆戴綏魚躍拂池大夫戴前纁後玄披亦如之士布帷布荒一池掄絞纁紐二緇紐
二齊三采一貝畫髮二皆戴綏士戴前纁後緇二披用纁 君葬用輜四綵二碑御
棺用羽葆大夫葬用輜二綵二碑御棺用茅士葬用國車二綵無碑比出宮御棺用
功布 凡封用綵去碑負引君封以衡大夫士以咸君命毋諱以鼓封大夫命毋哭
士哭者相止也 君松椁大夫柏椁士雜木椁 棺椁之間君容祝大夫容壺士容
甗 君裏椁虞筐大夫不裏椁士不處筐

祭法

祭法有虞氏禘黃帝而郊饗祖顓頊而宗堯夏后氏亦禘黃帝而郊饗祖顓頊而宗禹殷人禘饗而郊冥祖契而宗湯周人禘饗而郊稷祖文王而宗武王 燔柴於泰壇祭天也瘞埋於泰折祭地也用騂犢 埋少牢於泰昭祭時也相近於坎壇祭寒暑也王宮祭日也夜明祭月也幽宗祭星也雩宗祭水旱也四坎壇祭四方也山川谷丘陵能出雲爲風雨見怪物皆曰神有天下者祭百神諸侯在其地則祭之亡其地則不祭 大凡生於天地之間者皆曰命其萬物死皆曰折人死曰鬼此五代之所不變也七代之所更立者禘郊宗祖其餘不變也○天下有王分地建國置都立邑設廟祫壇墀而祭之乃爲親疏多少之數是故王立七廟一壇一墀曰考廟曰王考廟曰皇考廟曰顯考廟曰祖考廟皆月祭之遠廟爲祫有二祫享嘗乃止去祫爲壇去壇爲墀壇墀有禘焉祭之無禘乃止去墀曰鬼諸侯立五廟一壇一墀曰考廟曰王考廟曰皇考廟皆月祭之顯考廟祖考廟享嘗乃止去祖爲壇去壇爲墀壇墀有禘焉祭之無禘乃止去墀爲鬼大夫立三廟二壇曰考廟曰王考廟曰皇考廟

享嘗乃止顯考祖考無廟有禱焉爲壇祭之去壇爲鬼適士二廟一壇曰考廟曰王考廟享嘗乃止顯考無廟有禱焉爲壇祭之去壇爲鬼官師一廟曰考廟王考無廟而祭之去王考爲鬼庶士庶人無廟死曰鬼 王爲羣姓立社曰大社王自爲立社曰王社諸侯爲百姓立社曰國社諸侯自爲立社曰侯社大夫以下成羣立社曰置社 王爲羣姓立七祀曰司命曰中雷曰國門曰國行曰泰厲曰戶曰竈王自爲立七祀諸侯爲國立五祀曰司命曰中雷曰國門曰國行曰公厲諸侯自爲立五祀大夫立三祀曰族厲曰門曰行適士立二祀曰門曰行庶士庶人立一祀或立戶或立竈 王下祭殤五適子適孫適曾孫適玄孫適來孫諸侯下祭三大夫下祭二適士及庶人祭子而止 夫聖王之制祭祀也法施於民則祀之以死勤事則祀之以勞定國則祀之能禦大菑則祀之能捍大患則祀之是故厲山氏之有天下也其子曰農能殖百穀夏之衰也周弃繼之故祀以爲稷共工氏之霸九州也其子曰后土能平九州故祀以爲社帝嚳能序星辰以著衆堯能賞均刑法以義終舜勤衆事而野死鯀鄣鴻水而殛死禹能脩鯀之功黃帝正名百物以明民共財顓頊能脩之契爲

司徒而民成冥勤其官而水死湯以寬治民而除其虐文王以文治武王以武功去民之菑此皆有功烈於民者也及夫日月星辰民所瞻仰也山林川谷丘陵民所取財用也非此族也不在祀典

祭義

祭不欲數數則煩煩則不敬祭不欲疏疏則怠怠則忘是故君子合諸天道春禘秋嘗霜露既降君子履之必有悽愴之心非其寒之謂也春雨露既濡君子履之必有怵惕之心如將見之樂以迎來哀以送往故禘有樂而嘗無樂 致齊於內散齊於外齊之日思其居處思其笑語思其志意思其所樂思其所嗜齊三日乃見其所爲齊者 祭之日入室儼然必有見乎其位周還出戶肅然必有聞乎其容聲出戶而聽愴然必有聞乎其嘆息之聲 是故先王之孝也色不忘乎目聲不絕乎耳心志嗜欲不忘乎心致愛則存致愆則著著存不忘乎心夫安得不敬乎 君子生則敬養死則敬享思終身弗辱也君子有終身之喪忌日之謂也忌日不用非不祥也言夫日志有所至而不敢盡其私也 唯聖人爲能饗帝孝子爲能饗親饗者鄉也鄉

之然後能饗焉是故孝子臨尸而不作君牽牲夫人奠盎君獻尸夫人薦豆卿大夫相君命婦相夫人齊齊乎其敬也愉愉乎其忠也勿勿諸其欲其饗之也 文王之祭也事死者如事生思死者如不欲生忌日必哀稱諱如見親祀之忠也如見親之所愛如欲色然其文王與詩云明發不寐有懷二人文王之詩也祭之明日明發不寐饗而致之又從而思之祭之日樂與哀半饗之必樂已至必哀 仲尼嘗奉薦而進其親也愨其行也趨趨以數已祭子轅問曰子之言祭濟濟漆漆然今子之祭無濟濟漆漆何也子曰濟濟者容也遠也漆漆者容也自反也容以遠若容以自反也夫何神明之及交夫何濟濟漆漆之有乎反饋樂成薦其薦俎序其禮樂備其百官君子致其濟濟漆漆夫何愨愨之有乎夫言豈一端而已夫各有所當也 孝子將祭慮事不可以不豫比時具物不可以不備虛中以治之 宮室既脩牆屋既設百物既備夫婦齊戒沐浴盛服奉承而進之洞洞乎屬屬乎如弗勝如將失之其孝敬之心至也與薦其薦俎序其禮樂備其百官奉承而進之 於是論其志意以其愨愨以與神明交庶或饗之庶或饗之孝子之志也 孝子之祭也盡其愨而愨焉盡

其信而信焉盡其敬而敬焉盡其禮而不過失焉進退必敬如親聽命則或使之也
孝子之祭可知也其立之也敬以誦其進之也敬以愉其薦之也敬以欲退而立
如將受命已徹而退敬齊之色不絕於面孝子之祭也立而不誦固也進而不愉疏
也薦而不欲不愛也退立而不如受命敬也已徹而退無敬齊之色而忘本也如是
而祭失之矣 孝子之有深愛者必有和氣有和氣者必有愉色有愉色者必有婉
容孝子如執玉如奉盈洞洞屬屬然如弗勝如將失之嚴威儼恪非所以事親也成
人之道也 先王之所以治天下者五貴有德貴貴老敬長慈幼此五者先王之
所以定天下也貴有德何爲也爲其近於道也貴貴爲其近於君也貴老爲其近於
親也敬長爲其近於兄也慈幼爲其近於子也是故至孝近乎王至弟近乎霸至孝
近乎王雖天子必有父至弟近乎霸雖諸侯必有兄先王之教因而弗改所以領天
下國家也 子曰立愛自親始教民睦也立教自長始教民順也教以慈睦而民貴
有親教以敬長而民費用命孝以事親順以聽命錯諸天下無所不行 郊之祭也
喪者不敢哭凶服者不敢入國門敬之至也 祭之日君牽牲穆蒼君鄉大夫序從

既入廟門麗于碑。卿大夫袒而毛牛尚耳，鸞刀以割取腍臂，乃退。燔祭祭腥而退，敬之至也。郊之祭，大報天而主日，配以月。夏后氏祭其闇，殷人祭其陽，周人祭日以朝及闇。祭日於壇，祭月於坎，以別幽明以制上下。祭日於東，祭月於西，以別外內以端其位。日出於東，月生於西，陰陽長短終始相巡，以致天下之和。天下之禮，致反始也，致鬼神也，致和用也，致義也，致讓也，致反始以厚其本也，致鬼神以尊上也，致物用以立民紀也，致義則上下不悖逆矣，致讓以去爭也。合此五者以治天下之禮也。雖有奇邪而不治者，則微矣。宰我曰：吾聞鬼神之名，不知其所謂。子曰：氣也者，神之盛也；魄也者，鬼之盛也；合鬼與神教之至也。衆生必死死必歸土，此之謂鬼。骨肉斃於下，陰爲野土，其氣發揚于上，爲昭明，焄蒿悽愴，此百物之精也。神之著也。因物之精，制爲之極，明命鬼神以爲黔首，則百衆以畏，萬民以服。聖人以是爲未足也，築爲宮室，設爲宗祧，以別親疏，遠邇教民，反古復始，不忘其所由生也。衆之服自此，故聽且速也。二端既立，報以二禮。建設朝事，燔燎羶臠，見以蕭光以報氣也。此教衆反始也。薦黍稷羞肝肺，首心見間，以俠飶加以鬱鬯以報魄也。

教民相愛上下用情禮之至也

君子復古復始不忘其所由生也是以致其敬發其情竭力從事以報其親不敢弗盡也 是故昔者天子爲藉千畝冕而朱紘躬秉耒諸侯爲藉百畝冕而青紘躬秉耒以事天地山川社稷先古以爲醴酪齊盛於是乎取之敬之至也 古者天子諸侯必有養獸之官及歲時齊戒沐浴而躬朝之犧牲祭牲必於是取之敬之至也君召牛納而視之擇其毛而卜之吉然後養之君皮弁素積朔月月半君巡牲所以致力孝之至也 古者天子諸侯必有公桑蠶室近川而爲之築宮仞有三尺棘牆而外閉之及大昕之朝君皮弁素積卜三宮之夫人世婦之吉者使入蠶于蠶室奉種浴于川桑于公桑風戾以食之歲旣單矣世婦卒蠶奉繭以示于君遂獻繭于夫人夫人曰此所以爲君服與遂副禕而受之因少牢以禮之古之獻繭者其率用此與及良日夫人纁三盆手遂布于三宮夫人世婦之吉者使纁遂朱綠之玄黃之以爲黼黻文章服旣成君服以祀先王先公敬之至也 君子曰禮樂不可斯須去身致樂以治心則易直子諒之心油然而生矣易直子諒之心生則樂樂則安安則久久則

天天則神天則不言而信神則不怒而威致樂以治心者也致禮以治躬則莊敬莊敬則嚴威心中斯須不和不樂而鄙詐之心入之矣外貌斯須不莊不敬而慢易之心入之矣故樂也者動於內者也禮也者動於外者也樂極和禮極順內和而外順則民瞻其顏色而不與爭也望其容貌而衆不生慢易焉故德輝動乎內而民莫不承聽理發乎外而衆莫不承順故曰致禮樂之道而天下塞焉舉而錯之無難矣樂也者動於內者也禮也者動於外者也故禮主其減樂主其盈禮減而進以進爲文樂盈而反以反爲文禮減而不進則銷樂盈而不反則放故禮有報而樂有反禮得其報則樂樂得其反則安禮之報樂之反其義一也 曾子曰孝有三大孝尊親其次弗辱其下能養公明儀問於曾子曰夫子可以爲孝乎曾子曰是何言與是何言與君子之所爲孝者先意承志諱父母於道參直養者也安能爲孝乎曾子曰身也者父母之遺體也行父母之遺體敢不敬乎居處不莊非孝也事君不忠非孝也涖官不敬非孝也朋友不信非孝也戰陳無勇非孝也五者不遂裁及於親敢不敬乎亨孰羶膾嘗而薦之非孝也養也君子之所謂孝也者國人稱頌然曰幸哉有子如

此所謂孝也已衆之本教曰孝其行曰養養可能也敬爲難敬可能也安爲難安可能也卒爲難父母旣沒慎行其身不遺父母惡名可謂能終矣仁者仁此者也禮者履此者也義者宜此者也信者信此者也強者強此者也樂自順此生刑自反此作曾子曰夫孝置之而塞乎天地溥之而橫乎四海施諸後世而無朝夕推而放諸東海而準推而放諸西海而準推而放諸南海而準推而放諸北海而準詩云自西自東自南自北無思不服此之謂也曾子曰樹木以時伐焉禽獸以時殺焉夫子子曰斷一樹殺一獸不以其時非孝也孝有三小孝用力中孝用勞大孝不匱思慈愛忘勞可謂用力矣尊仁安義可謂用勞矣博施備物可謂不匱矣父母愛之喜而弗忘父母惡之懼而無怨父母有過諫而不逆父母旣沒必求仁者之粟以祀之此之謂禮終○樂正子春下堂而傷其足數月不出猶有憂色門弟子曰夫子之足瘳矣數月不出猶有憂色何也樂正子春曰善如爾之問也善如爾之問也吾聞諸曾子曾子聞諸夫子曰天之所生地之所養無人爲大父母全而生之子全而歸之可謂孝矣不虧其體不辱其身可謂全矣故君子頃步而弗敢忘孝也今予忘孝之道予是

以有憂色也壹舉足而不敢忘父母壹出言而不敢忘父母壹舉足而不敢忘父母是故道而不徑舟而不游不敢以先父母之遺體行殆壹出言而不敢忘父母是故惡言不出於口忿言不反於身不辱其身不羞其親可謂孝矣○昔者有虞氏貴德而尚齒夏后氏貴爵而尚齒殷人貴富而尚齒周人貴親而尚齒虞夏殷周天下之盛王也未有遺年者年之貴乎天下久矣次乎事親也○是故朝廷同爵則尚齒七十杖於朝君問則席八十不俟朝君問則就之而弟達乎朝廷矣 行肩而不併不錯則隨見老者則車徒辟斑白者不以其任行乎道路而弟達乎道路矣居鄉以齒而老窮不遺強不犯弱衆不暴寡而弟達乎州巷矣 古之道五十不爲甸徒頒禽隆諸長者而弟達乎狻狩矣軍旅什伍同爵則尚齒而弟達乎軍旅矣 孝弟發諸朝廷行乎道路至乎州巷放乎狻狩脩乎軍旅衆以義死之而弗敢犯也○祀乎明堂所以教諸侯之孝也食三老五更於大學所以教諸侯之弟也祀先賢於西學所以教諸侯之德也耕藉所以教諸侯之養也朝覲所以教諸侯之臣也五者天下之大教也 食三老五更於大學天子袒而割牲執醬而饋執爵而酌冕而摠于所以

教諸侯之弟也是故鄉里有齒而老窮不遺強不犯弱衆不暴寡此由大學東者也天子設四學當入學而大于齒 天子巡守諸侯待于竟天子先見百年者八十九十者東行四行者弗敢過西行者弗敢過欲言政者君就之可也 壹命齒于鄉里再命齒于族三命不齒族有七十者弗敢先七十者不有大故不入朝若有大故而入君必與之揖讓而后及爵者 天子有善讓德於天諸侯有善歸諸天子卿大夫有善薦於諸侯士庶人有善本諸父母存諸長老祿爵慶賞成諸宗順所以示順也昔者聖人建陰陽天地之情立以爲易易抱龜南面天子卷冕北面雖有明知之心必進斷其志焉示不敢專以尊天也善則稱人過則稱己教不伐以尊賢也 孝子將祭祀必有齊莊之心以慮事以具服物以脩宮室以治百事及祭之日顏色必溫行必恐如懼不及愛然其奠之也容貌必溫身必誦如語焉而未之然宿者皆出其立卑靜以正如將弗見然及祭之後陶陶遂遂如將復入然是故愨善不違身耳目不違心思慮不違親結諸心形諸色而術省之孝子之志也 建國之神位右社稷而左宗廟

祭統

凡治人之道莫急於禮禮有五經莫重於祭夫祭者非物自外至者也自中出生於心也心怵而奉之以禮是故唯賢者能盡祭之義 賢者之祭也必受其福非世所謂福也福者備也備者百順之名也無所不順者謂之備言內盡於己而外順於道也忠臣以事其君孝子以事其親其本一也上則順於鬼神外則順於君長內則以孝於親如此之謂備唯賢者能備能備然後能祭是故賢者之祭也致其誠信與其忠敬奉之以物道之以禮安之以樂參之以時明薦之而已矣不求其爲此孝子之心也祭者所以追養繼孝也孝者畜也順於道不道於倫是之謂畜 是故孝子之事親也有三道焉生則養沒則喪喪畢則祭養則觀其順也喪則觀其哀也祭則觀其敬而時也盡此三道者孝子之行也 既內自盡又外求助昏禮是也故國君取夫人之辭曰請君之玉女與寡人共有敝邑事宗廟社稷此求助之木也夫祭也者必夫婦親之所以備外內之官也官備則具備水草之菹陸產之醢小物備矣三牲之俎八簋之實美物備矣昆蟲之異草木之實陰陽之物備矣 凡天之所生地之

所長苟可薦者莫不咸在示盡物也外則盡物內則盡志此祭之心也是故天子親耕於南郊以共齊盛王后蠶於北郊以共純服諸侯耕於東郊亦以共齊盛夫人蠶於北郊以共冕服天子諸侯非莫耕也王后夫人非莫蠶也身致其誠信誠信之謂盡盡之謂敬敬盡然後可以事神明此祭之道也及時將祭君子乃齊齊之爲言齊也齊不齊以致齊者也是以君子非有大事也非有恭敬也則不齊不齊則於物無防也嗜欲無止也及其將齊也防其邪物訖其嗜欲耳不聽樂故記曰齊者不樂言不敢散其志也心不苟慮必依於道手足不苟動必依於禮是故君子之齊也專致其精明之德也故散齊七日以定之致齊三日以齊之定之之謂齊齊者精明之至也然後可以交於神明也是故先期旬有一日宮宰宿夫人夫人亦散齊七日致齊三日君致齊於外夫人致齊於內然後會於大廟君純冕立於阼夫人副褱立於東房君執圭瓊裸尸大宗執璋瓊亞裸及迎牲君執紉鄉大夫從士執芻宗婦執盎從夫人薦淶水君執鸞刀羞膾夫人薦豆此之謂夫婦親之及入舞君執子戚就舞位君爲東上冕而摠干率其羣臣以樂皇尸是故天子之祭也與天下樂之諸侯

祭也與竟內樂之冕而摠于率其羣臣以樂皇尸此與竟內樂之義也 夫祭有三重焉獻之屬莫重於裸聲莫重於升歌舞莫重於武宿夜此周道也凡三道者所以假於外而以增君子之志也故與志進退志輕則亦輕志重則亦重輕其志而求外之重也雖聖人弗能得也是故君子之祭也必身自盡也所以明重也道之以禮以奉三重而薦諸皇尸此聖人之道也 夫祭有餼餼者祭之末也不可不知也是故古之人有言曰善終者如始餼其是已是故古之君子曰尸亦餼鬼神之餘也惠術也可以觀政矣是故尸謾君與卿四人餼君起大夫六人餼臣餼君之餘也大夫起士八人餼賤餼貴之餘也士起各執其具以出陳于堂下百官進徹之下餼上之餘也凡餼之道每變以衆所以別貴賤之等而興施惠之象也是故以四簋黍見其脩於廟中也廟中者竟內之象也祭者澤之大者也是故上有大澤則惠必及下願上先下後耳非上積重而下有凍餒之民也是故上有大澤則民夫人待于下流知惠之必將至也由餼見之矣故曰可以觀政矣 夫祭之爲物大矣其興物備矣順以備者也其教之本與是故君子之教也外則教之以尊其君長內則教之以孝於

其親是故明君在上則諸臣服從崇事宗廟社稷則子孫順孝盡其道端其義而教生焉是故君子之事君也必身行之所不安於上則不以使下所惡於下則不以事上非諸人行諸己非教之道也是故君子之教也必由其本順之至也祭其是與故曰祭者教之本也已 夫祭有十倫焉見事鬼神之道焉見君臣之義焉見父子之倫焉見貴賤之等焉見親疏之殺焉見爵賞之施焉見夫婦之別焉見政事之均焉見長幼之序焉見上下之際焉此之謂十倫 鋪筵設同几爲依神也詔祝於室而出于祊此交神明之道也 君迎牲而不迎尸別嫌也尸在廟門外則疑於臣在廟中則全於君君在廟門外則疑於君入廟門則全於臣全於子是故不出者明君臣之義也 夫祭之道孫爲王父尸所使爲尸者於祭者子行也父北面而事之所以明子事父之道也此父子之倫也 尸飲五君洗玉爵獻卿尸飲七以瑤爵獻大夫尸飲九以散爵獻士及羣有司皆以齒明尊卑之等也 夫祭有昭穆昭穆者所以別父子遠近長幼親疏之序而無亂也是故有事於大廟則羣昭羣穆咸在而不失其倫此之謂親疏之殺也 古者明君爵有德而祿有功必賜爵祿於大廟示不敢

專也故祭之日一獻君降立于阼階之西南鄉所命北面史由君右執策命之再拜稽首受書以歸而舍奠于其廟此爵賞之施也 君卷冕立于阼夫人副褱立于東房夫人薦豆執校執醴授之執鐙尸酢夫人執柄夫人授尸執足夫婦相授受不相襲處酢必易爵明夫婦之別也 凡爲俎者以骨爲主骨有貴賤般人貴髀周人貴肩凡前貴於後俎者所以明祭之必有惠也是故貴者取貴骨賤者取賤骨貴者不重賤者不虛示均也惠均則政行政行則事成事成則功立功之所以立者不可不知也俎者所以明惠之必均也善爲政者如此故曰見政事之均焉 凡賜爵昭爲一穆爲一昭與昭齒稽與穆齒凡羣有司皆以齒此之謂長幼有序 夫祭有畀燁胞翟闈者惠下之道也唯有德之君爲能行此明足以見之仁足以與之畀之爲言與也能以其餘畀其下者也燁者甲吏之賤者也胞者肉吏之賤者也翟者樂吏之賤者也闈者守門之賤者也古者不使刑人守門此四守者吏之至賤者也尸又至尊以至尊既祭之末而不忘至賤而以其餘畀之是故明君在上則竟內之民無凍餒者矣此之謂上下之際 凡祭有四時春祭曰禘夏祭曰禘秋祭曰嘗冬祭曰烝

禘禘陽義也嘗烝陰義也禘者陽之盛也嘗者陰之盛也故曰莫重於禘嘗古者於禘也發爵賜服順陽義也於嘗也出田邑發秋政順陰義也故記曰嘗之日發公室示賞也草艾則絜未發秋政則民弗敢草也故曰禘嘗之義大矣治國之本也不可不知也明其義者君也能其事者臣也不明其義君人不全不能其事爲臣不全夫義者所以濟志也諸德之發也是故其德盛者其志厚其志厚者其義章其義章者其祭也敬祭敬則竟內之子孫莫敢不敬矣是故君子之祭也必身親澆之有故則使人可也雖使人也君不失其義者君明其義故也其德薄者其志輕疑於其義而求祭使之必敬也弗可得已祭而不敬何以爲民父母矣 夫鼎有銘銘者自名也自名以稱揚其先祖之美而明著之後世者也爲先祖者莫不有美焉莫不有惡焉銘之義稱美而不稱惡此孝子孝孫之心也唯賢者能之銘者論譎其先祖之有德善功烈勳勞慶賞聲名列於天下而酌之祭器自成其名焉以祀其先祖者也顯揚先祖所以崇孝也身比焉順也明示後世教也夫銘者壹稱而上下皆得焉耳矣是故君子之觀於銘也既美其所稱又美其所爲爲之者明足以見之仁足以與之知

足以利之可謂賢矣賢而勿伐可謂恭矣故衛孔悝之鼎銘曰六月丁亥公假于大廟公曰叔舅乃祖莊叔左右成公成公乃命莊叔隨難于漢陽卽宮于宗周奔走無射啓右獻公獻公乃命咸叔纂乃祖服乃考文叔興舊者欲作率慶士躬恤衛國其勤公家夙夜不解民咸曰休哉公曰叔舅予女銘若纂乃考服悝拜稽首曰對揚以辟之勤大命施于烝彝鼎此衛孔悝之鼎銘也古之君子論譏其先祖之美而明著之後世者也比其身以重其國家如此子孫之守宗廟社稷者其先祖無美而稱之是誣也有善而弗知不明也知而弗傳不仁也此三者君子之所恥也 昔者周公且有勳勞於天下周公既沒成王康王追念周公之所以勳勞者而欲尊魯故賜之以重祭外祭則郊社是也內祭則大嘗禘是也夫大嘗禘升歌清廟下而管象朱干玉戚以舞大武八佾以舞夏此天子之樂也康周公故以賜魯也子孫纂之至于今不廢所以明周公之德而又以重其國也

經解

孔子曰入其國其教可知也其爲人也溫柔敦厚詩教也疏通知遠書教也廣博易

良樂教也絮靜精微易教也恭儉莊敬禮教也屬辭比事春秋教也故詩之失愚書之失誣樂之失奢易之失賊禮之失煩春秋之失亂其爲人也溫柔敦厚而不愚則深於詩者也疏通知遠而不誣則深於書者也廣博易良而不奢則深於樂者也絮靜精微而不賊則深於易者也恭儉莊敬而不煩則深於禮者也屬辭比事而不亂則深於春秋者也 天子者與天地參故德配天地兼利萬物與日月並明明照四海而不遺微小其在朝廷則道仁聖禮義之序燕處則聽雅頌之音行步則有環佩之聲升車則有鸞和之音居處有禮進退有度百官得其宜萬事得其序詩云淑人君子其儀不忒其儀不忒正是四國此之謂也發號出令而民說謂之和上下相親謂之仁民不求其所欲而得之謂之信除去天地之害謂之義義與信和與仁霸王之器也有治民之意而無其器則不成 禮之於正國也猶衡之於輕重也繩墨之於曲直也規矩之於方圓也故衡誠縣不可欺以輕重繩墨誠陳不可欺以曲直規矩誠設不可欺以方圓君子審禮不可誣以姦詐是故隆禮由禮謂之有方之士不隆禮不由禮謂之無方之民敬讓之道也故以奉宗廟則敬以入朝廷則貴賤有位

以處室家則父子親兄弟和以處鄉里則長幼有序孔子曰安上治民莫善於禮此之謂也 故朝覲之禮所以明君臣之義也聘問之禮所以使諸侯相尊敬也喪祭之禮所以明臣子之恩也鄉飲酒之禮所以明長幼之序也昏姻之禮所以明男女之別也夫禮禁亂之所由生猶坊止水之所自來也故以舊坊爲無所用而壞之者必有水敗以舊禮爲無所用而去之者必有亂患 故昏姻之禮廢則夫婦之道苦而淫辟之罪多矣鄉飲酒之禮廢則長幼之序失而爭鬪之獄繁矣喪祭之禮廢則臣子之恩薄而倍死忘生者衆矣聘覲之禮廢則君臣之位失諸侯之行惡而倍畔侵陵之敗起矣 故禮之教化也微其止邪也於未形使人日徙善遠罪而不自知也是以先王隆之也易曰君子慎始差若豪釐繆以千里此之謂也

哀公問

哀公問於孔子曰大禮何如君子之言禮何其尊也孔子曰丘也小人不足以知禮君曰否吾子言之也孔子曰丘聞之民之所由生禮爲大非禮無以節事天地之神也非禮無以辨君臣上下長幼之位也非禮無以別男女父子兄弟之親昏姻疏數

之交也君子以此之爲尊敬然後以其所能教百姓不廢其會節有成事然後治其雕鏤文章黼黻以嗣其順之然後言其喪筭備其鼎俎設其豕腊脩其宗廟歲時以敬祭祀以序宗族卽安其居節醜其衣服卑其宮室車不雕幾器不刻鏤食不貳味以與民同利昔之君子之行禮者如此公曰今之君子胡莫行之也孔子曰今之君子好實無厭淫德不倦荒怠敖慢固民是盡午其衆以伐有道求得當欲不以其所昔之用民者由前今之用民者由後今之君子莫爲禮也○孔子侍坐於哀公哀公曰敢問人道誰爲大孔子愀然作色而對曰君之及此言也百姓之德也固臣敢無辭而對人道政爲大公曰敢問何謂爲政孔子對曰政者正也君爲正則百姓從政矣君之所爲百姓之所從也君所不爲百姓何從公曰敢問爲政如之何孔子對曰夫婦別父子親君臣嚴三者正則庶物從之矣公曰寡人雖無似也願聞所以行三言之道可得聞乎孔子對曰古之爲政愛人爲大所以治愛人禮爲大所以治禮敬爲大敬之至矣大昏爲大大昏至矣大昏旣至冕而親迎親之也親之也者親之也是故君子興敬爲親舍敬是遺親也弗愛不親弗敬不正愛與敬其政之本與公

曰寡人願有言然冕而親迎不已重乎孔子愀然作色而對曰合二姓之好以繼先聖之後以爲天地宗廟社稷之主君何謂已重乎公曰寡人固不固焉得聞此言也寡人欲問不得其辭請少進孔子曰天地不合萬物不生大昏萬世之嗣也君何謂已重焉孔子遂言曰內以治宗廟之禮足以配天地之神明出以治直言之禮足以立上下之敬物恥足以振之國恥足以興之爲政先禮禮其政之本與孔子遂言曰昔三代明王之政必敬其妻子也有道妻也者親之主也敢不敬與子也者親之後也敢不敬與君子無不敬也敬身爲大身也者親之枝也敢不敬與不能敬其身是傷其親傷其親是傷其本傷其本枝從而亡三者百姓之象也身以及身子以及子妃以及妃君行此三者則愼乎天下矣大王之道也如此則國家順矣 公曰敢問何謂敬身孔子對曰君子過言則民作辭過動則民作則君子言不過辭動不過則百姓不命而敬恭如是則能敬其身能敬其身則能成其親矣 公曰敢問何謂成親孔子對曰君子也者人之成名也百姓歸之名謂之君子之子是使其親爲君子也是爲成其親之名也已孔子遂言曰古之爲政愛人爲大不能愛人不能有其身

不能有其身不能安土不能安土不能樂天不能樂天不能成其身 公曰敢問何謂成身孔子對曰不過乎物 公曰敢問君子何貴乎天退也孔子對曰貴其不已如日月東西相從而不已也是天道也不閉其久是天道也無爲而物成是天道也已成而明是天道也 公曰寡人慙愚冥煩子志之心也孔子蹴然辟席而對曰仁人不過乎物孝子不過乎物是故仁人之事親也如事天事天如事親是故孝子成身公曰寡人既聞此言也無如後罪何孔子對曰君之及此言也是臣之福也

仲尼燕居

仲尼燕居子張子貢游侍縱言至於禮子曰居女三人者吾語女禮使女以禮周流無不備也子貢越席而對曰敢問何如子曰敬而不中禮謂之野恭而不中禮謂之給勇而不中禮謂之逆子曰給奪慈仁 子曰師爾過而商也不及子產猶衆人之母也能食之不能教也子貢越席而對曰敢問將何以爲此中者也子曰禮乎禮夫禮所以制中也 子貢退言游進曰敢問禮也者領惡而全好者與子曰然然則何如子曰郊社之義所以仁鬼神也嘗禘之禮所以仁昭穆也饋奠之禮所以仁死

喪也射鄉之禮所以仁鄉黨也食饗之禮所以仁賓客也子曰明乎郊社之義嘗禘之禮治國其如指諸掌而已乎是故以之居處有禮故長幼辨也以之閨門之內有禮故三族和也以之朝廷有禮故官爵序也以之田獵有禮故戎事閑也以之軍族有禮故武功成也是故官室得其度量鼎得其象味得其時樂得其節事得其式鬼神得其饗喪紀得其哀辨說得其黨官得其體政事得其施加於身而錯於前凡衆之動得其宜子曰禮者何也卽事之治也君子有其事必有其治治國而無禮譬猶瞽之無相與偃偃乎其何之譬如終夜有求於幽室之中非燭何見若無禮則手足無所錯耳目無所加進退揖讓無所制是故以之居處長幼失其別閨門三族失其和朝廷官爵失其序田獵戎事失其策軍族武功失其制官室失其度量鼎失其象味失其時樂失其節事失其式鬼神失其饗喪紀失其哀辨說失其黨官失其體政事失其施加於身而錯於前凡衆之動失其宜如此則無以祖洽於衆也子曰慎聽之女三人者吾語女禮猶有九焉大饗有四焉苟知此矣雖在獻畝之中事之聖人已兩君相見揖讓而入門入門而縣興揖讓而升堂升堂而樂闋下管象武夏籥

序興陳其薦俎序其禮樂備其百官如此而后君子知仁焉行中規還中矩和鸞中采齊客出以雍徹以振羽是故君子無物而不在禮矣人門而金作示情也升歌清廟示德也下而管象示事也是故古之君子不必親相與言也以禮樂相示而已子曰禮也者理也樂也者節也君子無理不動無節不作不能詩於禮繆不能樂於禮素薄於德於禮虛子曰制度在禮文爲在禮行之其在人乎子貢越席而對曰敢問變其窮與子曰古之人與古之人也達於禮而不達於樂謂之素達於樂而不達於禮謂之偏夫變達於樂而不達於禮是以傳於此名也古之人也 子張問政子曰師乎前吾語女乎君子明於禮樂舉而錯之而已子張復問子曰師爾以爲必鋪几筵升降酌獻酬酢然後謂之禮乎爾以爲必行綴兆興羽籥作鍾鼓然後謂之樂乎言而履之禮也行而樂之樂也君子力此二者以南面而立夫是以天下大平也諸侯朝萬物服體而百官莫敢不承事矣禮之所興衆之所治也禮之所廢衆之所亂也目巧之室則有與阼席則有上下車則有左右行則有隨立則有序古之義也室而無與阼則亂於堂室也席而無上下則亂於席上也車而無左右則亂於車也行

而無隨則亂於塗也立而無序則亂於位也昔聖帝明王諸侯辨貴賤長幼遠近男女外內莫敢相踰越皆由此塗出也三子者既得聞此言也於夫子昭然若發矇矣

孔子問居

孔子問居子夏侍子夏曰敢問詩云凱弟君子民之父母何如斯可謂民之父母矣孔子曰夫民之父母乎必達於禮樂之原以致五至而行三無以橫於天下四方有敗必先知之此之謂民之父母矣子夏曰民之父母既得而聞之矣敢問何謂五至孔子曰志之所至詩亦至焉詩之所至禮亦至焉禮之所至樂亦至焉樂之所至哀亦至焉哀樂相生是故正明目而視之不可得而見也傾耳而聽之不可得而聞也志氣塞乎天地此之謂五至子夏曰五至既得而聞之矣敢問何謂三無孔子曰無聲之樂無體之禮無服之喪此之謂三無子夏曰三無既得略而聞之矣敢問何詩近之孔子曰夙夜其命宥密無聲之樂也威儀逮逮不可選也無體之禮也凡民有喪匍匐救之無服之喪也子夏曰言則大矣美矣盛矣言盡於此而已乎孔子曰何爲其然也君子之服之也猶有五起焉子夏曰何如孔子曰無聲之樂氣志不

違無體之禮威儀遲遲無服之喪內恕孔悲無聲之樂氣志既得無體之禮威儀翼翼無服之喪施及四國無聲之樂氣志既從無體之禮上下和同無服之喪以畜萬邦無聲之樂日聞四方無體之禮日就月將無服之喪純德孔明無聲之樂氣志既起無體之禮施及四海無服之喪施于孫子 子夏曰三王之德參於天地敢問何如斯可謂參於天地矣孔子曰奉三無私以勞天下子夏曰敢問何謂三無私孔子曰天無私覆地無私載日月無私照奉斯三者以勞天下此之謂三無私其在詩曰帝命不違至于湯齊湯降不遲聖敬日齊昭假遲遲上帝是祇帝命式于九圍是湯之德也 天有四時春秋冬夏風雨霜露無非教也地載神氣神氣風霆風靈流形庶物露生無非教也 清明在躬氣志如神嗜欲將至有開必先天降時雨山川出雲其在詩曰嵩高惟嶽峻極于天惟嶽降神生甫及申惟申及甫惟周之翰四國于蕃四方于宣此文武之德也 三代之王也必先令聞詩云明明天子令聞不已三代之德也弛其文德協此四國大王之德也子夏蹶然而起負牆而立曰弟子敢不承乎

坊記

子言之君子之道辟則坊與坊民之所不足者也大爲之坊民猶踰之故君子禮以坊德刑以坊淫命以坊欲 子云小人貧斯約富斯驕約斯盜驕斯亂禮者因人之情而爲之節文以爲民坊者也故聖人之制富貴也使民富不足以驕貧不至於約貴不慊於上故亂益亡 子云貧而好樂富而好禮衆而以寧者天下其幾矣詩云民之貪亂寧爲荼毒故制國不過千乘都成不過百雉家富不過百乘以此坊民諸侯猶有畔者 子云夫禮者所以章疑別微以爲民坊者也故貴賤有等衣服有別朝廷有位則民有所讓子云天無二日土無二王家無二主尊無二上示民有君臣之別也春秋不稱楚越之王喪禮君不稱天大夫不稱君恐民之惑也詩云相彼盍旦尙猶患之子云君不與同姓同車與異姓同車不同服示民不嫌也以此坊民民猶得同姓以弑其君 子云君子辭貴不辭賤辭富不辭貧則亂益亡故君子與其使食浮於人也寧使人浮於食子云觴酒豆肉讓而受惡民猶犯齒衽席之上讓而坐下民猶犯貴朝廷之位讓而就賤民猶犯君詩云民之無良相怨一方受爵不讓

至於已斯亡子云君子貴人而賤己先人而後己則民作讓故稱人之君曰君自稱其君曰寡君子云利祿先死者而後生者則民不僭先亡者而後存者則民可以託詩云先君之思以畜寡人以此坊民民猶僭死而號無告子云有國家者貴人而賤祿則民興讓尙技而賤車則民興藝故君子約言小人先言子云上酌民言則下天上施上不酌民言則犯也下不天上施則亂也故君子信讓以蒞百姓則民之報禮重詩云先民有言詢於芻蕘于云善則稱人過則稱己則民不爭善則稱人過則稱己則怨益亡詩云爾卜爾筮履無咎言子云善則稱人過則稱己則民讓善詩云考卜惟王度是錡京惟龜正之武王成之子云善則稱君過則稱己則民作忠君陳曰爾有嘉謀嘉猷入告爾君子內女乃順之于外曰此謀此猷惟我君之德於乎是惟良顯哉子云善則稱親過則稱己則民作孝大誓曰予克紂非予武惟朕文考無罪紂克予非朕文考有罪惟予小于無良于云君子弛其親之過而敬其美論語曰三年無改於父之道可謂孝矣高宗云三年其惟不言言乃謹于云從命不忿微諫不倦勞而不怨可謂孝矣詩云孝子不匱子云睦於父母之黨可謂孝矣故

君子因睦以合族詩云此令兄弟綽綽有裕不令兄弟交相爲瘵子云於父之執可以乘其車不可以衣其衣君子以廣孝也子云小人皆能養其親君子不敬何以辨子云父子不同位以厚敬也書云厥辟不辟忝厥祖子云父母在不稱老言孝不言慈閨門之內戲而不歎君子以此坊民民猶薄於孝而厚於慈子云長民者朝廷敬老則民作孝子云祭祀之有尸也宗廟之主也示民有事也脩宗廟敬祀事教民追孝也以此坊民民猶忘其親子云敬則用祭器故君子不以菲廢禮不以美沒禮故食禮主人親饋則客祭主人不親饋則客不祭故君子苟無禮雖美不食焉易曰東鄰殺牛不如西鄰之禴祭寔受其福詩云既醉以酒既飽以德以此示民民猶爭利而忘義子云七日戒三日齋承一人焉以爲尸過之者趨走以教敬也醴酒在室醜酒在堂澄酒在下示不淫也尸飲三衆賓飲一示民有上下也因其酒肉聚其宗族以教民睦也故堂上觀乎室堂下觀乎上詩云禮儀卒度笑語卒獲子云賓禮每進以讓喪禮每加以遠浴於中霑飯於牖下小斂於戶內大斂於阼殯於客位祖於庭葬於墓所以示遠也殷人弔於壙周人弔於家示民不偕也子云死民之卒

事也吾從周以此坊民諸侯猶有葬而不葬者 子云升自客階受弔於賓位教民追孝也未沒喪不稱君示民不爭也故魯春秋記晉喪曰殺其君之子奚齊及其君卓以此坊民子猶有弑其父者 子云孝以事君弟以事長示民不貳也故君子有君不謀仕唯卜之日稱二君喪父三年喪君三年示民不疑也父母在不敢有其身不敢私其財示民有上下也故天子四海之內無客禮莫敢爲主焉故君適其臣升自阼階卽位於堂示民不敢有其室也父母在饋獻不及車馬示民不敢專也以此坊民民猶忘其親而貳其君 子云禮之先幣帛也欲民之先事而後祿也先財而後禮則民利無辭而行情則民爭故君子於有饋者弗能見則不視其饋易曰不耕穫不菑畚凶以此坊民民猶貴祿而賤行 子云君子不盡利以遺民詩云彼有遺秉此有不斂穧伊寡婦之利故君子仕則不稼田則不漁食時不力珍大夫不坐羊士不坐犬詩云采芣采芣無以下體德音莫遠及爾同死以此坊民民猶忘義而爭利以亡其身 子云夫禮坊民所淫章民之別使民無嫌以爲民紀者也故男女無媒不交無幣不相見恐男女之無別也以此坊民民猶有自獻其身詩云伐柯如之

何匪斧不克取妻如之何匪媒不得蕝麻如之何橫從其畝取妻如之何必告父母
子云取妻不取同姓以厚別也故買妾不知其姓則卜之以此坊民魯春秋猶去
夫人之姓曰吳其死曰孟子卒 子云禮非祭男女不交爵以此坊民陽侯猶殺繆
侯而竊其夫人故大饗廢夫人之禮 子云寡婦之子不有見焉則弗友也君子以
辟遠也故朋友之交主人不在不有大故則不入其門以此坊民民猶以色厚於德
子云好德如好色諸侯不下漁色故君子遠色以爲民紀故男女授受不親御婦人
則進左手姑姊妹女子子已嫁而反男子不與同席而坐寡婦不夜哭婦人疾問之
不問其疾以此坊民民猶淫泆而亂於族 子云昏禮壻親迎見於舅姑舅姑承子
以授壻恐事之違也以此坊民婦猶有不至者

中庸

天命之謂性率性之謂道脩道之謂教道也者不可須臾離也可離非道也是故君
子戒慎乎其所不睹恐懼乎其所不聞莫見乎隱莫顯乎微故君子慎其獨也喜怒哀
哀樂之未發謂之中發而皆中節謂之和中也者天下之大本也和也者天下之達

道也致中和天地位焉萬物育焉 仲尼曰君子中庸小人反中庸君子之中庸也君子而時中小人之中庸也小人而無忌憚也子曰中庸其至矣乎民鮮能久矣子曰道之不行也我知之矣知者過之愚者不及也道之不明也我知之矣賢者過之不肖者不及也人莫不飲食也鮮能知味也子曰道其不行矣夫 子曰舜其大知也與舜好問而好察邇言隱惡而揚善執其兩端用其中於民其斯以爲舜乎 子曰人皆曰予知驩而納諸罟獲陷阱之中而莫之知辟也人皆曰予知擇乎中庸而不能期月守也 子曰回之爲人也擇乎中庸得一善則拳拳服膺而弗失之矣子曰天下國家可均也爵祿可辭也白刃可蹈也中庸不可能也 子路問強子曰南方之強與北方之強與抑而強與寬柔以教不報無道南方之強也君子居之衽金革死而不厭北方之強也而強者居之故君子和而不流強哉矯中立而不倚強哉矯國有道不變塞焉強哉矯國無道至死不變強哉矯 子曰素隱行怪後世有述焉吾弗爲之矣君子遵道而行半塗而廢吾弗能已矣君子依乎中庸遯世不見知而不悔唯聖者能之君子之道費而隱夫婦之愚可以與知焉及其至也雖聖人亦

有所不知焉夫婦之不肖可以能行焉及其至也雖聖人亦有所不能焉天地之大
也人猶有所憾故君子語大天下莫能載焉語小天下莫能破焉詩云鸞飛戾天魚
躍于淵言其上下察也君子之道造端乎夫婦及其至也察乎天地 子曰道不遠
人人之爲道而遠人不可以爲道詩云伐柯伐柯其則不遠執柯以伐柯睨而視之
猶以爲遠故君子以人治人改而止忠恕違道不遠施諸己而不願亦勿施於人君
子之道四丘未能一焉所求乎子以事父未能也所求乎臣以事君未能也所求乎
弟以事兄未能也所求乎朋友先施之未能也庸德之行庸言之謹有所不足不敢
不勉有餘不敢盡言願行行願言君子胡不慥慥爾君子素其位而行不願乎其外
素富貴行乎富貴素貧賤行乎貧賤素夷狄行乎夷狄素患難行乎患難君子無入
而不自得焉在上位不陵下在下位不援上正己而不求於人則無怨上不怨天下
不尤人故君子居易以俟命小人行險以徼幸 子曰射有似乎君子失諸正鵠反
求諸其身君子之道辟如行遠必自邇辟如登高必自卑詩曰妻子好合如鼓瑟琴
兄弟既翕和樂且耽宜爾室家樂爾妻帑子曰父母其順矣乎 子曰鬼神之爲德

其盛矣乎視之而弗見聽之而弗聞體物而不可遺使天下之人齊明盛服以承祭祀洋洋乎如在其上如在其左右詩曰神之格思不可度思矧可射思夫微之顯誠之不可揜如此夫子曰舜其大孝也與德爲聖人尊爲天子富有四海之內宗廟饗之子孫保之故大德必得其位必得其祿必得其名必得其壽故天之生物必因其材而篤焉故栽者培之傾者覆之詩曰嘉樂君子憲憲令德宜民宜人受祿於天保佑命之自天申之故大德者必受命子曰無憂者其惟文王乎以王季爲父以武王爲子父作之子述之武王纘大王王季文王之緒壹戎衣而有天下身不失天下之顯名尊爲天子富有四海之內宗廟饗之子孫保之武王末受命周公成文武之德追王大王王季上祀先公以天子之禮斯禮也達乎諸侯大夫及士庶人父爲大夫子爲士葬以大夫祭以士父爲士子爲大夫葬以士祭以大夫期之喪達乎大夫三年之喪達乎天子父母之喪無貴賤一也子曰武王周公其達孝矣乎夫孝者善繼人之志善述人之事者也春秋脩其祖廟陳其宗器設其裳衣薦其時食宗廟之禮所以序昭穆也序爵所以辨貴賤也序事所辨賢也旅酬下爲上所以逮賤

也燕毛所以序齒也踐其位行其禮奏其樂敬其所尊愛其所親事死如生事亡如事存孝之至也郊社之禮所以事上帝也宗廟之禮所以祀乎其先也明乎郊社之禮禘嘗之義治國其如示諸掌乎 哀公問政子曰文武之政布在方策其人存則其政舉其人亡則其政息人道敏政地道敏樹夫政也者蒲盧也故爲政在人取人以身脩身以道脩道以仁仁者人也親親爲大義者宜也尊賢爲大親親之義尊賢之等禮所生也在下位不獲乎上民不可得而治矣故君子不可以不脩身思脩身不可以不事親思事親不可以不知人思知人不可以不知天天下之達道五所以行之者三曰君臣也父子也夫婦也昆弟也朋友之交也五者天下之達道也知仁勇三者天下之達德也所以行之者一也或生而知之或學而知之或困而知之及其知之一也或安而行之或利而行之或勉強而行之及其成功一也 子曰好學近乎知力行近乎仁知恥近乎勇知斯三者則知所以脩身知所以脩身則知所以治人知所以治人則知所以治天下國家矣凡爲天下國家有九經曰脩身也尊賢也親親也敬大臣也體羣臣也子庶民也來百工也柔遠人也懷諸侯也脩身則

道立尊賢則不惑親親則諸父昆弟不怨敬大臣則不眩體羣臣則士之報禮重子庶民則百姓勸來百工則財用足柔遠人則四方歸之懷諸侯則天下畏之齊明盛服非禮不勸所以脩身也去讒遠色賤貨而貴德所以勸賢也尊其位重其祿同其好惡所以勸親親也官盛任使所以勸大臣也忠信重祿所以勸士也時使薄斂所以勸百姓也日省月試既廩稱事所以勸百工也送往迎來嘉善而矜不能所以柔遠人也繼絕世舉廢國治亂持危朝聘以時厚往而薄來所以懷諸侯也凡爲天下國家有九經所以行之者一也凡事豫則立不豫則廢言前定則不跲事前定則不困行前定則不疚道前定則不窮

在下位不獲乎上民不可得而治矣獲乎上有道不信乎朋友不獲乎上矣信乎朋友有道不順乎親不信乎朋友矣順乎親有道反諸身不誠不順乎親矣誠身有道不明乎善不誠乎身矣誠者天之道也誠之者人之道也誠者不勉而中不思而得從容中道聖人也誠之者擇善而固執之者也博學之審問之慎思之明辨之篤行之有弗學學之弗能弗措也有弗問問之弗知弗措也有弗思思之弗得弗措也

有弗辨辨之弗明弗措也有弗行之弗篤弗措也人一能之己百之人十能之己千之果能此道矣雖愚必明雖柔必強 自誠明謂之性自明誠謂之教誠則明矣明則誠矣唯天下至誠爲能盡其性能盡其性則能盡人之性能盡人之性則能盡物之性能盡物之性則可以贊天地之化育可以贊天地之化育則可以與天地參矣 其次致曲曲能有誠誠則形形則著著則明明則動動則變變則化唯天下至誠爲能化 至誠之道可以前知國家將興必有禎祥國家將亡必有妖孽見乎蓍龜動乎四體禍福將至善必先知之不善必先知之故至誠如神 誠者自成也而道自道也誠者物之終始不誠無物是故君子誠之爲貴誠者非自成己而已也所以成物也成己仁也成物知也性之德也合外內之道也故時措之宜也故至誠無息不息則久久則徵徵則悠遠悠遠則博厚博厚則高明博厚所以載物也高明所以覆物也悠久所以成物也博厚配地高明配天悠久無疆如此者不見而章不動而變無爲而成天地之道可豈言而盡也其爲物不貳則其生物不測天地之道博也厚也高也明也悠也久也 今夫天斯昭昭之多及其無窮也日月星辰繫焉萬

物覆焉今夫地一撮土之多及其廣厚載華嶽而不重振河海而不洩萬物載焉今夫山一卷石之多及其廣大草木生之禽獸居之寶藏興焉今夫水一勺之多及其不測鼉鼉蛟龍魚鼈生焉貨財殖焉詩曰惟天之命於穆不已蓋曰天之所以爲天也於乎不顯文王之德之純蓋曰文王之所以爲文也純亦不已 大哉聖人之道洋洋乎發育萬物峻極于天優優大哉禮儀三百威儀三千待其人然後行故曰苟不至德至道不凝焉 故君子尊德性而道問學致廣大而盡精微極高明而道中庸溫故而知新敦厚以崇禮 是故居上不驕爲下不倍國有道其言足以興國無道其默足以容詩曰既明且哲以保其身其此之謂與 子曰愚而好自用賤而好自專生乎今之世反古之道如此者裁及其身者也非天子不議禮不制度不考文今天下車同軌書同文行同倫雖有其位苟無其德不敢作禮樂焉雖有其德苟無其位亦不敢作禮樂焉 子曰吾說夏禮杞不足徵也吾學殷禮有宋存焉吾學周禮今用之吾從周王天下有三重焉其寡過矣乎上焉者雖善無徵無徵不信不信民弗從下焉者雖善不尊不尊不信不信民弗從故君子之道本諸身徵諸庶民考

諸三王而不繆建諸天地而不悖質諸泉神而無疑百世以俟聖人而不惑質諸鬼神而無疑知天也百世以俟聖人而不惑知人也是故君子動而世爲天下道行而世爲天下法言而世爲天下則遠之則有望近之則不厭詩曰在彼無惡在此無射庶幾夙夜以永終譽君子未有不如此而蚤有譽於天下者也 仲尼祖述堯舜憲章文武上律天時下襲水土辟如天地之無不持載無不覆幬辟如四時之錯行如日月之代明萬物並育而不相害道並行而不相悖小德川流大德教化此天地之所以爲大也唯天下至聖爲能聰明睿知足以有臨也寬裕溫柔足以有容也發強剛毅足以有執也齊莊中正足以有敬也文理密察足以有別也溥博淵泉而時出之溥博如天淵泉如淵見而民莫不敬言而民莫不信行而民莫不說是以聲名洋溢乎中國施及蠻貊舟車所至人力所通天之所覆地之所載日月所照霜露所降凡有血氣者莫不尊親故曰配天唯天下至誠爲能經綸天下之大經立天下之大本知天地之化育夫焉有所倚肫肫其仁淵淵其淵浩浩其天苟不固聰明聖知達天德者其孰能知之詩曰衣錦尙絀惡其文之著也故君子之道闇然而日章小人

之道的然而日亡君子之道淡而不厭簡而文溫而理知遠之近知風之自知微之顯可與入德矣詩云潛雖伏矣亦孔之昭故君子內省不疚無惡於志君子所不可及者其唯人之所不見乎詩云相在爾室尙不愧于屋漏故君子不動而敬不言而信詩曰奏假無言時靡有爭是故君子不賞而民勸不怒而民威於鈇鉞詩曰不顯惟德百辟其刑之是故君子篤恭而天下平詩曰予懷明德不大聲以色 子曰聲色之於以化民末也詩曰德輶如毛毛猶有倫上天之載無聲無臭至矣

表記

子言之歸乎君子隱而顯不矜而莊不厲而威不言而信 子曰君子不失足於人
不失色於人不失口於人是故君子貌足畏也色足懾也言足信也甫刑曰敬忌而
罔有擇言在躬 子曰褻褻之不相因也欲民之母相瀆也子曰祭極敬不繼之以
樂朝極辨不繼之以倦 子曰君子慎以辟禍篤以不揜恭以遠恥 子曰君子莊
敬日強安肆日偷君子不以一日使其躬僂焉如不終日子曰齊威以事鬼神擇日
月以見君恐民之不敬也子曰狎侮死焉而不畏也 子曰無辭不相接也無禮不

相見也欲民之母相襲也易曰初筮告再三瀆瀆則不告 子言之仁者天下之表也義者天下之制也報者天下之利也子曰以德報德則民有所勸以怨報怨則民有所懲詩曰無言不讎無德不報大甲曰民非后無能胥以寧后非民無以辟四方子曰以德報怨則寬身之仁也以怨報德則刑戮之民也子曰無欲而好仁者無畏而惡不仁者天下一人而已矣是故君子議道自己而置法以民子曰仁有三與仁同功而異情與仁同功其仁未可知也與仁同過然後其仁可知也仁者安仁知者利仁畏罪者強仁仁者右也道者左也仁者入也道者義也厚於仁者薄於義親而不尊厚於義者薄於仁尊而不親道有至義有考至道以王義道以霸考道以爲無失 子言之仁有數義有長短小大中心慍怛愛人之仁也率法而強之資仁者也詩云豐水有芑武王豈不仕詒厥孫謀以燕翼子武王烝哉數世之人也國風曰我今不闕皇恤我後終身之仁也 子曰仁之爲器重其爲道遠舉者莫能勝也行者莫能致也取數多者仁也夫勉於仁者不亦難乎是故君子以義度人則難爲人以人望人則賢者可知已矣子曰中心安仁者天下一人而已矣大雅曰德輶如毛民

鮮克舉之我儀圖之惟仲山甫舉之愛莫助之小雅曰高山仰止景行行止子曰詩之好仁如此鄉道而行中道而廢忘身之老也不知年數之不足也俛焉日有孳孳斃而后已子曰仁之難成久矣人人失其所好故仁者之過易辭也子曰恭近禮儉近仁信近情敬讓以行此雖有過其不甚矣夫恭寡過情可信儉易容也以此失之者不亦鮮乎詩曰溫溫恭人惟德之基子曰仁之難成久矣惟君子能之是故君子不以其所能者病人不以其所不能者愧人是故聖人之制行也不制以己使民有所勸勉愧恥以行其言禮以節之信以結之容貌以文之衣服以移之朋友以極之欲民之有壹也小雅曰不愧于人是不畏于天是故君子服其服則文以君子之容有其容則文以君子之辭遂其辭則實以君子之德是故君子恥服其服而無其容恥有其容而無其辭恥有其辭而無其德恥有其德而無其行是故君子衰絰則有衰色端冕則有敬色甲冑則有不可辱之色詩云惟鷦在梁不濡其翼彼記之子不稱其服 子言之君子之所謂義者貴賤皆有事於天下天子親耕粢盛秬鬯以事上帝故諸侯勤以輔事於天子子曰下之事上也雖有庇民之大德不敢有君民之

心仁之厚也是故君子恭儉以求役仁信讓以求役禮不自尙其事不自尊其身儉於位而寡於欲讓於賢卑己而尊人小心而畏義求以事君得之自是不得自是以聽天命詩云莫莫葛藟施于條枚凱弟君子求福不回其舜禹文王周公之謂與有君民之大德有事君之小心詩云惟此文王小心翼翼昭事上帝聿懷多福厥德不回以受方國子曰先王謚以尊名節以壹惠恥名之浮於行也是故君子不自大其事不自尙其功以求處情過行弗率以求處厚彰人之善而美人之功以求下賢是故君子雖自卑而民敬尊之子曰后稷天下之爲烈也豈一手一足哉唯欲行之浮於名也故自謂便人 子言之君子之所謂仁者其難乎詩云凱弟君子民之父母凱以強教之弟以說安之樂而毋荒有禮而親威莊而安孝慈而敬使民有父之尊有母之親如此而后可以爲民父母矣非至德其孰能如此乎今父之親于也親賢而下無能母之親于也賢則親之無能則憐之毋親而不尊父尊而不親水之於民也親而不尊火尊而不親土之於民也親而不尊天尊而不親命之於民也親而不尊鬼尊而不親 子曰夏道尊命事鬼神而遠之近人而忠焉先祿而後威先賞

而後罰親而不尊其民之敝慙而愚喬而野朴而不文 殷人尊神率民以事神先鬼而後禮先罰而後賞尊而不親其民之敝蕩而不靜勝而無恥周人尊禮尙施事鬼敬神而遠之近人而忠焉其賞罰用爵列親而不尊其民之敝利而巧文而不慙賊而蔽 子曰夏道未瀆辭不求備不大望於民民未厭其親殷人未瀆禮而求備於民周人強民未瀆神而賞爵刑罰窮矣 子曰虞夏之道寡怨於民殷周之道不勝其敝子曰虞夏之質殷周之文至矣虞夏之文不勝其質殷周之質不勝其文子言之曰後世雖有作者虞帝弗可及也已矣君天下生無私死不厚其子子民如父母有憐恤之愛有忠利之教親而尊安而敬威而愛富而有禮惠而能散其君子尊仁畏義恥費輕實忠而不犯義而順文而靜寬而有辨甫刑曰德威惟威德明惟明非虞帝其孰能如此乎 子言之事君先資其言拜自獻其身以成其信是故君有責於其臣臣有死於其言故其受祿不誣其受罪益寡 子曰事君大言入則望大利小言入則望小利故君子不以小言受大祿不以大言受小祿易曰不家食吉子曰事君不下達不尙辭非其人弗自小雅曰靖共爾位正直是與神之聽之式穀

以女 子曰事君遠而諫則調也近而不陳則尸利也子曰邇臣守和宰正百官大臣慮四方子曰事君欲諫不欲陳詩云心乎愛矣瑕不謂矣中心藏之何日忘之子曰事君難進而易退則位有序易進而難退則亂也故君子三揖而進一辭而退以遠亂也子曰事君三違而不出竟則利祿也人雖曰不要吾弗信也子曰事君慎始而敬終子曰事君可貴可賤可富可貧可生可殺而不可使爲亂 子曰事君軍旅不辟難朝廷不辭賤慮其位而不履其事則亂也故君使其臣得志則慎慮而從之否則孰慮而從之終事而退臣之厚也易曰不事王侯高尙其事 子曰唯天子受命于天士受命于君故君命順則臣有順命君命逆則臣有逆命詩曰鶉之姜姜鶉之賁賁人之無良我以爲君 子曰君子不以辭盡人故天下有道則行有枝葉天下無道則辭有枝葉是故君子於有喪者之側不能贈焉則不問其所費於有病者之側不能饋焉則不問其所欲有客不能館則不問其所舍故君子之接如水小人之接如醴君子淡以成小人甘以壞小雅曰盜言孔甘亂是用餒 子曰君子不以口譽人則民作忠故君子問人之寒則衣之問人之飢則食之稱人之美則爵之

國風曰心之憂矣於我歸說 子曰口惠而實不至怨菑及其身是故君子與其有諾責也寧有己怨國風曰言笑晏晏信誓旦旦不思其反反是不思亦已焉哉 子曰君子不以色親人情疏而貌親在小人則穿窬之盜也與子曰情欲信辭欲巧子言之昔三代明王皆事天地之神明無非卜筮之用不敢以其私褻事上帝是故不犯日月不違卜筮卜筮不相襲也大事有時日小事無時日有筮外事用剛日內事用柔日不違龜筮子曰牲牲禮樂齊盛是以無害乎鬼神無怨乎百姓 子曰后稷之祀易富也其辭恭其欲儉其祿及子孫詩曰后稷兆祀庶無罪悔以迄于今子曰大人之器威敬天子無筮諸侯有守筮天子道以筮諸侯非其國不以筮卜宅寢室天子不卜處大廟子曰君子敬則用祭器是以不廢日月不違龜筮以敬事其君長是以上不瀆於民下不褻於上

緇衣

子言之曰爲上易事也爲下易知也則刑不煩矣 子曰好賢如緇衣惡惡如巷伯則爵不瀆而民作愿刑不試而民咸服大雅曰儀刑文王萬國作孚 子曰夫民教

之以德齊之以禮則民有格心教之以政齊之以刑則民有遜心故君民者子以愛之則民親之信以結之則民不倍恭以涖之則民有孫心甫刑曰苗民匪用命制以刑惟作五虐之刑曰法是以民有惡德而遂絕其世也 子曰下之事上也不從其所令從其所行上好是物下必有甚者矣故上之所好惡不可不慎也是民之表也 子曰禹立三年百姓以仁遂焉豈必盡仁詩云赫赫師尹民具爾瞻甫刑曰一人有慶兆民賴之大雅曰成王之孚下土之式 子曰上好仁則下之爲仁爭先人故長民者章志貞教尊仁以子愛百姓民致行己以說其上矣詩云有棣德行四國順之 子曰王言如絲其出如綸王言如綸其出如紉故大人不倡游言可言也不可 行君子弗言也可行也不可言君子弗行也則民言不危行而行不危言矣詩云淑慎爾止不讐于儀 子曰君子道人以言而禁人以行故言必慮其所終而行必稽其所敝則民謹於言而慎於行詩云慎爾出話敬爾威儀大雅曰穆穆文王於緝熙敬止 子曰長民者衣服不貳從容有常以齊其民則民德壹詩云彼都人士狐裘黃黃其容不改出言有章行歸于周萬民所望 子曰爲上可望而知也爲下可述

而志也則君不疑於其臣而臣不惑於其君矣尹吉曰惟尹躬及湯咸有壹德詩云淑人君子其儀不忒 子曰有國者章善癩惡以示民厚則民情不忒詩云靖共爾位好是正直 子曰上人疑則百姓惑下難知則君長勞故君民者章好以示民俗慎惡以御民之淫則民不惑矣臣儀行不重辭不援其所不及不煩其所不知則君不勞矣詩云上帝板板下民卒瘞小雅曰匪其止共隍王之邛 子曰政之不行也教之不成也爵祿不足勸也刑罰不足恥也故上不可以褻刑而輕爵康誥曰敬明乃罰甫刑曰播刑之不迪 子曰大臣不親百姓不寧則忠敬不足而富貴已過也大臣不治而邇臣比矣故大臣不可不敬也是民之表也邇臣不可不慎也是民之道也君毋以小謀大毋以遠言近毋以內圖外則大臣不怨邇臣不疾而遠臣不蔽矣葉公之願命曰毋以小謀敗大作毋以嬖御人疾莊后毋以嬖御士疾莊士大夫卿士子曰大人不親其所賢而信其所賤民是以親失而教是以煩詩云彼求我則如不我得執我仇仇亦不我力君陳曰未見聖若己弗克見既見聖亦不克由聖 子曰小人溺於水君子溺於口大人溺於民皆在其所褻也夫水近於人而溺人德

易狎而難親也易以溺人口費而煩易出難悔易以溺人夫民閉於人而有鄙心可敬不可慢易以溺人故君子不可以不慎也太甲曰毋越厥命以自覆也若虞機張往省括于厥度則釋兌命曰惟口起羞惟甲冑起兵惟衣裳在笥惟子戈省厥躬太甲曰天作孽可違也自作孽不可以逭尹吉曰惟尹躬天見于西邑夏自周有終相亦惟終 子曰民以君爲心君以民爲體心莊則體舒心肅則容敬心好之身必安之君好之民必欲之心以體全亦以體傷君以民存亦以民亡詩云昔晉有先正其言明且清國家以寧都邑以成庶民以生誰能秉國成不自爲正卒勞百姓君雅曰夏日暑雨小民惟曰怨資冬祁寒小民亦惟曰怨 子曰下之事上也身不正言不信則義不壹行無類也子曰言有物而行有格也是以生則不可奪志死則不可奪名故君子多聞質而守之多志質而親之精知略而行之君陳曰出入自爾師虞庶言同詩云淑人君子其儀一也 子曰唯君子能好其正小人毒其正故君子之朋友有鄉其惡有方是故邇者不惑而遠者不疑也詩云君子好仇 子曰輕絕貴賤而重絕富貴則好賢不堅而惡惡不著也人雖曰不利善不信也詩云朋友攸攝攝

以威儀 子曰私惠不歸德君子不自留焉詩云人之好我示我周行 子曰苟有車必見其軾苟有衣必見其敝人苟或言之必聞其聲苟或行之必見其成葛覃曰服之無射 子曰言從而行之則言不可飾也行從而言之則行不可飾也故君子寡言而行以成其信則民不得大其美而小其惡詩云白圭之玷尚可磨也斯言之玷不可爲也小雅曰允也君子展也大成君爽曰昔在上帝展田觀文王之德其集大命于厥躬 子曰南人有言曰人而無恆不可以爲卜筮古之遺言與龜筮猶不能知也而況於人乎詩云我龜既厭不我告猶兌命曰爵無及惡德民立而正事純而祭祀是爲不敬事煩則亂事神則難易曰不恆其德或承之羞恆其德貞婦人吉夫子凶

奔喪

奔喪之禮始聞親喪以哭蒼使者盡哀問故又哭盡哀 遂行日行百里不以夜行唯父母之喪見星而行見星而舍若未得行則成服而后行過國主竟哭盡哀而止哭辟市朝望其國竟哭至於家入門左升自西階墮東西而坐哭盡哀括髮袒降堂

東卽位西鄉哭成踊髮經于序東絞帶反位拜賓成踊送賓反位有賓後至者則拜之成踊送賓皆如初衆主人兄弟皆出門出門哭止闔門相者告就次於又哭括髮袒成踊於三哭猶括髮袒成踊三日成服拜賓送賓皆如初○奔喪者非主人則主人爲之拜賓送賓奔喪者自齊衰以下入門左中庭北面哭盡哀免麻于序東卽位袒與主人哭成踊於又哭三哭皆免袒有賓則主人拜賓送賓丈夫婦人之待之也皆如朝夕哭位無變也 奔母之喪面面哭盡哀括髮袒降堂東卽位西鄉哭成踊髮免經于序東拜賓送賓皆如奔父之禮於又哭不括髮○婦人奔喪升自東階殯東西面坐哭盡哀東壘卽位與主人拾踊 奔喪者不及殯先之墓北面坐哭盡哀主人之待之也卽位於墓左婦人墓右成踊盡哀括髮東卽主人位經絞帶哭成踊拜賓反位成踊相者告事畢遂冠歸入門左北面哭盡哀括髮袒成踊東卽位拜賓成踊賓出主人拜送有賓後至者則拜之成踊送賓如初衆主人兄弟皆出門出門哭止相者告就次於又哭括髮成踊於三哭猶括髮成踊三日成服於五哭相者告事畢爲母所以異於父者壹括髮其餘免以終事他如奔父之禮 齊衰以下不及

殯先之墓西而哭盡哀免麻于東方卽位與主人哭成踊襲有賓則主人拜賓送賓
賓有後至者拜之如初相者告事畢遂冠歸入門左北面哭盡哀免袒成踊東卽位
拜賓成踊賓出主人拜送於又哭免袒成踊於三哭猶免袒成踊三日成服於五哭
相者告事畢 聞喪不得奔喪哭盡哀問故又哭盡哀乃爲位括髮袒成踊襲經絞
帶卽位拜賓反位成踊賓出主人拜送于門外反位若有賓後至者拜之成踊送賓
如初於又哭括髮袒成踊於三哭猶括髮袒成踊三日成服於五哭拜賓送賓如初
若除喪而后歸則之墓哭成踊東括髮袒經拜賓成踊送賓反位又哭盡哀遂除
於家不哭主人之待之也無變於服與之哭不踊 自齊衰以下所以異者免麻
凡爲位非親喪齊衰以下皆卽位哭盡哀而東免經卽位袒成踊襲拜賓反位哭成
踊送賓反位相者告就次三日五哭卒主人出送賓衆主人兄弟皆出門哭止相者
告事畢成服拜賓若所爲位家遠則成服而往 齊衰望鄉面哭大功望門而哭小
功至門而哭緦麻卽位而哭 哭父之黨於廟母妻之黨於寢師於廟門外朋左於
寢門外所識於野張帷凡爲位不奠哭天子九諸侯七卿大夫五士三大夫哭諸侯

不敢拜賓諸臣在他國爲位而哭不敢拜賓與諸侯爲兄弟亦爲位而哭凡爲位者登祖 所識者弔先哭于家而後之墓皆爲之成踊從主人北而而踊凡喪父在父爲主父沒兄弟同居各主其喪親同長者主之不同親者主之 聞遠兄弟之喪旣除喪而后聞喪免袒成踊拜賓則尙左手 無服而爲位者唯嫂叔及婦人降而無服者麻 凡奔喪有大夫至袒拜之成踊而后襲於士襲而后拜之

問喪

親始死雞斯徒跳扱上衽交手哭惻怛之心痛疾之意傷腎乾肝焦肺水漿不入口三日不舉火故鄰里爲之糜粥以飲食之夫悲哀在中故形變於外也痛疾在心故口不甘味身不安美也三日而斂在牀曰尸在棺曰柩動尸舉柩哭踊無數惻怛之心痛疾之意悲哀志慙氣盛故袒而踊之所以動體安心下氣也婦人不宜袒故發芻擊心爵踊股股田田如壞牆然悲哀痛疾之至也故曰辟踊哭泣哀以送之送形而往迎精而反也其往送也望望然汲汲然如有追而弗及也其反哭也皇皇然若有求而弗得也故其往送也如慕其反也如疑求而無所得之也入門而弗見也上

堂又弗見也入室又弗見也亡矣喪矣不可復見已矣故哭泣辟踊盡哀而止矣心
悵焉愴焉惚焉憤焉心絕志悲而已矣祭之宗廟以鬼饗之徼幸復反也成壙而歸
不敢入處室居於倚廬哀親之在外也寢苦枕塊哀親之在土也故哭泣無時服勤
三年思慕之心孝子之志也人情之實也或問曰死三日而后斂者何也曰孝子親
死悲哀志慙故匍匐而哭之若將復生然安可得奪而斂之也故曰三日而后斂者
以俟其生也三日而不生亦不生矣孝子之心亦益衰矣家室之計衣服之具亦可
以成矣親戚之遠者亦可以至矣是故聖人爲之斷決以三日爲之禮制也或問曰
冠者不肉袒何也曰冠至尊也不居肉袒之體也故爲之免以代之也然則禿者不
免僇者不袒跛者不踊非不悲也身有痼疾不可以備禮也故曰喪禮唯哀爲主矣
女子哭泣悲哀擊胷傷心男子哭泣悲哀稽顙觸地無容哀之至也或問曰免者以
何爲也曰不冠者之所服也禮曰童子不總唯當室總總者其免也當室則免而杖
矣或問曰杖者何也曰竹桐一也故爲父苴杖苴杖竹也爲母削杖削杖桐也或問
曰杖者以何爲也曰孝子喪親哭泣無數服勤三年身病體羸以杖扶病也則父在

不敢杖矣尊者有故也堂上不杖辟尊者之處也堂上不趨示不遽也此孝子之志也人情之實也禮義之經也非從天降也非從地出也人情而已矣

服問

傳曰有從輕而重公子之妻爲其皇姑有從重而輕爲妻之父母有從無服而有服公子之妻爲公子之外兄弟有從有服而無服公子爲其妻之父母傳曰母出則爲繼母之黨服母死則爲其母之黨服爲其母之黨服則不爲繼母之黨服三年之喪既練矣有期之喪既葬矣則帶其故葛帶經期之經服其功衰有大功之喪亦如之小功無變也麻之有本者變三年之葛既練遇麻斷本者於免經之既免去經每可以經必經既經則去之小功不易喪之練冠如免則經其總小功之經因其初葛帶總之麻不變小功之葛小功之麻不變大功之葛以有本爲稅殤長中變三年之葛終殤之月筭而反三年之葛是非重麻爲其無卒哭之稅下殤則否君爲天子三年夫人如外宗之爲君也世子不爲天子服君所主夫人妻大子適婦大夫之適子爲君夫人大子如士服君之母非夫人則羣臣無服唯近臣及僕驂乘從服唯君所服

服也公爲卿大夫錫衰以居出亦如之當事則弁經大夫相爲亦然爲其妻往則服之出則否凡見人無免經雖朝於君無免經唯公門有稅齊衰傳曰君子不奪人之喪亦不可奪喪也傳曰罪多而刑五喪多而服五上附下附列也

問傳

斬衰何以服直苴惡貌也所以首其內而見諸外也斬衰貌若苴齊衰貌若臬大功貌若止小功總麻容貌可也此哀之發於容體者也斬衰之哭若往而不反齊衰之哭若往而反大功之哭三曲而偯小功總麻哀容可也此哀之發於聲音者也斬衰唯而不對齊衰對而不言大功言而不議小功總麻議而不及樂此哀之發於言語者也斬衰三日不食齊衰二日不食大功三不食小功總麻再不食士與斂焉則壹不食故父母之喪既殯食粥朝一溢米莫一溢米齊衰之喪疏食水飲不食菜果大功之喪不食醯醬小功總麻不飲醴酒此哀之發於飲食者也父母之喪既處卒哭疏食水飲不食菜果期而小祥食菜果又期而大祥有醯醬中月而禫禫而飲醴酒始飲酒者先飲醴酒始食肉者先食乾肉父母之喪居倚廬寢苦枕塊不說經帶齊

衰之喪居堊室芻藻不納大功之喪寢有席小功緦麻牀可也此哀之發於居處者也父母之喪既虞卒哭柱楣藻屏芻藻不納期而小祥居堊室寢有席又期而大祥居復寢中月而禫禫而牀斬衰三升齊衰四升五升六升大功七升八升九升小功十升十一升十二升緦麻十五升去其半有事其縷無事其布曰緦此哀之發於衣服者也斬衰三升既虞卒哭受以成布六升冠七升爲母疏衰四升受以成布七升冠八升去麻服葛葛帶三重期而小祥練冠緦緣要經不除男子除乎首婦人除乎帶男子何爲除乎首也婦人何爲除乎帶也男子重首婦人重帶除服者先重者易服者易輕者又期而大祥素縞麻衣中月而禫禫而纈無所不佩易服者何爲易輕者也斬衰之喪既虞卒哭遭齊衰之喪輕者包重者特既練遭大功之喪麻葛重齊衰之喪既虞卒哭遭大功之喪麻葛兼服之 斬衰之葛與齊衰之麻同齊衰之葛與大功之麻同大功之葛與小功之麻同小功之葛與緦之麻同麻同則兼服之兼服之服重者則易輕者也

三年問

三年之喪何也曰稱情而立文因以飾羣別親疏貴賤之節而弗可損益也故曰無易之道也創鉅者其日久痛甚者其愈遲三年者稱情而立文所以爲至痛極也斬衰苴杖居倚廬食粥寢苦枕塊所以爲至痛飾也三年之喪二十五月而畢哀痛未盡思慕未忘然而服以是斷之者豈不送死有已復生有節也哉 凡生天地之間者有血氣之屬必有知有知之屬莫不知愛其類今是大鳥獸則失喪其羣匹越月踰時焉則必反巡過其故鄉翔回焉鳴號焉踴躍焉踟躕焉然後乃能去之小者至於燕雀猶有啁噍之頃焉然後乃能去之故有血氣之屬者莫知於人故人於其親也至死不窮 將由夫患邪淫之人與則彼朝死而夕忘之然而從之則是曾鳥獸之不若也夫焉能相與羣居而不亂乎 將由夫脩飾之君子與則三年之喪二十五月而畢若駟之過隙然而遂之則是無窮也 故先王焉爲之立中制節壹使足以成文理則釋之矣 然則何以至期也曰至親以期斷是何也曰天地則已易矣四時則已變矣其在天地之中者莫不更始焉以是象之也 然則何以三年也曰加隆焉爾也焉使倍之故再期也 由九月以下何也曰焉使弗及也故三年以爲

隆總小功以爲殺期九月以爲間上取象於天下取法於地中取則於人人之所以羣居和壹之理盡矣故三年之喪人道之至文者也夫是之謂至隆是百王之所同古今之所壹也未有知其所由來者也孔子曰子生三年然後免於父母之懷夫三年之喪天下之達喪也

深衣

古者深衣蓋有制度以應規矩繩權衡短毋見膚長毋被土續衽鉤邊要縫半下袼之高下可以運肘袂之長短反詘之及肘帶下毋厭髀上毋厭脅常無骨者制十有二幅以應十有二月袂圓以應規曲袷如矩以應方負繩及踝以應直下齊如權衡以應平故規者行舉手以爲容負繩抱方者以直其政方其義也故易曰坤六二之動直以方也下齊如權衡者以安志而平心也五法已施故聖人服之故規矩取其無私繩取其直權衡取其平故先王貴之故可以爲文可以爲武可以擯相可以治軍旅完且弗費善衣之次也具父母大父母衣純以續具父母衣純以青如孤子衣純以素純袂緣純邊廣各寸半

投壺

投壺之禮主人奉矢司射奉中使人執壺主人請曰某有枉矢哨壺請以樂賓賓曰子有旨酒嘉肴某既賜矣又重以樂敢辭主人曰枉矢哨壺不足辭也敢固以請賓曰某既賜矣又重以樂敢固辭主人曰枉矢哨壺不足辭也敢固以請賓曰某固辭不得命敢不敬從 賓再拜受主人般還曰辟主人阼階上拜送賓盤還曰辟 已拜受矢進卽兩楹間退反位揖賓就筵 司射進度壺間以二矢半反位設中東面執八筭興 請賓曰順投爲入比投不釋勝飲不勝者正爵既行請爲勝者立馬一馬從二馬三馬既立請慶多馬請主人亦如之 命弦者曰請奏狸首間若一大師曰諾 左右告矢具請拾投有入者則司射坐而釋一筭焉賓黨於右主黨於左 卒投司射執筭曰左右卒投請數二筭爲純一純以取一筭爲奇遂以奇筭告曰某賢於某若干純奇則曰奇均則曰左右鈞 命酌曰請行醕酌者曰諾當飲者皆跪 奉觴曰賜灑勝者跪曰敬養 正爵既行請立馬馬各直其筭一馬從二馬以慶慶禮曰三馬既備請慶多馬賓主皆曰諾正爵既行請徹馬 筭多少視其坐籌室中

席上之珍以待聘夙夜強學以待問懷忠信以待舉力行以待取其自立有如此者
儒有衣冠中動作慎其大讓如慢小讓如僞大則如威小則如愧其難進而易退也
粥粥若無能也其容貌有如此者儒有居處齊難其坐起恭敬言必先信行必中正
道塗不爭險易之利冬夏不爭陰陽之和愛其死以有待也養其身以有爲也其備
豫有如此者儒有不寶金玉而忠信以爲寶不祈土地立義以爲土地不祈多積多
文以爲富難得而易祿也易祿而難畜也非時不見不亦難得乎非義不合不亦難
畜乎先勞而後祿不亦易祿乎其近人有如此者儒有委之以貨財淹之以樂好見
利不虧其義劫之以衆沮之以兵見死不更其守鷙蟲攫搏不程勇者引重鼎不程
其力往者不悔來者不豫過言不再流言不極不斷其威不習其謀其特立有如此
者 儒有可親而不可劫也可近而不可迫也可殺而不可辱也其居處不淫其飲
食不溽其過失可徵辨而不可面數也其剛毅有如此者 儒有忠信以爲甲冑禮
義以爲干櫓戴仁而行抱義而處雖有暴政不更其所其自立有如此者 儒有一
畝之宮環堵之室篳門圭窬蓬戶褻牖易衣而出并日而食上蒼之不敢以疑上不

荅不敢以詔其仕有如此者 儒有今人與居古人與稽今世行之後世以爲楷適弗逢世上弗援下弗推諛諂之民有比黨而危之者身可危也而志不可奪也雖危起居竟信其志猶將不忘百姓之病也其憂思有如此者 儒有博學而不窮篤行而不倦幽居而不淫上通而不困禮之以和爲貴忠信之美優游之法慕賢而容衆毀方而瓦合其寬裕有如此者 儒有內稱不辟親外舉不辟怨程功積事推賢而進達之不望其報君得其志苟利國家不求富貴其舉賢援能有如此者 儒有聞善以相告也見善以相示也爵位相先也患難相死也久相待也遠相致也其任舉有如此者 儒有澡身而浴德陳言而伏諍而正之上弗知也蠹而翹之又急爲也不臨深而爲高不加少而爲多世治不輕世亂不沮同弗與異弗非也其特立獨行有如此者 儒有上不臣天子下不事諸侯慎靜而尙寬強毅以與人博學以知服近文章砥厲廉隅雖分國如鋪銖不臣不仕其規爲有如此者 儒有合志同方營道同術並立則樂相下不厭久不相見聞流言不信其行本方立義同而進不同而退其交友有如此者 溫良者仁之本也敬慎者仁之地也寬裕者仁之作也孫

接者仁之能也禮節者仁之貌也言談者仁之文也歌樂者仁之和也分散者仁之施也儒皆兼此而有之猶且不敢言仁也其尊讓有如此者 儒有不隕穫於貧賤不充誦於富貴不恩君王不累長上不閔有司故曰儒今衆人之命儒也妄常以儒相詬病孔子至舍哀公館之聞此言也言加信行加義終沒吾世不敢以儒爲戲

大學

大學之道在明明德在親民在止於至善知止而后有定定而后能靜靜而后能安安而后能慮慮而后能得物有本末事有終始知所先後則近道矣古之欲明明德於天下者先治其國欲治其國者先齊其家欲齊其家者先脩其身欲脩其身者先正其心欲正其心者先誠其意欲誠其意者先致其知致知在格物物格而后知至知至而后意誠意誠而后心正心正而后身脩身脩而后家齊家齊而后國治國治而后天下平自天子以至於庶人壹是皆以脩身爲本其本亂而未治者否矣其所厚者薄而其所薄者厚未之有也此謂知本此謂知之至也所謂誠其意者毋自欺也如惡惡臭如好好色此之謂自謙故君子必慎其獨也小人閒居爲不善無所不

至見君子而后厭然揜其不善而著其善人之視己如見其肺肝然則何益矣此謂誠於中形於外故君子必慎其獨也會子曰十目所視十手所指其嚴乎富潤屋德潤身心廣體胖故君子必誠其意詩云瞻彼淇澳蓂竹猗猗有斐君子如切如磋如琢如磨瑟兮僖兮赫兮喧兮有斐君子終不可諠兮如切如磋者道學也如琢如磨者自脩也瑟兮僖兮者恂慄也赫兮喧兮者威儀也有斐君子終不可諠兮者道盛德至善民之不能忘也詩云於戲前王不忘君子賢其賢而親其親小人樂其樂而利其利此以沒世不忘也康誥曰克明德大甲曰顧諟天之明命帝典曰克明峻德皆自明也湯之盤銘曰苟日新日日新又日新康誥曰作新民詩曰周雖舊邦其命惟新是故君子無所不用其極詩云邦畿千里惟民所止詩云緝蠻黃鳥止於丘隅子曰於止知其所止可以人而不如鳥乎詩云穆穆文王於緝熙敬止爲人君止於仁爲人臣止於敬爲人子止於孝爲人父止於慈與國人交止於信 子曰聽訟吾猶人也必也使無訟乎無情者不得盡其辭大畏民志此謂知本所謂脩身在正其心者身有所忿懣則不得其正有所恐懼則不得其正有所好樂則不得其正有所

憂患則不得其正心不在焉視而不見聽而不聞食而不知其味此謂脩身在正其心所謂齊其家在脩其身者人之其所親愛而辟焉之其所賤惡而辟焉之其所畏敬而辟焉之其所哀矜而辟焉之其所敖惰而辟焉故好而知其惡惡而知其美者天下鮮矣故諺有之曰人莫知其子之惡莫知其苗之碩此謂身不脩不可以齊其家所謂治國必先齊其家者其家不可教而能教人者無之故君子不出家而成教於國孝者所以事君也弟者所以事長也慈者所以使衆也康誥曰如保赤子心誠求之雖不中不遠矣未有學養子而後嫁者也一家仁一國興仁一家讓一國興讓一人貪戾一國作亂其機如此此謂一言僨事一人定國堯舜率天下以仁而民從之桀紂率天下以暴而民從之其所令反其所好而民不從是故君子有諸已而后求諸人無諸已而后非諸人所藏乎身不想而能喻諸人者未之有也故治國在齊其家詩云桃之夭夭其葉蓁蓁之子于歸宜其家人宜其家人而后可以教國人詩云宜兄宜弟宜兄宜弟而后可以教國人詩云其儀不忒正是四國其爲父子兄弟足法而后民法之也此謂治國在齊其家所謂平天下在治其國者上老老而民興

孝上長長而民興弟上恤孤而民不倍是以君子有絜矩之道也所惡於上毋以使下所惡於下毋以事上所惡於前毋以先後所惡於後毋以從前所惡於右毋以交於左所惡於左毋以交於右此之謂絜矩之道詩云樂只君子民之父母民之所好好之民之所惡惡之此之謂民之父母詩云節彼南山維石巖巖赫赫師尹民具爾瞻有國者不可以不慎辟則爲天下僂矣詩云殷之未喪師克配上帝儀監于殷峻命不易道得衆則得國失衆則失國是故君子先慎乎德有德此有人有人此有土有土此有財有財此有用德者本也財者末也外本內末爭民施奪是故財聚則民散財散則民聚是故言悖而出者亦悖而入貨悖而入者亦悖而出康誥曰惟命不予常道善則得之不善則失之矣楚書曰楚國無以爲寶惟善以爲寶舅犯曰亡人無以爲寶仁親以爲寶秦誓曰若有一个臣斷斷兮無他技其心休休焉其如有容焉人之有技若己有之人之彥聖其心好之不啻若自其口出寔能容之以能保我子孫黎民尙亦有利哉人之有技媚嫉以惡之人之彥聖而違之俾不通寔不能容以不能保我子孫黎民亦曰殆哉唯仁人放流之進諸四夷不與同中國此謂唯仁

人爲能愛人能惡人見賢而不能舉舉而不能先命也見不善而不能退退而不能遠過也好人之所惡惡人之所好是謂拂人之性菑必逮夫身是斂君子有大道必忠信以得之驕泰以失之生財有大道生之者衆食之者寡爲之者疾用之者舒則財恆足矣仁者以財發身不仁者以身發財未有好仁而下不好義者也未有好義其事不終者也未有府庫財非其財者也孟獻子曰畜馬乘不察於雞豚伐冰之家不畜牛羊百乘之家不畜聚斂之臣與其有聚斂之臣寧有盜臣此謂國不以利爲利以義爲利也長國家而務財用者必自小人矣彼爲善之小人之使爲國家菑害並至雖有善者亦無如之何矣此謂國不以利爲利以義爲利也

冠義

凡人之所以爲人者禮義也禮義之始在於正容體齊顏色順辭令容體正顏色齊辭令順而后禮義備以正君臣親父子和長幼君臣正父子親長幼和而后禮義立故冠而后服備服備而后容體正顏色齊辭令順故曰冠者禮之始也是斂古者聖王重冠古者冠禮筮日筮賓所以敬冠事敬冠事所以重禮重禮所以爲國本也故

冠於阼以著代也醮於客位三加彌尊加有成也已冠而字之成人之道也見於母
母拜之見於兄弟兄弟拜之成人而與爲禮也玄冠玄端奠摯於君遂以摯見於鄉
大夫鄉先生以成人見也成人之者將責成人禮焉也責成人禮焉者將責爲人子
爲人弟爲人臣爲人少者之禮行焉將責四者之行於人其禮可不重與故孝弟忠
順之行立而后可以爲人而后可以治人也故聖王重禮故曰冠者禮之
始也嘉事之重者也是故古者重冠重冠故行之於廟行之於廟者所以尊重事尊
重事而不敢擅重事不敢擅重事所以自卑而尊先祖也

昏義

昏禮者將合二姓之好上以事宗廟而下以繼後世也故君子重之是以昏禮納采
問名納吉納徵請期皆主人筵几於廟而拜迎於門外入揖讓而升聽命於廟所以
敬慎重正昏禮也 父親醮子而命之迎男先於女也子承命以迎主人筵几於廟
而拜迎于門外婿執鴈入揖讓升堂再拜奠鴈蓋親受之於父母也降出御婦車而
婿授綏御輪三周先俟于門外婦至婿揖婦以入共牢而食合巹而醕所以合體同

尊卑以親之也 敬慎重正而后親之禮之大體而所以成男女之別而立夫婦之義也男女有別而后夫婦有義夫婦有義而后父子有親父子有親而后君臣有正故曰昏禮者禮之本也 夫禮始於冠本於昏重於喪祭尊於朝聘和於射鄉此禮之大體也 夙興婦沐浴以俟見質明贊見婦於舅姑執笄棗栗段脩以見贊醴婦婦祭脯醢祭醴成婦禮也舅姑入室婦以特豚饋明婦順也厥明舅姑共饗婦以一獻之禮奠酬舅姑先降自西階婦降自阼階以著代也 成婦禮明婦順又申之以著代所以重責婦順焉也婦順者順於舅姑和於室人而后當於夫以成絲麻布帛之事以審守委積蓋藏是故婦順備而后內和理內和理而后家可長久也故聖王重之 是以古者婦人先嫁三月祖廟未毀教於公宮祖廟既毀教于宗室教以婦德婦言婦容婦功教成祭之牲用魚芼之以蘋藻所以成婦順也○古者天子后立六宮三夫人九嬪二十七世婦八十一御妻以聽天下之內治以明章婦順故天下內和而家理天子立六官三公九卿二十七大夫八十一元士以聽天下之外治以明章天下之男教故外和而國治故曰天子聽男教后聽女順天子理陽道后治陰

德天子聽外治后聽內職教順成俗外內和順國家理治此之謂盛德 是故男教不脩陽事不得適見於天日爲之食婦順不脩陰事不得適見於天月爲之食是飲日食則天子素服而脩六官之職蕩天下之陽事月食則后素服而脩六宮之職蕩天下之陰事故天子之與后猶日之與月陰之與陽相須而后成者也天子脩男教父道也后脩女順母道也故曰天子之與后猶父之與母也故爲天王服斬衰服父之義也爲后服齊衰服母之義也

鄉飲酒義

鄉飲酒之義主人拜迎賓於庠門之外入三揖而后至階三讓而后升所以致尊讓也盥洗揚觶所以致絜也拜至拜洗拜受拜送拜既所以致敬也尊讓絜敬也者君子之所以相接也君子尊讓則不爭絜敬則不慢不慢不爭則遠於鬪辨矣不鬪辨則無暴亂之禍矣斯君子所以免於人禍也故聖人制之以道 鄉人士君子尊於房中之間賓主共之也尊有玄酒貴其質也羞出自東房主人共之也洗當東榮主人之所以自絜而以事賓也 賓主象天地也介僕象陰陽也三賓象三光也讓之

三也象月之三日而成魄也西而之坐象四時也天地嚴凝之氣始於四南而盛於西北此天地之尊嚴氣也此天地之義氣也天地溫厚之氣始於東北而盛於東南此天地之盛德氣也此天地之仁氣也主人者尊賓故坐賓於西北而坐介於西南以輔賓賓者接人以義者也故坐於西北主人者接人以德厚者也故坐於東南而坐僕於東北以輔主人也仁義接賓主有事俎豆有數曰聖聖立而將之以敬曰禮禮以體長幼曰德德也者得於身也故曰古之學術道者將以得身也是故聖人務焉 祭薦祭酒敬禮也嘑肺嘗禮也啐酒成禮也於席末言是席之正非專爲飲食也爲行禮也此所以貴禮而賤財也卒饌致實於西階上言是席之上非專爲飲食也此先禮而後財之義也先禮而後財則民作敬讓而不爭矣 鄉飲酒之禮六十者坐五十者立侍以聽政役所以明尊長也六十者三豆七十者四豆八十者五豆九十者六豆所以明養老也民知尊長養老而后乃能人孝弟民入孝弟出尊長養老而后成教成教而后國可安也君子之所謂孝者非家至而日見之也合諸鄉射教之鄉飲酒之禮而孝弟之行立矣 孔子曰吾觀於鄉而知王道之易易也 主

人親速賓及介而衆賓自從之至於門外主人拜賓及介而衆賓自入貴賤之義別矣 三揖至於階三讓以賓升拜至獻酬辭讓之節繁及介省矣至於衆賓升受坐祭立飲不酢而降隆殺之義別矣 工入升歌三終主人獻之笙入三終主人獻之間歌三終合樂三終工告樂備遂出一人揚箏乃立司正焉知其能和樂而不流也 賓酬主人主人酬介介酬衆賓少長以齒終於沃洗者焉知其能弟長而無遺矣 降說履升坐脩爵無數飲酒之節朝不廢朝莫不廢夕賓出主人拜送節文終遂焉知其能安燕而不亂也 貴賤明隆殺辨和樂而不流弟長而無遺安燕而不亂此五行者足以正身安國矣彼國安而天下安故曰吾親於鄉而知王道之易易也 鄉飲酒之義立賓以象天立主以象地設介僕以象日月立三賓以象三光古之制禮也經之以天地紀之以日月參之以三光政教之本也 亨狗於東方祖陽氣之發於東方也洗之在阼其水在洗東祖天地之左海也尊有玄酒教民不忘本也 賓必南鄉東方者春春之爲言蠢也產萬物者聖也南方者夏夏之爲言假也養之長之假之仁也西方者秋秋之爲言愁也愁之以時察守義者也北方者冬冬之

爲言中也中者藏也是以天子之立也左聖鄉仁右義備藏也介必東鄉介賓主也主人必居東方東方者春春之爲言養也產萬物者也主人者造之產萬物者也月者三日則成魄三月則成時是以禮有三讓建國必立三卿三賓者政教之本禮之大參也

射義

古者諸侯之射也必先行燕禮卿大夫士之射也必先行鄉飲酒之禮故燕禮者所以明君臣之義也鄉飲酒之禮者所以明長幼之序也 故射者進退周還必中禮內志正外體直然後持弓矢審固持弓矢審固然後可以言中此可以觀德行矣 其節天子以騶虞爲節諸侯以狸首爲節卿大夫以采蘋爲節士以采芣爲節騶虞者樂官備也狸首者樂會時也采蘋者樂循法也采芣者樂不失職也是故天子以備官爲節諸侯以時會天子爲節卿大夫以循法爲節士以不失職爲節故明乎其節之志以不失其事則功成而德行立德行立則無暴亂之禍矣功成則國安故曰射者所以觀盛德也 是故古者天子以射選諸侯卿大夫士射者男子之事也因

而飾之以禮樂也。故事之盡禮樂而可數爲以立德行者，莫若射。故聖王務焉。是故古者天子之制諸侯歲獻貢士於天子，天子試之於射宮，其容體比於禮，其節比於樂，而中多者得與於祭，其容體不比於禮，其節不比於樂，而中少者不得與於祭。數與於祭，而君有慶，數不與於祭，而君有讓。數有慶而益地，數有讓而削地。故曰射者，射爲諸侯也。是以諸侯君臣盡志於射，以習禮樂。夫君臣習禮樂，而以流亡者，未之有也。故詩曰：曾孫侯氏，四正具舉。大夫君子，凡以庶士。小大莫處，御於君所。以燕以射，則燕則譽。言君臣相與盡志於射，以習禮樂，則安則譽也。是以天子制之，而諸侯務焉。此天子之所以養諸侯而兵不用，諸侯自爲正之具也。孔子射於矍相之圃，蓋觀者如堵。牆射至於司馬，使子路執弓矢，出延射曰：賁軍之將亡圃之大夫，與爲人後者，不人其餘，皆人。蓋去者半，人者半。又使公罔之裘序點揚觶，而語公罔之裘揚觶，而語曰：幼壯孝弟，耆耄好禮，不從流俗，脩身以俟死者，不在此位也。蓋去者半，處者半。序點又揚觶，而語曰：好學不倦，好禮不變，施期稱道不亂者，不在此位也。蓋勵有存者。射之爲言者，繹也。或曰：舍也。繹者，各繹己之志也。故心平體正，持

弓矢審固持弓矢審固則射中矣故曰爲人父者以爲父鵠爲人子者以爲子鵠爲人君者以爲君鵠爲人臣者以爲臣鵠故射者各射己之鵠故天子之大射謂之射侯射侯者射爲諸侯也射中則得爲諸侯射不中則不得爲諸侯 天子將祭必先習射於澤澤者所以擇士也已射於澤而后射於射官射中者得與於祭不中者不得與於祭不得與於祭者有讓削以地得與於祭者有慶益以地進爵紕地是也故男子生桑弧蓬矢六以射天地四方天地四方者男子之所有事也故必先有志於其所有事然後敢用穀也飯食之謂也 射者仁之道也射求正諸己己正而彼發發而不中則不怨勝己者反求諸己而已矣孔子曰君子無所爭必也射乎揖讓而升下而故其爭也君子 孔子曰射者何以射何以聽循聲而發發而不失正鵠者其唯賢者乎若夫不肖之人則彼將安能以中詩云發彼有的以祈爾爵祈求也求中以辭爵也酒者所以養老也所以養病也求中以辭爵者辭養也

燕義

古者周天子之官有庶子官庶子官職諸侯卿大夫士之庶子之卒掌其戒令與其

教治別其等正其位國有大事則率國子而致於天子唯所用之若有甲兵之事則授之以車甲合其卒伍置其有司以軍法治之司馬弗正凡國之政事國子存游卒使之脩德學道春合諸學秋合諸射以考其藝而進退之 諸侯燕禮之義君立阼階之東南南鄉爾卿大夫皆少進定位也君席阼階之上居主位也君獨升立席上西面特立莫敢適之義也 設賓主飲酒之禮也使宰夫爲獻主臣莫敢與君亢禮也不以公卿爲賓而以大夫爲賓爲疑也明嫌之義也賓入中庭君降一等而揖之禮之也 君舉旅於賓及君所賜爵皆降再拜稽首升成拜明臣禮也君答拜之禮無不荅明君上之禮也臣下竭力盡能以立功於國君必報之以爵祿故臣下皆務竭力盡能以立功是以國安面君寧禮無不荅言上之不虛取於下也上必明正道以道民民道之而有功然後取其什一故上用足而下不匱也是以上下和親而不相怨也和寧禮之用也此君臣上下之大義也故曰燕禮者所以明君臣之義也 席小卿次上卿大夫次小卿士庶子以次就位於下獻君君舉旅行酬而后獻卿卿舉旅行酬而后獻大夫大夫舉旅行酬而后獻士士舉旅行酬而后獻庶子俎豆牲

體薦羞皆有等差所以明貴賤也

聘義

聘禮上公七介侯伯五介子男三介所以明貴賤也介紹而傳命君子於其所尊弗敢質敬之至也 三讓而后傳命三讓而后入廟門三揖而后至階三讓而后升所以致尊讓也 君使士迎於竟大夫郊勞君親拜迎於大門之內而廟受北面拜既拜君命之辱所以致敬也 敬讓也者君子之所以相接也故諸侯相接以敬讓則不相侵陵 卿爲上擯大夫爲承擯士爲紹擯君親禮賓賓私而私覲致饗餼還圭璋賄贈饗食燕所以明賓客君臣之義也 故天子制諸侯比年小聘三年大聘相厲以禮使者聘而誤主君弗親饗食也所以愧厲之也諸侯相厲以禮則外不相侯內不相陵此天子之所以養諸侯兵不用而諸侯自爲正之具也 以圭璋聘重禮也已聘而還圭璋此輕財而重禮之義也諸侯相厲以輕財重禮則民作讓矣 主國待客出入三積餼客於舍五牢之具陳於內米三十車禾三十車芻薪倍禾皆陳於外乘禽日五雙羣介皆有餼牢壹食再饗燕與時賜無數所以厚重禮也 古之

用財者不能均如此然而用財如此其厚者言盡之於禮也盡之於禮則內君臣不相陵而外不相侵故天子制之而諸侯務焉爾 聘射之禮至大禮也質明而始行事日幾中而后禮成非強有力者弗能行也故強有力者將以行禮也酒清人渴而不敢飲也肉乾人飢而不敢食也日莫人倦齊莊正齊而不敢解惰以成禮節以正君臣以親父子以和長幼此衆人之所難而君子行之故謂之有行有行之謂有義有義之謂勇敢故所貴於勇敢者貴其能以立義也所貴於立義者貴其有行也所貴於有行者貴其行禮也飲所貴於勇敢者貴其敢行禮義也故勇敢強有力者天下無事則用之於禮義天下有事則用之於戰勝用之於戰勝則無敵用之於禮義則順治外無敵內順治此之謂盛德故聖王之貴勇敢強有力如此也勇敢強有力而不用之於禮義戰勝而用之於爭鬪則謂之亂人刑罰行於國所誅者亂人也如此則民順治而國安也 子貢問於孔子曰敢問君子貴玉而賤珉者何也爲玉之寡而珉之多與孔子曰非爲珉之多故賤之也玉之寡故貴之也夫昔者君子比德於玉焉溫潤而澤仁也縝密以栗知也廉而不劌義也垂之如隊禮也叩之其聲清

越以長其終詘然樂也瑕不揜瑜瑜不揜瑕忠也孚尹旁達信也氣如白虹天也精神見於山川地也圭璋特達德也天下莫不貴者道也詩云言念君子溫其如玉故君子貴之也

喪服四制

凡禮之大體體天地法四時則陰陽順人情故謂之禮譬之者長不知禮之所由生也 夫禮吉凶異道不得相干取之陰陽也喪有四制變而從宜取之四時也有恩有理有節有權取之人情也恩者仁也理者義也節者禮也權者知也仁義禮知人道具矣 其恩厚者其服重故爲父斬衰三年以恩制者也 門內之治恩揜義門外之治義斷恩資於事父以事君而敬同貴貴尊尊義之大者也故爲君亦斬衰三年以義制者也 三日而食三月而沐期而練毀不減性不以死傷生也喪不過三年其衰不補墳墓不培祥之日鼓素琴告民有終也以節制者也資於事父以事母而愛同天無二日土無二主國無二君家無二尊以一治之也故父在爲母齊衰期者見無二尊也 杖者何也爵也三日授子杖五日授大夫杖七日授士杖或曰擔

主或曰輔病婦人童子不杖不能病也百官備百物具不言面事行者扶而起言而
后事行者杖而起身自執事而后行者面垢而已禿者不髻僮者不袒跛者不踊老
病不止酒肉凡此入者以權制者也始死三日不怠三月不解期悲哀三年憂思
之殺也聖人因殺以制節此喪之所以三年賢者不得過不肖者不得不及此喪之
中庸也王者之所常行也書曰高宗諒闇三年不言善之也王者莫不行此禮何以
獨善之也曰高宗者武丁武丁者殷之賢王也繼世卽位而慈良於喪當此之時殷
衰而復興禮廢而復起故善之善之故載之書中而高之故謂之高宗三年之喪君
不言書云高宗諒闇二年不言此之謂也然而曰言不文者謂臣下也禮斬衰之喪
唯而不對齊衰之喪對而不言大功之喪言而不議總小功之喪議而不及樂父母
之喪衰冠繩纒管屨三日而食粥三月而沐期十三月而練冠三年而祥比終茲
三節者仁者可以觀其愛焉知者可以觀其理焉強者可以觀其志焉禮以治之義
以正之孝子弟弟貞婦皆可得而察焉

禮記終